

द्वादश तीर्थ माहात्म्य

द्वादश तीर्थ माहात्म्य

DWADASHA TIRTHA MAHATMYA

सम्पादक

विकास रत्न वज्राचार्य

पिकाकः

द्वादश तीर्थ उपोषध अष्टमी व्रत तदर्थ समिति, गोंगबुँ

ने.सं. ११२८ / वि.सं. २०६५ / बु.सं. २५५२ / ई.सं. २००८

बुद्ध सम्बत् : २५५२

नेपाल सम्बत् : ११२८

विक्रम सम्बत् : २०६५

इस्वी सम्बत् : २००८

सफुया नाँ : द्वादश तीर्थ माहात्म्य

पिदंगु दिं : नेपाल सम्बत् ११२८ कौलागा अष्टमी
(२०६५ साल कार्तिक ६ गते)

सम्पादक : बिकाशरत्न वज्राचार्य

पिकाक : द्वादश तीर्थ उपोषध अष्टमी व्रत तदर्थ समिति

कम्प्यूटर समा ज्या: व देव कीपा : सनोज शाक्य

थाकू : चारुमति प्रिन्टिङ्ग प्रेस

चा:बही, फोन ल्या: ४२२९८६७

द्वादश तीर्थ माहात्म्य

DWADASHA TIRTHA MAHATMYA

सम्पादक

बिकाशरत्न वज्राचार्य



प्रकाशक

द्वादश तीर्थ उपोषध अष्टमी व्रत तदर्थ समिति

गोंगबुँ, चक्रपथ

ने.सं. ११२८/बि.सं. २०६५/बु.सं. २५५२

किपाः अनुसारं थाप्के याये



छत्वा: नुग: ख:

नेपाल धर्म व संस्कृति जाया च्वंगु भूमि खः थन धर्म नं विभिन्न प्रकार दु । संद्धर्म, गुंलाधर्म, गरिब दुःखी पित्त नयेगु, पुनेगु, च्वनेगु थाय्, दान यायेगु धर्म, अथे हे धैथे धर्म यायेगु भवलय् जि जजमान सुकुकाजी महर्जन, वयकःया जहान दशमाया महर्जन व सकल परिवारया धर्म चित्त उत्पत्ति जुयाः जिथाय् भायादिल अले वयकलं धयादिल गुरुजु जिं कजी जुयाः भिनिगू तीर्थय् (द्वादश तीर्थ) अष्टमी व्रत धलं दनेगु इच्छा जुल । धलं दनेत छु पूजा यायमाः ? पूजा यायेगु ज्वलं छु छु माः ? धकाः न्यनादिल अष्टमीव्रत दनेगु निगू शब्द न्यने दयाः जिगु मन खुसी जुल ।

पूजा यायेगु, पूजा यायेत माःगु पूजाया ज्वलंत जोरजाम यायेगु व सहलह व्याकेगु भवलय् वयकलं हानं छगू खं धयादिल । स्वर्गीय जिमि मा/अबुया नामं अष्टमी व्रत सफू पिकायाः गुरुजुपित्त दान प्रदान यायेगु । जितःला अग चा मालं देगःचा लूथें जुल छायधाःसां न्हापा जिं धलं दंकाः वनावले समाधि लक्षचैत्य मण्डल, बुद्ध धर्म, संघ मण्डल पूजा व बाखं कनेगु छगू हे सफुलिइ मदुगु व कथं मवंगु कारणं यानाः जितः मछिंगु, थाकुगु व अल्लमल्ल जूगु खः । धलं दंकेगुलिइ एक रूपता व शुद्धता मदुगु जिं अनुभव याना व तायेका अथेया कारणय् गुरुजुपिनि संकस्यां पूजा यायेगुलिइ क्रमाकथं एकरूपता, शुद्धता, अःपुकेगु लागि कथं हंकेगु लागि समाधि लक्षचैत्ये मण्डल बुद्ध धर्म संघ मण्डल तःधं मण्डल पूजा, बाखं कनेगु/छगू हे सफुलिइ दुध्याकाः छधाःगु सफू पिकायेत इनाप यानागु जुल । जजमान सुकुकाजी महर्जन दाता जुयाः नेपाल बौद्ध संस्कृति संरक्षण केन्द्रया गोसालय् अष्टमी व्रत पूजा विधि नामं प्रकाशन जुयाः छलपोल गुरु वज्राचार्यपिनि ल्हातय् लायेधुंकु दु । विविध कारणं यानाः द्वादश तीर्थ बाखं थ्व सफुलिइ दुध्याके मफुगु जुल । द्वादश तीर्थ उपोषध व्रत तदर्थ समिति नाप सल्लाह जुयाः द्वादश तीर्थ उपोषध व्रत बाखं कनेगू सफू पिकायेगु निर्णय जुल ।

अन्त्यय द्वादश तीर्थ उपोषध व्रत (अष्टमी व्रत) या कजी सुकुकाजी व जहान दशमाया महर्जन सकल परिवार, द्वादश तीर्थ बाखं सफू पिकायेत चन्दा बियाः ग्वाहाली याना बिज्यापी/याना दिपी सकल धःमू खल पिनी, सकलसियात बोधिज्ञान लानाः अन्त्यय अनुत्तर सम्यक सम्बोधि प्राप्त जुइमा नापं थःगु व्यापार/व्यवसायया विज्ञापन बियाः आर्थिक ग्वाहाली यानादीपिं व्यापार/व्यवसाय वर्ग पिनित वाणिज्य, व्यापार सफल जुइमा, लाभ जुइमा । थुगु सफू पिकायेगुलिइ शुद्ध अशुद्ध स्वया बिज्याम्ह हनेबहम्ह स.प्रा.शान्तहर्ष वज्राचार्ययात कृतज्ञता देछायाच्वना । प्रत्यक्ष व अप्रत्यक्ष रूपं, ग्वाहाली याना दीपिं सकसितं धन्यवाद दु । बाजं खलः, स्वयंसेवक खलः, धःमूखलः सकलसिया दीर्घायु, सुस्वास्थ्य, शुभमंगल, कल्याण, जय जुइमा धैगु मनं निसें कामना यानाच्वना ।

मूल आचार्य
सुजनरत्न वज्राचार्य
हेमवर्ण महाविहार, गम्वाहा

द्वादश तीर्थया मन्तव्य

- यज्ञमानपति वज्राचार्य

गोंगबुँ स्थित द्वादश तीर्थ उपोषध अष्टमीव्रत तदर्थ समितिया आयोजनाय थौन्हेनिसें न्ह्याकुगु द्वादश तीर्थ व्रतसेवा थुगुसिइ व्वचायेकुगु जुयाच्चन । तीर्थ धायेबलय् निगू अथवा निगू स्वयां अपो नदी मिलन जूगु थाय्थात संकेत याःगु खनेदु । नेपाल मण्डल दुने विशेष यानाः कान्तिपुर क्षेत्रय् भिनिगू तीर्थया महात्म्य क्यनातःगु दु । कान्तिपुर नगरया पूर्वोत्तरपाखे गोकर्णनिसें राजतीर्थतक प्यंगू दु । थ्व प्यंगू दक्कौं वागमती लागाय् ला । अथेहे पश्चिमोत्तरपाखे टोखा दोभाननिसें ज्ञान तीर्थतक प्यंगू तीर्थ दु । थ्व प्यंगुलिं विष्णुमती क्षेत्रय् खः । अले दक्षिणमुखी जुया हाकुगु पिहाँ वनेगु भूवलय् टेकु दोभानं प्रारम्भ जुयाः न्यखुतक प्यंगू यानाः मुक्कं भिनिगू तीर्थया धलः खः । थथे पूर्वय् प्यंगू पश्चिमय् प्यंगू अले दक्षिणाभिमुख जुयाः छरय् जुयाच्चंगू प्यंगू तीर्थस्थल भौतय् नक्सा कोरय् यानाः स्वत धाःसा अन नकतिनि ह्वयाच्चंगु उत्तराभिमुख पलेस्वांया लक्षण बानकी खने दइ ।

थ्व भिनिगू तीर्थ दक्कौं छगूयां अपो नदीया संगम जूगु थासं-थाय्थात हे कयातःगु खः । थ्व द्वादश तीर्थ महात्म्य सफुलिइ छु छु नदी मिलन जूगु थाय् खः, छु छु तीर्थ धकाः नां जूवंगु खः थ्व खँ च्वयातःगु दु । उकी मध्ये पश्चिमोत्तरपाखे वयाच्चंगु विष्णुमती व पूर्वोत्तरपाखे वाः वयाच्चंगु वागमती खुसि ह्वंक्ःगु छगू थाय् खः । थ्व थाय्थात टेकु दोभान धाइ । थन चिन्तामणि तीर्थ धकाः नां वियातःगु दु ।

थथे विपरीत दिशाया निगू खुसि सम्मिश्रण जुइगु बिन्दुया च्वय् छुं नं छुं भू भाग दइ । थ्व भू भाग भण्डै भण्डै अंग्रेजी आखः V आकार जुइ । थजाःगु स्वकुलाःगु आकारयात धर्मोदय धायेगु बौद्धधर्मया वज्रयान क्षेत्रय् संस्कृति व विधा दु । थजाःगु भूभागय् छचाखेरं खुसिं चाहुला च्वंगु जुइ । उकीं थ्व भूभाग उर्वरा शक्तियुक्त जुइगु स्वाभाविक खः । अले धर्म उत्पन्न जुइगु जुल । थन धर्मया अर्थ वस्तुनिसें कयाः मानवपिनिगु सकारात्मक सोच व अजाःगु सोच कथं व्यवहार यायेगु तर्क सक्तांयात कःघाकेगु कथं छयलातःगु दु । धर्मया अर्थ केवल थन दः पूजा यायेगु, पाठ यायेगु, होम यायेगु, मन्त्रोच्चारण यायेगु आदि इत्यादियात जक सीमित यानातःगु मखु ।

मानवीय वस्ती विकास, विस्तार व सभ्यताया इतिहास पुइका स्वल धाःसा मनू व लः(जल)या दथुइ दुयंक स्वापू दुगु खने दइ । खुसिया मिलन जूगु थाय्था भूभागय् मनूतय्गु वस्ती दयेकिगु, पशुपालन याइगु, खेतिपाति याइगु, उद्योग धन्दा याइगु आदि इत्यादि खँ इतिहासया पानाय् व्वने दइ । लः मदुसा मनू म्वाये हे फइ मखु । उकीं लःयात सकसियां माँ समान 'मामकी' धाइगु जुयाच्चन ।

मामकीया स्वभाव करुणामयी खः । सकल जगत प्राणीयात परोक्ष अपरोक्ष कथं प्रतिपालन यानाच्चम्ल लोकेश्वर खः । करुणामय खः । थजाम्ल करुणामय लोकेश्वरयात सेवा यायेगु, तीर्थया गुण स्मरण यायेगु आदि छम्ल सभ्य मनूया कर्तव्य खः । थ्व सफुलिइ भिनिगू तीर्थया भिनिम्ल लोकेश्वरपिनिगु बाखं नापं प्यम्ल करुणामयया विषयय् नं खँ च्वयातःगु दु ।

लोकेश्वरपिनिगुनेपालय् द्वादश तीर्थ व्रत धकाः छगू विधाया संस्कृति व परम्परा ब्वलनाच्चंगु खने दु । द्वादश तीर्थ उपोषध व्रत तदर्थ समिति, गोंगबुँ नीस्वनाः उकीया हे आयोजनाय् करिब ६०० संख्याया धर्मावलम्बीपिसं ब्वति कायेकाः न्ह्याकुगु द्वादश तीर्थ व्रत सेवा निर्विघ्नपूर्वक सम्पन्न याःगु लसताया खँ खः । वयेकःपिनिगु थ्व सेवा भक्तिभाव सभ्यताया परिचायक अवश्य खः । तीर्थ तीर्थ पतिकं न्हापाथें सफा सुघर मजू । धार्मिक तीर्थ फोहर दूषित वातावरणया स्थलय् परिणत जुयाच्चंगु अवश्यमेव दुःखया खँ खः । वयेकःपिसं अनुभव याःगु दइ । थुखे पाखे नं छुं याये माल, सुमुक च्वने मज्यू धकाः भावना जागरण हये दुसा थौकन्हय्या अवस्थाय् तःधंगु धर्म जुइ ।

मेमेगु देशय् यक्को न्हापानिसें फोहर दूषित जुयाच्चंगु खुसियात सफा सुघर याना: रमणीय स्थल दयेकुगु धैगु अखवार टी भि आदिइ ब्वनेदु, न्यनेदु स्वये नं दु । नेपालय् नं अथे यायेगु जन जागरण हये दुसा: जिउ ।

थ्व सफुलिइ छगू छगू तीर्थ पतिकं छगू छगू पीठया नं खँ दु । पीठया अर्थ केन्द्र खः । मनूतय्गु मिलन जुइगु थाय् खः । धर्मभीरुपिनिगु जमघट स्थल खः । साधन यायेगु थाय् खः । समाज कल्याण यायेत आध्यात्मिक एवं व्यवहारिक कुतः यायेगु भूमि खः । थजा:गु भूमि भिनिगू कथं दु धका: हेवज्रतन्त्रय् च्यात:गु दु ।

हेवज्रतन्त्रय् वज्रगर्भजं न्त्यसः तःगु व भगवान् लिसः विइकातःगु कथं न्त्यथनातःगु थथे खः -

वज्रगर्भ उवाच -

हे भगवन् के ते मेलापकस्थानः ?

भगवान् आह -

पीठं च उपपीठं च क्षेत्रोपक्षेत्रम् एव च ॥

छन्दोहः च उपछन्दोहं मेलापकोः मेलापकं तथा ॥

पीलवम् च उपपीलवम् श्मशानोपश्मशानम्

एता द्वादश भूमयः ॥

थ्व भिनिगू भूमियात भिनिगः अ आ इ ई स्वराक्षर (स्वर अक्षर छ्यधभकि) नाप स्वापू तयेगु ज्या अतिकं प्रख्यातगु नामसंगीतिया टीका अमृतकर्णिकाय् (रविश्रीभिक्षु कृत) क्यनातःगु दु । व थथे खः -

अकारे पीठसंज्ञा च आकारे चोपपीठकम् ।

इकारे क्षेत्रनामं च ईकारे चोपक्षेत्रकम् ॥

छन्दोहं चोकारेण ऊकारेणोपच्छन्दकम् ।

मेलापकएकारे ऐकारे च उपमेलापकम् ॥

श्मशानञ्चैव ओकारे औकारे चोपश्मशानकम् ।

पीलवं चैव अकारे अकारे चोपपीलवं च ॥ इति


(अमृतकर्णिका पृ.१८)

अमृतकर्णिका धैगु सफुलिइ द्वादश भूमिया नां थजा:गु कथं नं बियातःगु दु -

१. समन्तप्रभा २. अमितप्रभा ३. गगनप्रभा ४. वज्रप्रभा ५. रत्नप्रभा ६. पट्टप्रभा

७. कर्मप्रभा ८. अनुपमा ९. निरुपमा १०. प्रज्ञाप्रभा ११. सर्वज्ञता १२. प्रत्यात्मवेद्याख्या

नेपा: गा:या उत्पन्न स्वयम्भूलिसे स्वापू दु । अले थ्व भिनिगू तीर्थ उत्पन्नया विषयय् स्वयम्भूपुराणय् उल्लेख जुयाच्चंगु दु । स्वयम्भू महाचैत्यया छगू भाग गलकुति अर्थात् हर्मिकाया द्यःने दिनाच्चंगु तकिं तकिं भिंस्वंगू चा: खः । उकिइ मध्ये दकले च्वय् च्वंगु भिंस्वंगू चा: 'अकनिष्ट भुवन'(वज्रभूमि) त्वःता: वयां क्वय् च्वंगु भिनिगू चक्का दु । थ्व भिनिगू चक्कायात 'द्वादश भूमि' धका: धाइ । 'द्वादश पारमिता' नं धा: । अ आ इ ई कथं 'द्वादशाक्षर' धका: नां काइपिं नं दु । थुमित संकेत याइगु मेगु नां खः 'द्वादश पीठ' । थीथी स्तरया ज्ञान कथं संकेत बियातःगु नं ब्वनेदु । द्वादश भूमि, द्वादश पारमिता, द्वादशाक्षरया, द्वादश पीठया विषय सहित उल्लेख जुयाच्चंगु किपा थन न्त्यथनेबहः जू ।



अनुत्पाद ज्ञान थुलि आखः प्रज्ञापारमितानापं न्हयंकेगु

५.	उ	अभिमुखि	छन्दोह	ध्यानपारमिता	पारमिताक्षय ज्ञान
४.	ई	अर्चिप्ती	उपक्षेत्र	वीर्यपारमिता	मार्ग ज्ञान
३.	इ	प्रभाकरी	क्षेत्र	क्षान्तिपारमिता	निरोध ज्ञान
२.	आ	विमला	उपपीठ	शीलपारमिता	समुदय ज्ञान
१.	अ	प्रमृदिता	पीठ	दानपारमिता	दुःख ज्ञान

विकासरत्न वज्राचार्यया सम्पादकत्वय् तयार जूगु थ्व द्वादश महात्म्य व्रत सफूया विषय मन्तव्य च्वयेगु
अवसर जित चूलागु तायेकागु जुल । थ्व सफू सकसितं ज्या लगये जुइ धैगु आशा ।

सम्पादकीय

पुण्यभूमि नेपा: देशय, इतिहास पक्ष क्यनावया च्वयें भीगु समाज थौयागु परिस्थितियात ल्वयेक धार्मिक सांस्कृतिक पक्षयात कया: भी, समाजया जवा: जुया:च्वनापि सामाजिक प्राणीपिसं आ:यात ल्वगु कथं, पौराणिक धर्मयात मस्यंकुसे सुधार याना वनेमा:गु थौयागु आवश्यकता ख: ।

नेपा: देशय, न्हापानिसं अतिहे लोकं ह्वानावयाच्वंगु धर्मत मध्येयागु छगू धर्म ख: अष्टमी व्रत । थुगु अष्टमी व्रत, विधि, विधान व थुकिया मूल आधारत थी थी व्रतविधि पाखें उपलब्ध जुया:च्वंगु ख:सा थुकिया बाखंत लोकेश्वर अवलोकितेश्वरपनिगु बाखं, खने दयाच्वंगु दु ।

थुगु अष्टमी व्रत थ: थ:गु छें वुद्ध बोधिसत्वपनिगु अग्रस दनेगुयाना वया च्वंगु ख:सा, तीर्थ व्रत यायेगु भवलय नं थुगु हे अष्टमी व्रत दनेगु चलन थौतक नं दहे दिन । तीर्थ व्रत यायेगु भवलय द्वादश तीर्थत गोकर्णनिसं कया: नखु तक, कायेगु चलन चले जुया: वैच्वंगु ख:सा थुगु द्वादश तीर्थ माहात्म्य स्वयंम्भुपुरा पाखें वयाच्वंगु खनेदु ।

भी मनुजुया जन्म कया मनं याये मा:गु सत कर्मत याये सयेकेत व्रत दनेगु नं छगू मनूया जुनिइ मदयेक मगा:गु क्रिया ख: । थुगु व्रत दनेवल्य गुरुं स्यने कने याइगु धैगु हे शील पालना यायेगु याये मत्य:गु मज्यूगु, भिता प्रकारया अकुशल मयायेगु व थ:गु चित्तयात एकाग्र याना: तटस्थताय च्वने सयेकेगु विधि ख: । व्रत विधि चाहे अष्टमी व्रत, तिला व्रत, पुण्य व्रत, न्ह्यागु हे व्रत या:सा शील हे पालना यायेगु ख: धका भीसं सियेके मागू ख: ।

भीगु समाजय जन्मनिसं कया: मृत्यु जुइ वले तक तीर्थया त:धंगु महत्वं जुयाच्वंगु ख:सा थुगु जीवन कालय नं तीर्थ व्रत यायेगु उत्तिकं हे च्वन्हयानाच्वंगु खनेदु । थजागु महानतां जायाच्वंगु तीर्थयागु माहात्म्य बाखं कनेगु न्यनेगु भीगु धर्म संस्कृति क्यनावयाच्वंगु लैपुख: ।

द्वादश तीर्थ उपोषध व्रत दनेगु ज्या गोंगबु निवासी कजी सुकुकाजी महर्जन व दशमाया महर्जन या पूर्ण सक्रियताय तिथि मिति ल्या: २०६४ साल पुष २ गते निसं २०६५ साल आश्विन ५ गते तकया दुने शुक्लपक्ष अष्टमी व कृष्णपक्ष अष्टमी पतिकं बोधिसत्वपिंथा नापं याना: मुकं २१ क: अष्टमी व्रत दनेगु भवलय जि उपाध्याय जुया: बाखं कनावयागु इलय बाखं कनेत मा:गु बाखं, सफू माला स्व:यागु इलय जिस्वयागु बाखं सफुत ख: - अनुवादक आदिवज्र वज्राचार्यया द्वादश तीर्थ माहात्म्य व पं. वद्रीरत्न वज्राचार्य (स्वयंम्भुपुराण) व यलया पं. आशा काजी वज्राचार्यजुपिसं प्रकास यानातगु सफू स्वया: थुगु द्वादश तीर्थ माहात्म्य सफू सम्पादन यानागु ख: ।

थुके दुने प्यम्ह करुणामययागु बाखं नं दुथ्याकागु जुल । प्यम्ह करुणामययागु बाखं कनेत अमोघवज्र वज्राचार्यगु सम्पादनयात त:हगु लोकेश्वरपनिगु बाखं सफू नं कजागु ख: ।

थुगु द्वादश तीर्थया बाखं स्वयंम्भुपुराणपाखें वयाच्वंगु ख:सा थौकन्हय थुगु तीर्थ गन गन लाना च्वंगु दु धैगु सीकेत, आ:यागु परिस्थितिइ गुगु कथं तीर्थया अवस्थाय लानाच्वंगु ख: धैगु सिइकेत, फुकं तीर्थया किपा नं दुथ्याकागु जुल । नापं तीर्थ म्हासिइकाधका: थौकन्हय छुछु तीर्थ गन गन लाना च्वंगु दु धैगु सिइकेत सम्बन्धित तीर्थया वडा, थाय, व स्नानदान नापं यायेगु क्यनेमा:गु आवश्यक ताया, थुगु ब्याक्कं सक्षिप्त उल्लेख यानाबियागु जुल: ।

थुगु द्वादश तीर्थ माहात्म्य प्रकाशन यायेत मा:गु आर्थिक ग्वाहालि द्वादश तीर्थ उपोषध व्रत दना बिज्यापि/दीपि सकल व्रतालुपिनिगु यथा श्रद्धां प्राप्त जूगु आर्थिक ग्वाहालि थुगु सफू प्रकाशन जूगु ख: । ग्वाहालि याना बिज्यापि/दिपिनिगु नां धलं क्वय उल्लेख याना बियागु दु ।

थुगु सफू प्राचीन नेपालभाषा ग्रन्थ स्वयंम्भू पुराण, द्वादश तीर्थ माहात्म्य कथा पाखें उद्धित जुगु ख: ।

थुगु सफूया शोभा वधे जुइक द्वादश तीर्थ यागु पौराणिक विषययात आःयागु परिस्थितियात लोगुकथं थुगुसार गौरव खँत च्वया बिज्याःम्ह हनेबहःम्ह गुरुवर बौद्ध विद्वान यज्ञमान पति वज्राचार्यज्यू प्रति कृतज्ञता देछाया च्वना ।

अथेहे नागार्जुन बौद्ध अध्ययन संस्थान या निर्देशक बौद्ध विद्वान भाजु मीन बहादुर शाक्य जुं द्वादश तीर्थया विषय कया वसपोलया थःगु अनुभव यात द्वादश तीर्थ छगू अध्ययन नां यागु छपु लेख बिया बिज्याःगुलिं वसपोल प्रति आभार व्यक्त यानाच्वना ।

आयागु परिस्थितिइ, द्वादश तीर्थ, धैगु खालि सफूतिई जक जुयावना च्वंगु इलय्, आःयागु पुस्तापिसं थुइगु कथं अले लिपाया पुस्ता पिसं द्वादश तीर्थ, गन गन लाः धैगु सीकेया निम्ति थुगु द्वादश तीर्थ माहात्म्य बाँखं सफू सम्पादन यानागु खः ।

थुगु सफू शुद्धा शुद्धि स्वयाः भिंका बिज्याःम्ह हनेबहःम्ह उप प्राध्यापक गुरुवर शान्त हर्ष वज्राचार्यजु प्रति दुनगलनिसें आभार व्यक्त याना च्वना । थुगु सफू प्रकाशनया लागि माःमाःथाय् मामा कथं ग्वाहालि याना दीपिं सकल धर्म पासापिं अथेहे प्रकाशक द्वादश तीर्थ उपोषध अष्टमी व्रत तदर्थ समितिया सकल दुजःपिं, कजी भाजु सुकुकाजी महर्जन व दशमाया महर्जन लगायत छेजःपित यक्को यक्को सुभाय बियाच्वना ।

यक्को चिहाकःगु इलयनं माःमाःकथं ग्वाहालियाना सफू छापे याना बिज्यागुलिं प्रेश परिवारपिन्त नं यक्को यक्को सुभाय बियाच्वना ।

थुगु सफू हथाय् हथाय् सं पित कायगु ज्या यायेमाःगु जुगुलिं स्यंगु, तोफ्यूगु, मगाःगु मचाःगु यक्को दय्फु हाकनं लिपा प्रकाशन यायेबले भिंका प्रकाशन यायेया निम्ति छपिसं/छिकपिसं, द्वं विद्वं, व्याकं क्षमा याइ धैगु भलसा कया च्वना । सुभाय

विकाशरत्न वज्राचार्य
मह्यपि

विषय सूची

क. छत्वाः नुगः खः	सुजनरत्न वज्राचार्य
ख. द्वादश तीर्थया मन्तव्य	यज्ञमानपति वज्राचार्य
ड. सम्पादकीय	विकाशरत्न वज्राचार्य
१. महायान सूत्र	१
२. पुण्य तीर्थ (गोकर्ण)	२
३. शान्त तीर्थ (गुह्येश्वरी)	८
४. शङ्कर तीर्थ (शंखमोल)	१८
५. राज तीर्थ	२७
६. मनोरथ तीर्थ (टोखा दोभान)	३७
७. निर्मल तीर्थ (भचाखुसि)	४१
८. निधान तीर्थ (लख तीर्थ)	४६
९. ज्ञान तीर्थ (कहू खुसि)	५२
१०. चिन्तामणि तीर्थ (टेकू दोभान)	५७
११. प्रमोद तीर्थ (दान गाः)	६९
१२. सुलक्षण तीर्थ (भाजं गाः)	७९
१३. जय तीर्थ (न्यखु)	८५
१४. श्री जनबहाःद्यःया ऐतिहासिक बाखँ (आर्यावलोकेश्वर)	९०
१५. श्रीरक्तार्यवलोकितेश्वरया बाखँ (बुंग द्यः)	९२
१६. श्री आदिनाथ लोकेश्वरया बाखँ (चोभा द्यः)	९८
१७. श्री सृष्टिकान्त लोकेश्वरया बाखँ (नालाकरुणामय)	१०२
१८. दातापिनिगु नाँ धलः	१०६

महायान सूत्र

बिहरति कनकाद्रौ शाक्यसिंहो मुनीन्द्रः ।

अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः ।

समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

येदेवाः सन्तिमेरौ वरकनकमये मण्डले येचयक्षाः ।

पातालेयेमुजंगा स्फणिमणिकिरणै ध्वस्तसर्वान्धकाराः ॥

कैलाशेस्त्रीबिलासे प्रमदित हृदया येचबिद्या घरेन्द्रा ।

स्तेमोक्षं द्वारभूतं मुनिवरवचनं श्रोतुमायान्तिसर्वे ॥१॥

आयान्ता श्रोतुकामा असुर सुरनारा सिद्धिगन्धर्वनागाः ॥

यक्षा कुमाण्डाकिन्तरेन्द्रा गरुड हरिहराः शक्रबम्हादिदेवाः ॥

पूजो पञ्चोपचारै स्त्रिभुवन नमितं मेदिनी दुर्लभाभ्यः ।

भक्त्याहं वाचयामि प्रनमित शिरसा तं महायान सूत्रं ॥२॥

गुरुबुद्धो गुरुधर्मो गुरुसङ्घस्तथैवच ।

गुरुवज्रधरः श्रीमान् तस्मैश्री गुरुवे नमः ॥

मन्जुश्री जगत्नाथं खड्ग पुस्तक धारणं ।

सर्वविद्याफलंदाता मन्जुश्री नमाम्यहं ॥

पुण्य तीर्थ (गोकर्ण)

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

आदौ न्हापां मैत्रिय बोधिसत्त्वं श्री भगवानयाथाय् न्हयःने च्वना ल्हाःनिपां बिन्ति याना हे प्रभु ! छल्पोलया कृपां थ्व नेपाल मण्डले द्वादश तीर्थ उत्पत्ति जूगु पुण्यफले म्यला लाइगु हाकनं थुगु द्वादश तीर्थ सुनां २ व्रत याना वन । थुगु तीर्थे तपस्या याना सु सु उद्धार जुल इमित उकियागु फल छु छु लात । हे गुरु ! थ्व खँ जूसां जि अत्यन्त हे न्यनेगु इच्छा जुल । हे नाथ, हे गुरु छल्पोलं जिगु उपरे दया कृपा तयाः उगु सम्पूर्ण खँ आज्ञा दयेका बिज्याहुँ धका थथ्ये मैत्रिय, बोधिसत्त्वं, बिन्ति याःगु खँ न्यना श्री भगवानं, थथ्ये आज्ञा दयेका बिज्यात ।

हे मैत्रिय, धन्य २ छ खः, आः छंगु मनं एक चित्त याना न्यो । जित जि गुरुं गथे कना तःगु खँ खः । अथे हे नतुं, थौयागु दिनेसं छन्त जिं कने त्यना । श्रृणु छं न्यो । आदौ न्हापां मूलगू बागमति व अमोघ फलदायनी धयागु थ्व निगूलिं छगू जुयाः मिले जुयाः सङ्गम जुयाः च्वंगु थाय्यात “शोधन-तीर्थ” धका नामं प्रसिद्ध जुयाः च्वंगु थुजागु तीर्थे बास याना च्वंम्ह तक्षक धका नाँ जुयाः च्वंम्ह नागराजायागु शरीरस कुष्ठ रोगं कयाः उगु रोग भ्रंभ्रं बरे जुयाः वया थःगु शरीरे कष्ट जुयाः वस्येलि थुम्ह नाग राजां मने ल्वीकलकी । अहो आश्चर्य जिं मखुगु कर्म यानागुलिं उगु फलं थौं थ्व जिगु शरीरे कुष्ठ रोगं थिल । आः कुष्ठ रोग शान्त यायेत गथे यायेमाल । बिना दान धर्म, जप, तप मयास्यें थुगु रोग शान्त यायेमालि धका मने लुइका उगु हे शोधन तीर्थे वने माली धका धयाः वन । थुम्ह तक्षक नागराजां अनहे उगु तीर्थस्थले च्वना तपस्या याना च्वंवन ।

हे मैत्रिय बोधिसत्त्व ! धका श्री भगवानं आज्ञा दयेका बिज्यात । थ्व खँ न्यना मैत्रिय बोधिसत्त्वं हाकनं श्री भगवान्याके थथ्ये बिन्तियात । हे भगवान, हे शास्ता, हे गुरु, थुम्ह तक्षक नागराजयात छुया निम्ति उगु कुष्ठ रोगं कयेका पीडा जुइका च्वने माल धका थथे बिन्ति यास्येलि श्री भगवानं थथ्ये आज्ञा दयेका बिज्यात ।

हे मैत्रिय, थ्व खँ गथे धाःसा आदि न्हापां नेपाल मण्डले लखँ जलामय जुयाः च्वंबले श्री मञ्जुश्री गुरुं उगु दहया लंख छोना छोये धुंका थुम्ह तक्षक नाम नागराजां जूसां उगु दहने च्वना च्वंपि अनेक प्रकारया जलजन्तु डानं, ब्यां, सोंजु गोंजु, काबले इत्यादि सकल जन्तुपिन्तनं थ्व तक्षक नागं डाना, गुलिसितनं थःम्हं नया, गुलिसितनं अनेक प्रकारं सास्ति याना थ योथे सना जुल ।

हे मैत्रिय, थुकेयागु प्रभावं न व नागयात अथे कुष्ठ रोगं कयेका महाकष्ट नया: च्वने मा:गु जुल । आ: थ्व नागं थ्व थ:गु मनं चायेका उगु कुष्ठ रोग हरण यायेत (मदयेकेत) व शोधन तीर्थे च्वना तपस्या यांना च्वंवन । गयोगु प्रकारं तपस्यायात धाल धा:सा एक चित्तं श्री त्रिरत्नयागु नां कया: स्मरण यांना, नित्य २ हे उगु तीर्थे च्वना बालुका धयागु फियागु नतुं चैत्य दयेका उगु चैत्ययात अनेक प्रकारं जप, तप, ध्यान आदि यांना षडक्षरी मन्त्र प्रयोग यांना थथ्ये चानं न्हिनं उगु तीर्थे लखे ल्हा:थुना स्तोत्र च्वना त्रिरत्नयागु भक्तियाना थुगु भक्तियाना थुगु प्रकारं तपस्या यात । हे मैत्रिय, अथ्ये च्वना तपस्या यांना च्वच्वं २ नीछन्हु दयावस्येलिं थुम्ह तक्षक नागया शरीरे च्वंगु कुष्ठ रोग नाश जुया: मदया वना दिव्य शरीर जुया: बल । हे मैत्रिय, थथ्ये तीर्थे सेवायागु पुण्यया प्रभावं थ्व नागराजाया न्हापा स्वयां बाँलागु रूप शरीर जुया: व:गु खना थ्व स्वया: बडो आनन्दं च्वना तपस्या यांना हे च्वन ।

हे मैत्रिय, अनलि छन्हुया दिनसं अन च्वच्वं २ थुम्ह तक्षक नागया जुसां थ:गु शरीरस न्यंकनहे म्हछम्हं स्वया: मनयात अत्यन्त हर्ष जुइका धालकि । अहो आश्चर्य जि जूसां कुष्ठरोग पीडा ज्वीका च्वनाम्ह: थुजोम्हेसिनं, थुगु शोधन तीर्थे वया: नीछको यंकहे थुगु तीर्थे स्नान यांना श्री त्रिरत्नयात भजे यांना सुवर्ण बालुका यागु चैत्य दयेका षडक्षरी मन्त्र धारणा यांना च्वना च्वनागु थनी २१ नीछन्हु तिनि दुगु वखते हे जित थुजोगु प्रकारं आनन्द जुया: उगु कुष्ठरोग हरण जुया: दिव्य देह ज्वीका विल । धन्य २ जिगु भाग्ये थथे जागु उत्तमगु तधंगु तीर्थजा गनहे मखं । हानं श्री त्रिरत्न थ्यें तधंम्हनं जिं गनहे मखं । धन्य २ वसपोलपिनिगु कृपानं थौं जिगु शरीरे जुया: च्वंगु महा कुष्ठरोग फुकहे शान्त जुया: दिव्य देह ज्वीका विल । हे भगवान्, आ: जिनं थयोगु पुण्य क्षेत्र त्व:ता गन वने । हानं थथिम्ह तधंम्ह त्रिरत्नयागु भक्ति मयास्ये गुम्हदेवयागु भक्ति या:वने धया । उगु हे शोधन तीर्थे वास: यांना श्री स्वयम्भू तीर्थराजपिनिगु भक्तियाना च्वना च्वच्वं २ आपालं दयावन । अथे व नागं न्हिस्वक वहे पुण्य तीर्थे स्नान यांना श्री त्रिरत्नयागु भाव न्हापा स्वयानं बरो एक चित्त यांना जप स्तोत्र इत्यादि यांना, निराहार यांना थुजागु प्रकारं जाज्वल्यमान ज्वीक उपोषढ व्रत यांना च्वन । अजागु वखते व तक्षक नागयागु शरीर बाँलाना साक्षात् अग्नि देवता समानहे तेज प्रकाश जुया: च्वना बल । गपतेनं रत्नयागु मालां तिया १० भीगू फणा धारण यांना उगु शोधन तीर्थ (पुण्यतीर्थे हे) वास यांना आनन्दं च्वना च्वन ।

थथ्ये च्वना अनं तीर्थे भक्ति यांना अष्टमी व्रत यांना नित्यथ्ये श्री त्रिरत्नपिनिगु पूजा यांना सिधयेका: पालं यायेगुनं सिधयेका उगु तीर्थे ल्याहाँ वया, वया थ:योथ्ये म्हिता मनस अत्यन्त हर्षमान यांना वहे तीर्थे छगू थासे च्वना बरो आनन्दं निभाले छक पाना च्वने धका इच्छा यांना च्वना च्वन । थुगु वखतेस दैव संयोग अकस्मात् हे गरूड छम्ह केमिचायागु रूप जुया: उगु तीर्थे व्वया: चाहचु ह्युं जुया: च्वन । उगु वखते आकसं नसेहे केमिचां व तक्षक नागयात खंका तसकं छक लाय्लाय् बुया छथाय् जुया: उगु रूप त्वता गरूडयागु रूप धारणा यांना उम्ह नागया थास व्वया वया: न्हचयोने वना अकस्मात् नागयात ज्वन । आकसे थत यंकेत सन । थजागु वखते व गरूडयात तक्षक नागं धालकि । हे गरूडराज, छँ जित ज्वने मते । छाय् धालसा । जि जूसां तधंम्ह ईश्वरयागु सेवास च्वना च्वनाम्ह । उकें जित छँ तोता हुँ । जित ज्वनेमते । हे गरूडराज, छँ मेपिं नाग तेत ज्वं हुँ । छाय् धा:सा थ्व संसारे गरीब जूसां तवि तधंगु बल दु । हे गरूड छँ जित ली

फइमखु । आतक सानी तोलि जिगु तः (कोप) प्याहां बल धाय्वं छन्त यमपुरिइ छवयाथिइ । हे गरूड धका थय्ये धाल । नागं अथे धाःगु न्यना गरूडया नं अत्यन्त हे क्रोध बन्हे जुयाः तं प्याहांवेका मिखाहे गुलि २ च्याक कना थय्ये धाल । अरे नाग, छँ जित हेपे यानाला गथे मनुष्ये अन्न खना ग्याःसा, जिन छू खना ग्याइ । छला जिगु नेगु नसा खः । हे नाग, कास्व जिगु बल धका थःगु पपू थाया याना संका केन । अथे गरूड पपू संकूगुलिं याना उगु फसं कया अन पहाडे च्वंगु सिमा छमाः २ हे ल्यं ल्यं दना गो २ तू बल । गरूडं हानं धाल । अरे नाग ! छँ स्वः स्व जिगु पराक्रमं जित छँ ख्याये फइमखु धका गरूडं तक्षक नागयात ज्वन । अजोगु बखते नागनं गरूडयात धालकि । आः छन्त जिनं हे गरूड यमपुरिइ छोयत्यल धका निम्हं ल्वात । गयोगु प्रकारं ल्वात धाःसा गरूडं बेगं २ बल पिकयाः व नागयात सातु साला च्वन । अथे सालं नं थुम्ह नागयात व गरूडं संके सुधान्त हे मफू । गरूडं मने ल्वीकल कि । अहो आश्चर्य छु जूगु थ्व गजो गजोपिं बल्लापिं नाग तला जिं थिलकी अचेत जुयाः चेहरा मदया बनी धास्येलिं थौ थ्व तक्षक नागयात जिं ज्वना थतयेंके धका सना संकेहे मफू । आः गथ्ययायेगु । थनहे तोता थकेला धाःसा जिथें जाःम्ह नामदं कपूतम्ह गरूड राजा सु दइ । ज्वने धालसा थ्वैत जिं यंके फेमखु । गये याना तोते भरसक थ्वैत जिं ज्वना च्वे यंकेतसने । च्वे थत मयंकुसें तोतेहे मखु धका सापहे तं प्याहांवेका हचाउँक मिखा कना बेगं नागयात ज्वना फकोहे बल पिकयाः तुति निपाहे पर्वते थिकः कया बरो बेगं हे च्वे यंकेत साल । अथेन व नागयात संके सुधान्त मफु । हे मैत्रिय धका श्री शाक्यमुनि भगवानं आज्ञा दयेका बिज्यात ।

थनीलि हे मैत्रिय ! व गरूडं थःत सास्ति याःगु स्वयाः, सहयाये मफयाः थुम्ह तक्षक नागराजाया मने तसकं हे तं पिकयाः थःगु न्हचपनं व गरूडयात ह्माछम्हं हितुमतु हिना लुतुलुयाः उगु तीर्थया दखी लखे छववात । थय्ये याःगु स्वया गरूडं थःगु पपुतिं व नागयात दाया वज्र समान प्रहार यात । थय्ये यागु स्वयाः व नागया नं तं प्याहां वया, गरूडयागुः तुति निपासं हिना थःगु म्हुतुं विषया धारा ल्हवया बरोवर श्री त्रिरत्नयागु नां कया, गयेः रजक धैम्ह धुव्यां वस्त्र ल्होते छ्वाःवाइगु खः, अथेहे व गरूडयात नागं उगु तीर्थे लखे छ्वावात थय्ये लखे छ्वा वाना विष ल्होया सास्ति यागु स्वयाः थुम्ह गरूडया नं तं प्याहां वया व नागयात थःगु म्हुतुं मिं पिकया ल्होया थःगु पपु फुक गंका नागयात ज्वना थगु पपुतिं पर्वते केपुया बेगं २ नागयात साला च्वे यंकेत सनाहे च्वन । थ्व स्वयाः नागया नं थुजाम्ह गरूडयागु पपु प्याकेया नितिंनं थःगु म्हुतुं विष ल्होया तच्चतं वर्षा ज्वीका वाःवेका फयांफये मफयेक, वाफये वेका वारंवार थःगु शरीरं गरूडयात हिना उगु तीर्थे लखे वुतुवुला छ्वावाना व गरूडयात प्राणान्त ज्वीक सास्ति याना तल । थय्ये थ्व नागं गरूडयात स्वचा प्यन्हु तक हे लखे थुनाः तया तल ।

हे मैत्रिय, त्रिरत्नयागु ननया ाम मद्गुलिं व गरूडया थःगु बलहीन जुयाः मदया वन । उगु प्रकारं नागं यायाथ्यें सास्ति नयाः उगु लखे कष्ट ज्वीका च्वना च्वनेमाल । हानं गरूडया उगु थासे बलकायेगु (अर्थात् थिकः कायेगु पर्वत नं दक्खे चूर्ण जुयाः वने धुंकल । उम्ह नागं विष ल्होया हःगुलिं याना अन च्वंगु वृक्षः, सिमात फुक हे सिना वना गोतुला वना चूर्ण जुल ।

हे मैत्रिय, थयोगु प्रकारं व थासय् नाग व गरूड निम्हसिया तचोतं महा युद्धं ल्वाना च्वन । अथ्ये ल्वाल्वां २ क्रमैसित उम्ह गरूडया थःगु शक्ति हीन जुयाः वया च्वन । थुखे नागया धाःसा थःगु

शक्ति पराक्रम बन्हे जुया: बल दया थुम्ह नागं ब गरूडयात अनेक प्रकारं यायेजिम्ब हे सास्ति याना च्वन । अथे ब नागं थःत यायेजिम्ब हे सास्ति याना च्वंगु स्वया: गरूडया थःगु मनं भापिया धालकि- अहो आश्चर्य, थौ द: छु जुल । थ्व जिगु प्राण समेतयागु आशा मन्त । गजोम्ह नागया ल्हाते जि लात । थ्व जिगु ल्हा, तुति, पपूयागु छुहे बल वृद्धि मजुल । थौ थ्व नागं अवश्य मेव जित मस्याइहे मखुत । हा हा थ्व जिगु प्राण बचे ज्वी मखुत । आ: जित सु इश्वरं रक्षा याइ हे परमेश्वर, हे नारायण छपिंगु सेवकयात सास्ति याका तःगु स्वया । हे बैकुण्ठ बासी नारायण, हे दैव, थौ यागु दिने थ्व नागं जित स्याइन । हे नाथ ! थौ जित रक्षा याना विज्यायेमाल धका बारंबार श्री नारायणयात पुकार याना च्वन । थुगु वखते नारायणं जूसां थःगु अन्तर ध्यानं विचार याना स्वःगु वखते थम्ह सेवक जुया: च्वम्ह गरूडयात व तक्षक नागं सास्ति याना तःगु खना थ्व स्वया: थुम्ह नारायणं जूसां गरूडया उपरे करूणा तया:व नाग खना क्रोध पिकया: तत्कारण हे चतुर्भुज धरेयाना शंख, चक्र, गडा, पद्म ज्वना मेघ गर्जे जूथ्ये शंख पुया: सुदर्शन चक्र म्हुया व रणभूमिस थ्येक वया गुम्ह थःगु सेवक जुया: च्वम्ह गरूडया आतुर जुया: च्वंगु स्वया: गरूडया न्हचोने वना उम्ह नागयात स्वया: साप हे तँ पिकया-वा कटकट न्हचया मिखा हचाउंक कना थः गु सुदर्शन चक्र उम्ह नागयात कय्केत तयार यात ।

हे मैत्रिय बोधिसत्व । थयोगु वखते गुम्ह तक्षक नागराजाया थःत उम्ह विष्णु सुदर्शन चक्र कय्के त्यंगु खना मनस त्रास जुया: हथाय् चा चां ओं नमो रत्न त्रयाय ॥ धका श्री त्रिरत्नया नां कया प्रार्थना यात । हे प्रभू, हे इश्वर, हे त्रिरत्न ! थन जित थौ प्राणया संकष्ट जुल । याकन जित रक्षा याना विज्याहुं धका षडक्षरि मन्त्र धारण याना बराबर नमस्कार याना च्वन । हे मैत्रिय छँ न्यो । अजागु वखते सुखावति भुवनय् विज्याना च्वम्ह सिंह गया: विज्याकम्ह लोकेश्वरं जुसां थःम्ह सेवक जुया: च्वम्ह तक्षक नागयात अथ्ये प्राणया संकष्ट जुया: च्वंगु खना हथाय् चाया सिंह यागु म्हे च्वना उगु सुखावति भुवनं प्रस्थान याना आकाशमार्ग तत्कारणहे अन रणभूमि थ्येक विज्यात । थथ्ये उगु रणभूमि थेनेसातं थुगु प्रकारं आज्ञा दयेका विज्यात ।

हे विष्णु आम नागयात छँ छुयाये त्येनागु । आम नाग ला जि अति हे प्रेम जुया: च्वम्ह । जिगु भक्ति याना च्वम्ह । थुजोम्ह जिगु सेवकयात छँ छाय् आमथ्ये प्रहार याये त्येनागु । छु कारणं धका थुलि सुखावति भुवनया नाथ जुया: विज्याकम्ह श्री करूणामयं थथ्ये आज्ञा दयेका विज्यागु न्यना । उम्ह विष्णु जुसां थथ्ये प्रार्थना यात ।


हे भदन्त, हे गरूड न्यना विज्याहुं । म्येता कारण मखु, छाय् धा:सा थ्व जिगु सेवा याना च्वम्ह गरूडयात थ्व तक्षक नागं तस्सकं हे कष्ट विया: तःगु फगत वैगु प्राण जक वाँकी ज्वीक सास्ति ज्वीक जिगु सत्य भङ्ग यायेत तयार याना च्वन । हे भदन्त थुलिया कारणं जिं थ्वैत प्रहार याये त्येनागु खः । हे नाथ धका थथ्ये व विष्णु प्रार्थना याना धा:गु न्यना: त्रैलोक्यया नाथ जुया: विज्याना च्वम्ह श्री करूणामयं थथ्ये आज्ञादयेका विज्यात । हे बैकुण्ठ नाथ, हे विष्णु, व नाग छम्हेसिनं जक गरूडयात छु कारणं जक सास्ति यात ज्वी । हे विष्णु, छँ गथ्ये मसिल । मेपिन्त थःम्हं शत्रु भाव यास्येलि निश्चयनं थःगु जीवनयात संकष्ट ज्वी धका मस्यूला । हे नारायण, मेपिनि उपरे करूणा तया: शत्रु भाव मयास्ये च्वम्हेसित सदाकालं हे सुख, आनन्द ज्वीका च्वने दइ । न्हचाथाय् वंसा, न्हचाथाय् च्वंसा माया दया दयेका च्वने दइ । हे नारायण, हे हरि । थःम्हं शास्त्र ज्वना म्येपिन्त

स्याये धका संभेसित न्हचाथाय हे वंसां वैत शस्त्र यागु हे भय कायेमाली । हे जनार्दन, उकेया कारणे सुख, दुःख धयागु थःगु स्वभावं हे वैगु वैरि धयापिनं थःगु कर्तव्यं हे वैगु । हे चक्रपाणि, छं दुष्ट पापीतयत नाश याना भक्त जनपिन्त उधार याना च्वनाम्ह मखुला ? हे विष्णु थथिजाम्ह छं भक्त अभक्त छं हे विचार मयास्ये, थःमयो धका कर्पिन्त शत्रुयाना, द्वेष भाव तया प्रहार याये धका प्रहार याय फेला । हे विष्णु, सी धैगु व चिरंजीवी ज्वी धैगु थःगु कर्तव्यं ज्वी । छाया धाःसा देव जूसां मज्यू, दैत्य जूसां मज्यू, नाग जूसां मज्यू, मनुष्य जूसां मज्यू । थः थगु कर्तव्य थःत प्राप्त ज्वी हे हरि, थ्व यागु कर्तव्य ज्यायनं थ्वयात छं जिते याये फेमखु । थ्व हे जिते जुइ त्याइ । थ्वैत वैरि धाःगु शत्रुया भय मदु । छिर्मस्ये थ्वैत नाश याये धकां नाश याये फेमखु । हे विष्णु, थ्व जुल जि आपालं हे प्रीति दुम्ह भक्तजन खः । उम्ये बल पराक्रम दैगु जुल । तःधं ज्वीगु, चिधं ज्वीगु, सुख, दुःख ज्वीगु, जरा, व्याधि मृत्यु थ्व फुक्कहे थः थःगु कर्तव्यं प्राप्त ज्वी । मेपिन्त स्वैत नं दोष तये मज्यू । हे गरूड ! छं थ्व तक्षक नागयात शत्रु भाव याना स्वयं मत्ये । थौं छिपिं निम्ह हे मिले जुयाः मित्र भाव ज्वी माल धका थथे आज्ञा दयेकाः गुम्ह श्री करुणामयनं जूसां व नागराजायात कयाः थःम्हहे ज्वना उम्ह गरूडयागु गःपते व्वखाका विल । थजोगु वखते व नारायण आदि गरूड श्री करुणामय खना अत्यन्त खुसि जुयाः अनेक प्रकारं पंचोपचार पूजा याना स्तोत्र याना च्वन ।

हे मैत्रिय ! उगु वखते श्री करुणामय नं इमिगु न्हचयोने थुगु प्रकारं आज्ञादयेका विज्यात । हे गरूडराज, हे तक्षक नागराज ! आः थथ्ये मखुत, भीं फुक हे मिले जुयाः छगू तधंगु थासे वासयाना च्वं वनेनु धका थथ्ये आज्ञादयेका थःगु वाहन जुयाः च्वंम्ह सिंहयागु म्हे गरूडयात तयाः गरूडया म्हे नारायण तयाः नारायणया म्हे श्री लोकनाथ करुणामय विज्यानाः श्री ३ हरि हरि हरि वाहन लोकेश्वर धका नामं प्रसिद्ध ज्वीका उगु थास अन्तरध्यान जुयाः विज्यात । उजोगु वखते व सिंहयागु पराक्रमं उगु रणभूमिं तिन्हुयाः महावेगं तिन्हुयाः आकाशमार्गं व्वयावना अत्यन्त शुद्ध जुयाः च्वंगु चारुगिरि धैगु पर्वते दथ्वीः थ्येक विज्याना थुगु नेपाल रक्षा यायेनिमित्तनं थौया अद्यापितकनं स्थीरहे विज्याना च्वनं धका श्री शाक्यमुनि भगवानं मैत्रिय बोधिसत्त्वयात थथे धका कुक्कुटाराम महाविहारे विज्याना च्वंम्ह उपगुप्त भिक्षुं अशोक महाराज आदि आपालं भिक्षुगणपिनिगु न्हचोने थुगु प्रकारं आज्ञा दयेका विज्यात । थ्वहे खं यात जूसां कयाः थुगु स्थाने च्वना संक्षिप्त मात्रं सकल श्रोतागणपिनिगु न्हचोने च्वना कना च्वन ॥

इति श्री स्वयम्भू पुराणे माहात्म्य बागमति अमोघ फलदायनी संगमे पुण्य तीर्थ माहात्म्य
कथा प्रथमोऽध्याय सम्पूर्णः ॥

पुण्य तीर्थ गोकर्ण म्हसिका:



थुगु पुण्य भूमि नेपा, देश विभिन्न, धर्म, जात, जाति, च्वना वया च्वंगु, धार्मिक राहणुस्ता, दुगु नं खसा थुगु देशे, स्वयम्भू धर्मधातु चैत्य थेंजागु विश्वय गननं ज्वमलागु चैत्यया प्रादुभाव, जुया: च्वंगु महान् देश खः ।

थुगु देशे च्वोपि नेपामिपिसं यानावया च्वंगु, धर्म कर्मत मध्येय, अतिकं, च्वन्हयागु, व्रतत मध्ये, तः धगु व्रत ख, अष्टमी व्रत, थुगु अष्टमी व्रत, थथः गु छें बुद्ध बोधि सत्वपितिगु अग्रस च्वना, उपोषढ अष्टमि व्रत दनेगु, सत्ययुगं निसें, चलेजुया: वयाच्वंगु, थिथि प्रमाणत प्राप्त जुया: च्वंगु दु ।

वज्रयान बौद्ध धर्मया अनुयायीपिसं थौं तकनं याना वया च्वंगु धर्मत मध्ये द्वादश तीर्थ व्रत नं छगु खः ।

द्वादश तीर्थस व्रत जक मखस्ये, मृत्यु ज्युया वपिनि नामं भिनिलाया दुने, लय लय पतिकं, पुण्य तीर्थ गोकर्ण निसे कया नेखु: तक लय प्यं (मासिकपिण्ड) थयगु चलन, थौंतकनं, चले जुया: च्वंगु खने दिन । अथेहे, राज्य पाखें छेलावया च्वंगु, मोहनि नख बले राज्यया नायः हामापिसं, याना वया च्वंगु हिंसादि कर्म, यात म्हःयायत हिंसाय लाना, स्यापिं, सीपि, दक्को प्राणिपि, उद्धार जुइमा धका मोहनि नख, सुरु जुसानिसे, टिका कुन्हु तक, नवरथ धका थुगु हे, द्वादश तीर्थ मध्येय, यागु गूगु तीर्थस वया, महा स्नान यायेगु वालुका चैत्य दयेका अर्घ यायगु चलन नं मदुगु मखु । व्रत मध्ये, महानगु व्रत, उपोषढ अष्टमी व्रत, दनेगु भोले, द्वादश तीर्थ, स वना, धलं दंनि बले, दकले न्हापां थुगु गोकर्ण तीर्थ निसे सुरु यायगु, यानावया च्वंगु खसा, दिवंगत जुइ धुंकूपिं, थ बौया, स्वास्वेयगु दिखुन्हु थुगु तीर्थे वया पिण्ड दान यायगु प्रथा नं गाकं हाकया वया च्वंगु दु ।

थुगु पुण्यतीर्थ गोकर्ण यागु उत्पत्ति, व धर्म कथा व्याकं स्वयम्भू पुराण पाख्ये वयाच्वंगु खसा, थौकन्हे थुगु तीर्थ गोकर्ण गाविस वडा नं. १ स. वागमति अमोघ फलदायनी संगम जुयाच्वंगु थुगु पुण्यतीर्थस तक्षक नागराजां बास याना च्वंगु खसा, थुगुतीर्थ स दानयायगु सिजया लः थल (जलघट) व. दक्षिण थुगुतीर्थे, ब्रम्हायणी पीठ माने याना वया च्वंगु खसा थुगु तीर्थे पाठ यायगु आर्य प्रजा पारमिता सूत्र ख थुगु तीर्थयात उत्तर गया: धायेगुनं यानावयाच्वंगु खनेदुः ।

थुगु तीर्थ व्रत, यानागुया, पुण्यफल खः नर्क प्रेत तीर्थक हिंसादि पाप मोचन जुइगु खः । अथेहे थुगु तीर्थे महास्नान यायेवले द्वाप्त्र स्वा नं मोल्हुयेगु खः । थुगु तीर्थस, तक्षक नाग राजा उधार जूगुखः ।

समय परिस्थिति अनुसारं थौकन्हेया परिभाषां थुगु तीर्थ यागु, धार्मिक सांस्कृतिक पक्षयात व्यापक प्रचार प्रसार याये माःगु तायेका च्वना । शुभाय ।

शान्त तीर्थ (गुह्येश्वरी)

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

हे मैत्रिय, बोधिसत्त्व ! आः हानं शान्त तीर्थयागु माहात्म्य कनेत्यना । छं एकचित्त याना न्यो । बागमति व मारदायनी संगम जुयाः मिले जुयाः च्वंगु थाययात “शान्त-तीर्थ” धका धाइ । हे मैत्रिय धका, श्री शाक्यसिंह भगवानं आज्ञादयेका विज्यात । थथ्ये आज्ञादयेका विज्यागु न्यना मैत्रिय बोधिसत्त्व हाकनं विन्तियात हे भगवान् उगु तीर्थे सेवा याना सु सु उद्धार जुयाः वन भगवान् धका न्यस्येलि श्री भगवानं आज्ञादयेका विज्यात ।

हे मैत्रिय, परा पूर्वकाले हिमालय धका नां जुयाः च्वंम्ह पर्वतराज छम्ह दैच्वन । थ्वया मेनका धयाम्ह छम्ह स्त्री दया च्वन । हे मैत्रिय, थुपिं निम्ह स्त्री पुरुषया अत्यन्त मेलमिलाप जुयाः बरो आनन्दं सुख भोग याना च्वन । थथ्ये च्वच्वं २ आपालं वर्ष बिते जुयाः वस्यलि छन्हुया दिनस व मेनकाया गर्भाधान जुल । मासं पूर्ण जुयाः भिला दया वस्येलि व मेनकाया गर्भ बालिका छम्ह जन्म जुल । गयोम्ह बालक जन्म जुल धाःसा साक्षात् पूर्ण चन्द्रमा थ्ये स्वीनिता लक्षणं पूर्ण जुयाः अत्यन्त सुन्दरी म्ह । थयोम्ह पुत्री छम्ह जन्म जूगु खना व हिमालया अत्यन्त खुसि जुयाः बरो हर्षमानं थःगु कुलायन अनुसारं माको कर्म काण्डयाना भिंगु शुभ लग्ने साइत स्वयाः नामाकर्मयात (नां छुत) थ्व बालकयागु नां पार्वती जुल धका थथ्ये नं प्रख्यात याना बरो आनन्दं प्रतिपाल याना तल ।

हे मैत्रिय, व बालिकायागु शरीर हृष्टपुष्ट जुयाः बालाना शुक्ल पक्षया चन्द्रमा वन्हे ज्वी थ्ये न्हिं न्हिं हे बरे जुयाः वया च्वन थ्व स्वयाः मां बौ नं व पार्वतीयात विद्या आरम्भ याना आखः स्येना सम्पूर्ण ज्ञान बुद्धि पुरे ज्वीका वंगु खना थ्व स्वयाः खुसि जुयाः नापं थुम्ह पार्वतीयागु शरीरे वैशं जाया परम सुन्दरी जुयाः वःगु खना निम्ह स्त्री पुरुषया मनसं सापहे चंचल ज्वीका बरो हर्ष धाल ।

हे प्रिये, हे स्त्री मेनका स्व स्व भी पुत्री पार्वतीया सकल विद्या पारंगत ज्वीका अतिहे जौवन जाया त्रैलोक्ययात हे मोहनी स्वरूप जुयाः वल । आः थ्व म्हचाय् पार्वतीयात थन तये मजिल हे स्त्री मेनका, थ्वैत भीसं पुरुषनाप विवाह याना वियेमाल धका निम्ह स्त्री पुरुषया थथ्ये मने ल्वीका सल्हायाना माको सामग्री तयार याः धका अन्हेयात । थुलि धयाः व हिमालयनं गुम्ह कैलाशपति जुयाः च्वंम्ह श्री महादेवयात जूसां निमन्त्रणा याके छोये माल धका मती तयाः थःगु आश्रमे च्वनां उगु निमन्त्रणापत्र च्वया व्वना थः दूतपिन्त थथ्ये आज्ञा दयेकल । हे दूतपिं, छिमिसं जूसां थुगु निमन्त्रणापत्र ज्वना गुम्ह कैलाशपति श्री महादेवयात पुरे याना वियाः वा धका अन्हेयाःगु ज्यायात

व दूत पिस्ये तुरन्तहे स्वीकार याना कयाः अनं प्रस्थान जुयाः कैलाशे थ्येका महादेवयात उगु पत्र बुभेयात ।

हे मैत्रिय ! अनलि उम्ह महादेवं व पत्र व्वना सन्तोष ज्वीका उगु कैलाशं त्वःता वना हिमाल पर्वतस थ्यंकवन । अथ्ये श्री महादेव थःगु हिमालय थ्यंकवल धाःगु न्यना (अर्थात्) उगु खवर वःगु न्यना तत्कारणं दना लंस्ववना नापं हे थःगु आश्रमे बिज्याकल । उगु बखते हिमालय नं जूसां थःगु आश्रमे चवनां महादेवयात थथ्ये आज्ञा दयेकल । हे परमेश्वर !! महादेव, थन छपिन्त निमन्त्रणा यानागु म्येता कारणं मखु । छपिसं सियाहे च्वन ज्वी छाया धालसा जिम्ह पुत्री पार्वती छम्ह दया च्वंगु दु व छपिन्त योग्य जूथ्ये च्वनां जिमिसं थौ कन्यादान बी धका छपिन्त बिन्ति यानागु खः । थुलि हिमालयनं धाःगु खँ न्यना महादेवं जूसां मुसुहुनं न्हिला आज्ञा जुल । हे पवर्त राज हिमालय ! जि जूसां शक्ति मदयाः कैलाशे बिचार याइम्ह मदया च्वंगु ताकालं दत । आः थःपिसं जिगु उपरे दया तयाः पार्वती कन्यादान बी धका व पार्वतीयात कन्यादान कयाः आनन्दं कैलाशे बिचा याना च्वने धका आज्ञादयेका बिज्यात । महादेवं थथे आज्ञा दयेकुगु न्यना हिमालयनं तुरन्त हे थःम्ह पुरोहित आदि सकल देवलोकपिन्तनं व्वंके छोट अर्थात् निमन्त्रणा याके छोट । अयोगु बखते बैशाख शुक्लया अक्षयतृतिया तिथि खुन्हु शुभ लग्ने यज्ञादि होमकर्म आदि याना श्री महादेवयात हिमालय, मेनका न्हयोने च्वना थःगु ल्हातिं पार्वती कन्यादान याना विल ।

हे मैत्रिय । थथ्ये थःगु विधि विधान याना उगु विवाह कर्म सिधयेकालि सकल देवलोकपिन्त थ थःगु थासे लिहाँवन । अनलि थुम्ह महादेव जक उगु विवाह कार्य सिधयेकालि न्यान्हु, खुन्हु दसेलि थःपिं निम्ह स्त्री पुरुषयानं व हिमालय मेनकायाके वेला कयाः अनं प्रस्थान जुयाः थःगु आश्रमे, कैलाश पर्वते बिज्याना नन्दी भृन्दी प्रथमगण थः परिवारपिं नापं च्वनां थः स्त्री पार्वती नापं तयाः ख्या थट्टा याना वरो आनन्दं च्वनाच्वन ।

हे मैत्रिय, थथ्ये च्वच्चं ताकालं बितेजुयाः वस्येलि थुम्ह पार्वतीया गर्भवती जुयावल । अथे व पार्वतीया गर्भवती जूगु महिना पुरे जुस्येलि छन्हु भिंगु दिनसं बालक निम्ह जन्म जुल । थ्व बालक गुजोपिं धालसा अत्यन्त हे सुन्दर जुयाः बाँलाना च्वपिं जुयाः च्वन । थ्व स्वयाः श्री महादेव पार्वती निम्ह अत्यन्त खुसि जुयाः यायेमाःगु छैथि क्रिया जातकर्म सकता याना लिपा शुभ लग्न स्वयाः नामकरण याना नां छुत । न्हापां गणेश, अनं कुमार धका थथ्ये निम्ह बालकयातनं नां छुतां उगु कर्म काण्ड सिधयेकल ।

हे मैत्रिय, अनलि व बालक निम्हसितनं पालन पोषण याना ततँ २ तधिक जुयाः थुपिं निम्ह, हे ज्ञान गुण शास्त्र मंत्र, तन्त्र आदि सिद्ध जुयाः सम्पूर्ण विद्यां पारंगत जुयाः वया च्वन । थ्व स्वयाः महादेव अति खुसि जुयाः थः पुत्र निम्हसित हे सःता थथ्ये आज्ञा जुल । हे गणेश, हे कुमार, आःछिमिगु पराक्रम छक जिं स्वये छिपिं निम्ह हे सुमेध, असुमेध पर्वत छक चाःहिला वा धका इपिं निम्हसितनं धयाः छोल । थुलि थः बौयागु आज्ञा न्यना थुपिं निम्ह चाहचू वन ।

हे मैत्रिय । थथ्ये इपिं निम्ह चाःहिला वेधुंका थः बौया थाय् तुं च्वनां च्वन । अथ्ये इमिगु पराक्रम स्वयाः श्री महादेवं इपिं निम्हसितनं वरदान विल । छु वरदान विल धाःसा न्हचागु ज्या याःसां श्री गणेशयात नि न्हापां पूजा वियेमाल । थथ्ये याःम्हेसित कार्य सिद्ध जुइ । थथ्ये मयाम्हेसित

न्हचागु ज्याःयाःसां बिःघ्न जुइ धका थुलि वरदान बियाः गणेशयात मर्त्य मण्डल छोया हल । हे मैत्रिय, कुमारयात जक न्हचागुं छुं ज्या याय्वले, पूजा सामग्री दयेकेवले न्हचयेवोहे आगं कयाः गणेशयात पूजा याये न्हचोहे मू लुखाया न्हचयोने पिखालखुस वाके छोयेमाल धका थुलि वरदान बियाः व कुमारयात पिखालखुस तयके छोत ।

हे मैत्रिय, थुलि निम्हेसितनं वरदान बिये धुस्येलि छन्हुया दिने थुम्ह महादेवं जूसां एस, गजि, धतुर नयाः रसनं भ्रमण जुयाः चाःहिला त्रिशूल पाछाया दिगम्बर जुयाः नाङ्गा धुंया क्षेगुलिं जेंस हिना थाय् थाय् पतिकं हारं तियाः श्मशानयागु विभुतिं इलाः म्ह छम्हं भुयिका हचाउँक मिखा कना लज्जा सम मदेक प्याखँ ल्हुया मशानं मशानं जुयाः साक्षात् भोलानाथ जुयाः थथ्ये म्हिता जुल । थथ्ये सना म्हिता जूगुः थः ससःबौ हिमालयनं खना थःगु मने आश्चर्य चायेका च्वन । थथ्ये जुजुं जुजुं निन्हु प्यन्हु दुखुनु व हिमालयं जूसां श्री महादेवयात सःतके छोत । थथ्ये साःला हयाः थःगु न्हचोने तयाः व हिमालयं जूसां विन्तियात हे जामाता, हे जिलाजं महादेव, छःपिन्त मेता कारणं सःतागु मखु । छुं छगू खँ विन्ति याये धका सतके हयागु खः । उखुन छल्पोलं निर्लज्जां नाङ्गा म्हे वस्त्र छुं मतस्ये एस, गजि, धतुरं कायेका त्रिशूल पाछाया मशानयागु विभुतीनं इला लाला थ्ये सना श्मशानं २ चाःहिला प्याखँ हुलाः लज्जाहे मदयेक छाये सना जुयागु । हे महादेव ! छःपिं छम्ह तधंम्ह परमेश्वर खः उकेसनं हानं देवाधिदेव धायेका दिव्य सुन्दर याना ईश्वर जुयाः देव, दैत्य, मनुष्यपिन्त उधार याना विज्याये माःम्हः छल्पोल धास्येलि । हे जिलाजं भाजु ! थथिंम्ह छल्पोल आमथे जुयाः विज्याये ज्यूला । हे महादेव अथे जुयाः विज्याये मत्ये । छःपिं आमथे जुयाः विज्यागुलिं थौं जित नापं देवलोकपिसं हेला याना हल । छुं अजाम्हेसितनं पार्वती कन्यादान वीगुला न्हचोनेलाको सना ज्वीमाःम्ह धका अनेक प्रकारं हेला याना हल । हे जामाता छःपिंके जिगु कोटि कोटि क्षमाः आमजोगु बानी छता याना विज्याये मत्ये । जि पुत्री पार्वतीनापं च्वनां आनन्द छःपिं उगु कैलाशे च्वनां विज्यात । हे स्वसुर पिता ! हिमालय जिगु वारे छुंहे चिन्ता याना विज्याये म्वाः धन्दा नं कायेम्वाः । जि लालाथ्ये जुल धका स्वैतनं छुं यानागु मदु । हे स्वसुरपिता हिमालय ! छःपिनि योयोथे जि योयोथ्ये जि, ज्वी जिगु निमिते सुनानं धन्दा कायेम्वाः । आमथ्ये छःपिसं छाय् खँ ल्हानागु । देवलोकपिसं जा जित छतिहे खं ल्हाःगु मदु । हे स्वसूर पिता । थौं छःपिसं जकहे जित हलुका ज्वीका बिल । आमथ्य बांलापि छःपिं बांलाकाहे जू जि बांधर्म धातुधर्म धातुमलाम्ह बांमलाकाहे ज्वी । थ्व जिगु चिन्ता सुनानं हे कायेम्वाः जि स्वयाः जिहे ज्वी धका तँ म्वयेका छिद्र वचनं व हिमालययात हकाः अनं प्रस्थान जुयाः थःगुहे कैलाशे थासे नतुं हे विज्यात । अयोगु बखते हिमालयया मनस सापहे आश्चर्य जुयाः थः पुत्री पार्वतीयात सतके छोया धाल ॥ हे पार्वती ! छुं स्वामि महादेवयात छुं छको बांलाक विन्ति याना न्यो । न्यना वैत बुभेया जिमिसं धयां ला बुभेहे मजू । हे पार्वती न्हचागु जतन यानानं वैत बुभे या । छुंहे धाःसा जक बुभे ज्वी धका धाःगु खँ न्यना कैलाशे वना निम्हनापं च्वनां विन्तियात । हे प्रभु ईश्वर ! जि पिता हिमालयं विन्ति याःगु खँ छल्पोल अप्रसन्न जुयाः विज्यायेमते । छल्पोल देवाधि देव जुयाः विज्याकम्हस्ये थौं अमल चीज नयाः उकें लगे ज्वीका लालाथे जुयाः थ्व संसार गथे जुइ । प्रभू थौं जि पितानं विन्तियाना हःगु खँ न्यना विज्याहुं । हे प्रभु छःपिनि योम्ह स्त्री जि खः धयागु जूसा थुलि जिगु विन्ति छक न्यना विज्याहुं धकाः थथ्ये थः स्त्री पार्वतीं धाःगु खँ न्यना महादेवं आज्ञा देका विज्यात ।

हे प्रिये पार्वती छं न्यों । आमथे जिगु धन्दा छिमित छु यायेत माल । सुना छिमित थ्व जिगु धन्दा का धाल । हे मूर्ख अज्ञान स्त्री, आमथ्ये ल्हाना च्वनेगु जूसा छ जिथाये च्वने मते । छाया धाःसा छिपिं बांलाकाहे जू । जि अघोरम्ह बाँ मलाम्ह अघोरनतुं ज्वी । एस, गजी, धतुर आदि नयाः अमलं कायेका दिगम्बर जुयाः मशानं मशानं चाःहिला ज्वी । अथे जुल धाँवहे योयोथ्ये जित खँ ल्हाये दैला । हे स्त्री पार्वती छिमिस्ये थःथगु जक धन्दा कयाच्चं । हे पार्वती । छं पिता हिमालययागु खँ न्यना जुयेमते । छं जिथाय् च्वनेगु इच्छा दु धैगु जूसा बाँलाक हे थुगु कैलाशे आनन्दं सुख भोग याना च्वं । आमथ्ये म्वाःमदूगु धन्दा कयाः ज्वी मते । हे पार्वती धका थथ्ये आज्ञा देका बिज्यागु न्यना पार्वती विन्तियात । हे प्रभु स्वामि थुलि खें छल्पोल चित्त बुझे मजुस्येलि छल्पोलया यथेहे जू जिमित धन्दा मदू । चिन्तानं मदू । छःपिनि स्वयाः यथेहेजू धयाः पार्वती जूसां सरासर हे थः पिता हिमालयया थांय् वना विन्तियात ।

हे पिता ! जिनं छःपिंगु आज्ञाथे भोलानाथयाके विन्ति याना नं भन हे क्रोध पिकयाः बोविल वयात जिं बोध यायेगु सामर्थ्य मदु, धका धाःगु खँ न्यना हिमालयनं धाल । हे पार्वती, आमथ्ये जुस्येलि काः म्वाल । आम भोलानाथया थाय् वने म्वाल, छ अन वना शान्ति ज्वी मखुतः थनहे च्वनां त्रिरत्नयागु तपोव्रत याना गुप्तवास जुयाच्चं । हे पुत्री, छं पुरुष भोलानाथ महादेवया भाः मदु । वं छन्त बल जप्तं व्वना यंकी । उक्ये छ गुप्तवास याना तपोव्रत याः धका थः पितानं धाःगु खँ न्यना तथास्तु । हे पिता ! धका थुम्ह पार्वतीं अनेक सामान दयेका तयार याना श्री त्रिरत्नया नां लुमंका अनेक दान धर्म याना च्वन ।

थथ्ये व्रत याना च्वननं व पार्वतीया मनं चित्त थिर मजुयाः थःगु मनं ल्वीकलकि आः जि थन च्वनां मजिल, जिं स्वयाँ हे मती मलूगु थासे च्वनां तपस्या याये धका मने तयाः उगु हिमालय पर्वते गुप्तगु थाय् गन दु धका माला स्वोजुल नं गनं हे ल्वीके मफयाः हाकनं मेमे थाय् तीर्थ पतिं चाःहिला स्वो जुलनं गुप्तगु थाय् गनंहे ल्वीके मफयाः थुम्ह पार्वती क्रम थ्ये नेपाल मण्डलय् थ्येक वया अननं सकभन हे चाःहिला माला स्वोःगु वखते छथाय् बागमती व मारदायनी सङ्गम जुयाः च्वंगु शान्त तीर्थ धयागु नां जुयाः च्वंगु उगु तीर्थ स्वो बले, अत्यन्त भिंगु बाँलागु पुण्य क्षेत्र स्थल मिले जुल । हानं श्री गुहचेश्वरीया वासस्थान जुयाः च्वंगु थन्योगु पुण्य स्थल प्राप्त जुल । आःजि थुगु हे स्थाने च्वनां तपस्या यायेगु जुल धका मने तयाः थुम्ह पार्वतीं उखुनु निस्ये उगु शान्त तीर्थे नित्य स्नान याना शुद्ध आत्मा याना सुवर्ण बालुकायागु चैत्य दयेका अनेक प्रकारं पंचोपचार पूजा याना छत्र, ध्वज, आदि छाया सुगन्ध धूप दीप, फलफूल ताम्बूलादि दोहलपा प्रदक्षिणा याना जप, तप, ध्यान आदि थःम्हं सःथ्ये याना च्वन ।

हे मैत्रिय बोधिसत्वः थुगु प्रकारं हानं व पार्वती लय्लय् पतिकं हे निराहार याना, फलाहार याना शुल्काष्टमी कृष्णाष्टमी थ्व निगू पक्षेनं हे उपोषठ व्रत याना मननं, वचननं उम्ह श्री त्रिरत्नयागु नां लुमंका तपोव्रत याना च्वन । हाकनं ब्राम्हण गणपतिं, चैलक भिक्षु, अतीत अनागत गणपिन्तन दानधर्म याना हे च्वन । थथ्ये याना थुम्ह पार्वतीं बोधिव्रत याना च्वन । अथे उपोषठ व्रत याना च्वंगु खना श्री खगानना गुहचेश्वरी देवी प्रसन्न जुयाः थः थम्हहे प्रत्यक्ष जुयाः उगु थासे थ्येक बिज्याना व पार्वतीयात थःगु रूप दर्शन बियाः आज्ञा दयेका बिज्यात । हे पार्वती धन्य छ खः छंगू भाव भक्ति खना जि सन्तुष्ट ज्वी धुनः । हे शुभक्ति धका थथ्ये आज्ञा दयेका बिज्यात । श्री गुहचेश्वरीयागु थुलि आज्ञा न्यना जगत्माता श्री गुहचेश्वरीयात अनेक प्रकारं

पूजा याना जप, ध्यान, स्तोत्र आदि याना अष्टाङ्ग प्रणाम याना वस्पोलयागु चरण कमले भोपुया थुगु प्रकारं विन्तियात । हे माता, हे तारनी, हे जननो थौं जिनं जगत्या माता जुया: विज्याकम्ह छल्पोलयागु दर्शन याये धुन । हे बुद्ध जननी धन्य धन्य जिगु भाग्य । हे कल्याणी, हे परमेश्वर ! जित वरदान मेता मखु, हे माता ! जित आपालं गोप्य याना सदानं छल्पोलया चरण कमले वास बिया: विज्याये माल धका थुलि पार्वतीं विन्ति याना धा:गु खं न्यना जगत्माता श्री गुहचेश्वरी देवी नं थ:गु चरण कमले न अमृतोदक धारा पिकया: गुहच भिषेक बिया: थ:गु आश्रमेस वास याका बरो गुप्तं उम्ह पार्वतीयात तोपुया तल ।

हे मैत्रिय, अयोगु वखते हिमालय नं जूसां थ: पुत्री पार्वतीयात लुमस्यें वया थ: परिजन जुया: च्वपिं यक्षगणपिन्त स:ता धाल । हे यक्षगणपिं जिम्ह पुत्री पार्वतीयागु ख्वा: मखंगु आपालं दत, थ्वया पुरुष भोलानाथ महादेव विश्वास मदुगुया कारणे जिं पार्वतीयात छं छथाय् च्वनां महा गुप्तं तपस्या याना दानधर्म याना श्री त्रिरत्नयागु भजन याना उपोषढ व्रत चले याना च्वं बोधिज्ञान मलातल्यहे धका जिं वचन बिया: छोयागु ख:, हे यक्षगणपिं । आपालं दत वैतु ख्वा: मखनागु । आ: छिपिस्ये थ्व प्यंगू दिशाय्सं वना थुम्ह पार्वतीयात मालाहिं धका धा:गु खं न्यना व यक्षगणपिसं सकभनं दिशापतिकं हे वना पुन: देश ग्राम, पर्वत, जंगल आदि थान थानान्तर पतिकं वना माला जुल । अथे माला जुलनं बाछि, लछि दयानं व पार्वतीयात लुयकेगु समर्थ मदया थुपिं फुक्कहे हिमालयया थाय् लिहां वया विन्तियात ।

हे पर्वतराज ! हिमालय ! छ:पिंगु आज्ञा थ्यें जिमिस्यें सम्पूर्ण दिशा पतिकं ग्राम, नगर, वन आदि सकभनं माला: स्वयान गनहे लुइके मफू धका धा:गु खं न्यना हिमालयनं धाल । अथेसा हे यक्षजनपिं आ: व पार्वतीयात मेथाय् स्वयेम्वा: अवश्य थ्वहे पर्वते तधंगु स्थाने अत्यन्त गुप्तं तपोव्रत याना च्वनज्वी । छिमिसं थुगु पर्वते वना सम्पूर्ण आश्रम चूर्ण ज्वीक तछ्छाना गन गुप्तवास च्वनां च्वंगु ख:, माला हिं धा:गु खं न्यना व यक्षगणपिं उगु हिमाल पर्वते थाँ हाँ वना सम्पूर्ण आश्रमपतिकं संचूर्ण याना जुल । थुगु प्रकारं हिमालय नं पुत्री पार्वतीयात माय्क्य छोया तल: हे मैत्रिय । थनयागु खँ थुलिहे जुल ।

अनलि कैलाशे च्वम्ह महादेव छन्हुया दिने थ:म्ह स्त्री पार्वतीयात लुमंका धालकि । अहो आश्चर्य जि अत्यन्त मतिनाम्ह स्त्रीया:गु ख्वा: मखनागु आपालं दिन दत, थौं तिनि लुमंस्ये वल । न्हापा जिं एस, गजि, धतुर भाङ्गयागु रसं कायेका: जुया: जि थुम्ह पार्वतीयात विचार याये मफुत: लोहेमना च्वन । थौं तिनि पार्वती लूमंस्येवल । आ: गथ्यायाये, थ्व पार्वती गन वना च्वन ज्वी हा: हा निश्चयनं जि प्रिये पार्वतीयागु प्राण लेनी मखुत ज्वी । हे पार्वती आ: जिं छन्त गन मा:वेगु । जिं छथिजाम्ह स्त्री गन वना स्वोवनेगु । सुनां जित माला बी:, सुना केनाबी: हे प्रिये पार्वती छंगु ख्वा: मखंगु आपालं दत धका हाला: थ:गणपिं नन्दी भृन्दि प्रथम गणपिन्त स:ता धाल । हे नन्दि भृन्दि परिवारगणपिं छिमिस्ये जिम्ह स्त्री पार्वतीयात थौं गन वना च्वंगु ख: अन गुगु दिशाय् ख: अनवना छिमिसं वैत मालाहति (अर्थात्) माला वा: धका थथे आज्ञा जुया: धा:गु न्यना व दूतगणपिसं श्री महारूद्रयात विन्ति याना धाल । हे महादेव ! छल्पोलया सेवक जुया: च्वपिं जिपिं दहेदुनि । थौं छल्पोल आनन्दं च्वनां विज्याहुं धया: विदा कया: गणछि, सकलेहे पार्वतीयात मा:वने धका वन ।

हे मैत्रिय ! थथ्ये माला जुलनं गनहे लुइके मफया: निराश जुया: थुपिं सकलेहे ल्याहाँ वया:

कैलाशे थ्येका श्री महादेवया न्हचोने च्वनां थथ्ये विन्तियात । हे महादेव ! छल्पोलया आज्ञा थ्ये जिमिसं दश दिशा सकभनं हे माला वये धुन, हे प्रभू । थुम्ह पार्वतीयात गनंहे लुयेकेगु सामर्थ मन्त, धका धाःगु खं न्यना महादेवं आज्ञा दयेकल ।

हे नन्दी भृन्दी प्रथमगण, हे शीतांग, भूत, प्रेत, पिशाच छिमिसं ल्वीके मफुसा म्वाल काः जि नापं वा छिपिं सकलेहे विना थ्व पार्वती लुयाः मवेकं थ्व जिगु प्राण स्थीर ज्वी मखुः आः भीपिं सकल्ये थ्व पृथिवी भ्रमण याना माला स्वःवने धका सकल परिवार फुक्क मुना दिशा दिशा पतिं देश, ग्राम, पर्वत, जंगल, स्वर्ग, मध्य, पाताल सम्पूर्ण आश्रम पतिं हे संचूर्ण ज्वीक तछ्छाना माला स्वः जूल । थथ्ये माला स्वजुलनं व पार्वतीयात ल्वीके मफयाः महादेवयानं शक्ति मदया (अर्थात्) सामर्थ मदयाः थःगु मिखां ख्ववि धाः हायेका विलाप याना धाल । हाः थौयागु दिने जिं पार्वतीयात माला ल्वीके धका सम्पूर्ण दको थासे पृथिवी हे चाःहिला स्वयाः माले धुनः गनंहे दुगु मखु । हाः आः जिं गन वना व पार्वतीयागु ख्वाः स्वः वनेगु । हे पार्वती थौं छं जिगु माया त्याग याना एकान्ते गन वना च्वनां । हे प्रिये सदांयाथ्ये छ जिगु मुले च्वंवा । हे पार्वती ! छ विना थ्व प्राण स्थीर ज्वी मखुत ।

हे प्रिये छं जित थुलि त्याग याइ धका मताया । हे सुन्दरी छंगु रूप यौवन, छंगु वचन गुण अनेक रसरंग, सुरत श्रृंगार आदि लुमना थ्व जिगु प्राण संकष्ट जुल । हे सुलक्षणि थःयागु सुख भोगयात त्वता छ एकान्त गन वना च्वनां । आः जिं छु तपस्या याःसा छंगु ख्वाः स्वयेदइ गुम्ह देवतां छ जित नाप लाकावी धका थथ्ये अनेक प्रकारं विलाप याना जुल ।

हे मैत्रिय, थथ्ये जुजुं निला प्यला दया वस्येलि पुनवार श्री महादेवं मने ल्वीकलकि आः छु याये जिगु कारणं जि स्त्री पार्वती न वियोग ज्वीका च्वने माल । आः जिं धन्दा सूता जक कयाः च्वनां छुयाये । नुगः मछिका विलाप याना जक छुयाये । जूगु ज्वीहे धुंकल । धका थथ्ये मने ल्वीकाः थः परिवारगणपिं सकलें सःता थथ्ये आज्ञा जुल । हे नन्दी भृन्दी प्रथमगणपिं, हानं हे छिमिसं न्हापा थ्ये तूं छको सकभन हे वना माला स्व हूँ । जिन थुम्ह पार्वतीयात ल्वीकेया नितिं श्री त्रिरत्नयाके शरणे वना तपोव्रत याये धका मती तयाः च्वनां । हे दूतगणपिं काः छिमिस्ये विस्तार याये म्वाल याकनं हे हूँ । अथे माला व पार्वतीयात गन खनः अन थासे छिमिसं जित व्वनायंकी धका इमित छोया थः जक उगु वागमती मणिरोहिनी धयागु सङ्गम जुयाः च्वंगु थासे च्वनां तपस्या याना च्वने धका उगु पुण्य क्षेत्रय् वना महादेवं वरो एकचित्तं जि स्त्री पार्वतीयागु खवर याकनं हे थ्येका प्रसन्न जुयाः विज्याये माल धका श्री त्रिरत्नयाके थुगु प्रकारं स्मरण याना उगु तीर्थे च्वनां तपस्या याना च्वन ।

हे मैत्रिय न्हिं न्हिं हे उगु तीर्थे स्नान याना बालुका चैत्य दयेका अनेक प्रकारं छत्र ध्वज वोयेका पुष्प धूप दीप, नैबद्य, फलमुल, दक्षिणा आदि चन्हेयाना पंचामृतं स्नान याकाः अनेक प्रकारं स्तोत्र याना पंचेन्द्रीय जिते याना राग द्वेष, मोह, माया त्वःता केवल श्री त्रिरत्नयागु जक हे भक्ति याना स्वंग मिखां तिसिना षडक्षरी मन्त्रं रूद्राक्ष धारण याना थयोगु प्रकारं तपस्या याना च्वन ।

हे मैत्रिय ! उखे बारंवार थः परिवारगणपिसं पार्वतीयात माय्का हे तयातल । थथ्ये तपस्या याना च्वंगु आपालं वर्ष दयावस्येलि छन्हुया दिने श्री गुहचेश्वरी देवीं जूसां थुम्ह महादेवं तपस्या याना च्वंगु स्वयाः प्रसन्न जुयाः उगु थासे थ्येक विज्याना थुम्ह महादेवयात थःगु रूप दर्शन क्यना थुगु प्रकारं आज्ञा दयेका विज्यात ।

हे महारूद्र, हे शंकर धन्य छंगु भाग्य छं तपस्या या:गु खना जि सन्तुष्ट जुल । हे महेश्वर, आ: छं छु इच्छा दु उगु वरदान का: धका धया: बिज्यात । थथ्ये आज्ञा जूगु न्यना व महादेव जूसां उगु योगंदना श्री महामायायात दर्शन याना षोदश उपचारं पूजा याना जप, तप, स्तोत्र आदि याना चरण कमले भोपुया ल्हा: जोरे याना प्रदक्षिणा याना थथ्ये बिन्तियात । हे परमेश्वरी जगत्माता धन्य धन्य जिगु भाग्य आ: जिं तपोव्रत यानागु साफल्य जुल । हे तारणी, प्रज्ञापारमिता छःपिं खना जि कृतार्थ ज्वी धुन । हे जननी, आ: जित वरदान म्येगु मयो छःपिनि कृपा द:सा जि स्त्री पार्वती नापं तया: बिज्याहूँ । हे भगवती जननी माता धका थुलि महादेवं बिन्ति या:गु खं न्यन थथ्ये आज्ञा दयेका बिज्यात । हे शम्भू महादेव छं पार्वती नापं च्वनेत १२ वर्ष तरे मजूतल्य छं थुगु तीर्थे च्वनां तपस्या याये मानि धका श्री गुहचेश्वरीं आज्ञा दयेका बिज्यागु न्यना तथास्तु हे परमेश्वर ! धका हानं बिन्तियात । हे जननी जिं १२ वर्ष तक तपस्या या:सा जि स्त्री पार्वती नाप लाइला धका धा:गु न्यना हानं थथ्ये आज्ञा दयेका बिज्यात । हे वृषभध्वज महारूद्र छं एक चित्त याना १२ वर्ष तक तपस्यायात धालसा निश्चयनं छन्त पार्वती नाप लाय्दयी । हे रूद्र थुलि मया:सा छं नाप लाय्दैमखु धका थुलि आज्ञा दयेका श्री गुहचेश्वरी अन्तरध्यान जुया: बिज्यात ।

अनंलि व महादेवं न्हापाथ्येनतुं हे उगु तीर्थे च्वनां हे तपस्या याना च्वन । थथ्ये च्वच्वं २ प्यदं खुदं दयावस्येलि उख्ये पार्वतीयात मा: वना च्वपिं व नन्दी, भृन्दी प्रथमगणपिसं श्री महादेवया आज्ञा थ्ये सम्पूर्ण थासे मामां ववं २ तीर्थे पतिकं चा:हिला जुजुं २ क्रमश नेपाल मण्डलय उत्तर दिशास लाना च्वंगु श्री बागमती व मारदायनी निगू सङ्गम जुया: च्वंगु महातीर्थे थ्येकवल व थासे इमिस्ये सकभन हे स्व:जुल । उगु बखते श्री गुहचेश्वरी देवी याननस्ये हे महादेवं छोया हपिं दूतगणपिं व:गु खना थ:म्हं बरो गुप्तं तयातैम्ह पार्वतीयात उला क्यना बिज्यात । उगु बखते पार्वतीया अन तीर्थे च्वनां स्नान याना बालुका चैत्य दयेका अनेक प्रकारं पंचोपचार पूजायाना बरो एक चित्तं तपस्या याना च्वंगु व नन्दी भृन्दीगणपिं सकसिननं आकाशानिस्ये खंकल । अथे व पार्वतीयात खनेसात् नमस्कार याना थुपिं गणछिं हे तत्कारणं श्री महादेवं तपस्या याना च्वंगु थासे थ्येक वना नमस्कार याना बिन्तियात ।

हे महादेव, हे प्रभू छल्पोलया तपस्या याना च्वंगुया प्रभावं थौं जिमिसं पार्वतीयात ल्वीका वे धुन । आ: बिस्तार याना बिज्याये मत्ये याकनं हे बिज्याहूँ धका बिन्तियात । अथ्ये बिन्ति या:गु खं न्यना व नन्दी भृन्दी सकल परिवारपिं मुंका थ: नं न्हचोने च्वनां थुगु प्रकारं आज्ञा दयेकल । हे परिवारगणपिं छिमिसं व पार्वतीयात गन खनागु थ्व खं सत्य नं ख: भूठ मखु जिमिस्ये व पार्वतीयात शान्त तीर्थ धयागु थासे च्वनां तपस्या याना च्वंगु स्वया: हतासहे छःपिन्त खबर का:वयागु ख: । हे महारूद्र ! आ: छःपिं अत्यन्त दिव्य रूप जुया: उम्ह पार्वतीयात मोहं दग्ध जुइका: रूप धारण याना बिज्या:म्ह हूँ धका धा:गु न्यना व महादेवं तत्कारणं हे दिव्य रूप धारण याना जटा मकुटं पुया: ख:गु ल्हातिं त्रिशूल पाछाया ज:गु ल्हातं दमरू थाना नन्दी भृन्दीपिसं बाजं थाका: प्रथमगणपिसं ताल बिया: म्ये हाय्का थ:म्हं जक नांचत पद कया: उम्ह पार्वतीयात नापलाय् धका प्रस्थान जुया: वना उगु शान्त तीर्थे थ्येक बिज्यात ।

थनंलि श्री गुहचेश्वरी देवीं उगु बाजा था:गुया शब्द वयेवं का: आ: धा:सा महादेव वल धका सीका पार्वतीयात गोप्य याना तोपुया तल । अयोगु बखते श्री महादेवं अन तीर्थे थ्येनेवं थ:

परिवार जुया: च्वपिं नन्दी भृन्दीपिंके न्यन का: छिमिसं धैगु थाय् थ्वहे मखुला का: ग्व: पार्वती गन दु जित क्यो धका श्री महादेवं इमिके न्यन । थ्व खं न्यना नन्दी भृन्दी सकसिनं हे उख्ये थुख्ये स्वया: माला जुल । अथ्ये माला जुलनं इमिसं गनं हे ल्वीके मफया: महादेवया न्हचोने वया थथ्ये बिन्तियात ।

हे महादेव ! जिमिसं थ्वहे थासे श्री पार्वती देवी बिज्याना व बालुका चैत्य दयेका अनेक प्रकारं पूजा भाव याना च्वंगु थ्वहे थाय् ख: । हे प्रभू छपिं पत्यार मजूसा स्वया: बिज्याहुं । थ्व बालुका चैत्ययात श्री पार्वतीनं पूजा याना त:गु छाया त:गु थ्वहे खं हानं फलफूल आदि छायात:गुनं थ्वहे ख: धका क्यना बिल । अथ्ये फुक्क हे क्यस्येलि महादेवया मने बिचायाना धाल । अहो आश्चर्य थौं जित छलेयात दैव थ्व सम्पूर्ण हे पार्वती चढे याना छाया जप, तप या:गु, याना च्वंगु निश्चयनं थ्वहे थासे ख: । अवश्यनं थौं जित दैवं छले याना क्यंगु ख: आ: जिं थ्वहे तीर्थे च्वनां पार्वतीयात नाप लाना जि सकल परिवारगणपिं नापं सहित याना उगु कैलाशे वने धका मने ल्वीका श्री महादेवं बरो एकचित्तं श्री त्रिरत्नया नां कया: छपिसं जि पत्नी पार्वतीयागु ख्वा: मखंगु ताकालं दत हे परमेश्वर ! व पार्वतीयात याकनं नाप लाका प्रसन्न जुया: बिज्याहुं धका दैव याके प्रार्थना याना पुनर्बार थुम्ह महादेवं थुगु हे तीर्थे च्वनां न्हापा थ्येहे तपस्यायात ।

हे मैत्रिय ! अथ्ये तपस्या यायां यायां १२ वर्ष पुरे जुस्येलि छन्हुया दिने श्री गुहचेश्वरी देवी जूसां थुम्ह महादेवं आपालं कष्टं तपस्या याना च्वंगु खना मनस अति हर्ष जुया: थूगु प्रकारं आकाशवाणिं धया: हल । हे महारूद्र ! छँ तपस्यायागु प्रभावं जि खुशी ज्वी धुन आ: छंम्ह पार्वती वरदान बिया: छोय् धका धा:गु शब्द न्यना खुशी जुया: थूगु प्रकारं बिन्तियात । हे परमेश्वर ! छल्पोल सु ख:, गुम्हख: जिं मसिल छपिंगु रूप दर्शन छक याये द:साज्यू धका: बिन्ति या:गु न्यना श्री गुहचेश्वरी देवी महादेव च्वनां च्वंगु थासे बिज्याना थ:गु रूप दर्शन क्यना बिज्यात ।

गुजागु प्रकारं दर्शन बिल धा:सा सहश्रभुज द्वोच्छिका ल्हा: धरेयाना सहस्रशीर्ष, द्वोच्छिग्वो क्यो धरेयाना नरशिरमाला क्वखाया:, हारं तिया: पंचमूद्रा धरेयाना अनेक रत्नया मालां क्वखाया:, कोटि सूर्यया तेज प्रकाश याना जाज्वल्यमान ज्वीक सिंहयागु म्हे बिज्याना उम्ह रूद्र, महादेवयागु न्ह्योने बिज्याना थुगु प्रकारं आज्ञा दयेका बिज्यात ।

हे गौरी शंकर, हे महादेव धन्य धन्य छँ तपस्या या ! गुलिं जि सन्तोष जुये धुन । हे शशिशेषर छँ आम छु इच्छां दुष्कर चर्या यानागु आम छंगु मनोबांछा जि पूर्ण याना वी । का: छँ जिके छु वरदान कायगु फों धका आज्ञा जूगु न्यना थुम्ह महादेवं तत्कारण मिखा कना स्वया: बिज्यागु बखते थ:गु न्हचोने ईश्वर खरा जुया: च्वंगु खना हथासं दना षोदशउपचार सहित पूजा याना अनेक प्रकारं जप, स्तोत्र, ध्यान आदि याना चरण कमले भोपुया: नमस्कार याना बिन्ति याना च्वन ।

हे परमेश्वरी जगत् व्यापिनी माता । थौं जिं कल्पना याना च्वनागु छल्पोलं सिया बिज्यागु हे खै । थुलिया निम्तिजक जिं तपस्या याना च्वनागु ख: । हे विश्वरूपिनि आ: जित याकनं पार्वती प्रसन्न जुया: बिज्याहुं धा:गु खं न्यना श्री गुहचेश्वरी देवीनं जूसां थ:गु द्वोच्छिका ल्हाती पतिकं हे छंम्ह पार्वती श्रृष्टि याना थथ्ये आज्ञा दयेका बिज्यात ।

हे शम्भु नाथ !, हे महादेव, का: छम्ह पार्वती गुम्ह ख: का: । हे महेश्वर थ:म्ह छम्ह जक ल्यया का: मखुम्ह काये मते धका थथ्ये आज्ञा दयेकूगु न्यना थ्व महादेवं विचार याना स्व:बले थुम्ह उम्ह धाये मफया: स्वजक स्वया: च्वन ।

हे मैत्रिय । पुनर्वार श्री गुहचेश्वरी देवीं हानं आज्ञा जुल । हे महादेव का: छम्ह स्त्री पार्वती गुम्ह ख: याकनं ल्यया: का: धका थथ्ये आज्ञा जूगु न्यना थुम्ह महादेवं ल्हा: भिपतिनं विन्तियात । हे माता, हे गुहचेश्वरी, हे जननी छल्पोलया महिमा खँ ल्हायगु जिके सामर्थ मदु । हे परमेश्वरी जित याकनं पार्वती दया तया: विज्याहुँ । हे माता, हे नैरात्मा, हे जननी थौं जि पत्नी थुम्ह उम्ह धका धायेगु सामर्थ मन्त । हे परमात्मा भगवती देवी धका थथ्ये विन्ति या:गु खँ न्यना श्री गुहचेश्वरी देवी जूसां थ:म्ह धारण याना तैगु १००० का ल्हानं फुक्कहे थपु क्वपु याना केबल छम्ह जक पार्वती याना प्रकाश ज्वीका क्यना थथ्ये आज्ञा दयेका विज्यात ।

हे शंकर, हे महादेव ! का: छम्ह स्त्री पार्वती थ्व ख:ला: ना धका वैगु ल्हाते ल:ल्हाना विल ।

हे मैत्रिय थयोगु वखते थुम्ह पार्वती जूसां श्री महारूद्रयात प्रदक्षिणा याना चरण कमले भोपुया नमस्कारयात । उगु वखते महारूद्रं थथ्ये विन्तियात । हे परमेश्वर ! छल्पोलयागु कृपानं थौं जि स्त्री पार्वती नाप लाये धुन आ: जि सन्तोष जुल । जि कैलाश त्व:ता वयागु आपालं दयेधुंकल छल्पोलं जित विदा बिया: विज्याहुँ । हे परमेश्वर ! धका थथ्ये विन्ति याना धा:गु खँ न्यना श्री जगत् माता जुया: च्वम्ह श्री गुहचेश्वरी देवीं: जूसां थथ्ये आज्ञा दयेका विज्यात । हे महारूद्र ! आ: छ जूसां शिवशक्ति स्वरूप उमा, महेश्वर धायेका थ:गु परिवार नन्दी भृन्दी प्रथमगण, भूत, प्रेत, पिशाच आदि सकल परिवार गण सहित याना परम आनन्द नं कोट्येश्वर धायेका हाकनं न्हापा तपस्या यानागु तीर्थे च्वनां सकल मनुष्यपिंके पूजाभाव कया: अष्ट सिद्धि धयागु फल बिया: च्वं । हे महारूद्र, हे पार्वती छिपिनिम्ह हे आ: गुबलेहे वियोग ज्वी मखुत । कल्प कल्पान्तर हे तकनं शिवशक्ति स्वरूप जुया: स्थिर ज्वीमा: । हे रूद्र महादेव ! हानं छं सेवा यानागु वागमती व मणिरोहिणी त्रिवेणी सङ्गम स्थाने लिपा कालान्तरे शंकर तीर्थे धका नां प्रसिद्ध ज्वी । हे महारूद्र थ:गु नां उमा महेश्वर जुल धका थथ्ये आज्ञा दयेका विज्यात । थुगु आज्ञा न्यना श्री महादेवया मने अत्यन्त हे हर्ष ज्वीका थुम्ह ईश्वरयात नमस्कार याना थ:म्ह स्त्री पार्वतीया न्हचोने आज्ञा जुल । हे स्त्री, हे प्रिये पार्वती जिं छँगु ख्वा: मखंगु आपालं दत: थौंयागु दिने श्री जगत् माता श्री गुहचेश्वरी देवीया प्रसादं छ, व जि नापलाये दत, धका थथ्ये आज्ञा दयेका विज्यागु न्यना पार्वती विन्तियात । हे प्रभू महारूद्र, हे स्वामी थौं श्री गुहचेश्वरी याक्य तपस्या ब्रत याना च्वनागु पूर्ण मजूनी । हे स्वामी आ: भीसं थुगु तपस्यायातनीं पूर्ण याना समाप्त ज्वीके धका अनेक प्रकारयागु पूजा सामग्री दयेका पार्वती देवीं षोदश उपचारनं श्री गुहचेश्वरी देवीयात पूजा भाव याना अनेक स्तोत्र आदि याना प्रदक्षिणा याना श्री गुहचेश्वरी देवीयागु अमृतोदक पानयाना श्री ईश्वर याके विदा कया: थ: परिवारं सहित याना थ:गु कैलाश पर्वते थ्येक वन धका श्री शाक्यमुनि भगवान् मैत्रिय बोधिसत्व आदि सकल सभा लोक गणपिन्त आज्ञा दयेका विज्यात । इति श्रीस्वयम्भू पुराणे वागमती मारदायनी संगमे शान्त तीर्थे श्री महादेव पार्वती उद्धार कोट्येश्वर प्रसिद्ध नाम द्वितीय अध्याय सम्पूर्ण समाप्त ।

शान्त तीर्थ (गुह्येश्वरी) म्हसीका:



शान्त तीर्थ

द्वादश तीर्थ व्रत यायेगु भोले थुगु तीर्थ निकोगु तीर्थ खः । थौकन्हये थुगु तीर्थ का.म.न.पा वडा नं. ७ स. गौरिघाट नापं च्वंगु खुसिसियें, ताः हाकय्क ल्वहंया त्वाथ दयकातगु, सतः नं निगू दयेका तैतगु छु भतिचा सुधार जुगू आभास जुया च्वंगु थुगु तीर्थ व्रत नाप नापं लये प्यं (मासिक श्राद्ध) यायेगु मृत्यूसंस्कार यागु सम्पूर्ण ज्या भोतः थुगु तीर्थस जुया च्वंगु भीसं खनाच्वंगु हे खं खः ।

थुगु तीर्थ यागु सम्पूर्ण वर्णन तः स्वयम्भूराण सः उल्लेख जुया च्वंगु भीसं स्यूगुहे खं खः । थुगु तीर्थस वागमती व मारदायनी संगम जूयाच्वंगु दोभानयात हे शान्त तीर्थ धया वःगु खः ।

थुगु तीर्थे तुयुगु वर्णम्हः सोमशिखि नागराजां वास याना विज्यागु खः । थुगु तीर्थे दानयायेगु भोले पञ्चवृहि व पञ्चवस्त्र दान यायेगु चलन दुः । थुगु तीर्थ पाखें मानेयायेगु पीठ खः गुह्येश्वरी देवी अथेहे पाठयायेगु खः आर्य गन्ध व्यूह सूत्र । थुगु तीर्थ व्रत सेवा यानाः गुया फल खः वातपित्त श्लेष्म आदिरोग शान्ति जुइगु । माहास्नान यायेगु स्वाँता खः धालेपत्ति स्वाँ । थुगु तीर्थे सत्य युगे पार्वती उद्धारजुगु खः ।

समय परिस्थिति अनुसारं थौकन्हयेया परिभाषां थुगु तीर्थ यागु, धार्मिक सांस्कृतिक पक्षयात व्यापकं प्रचार प्रसार याये माःगु तायेका च्वना । शुभाय् ।

शङ्कर तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

पुनर्वार हाकनं श्री शाक्यसिंह भगवानं मैत्रिय बोधिसत्वयागु ख्वाः स्वयाः थथ्ये आज्ञा दयेका विज्यात । हे मैत्रिय बोधिसत्व छं शान्ततीर्थ याःगु माहात्म्य न्यने धुंकल आः शङ्कर तीर्थयागु माहात्म्य कनेत्यना छं न्यो । हिमालय पर्वतया सन्निधाने नेपाल मण्डल बागमती, मणिरोहिनी व रुद्रधारा सङ्गम जुयाः च्वंगु त्रिवेणी धैगु तीर्थ छगू दया च्वन । थ्व तीर्थे छको जक मोल्हुया मात्रन मेगु तीर्थे भिको मोल्हुयागु उति मजू । हानं थुगु शङ्कर तीर्थे च्वनां लः जक त्वना मात्रनं थःगु शरीरयागु कायवाक् चित्त शुद्ध जुयाः सम्पूर्ण रोग, व्याधि, विष आदि नाश जुयाः शरीर शुद्ध ज्वीका च्वने दै ।

हे मैत्रिय, थयोगु उत्तम जुयाच्वंगु तीर्थया उत्तर दिशाया हिमालय पर्वत दयाच्वन, थ्व पर्वते सम्पूर्ण तथागतपिसं तपोव्रत याना थः थःगु मने कल्पना पुरेयाना च्वनां च्वनी । थ्वहे पर्वतया दथ्वीसं आपालं तःधंगु बगैचा दयाच्वन । थ्व बगैचास छचाखेरहे सिमां चाहुयेका अनेक फलमूल सहित जुयाः च्वन । थाय् थासे पुखुलिं चाहीका उगु पुखुलीस पल्यस्वाँ, उफोस्वाँ, चःस्वाँ अनेक प्रकारं बासना वयाच्वंगु षट्कृत, खुगूकृतयागु स्वाँ ह्वोया उके भ्रमरादि पंछिगणपिसं रस कयाः शोभा दया च्वन । अनेक प्रकारयागु मृतसंजीवनि धयागु जडिवुटी वासलं संयुक्त जुयाः च्वनां । अनेक प्रकारयापि भंग पंछि वनजन्तु धयापि सिंह, व्याघ्र, भालु, चितुवा, चला आदि सकसिननं थःथःगु इच्छथे नया, त्वना बरो आनन्दं म्हिता च्वन । अथ्येतुं उगु बगैचास अनेक फलमूल स्वाँया भाल जुयाः च्वनां च्वन ।

हे मैत्रिय उगु बगैचाया दथ्वी अगाध धयागु तःगागु गाः छगाः दुगु जुयाः च्वन । उगु गाःले अथ्य थथ्ये धका अगम्य काय्मफू । व गाले दंकहे नाः दया पुरे जुयाः उगु नाः लं सिमा बुया वया तःमाजुयाः वहे सिमाया हः कचा हाया वना घञ्जां तोपुया ख्यउंस्य च्वनां च्वंगु दु । थाय्थासे ल्हो आदि दया व ल्होयागु सिलिन्हचावया च्वंगु दु । हानं व गाले जलौका धैपि की, पतंग, सुल्फ्या आदि दया अन्धकार जुयाः च्वनां च्वन । उजागु थासे च्वे बुया वया च्वंगु बरो तमाःगु तितू सिमा छमा दया उकियागु कचा आपा दया तितूसि फल आपा सयाः उगु कचां फय् मफयाः व गाले धाके जुयाः तोपुया उगु गाः खनेहे मदया च्वनाच्वंगु दु । पुनर्वार तृण धयागु न्हाय्कं भाः घाय् आदिं भ्याम्मं तोपुयाच्वंगु दु ।

हे मैत्रिय थथिंजागु बगैचाया अधिपति जुयाः च्वंम्हः सुधाःसा छम्ह बोधिसत्वया अवतार कयाः च्वंम्ह सकल माकयाः राजा जुयाः च्वंम्ह धर्म कुवलाक्ष धयाम्ह माक छम्हः वहे बगैचाय् च्वनां श्री त्रिरत्नयागु सेवायाना च्वनाच्वन । गजागु प्रकारं सेवायाना च्वन धाःसा न्हिं न्हिं तीर्थे स्नान याना उगु बगैचायागु स्वां सिसा फल खाना हयाः श्री त्रिरत्नयात चन्हे याना थःगु काय्, बाक्, चित्त शुद्ध याना न्हिं स्वको मोल्हया वरो एकचित्त बोधिब्रत धारण याना तपस्या याना च्वन ।

हे मैत्रिय थुकेयागु पुण्यया प्रभावं व कपिलाक्ष धयाम्ह माकया उगु बगैचाय् फलफूल स्वां आदि आपालं वन्हे ज्वीका सम्पूर्ण पंछिगणपिं फुक्कहे आनन्द मनोहर जुयाः स्वर्गे इन्द्रयागु नन्दन बगैचाथ्ये तुल्य ज्वीका च्वन । छन्हुयागु दिने पांचालदेश धैगु पनौति देशयाम्ह ब्राम्हण छम्हेसिया सातेगु छगू बथानहे हयाः भवया ववं उगु बगैचाया सिथे थ्येन । अकस्मात् उगु बगैचाया कालं भालु छम्ह पिहां वया व भालुं सायात ज्वनेत्यन । थ्व स्वयाः ग्याना व सात फुक्कहे न्हचपं तितिं स्वाका विशब्दं विशब्दं हालाः उख्ये मदयेक विस्सुवन ।

हे मैत्रिय, अथ्ये व सात विस्सुं वंगु खना थ्व स्वयाः व ब्राम्हणं थःम्हं जोयेहयापिं सात मदुगु खना बगैचाय् द्वाहांवना न्यंकनहे माला स्वत । थथ्ये माला स्वो जुजुं जुजुं क्रमैसित वना च्वचों च्वचों अन उभान धगु बगैचाया दुने दथ्वी लाःवन । उगु थासे धालसा स्वांमा फलफूलमा सहित जुयाः च्वंगु अजागु थाय् खना व ब्राम्हणया आपालं त्यानुगु लगेजुगुलिं नेगु तृष्णां जुयाः अन हे हाया वया च्वंगु फलफूल कयाः ननं ननं क्रमैसित अन बगैचाय् द्वाहांवना च्वन । थथ्ये व ब्राम्हण सा माले धका मावोम्हः उगु फलफूल नेगु रसे भुले जुयाः ववं ववं उगु तितू सिमायागु न्हचोने थ्येक वन । थथ्ये व ब्राम्हणं अन स्वोवले अत्यन्तहे वांलाक पाके ज्वीक सया च्वंगु तितूसिमा खनः । थथ्ये खनेसात, व ब्राम्हणं उगु तितूसि खाना नल । थथ्ये ननं ननं उगु रसे भुलेजुयाः ववं २ अन अगाध जुयाः च्वंगु दहंया फुसे थ्योक् लाःवन । वथासे उगु सिमाय् तितूसि तसकहे सया कचाहे फय्मफयाः लचके जुयाः क्वछुना वया च्वन । थ्व सोया व असंतोषिम्ह ब्राम्हणं उगु क्वछुना वया च्वंगु कचाखना वहे कचास ज्वना थाहाँ वने धका न्हचाय मदु २ व कचा ज्वना उगु तितूसि खाना नेत सन । उगु वखते दैव संजोग व ब्राम्हणं तःगु कचा छगुलीं पालेथ्ये तोधुला वया उगु अगाध जुयाः च्वंगु दहने कुतू वन ।

हे मैत्रिय, थथ्ये कुतू वना उगु दहने दुने भुतुनाले लाना तुना वना च्वन । थयोगु वखते व ब्राम्हणया अथ्ययाय् मदयेका अमलं कःम्हथ्ये ज्वीका मिखा ख्यल्लहीका अजान्य ज्वीका मूर्छा जुयाः च्वन । पलख जास्येलि चेष्टादया थःगु मन जक भारा मिका धाल । हाहा थौ जित गथ्य जुल गयोगु थासे लात । थुजोगु अन्धकारं ख्येउस्ये च्वंगु धका निपाल्हातनं पत्ति २ याना स्वत । थथ्ये स्वःवले गनं २ भ्यतिना, गनं २ लः दु, गनं २ ल्वहं दु, गनं सिमाहः आदि दया चों थजागु थासे सापहे बल पिकयाः सिमाहःया द्वे च्वनां उख्ये थुख्ये स्वया धाल । अहो आश्चर्य, थ्व छुजुगु थन जिं छुहे खने दुगु नं मखु । थ्व छु धैगु थाय् सपना जक खःला सपना धायत जि न्हचो वःगुहे मखु धका हालाः च्वे क्वे जवं खवं च्वयाः ल्हातं खिना ताउविक स्वयाः चोंवले सिमा कचाया होतं नौयागु प्रमानं आकाशयागु तुयूजः भतीचा खनेदन । उवले व ब्राम्हणया मनं भापिलकि हाहाः थ्वजा अगाध दहंया गाले कुतू वंगु खनिः जि असंख्य लोभिम्ह असंतोषी जुयाः थजागु गाले दुना च्वने माल । आः थ्व गालं गुवले जि उत्रे जुयाः वनेफै आः जित सुनां थकयावी । थौं जिगु छे माँ वौः, स्त्री, पुत्र, पुत्री दया च्वंगु दु ।

थुमिगु ख्वा: गथ्येयाना स्ववने । हाहा दैव हे भगवान् धका थथ्ये हाला: च्वन । अयोगु बखते वैत अनगाले च्वपिं की पतङ्गतयसं वया हुन्तू हाला: तोपुया हि तोना न्याना च्वन । मेपिं जलौका धैपिं सुल्प्या आदिपिसनं हितोना न्यानाहे च्वन थथ्ये न्यागुलिं उगु वेदना सहायाये मफया: थ्व ब्राम्हण तस्सकं हे अति बिशब्दं २ ख्वया: आयामा २ आयाबावा २ धका थथ्ये हाला: ख्वया: हाहा जित आ: थुगु थासं थकया रक्षा याना बीम्ह भगवान् सु वइथ्ये हे भगवान् धका हाला: च्वच्चं २ प्यन्हु च्यान्हु दस्येलि थ्व ब्राम्हणया शरीरे प्राण जक बाँकी ज्वीक अन च्वपिं कीतयसं न्याना न्याका थयोगु प्रकारं दु:ख भुक्तमान याना च्वन ।

छन्हुया दिने वहे बगैचायाम्ह, अन बास याना च्वम्ह धर्मकुवलाक्ष माकनं थ:गु नित्याचार सिधेका अन उभान बगैचाय् न्यंकनहे बिचार याना अनेक प्रकारया स्वाँ थ्वया सिसाफल खाना गुम्ह श्री त्रिरत्नयात पूजाभाव याना चन्हे याना स्तोत्र प्रदक्षिणा याना थ: इच्छा जुथ्ये फलाहार याना बरो एकचित्त हर्षमानं याना उगु बगैचाय् म्हिता जुल थथ्ये म्हिता न्यंकनं स्वया: ववं ववं उगु अगाध दहंया समीपे थ्ये वन ।

हे मैत्रिय, उगु समय व गाले कुतू वना च्वम्ह ब्राम्हण छम्ह बरोबर ख्वया: हाला: हया: च्वंगु शब्द ताया थुम्ह कपिराजा जूसां व हाला: ह:गु, ख्वया: च्वंगु शब्द न्यना तीजक उगु गाले थ:गु न्हाय्पं दिका न्यना स्वत: । अथ्ये न्यना थनहे ख: धैगु सीका अहो आश्चर्य थ्व छु ख: न मनुष्य ला, भूत ला, प्रेतला, पिशाचला सुख: थ्व धका क्व स्वया: थथ्ये धया: छोल । अरे छ सु हं आंकन छाये च्वनागु ख: धका थथ्ये न्येगु शब्द ताया व अगाध गाले च्वनां ब्राम्हण च्वय् थस्वया: बिन्ति याना हल ।

हे परमेश्वर, हे प्रभू जि मेपिमखु, जि छम्ह मनुष्य ब्राम्हण ख:, छुयाये तितूसिया लोभयाना थयोगु अगाध गाले च्वनां च्वने माल । हे परमेश्वर ! जि थुगु गाले च्वनां च्वनागु तन्हुहे दत हे प्रभू जित थ्व गालं थकया याकनं हे उद्धार याना बिज्याहुँ । हे दैव छल्पोलयात नमस्कार धका थथ्ये बिन्ति याना धा:गु खँ न्यना थुम्ह धर्म कुवलाक्ष माकनं धया: छोल । हे मानव आमजोगु थागा मदूगु गाले कुतूवना च्वम्हेसित जिं गथे याना छन्त थकायेगु धया: छोल । थ्व खँ न्यना हानं बिन्ति याना धाल । हे प्रभु, हे ईश्वर छःपिसं न्हचागु जतन यानासां जित याकनहे छक उद्धार याना बिज्याहुँ । धका तसकं हे ज्वरं ख्वया: बिन्ति याना ह:गु उगु खँ न्यना थुम्ह कपिराजा माकया मने अतिहे दया करूणा वना बिचार याना स्वत: । खजा ख: आतुर परेजुया: च्वम्हयात उद्धार यायेगुहे त:धंगु धर्म ख: । उलि जक मखु सिना च्वम्हेसित जीवनदान बीगु जुल । हानं थयोगु २ परेजुया: च्वपिन्त उद्धार याये धैगु जुल । थ्व तधंगु धर्म ख: धया: त:गु दु । आ: थ्वैत नं तसकं हे आपत ज्वीका सिनाहे च्वम्ह धा सा छुमपा: उकें थ्वैत जिं थ्व जिगु ज्यूयाहे माया मकासे याकनहे उद्धार याये थुगु पुण्य जित त:धंगु धर्म दइ धका मने ल्वीका थथ्ये धया: छोल: ।

हे ब्राम्हण छःपिन्त फ:सा जिं उत्रे यानाबी तर मनुष्य धैपिं विश्वास मदु । अथेया निंति छँ विश्वास घात याये मखु ख:ला हे मनुष्य धका धया: छोल । थ्व खँ न्यना ब्राम्हणं धाल हे त्रैलोक्य नाथ ईश्वर जित उद्धार याना व्यूम्हेसित जिं गथे याना विश्वासघातक याशी । न्यना मात्रनहे अपराधगु खँ थौं पाप कर्मयाना नाप थथिगु दु:ख सिया पापे दुबिना च्वने माल धया: अन्योगु पाप कर्म मनया जूम्ह छु गति ज्वी । नरकवास घातक याये दैमखु । याकनं जित उद्धार याना बिज्याहुँ

धका विन्ति याना धाःगु खँ न्यना पुनर्वार कपिराजं धयाः छोट । हे मानव आमथ्ये जुस्येलि छ हथाय् चायमते छन्त जि उद्धार याना वी धका धयाः थःगु मनं विचार याना स्वल ।

आः थ्व गाले क्वाँ वनेत छुं सामान मदु छुयासा थिकज्वी धका विचार याना स्वबले छगू विचार जुयाः वल । आः थ्वहे सिमाया कचा जोना तिं न्हूया थुख्ये उख्ये, उख्ये थुख्ये याना सिमाय् जुना निक स्वक तिंन्हूया स्वबले अन च्वंगु ल्होते जूवने अथ्य जुयाः वैत लकूछिना तिंन्हूया थुख्ये च्वंवे धका थःगु मनं विचा याना तगोगु ल्हो पाछाया तिंन्हूया उगु सिमाय जुना व ब्राम्हणयात स्वयाः मनं मनं धाल । थपागोगु ल्हो छग पाछाया तिंन्हूया स्वयाला थनथ्येक वेफु धास्येलि थ्व मनुष्य छम्हेसिगु गुलि हे बोज दयि धका आपा दःसा थ्वहे ल्हो छगया ब्वतिमखा दयि धका मने तयाः अन बगैँचायागु फलफूल नेगु ज्वना व कपिराजां थ्व ब्राम्हणयात दया तयाः काः जिवे धुन धका उगु गाले क्वाहाँ वना थ म्ह ज्वना वनागु फलफूल वियाः नकल । थथ्ये व ब्राम्हणं उगु फलफूल नयाः नेधुंका उम्ह कपिराज धर्म कुवलाक्षयात नमस्कार याना च्वन ।

थुगु वखते थ्व कपिराजां व ब्राम्हणयागु कपाले ज्वना धाल । हे मानव दँ हथायचाये मते छन्त उद्धार यायेत वयाम्ह जि दु । आः छ जिगु म्हे च्वनां क्वातुक ज्वना मिखा तिसिना च्वनावा धका थुम्ह कृपावन्त जुयाः च्वंम्ह धर्मकुवलाक्ष कपिराजां थःगु म्हे च्वंगु दक्वहे बलपिकया तिंन्हूया उगु गाःया च्वसं च्वंगु सिमाय जुत । थुगु प्रकारं न्हेकति तिंन्हूगु वखते व अगाध दहंया गालं तरे जुयाः थाँवया आनन्द पूर्वकहे व ब्राम्हणयात क्वेतया फलमूलादि तृप्त ज्वीक नकाः वैगु शरीरे हि त्वना न्याना च्वपिं सुल्प्या आदि लिक्का बाँलाक विचायात । थुगु वखते व ब्राम्हणयात धाल कि हे मानव छन्त थकयागुलिं जि सापहे बल तुते जुल परिश्रम जुल उख्ये जि सापहे न्हचोवल । आः भतिचा देना च्वने छं जित छक विचायाना स्वयाच्च । थन थुगु बगैँचाय धूँ भालु, किसि आदि वनजन्तुया भय दु । छं भतिचा थुलि होस याना च्वं । जि छक दने धका व ब्राम्हणयात धाल । व खँ न्यना ब्राम्हणं धाल ।

हे प्रभू छःपि जिगु म्हे दना विज्याहुँ धका थःगु मुले व कपिराजयात थेन । थुम्ह कपिराजाया मने छुंहे कैफियत मतस्ये निसंकाहे व ब्राम्हणयागु मुले गोतुला आनन्दं न्हचोवेका च्वन । न्हचोवेका च्वंगु घौ निघौ प्यघौ जास्येलि व ब्राम्हण थथ्ये मने ल्वीकल । हाहा थौं जि छेँ वना पुत्र पुत्रिपिनिगु खाः गुबले स्व वने दइथ्ये, छेँ धालसा आपाहे तापानी थौं जित छेँ थ्येक सुना तयाः वी । जि थः थःम्हं वने धालसा तसकहे दुर्वल जुयाः च्वनतिनि बमलानि । जिगु म्हे छुंहे मन्त हि दक्वहे जलौका, सुल्प्यां न्याना फुयि धुंकल । मेपिं कीतेसंनं हित्वना मदये धुंकल उख्ये जि न्यासि वनेगु सामर्थ हे मन्त । आः छुयायेगु थन वने च्वंगु फलफूल जक नयाः जित छु तागत दै थुलि तक नयेमखना गौंसिज्वी धुंकल जि थथ्ये निर्वल जुयाः च्वंम्हस्ये थुगु शरीर बलाका गथ्ये थ्वदुर्गावनं तरे याना वनेफै । उख्ये थ्व दुर्गावनं तरे ज्वीत थ्वहे माकयागु ला नये दःसा जक जि बलाई धका थथ्ये मने ल्वीका थःके मुले आनन्दं दना च्वंम्ह माकयात तीजक मचाय्क वैगु छुयो बेंदिका क्वेतया आः बिस्तार याना च्वने मजिल, वखत थिक जुल । धका मति तयाः निश्चय याना व दूरात्मा चन्दाल मनं जुयाः च्वंम्ह लोभं करूणा चित्त मदया च्वंम्ह व ब्राम्हण दुर्वल जूसां नं लोभया बसं तोजक दना म्ह थररं खाका खाका ल्हाः जक फेररं खाका तग्वगु ल्हो छगः कयाः हयाः उगु ल्होतं म्हुया व कपिराजायागु छचोने ताके याना बरो बेगं हे प्रहारं याना कयेका बिल । थ्व लोके नेपित्याम्हेसिनं छु जक मयाइ ज्याया अनुसारं हरबरे जूगुलिं छता दुर्वल जूगुलिं, निता बिक्ल जूगुलिं, स्वता थुकेयाना

व ब्राम्हणं केकूगु ल्हों व माकयात स्यायेत मलास्ये न्हचलं चायेकेत जूवन । व वलं अथे ल्होंत च्वूसानं व माकया छ्चों चूर्ण मजू वैगु धर्मया प्रभावं वैत छ्चोंने मलासे आत्मा दुम्हस्ये मि सहितगु वज्जथ्यें तचोगु शब्द वेक मेगु ल्होंते जूवन । उगु ल्होंयागु शब्द न्हचलंचाया वाथाक दना सुनां केकलथ्यें धका तिन्हुया उख्यें थुख्यें न्हचलंचाया वाथाक दना सुनां केकलथ्यें धका तिन्हुया उख्यें थुख्यें स्ववले वहे ब्राम्हण छम्ह हायेकासवाय मेपि सुंमखँ ।

अयोगु वखते थ्व ब्राम्हण जूसां म्ह थररं खाका, ख्वाः वँचुसे च्वंका, भुयूचःति हायेका ग्याका च्वंम्ह थुम्ह ब्राम्हणयात स्वयाः थुगु प्रकारं न्यका धाल । अरे चण्डाल पापात्मा विश्वासघतकम्ह मनुष्य छँ जित प्रहारयात । हे पापात्मा धका थुम्ह धर्मकुवलाक्ष माकनं धाःगु खँ न्यना व ब्राम्हण ल्हाः विन्ति याना धाल । हे ईश्वर, हे प्रभू क्षमा याना विज्याहुँ । मेता कारण मखु छ्चिपिन्त प्रहार यानागु । जि सारि हे दुर्वल जुयाः छें वनेगु सामर्थ मदया जि याकनं वल्लाकेया निम्ति छ्चिपिंगु शरीरयागु क्वाःगु ला, हि नः साजक जि बलाना याकनं छें वने फैं धका मती तयाः जिन छल्पोलयागु शरीरे प्रहार यानागु खः । हे प्रभू धका थथ्ये विन्ति याना च्वन । थुलि विन्ति याना धाःगु न्यना कपिराज बानर राजां धाल ।

हे दुष्ट, हे पापात्मा धिकार छंगु जन्म छंगु ख्वाःजकहे स्वे मत्योः थुक् धका फुकलं विल । हे पापिष्ट छँ विश्वासघातकयागु प्रभावं छँ थ्वयासिकन तच्चंगु गाले, नर्के कुतू वने मालितिनि धका थथ्ये धयाः उगु थासँ ल्याहाँ वन ।

हे मैत्रिय, अनलि थुम्ह कपिराज माकनं मने ल्वीकलकिः अहो आश्चर्य थ्व पापात्मा विश्वासघातक ब्राम्हणयात जूसां जिहे वयागु छें तक तेयेंके छाये धाःसा अधर्मियात धर्म जिते यायेमाः श्री त्रिरत्नदेवतां विचार याहेयाइनि धका मने तयाः व ब्राम्हण कानु जिं छंगु छें थ्येंकहे छन्त तयावी, जिगु म्हे च्वं वःका धयाः लुकू छिना व ब्राम्हणयागु छें थ्येंक लिक च्वंगु गामे छ्छथाय् त्वःता थुम्ह कपि धैम्ह माकःया राजा अनं लिहाँ वया आनन्दं श्री त्रिरत्नयागु भक्ति याना च्वन ।

हे मैत्रिय, अनलि व पापात्मा विश्वासघातक ब्राम्हण उगु गामं थःगु छें थ्येंक वना सकल जहान परिवारपिं च्वनां कुशल वार्ता याना थःम्हं दुःख सिया वैगु खँ, कपिराजां उद्धारयागु खँ, उम्ह कपिराजायात अपराध यानागु खँ फुक्क कना आनन्द च्वनां च्वन । थथ्ये च्वच्चं २ निला प्यला दया वस्येलि व ब्राम्हणया शरीरे अकस्मात् म्हे फ्वात २ वैगु चिमं कुष्ठ रोगं थिया क्रमथ्ये धाः जुयाः उगु धाःलं न्हिं हि प्याहाँ वया । क्रमथ्ये वच्चे जुयाः कचिला धोगिथें धोगिना तूदाया नवया वल । अथ्ये वयागु शरीरे सर्वाङ्गहे स्येना धोगिना दुर्गंध नवया जलः खःलाः त्वाले नापं हे व्याप्त ज्वीक नवया अनत्वाले च्वपिं गुलिं थःगु छें त्वःता परयागु छें च्वंवन, गुलिसिया उगु शरीर धोगि नवगुलिं नेगुहे रूचि मजुयाः रोगं कयाः वल । गुलिसिया वाँकि थयाः वान्ताजक याना च्वपिं । थुगु किसिमं उगु त्वाले च्वनां च्वपिं सकसिनं हे नवगुलिं शरीरे रोग ज्वीका सकसियाहे दुःख ज्वीका च्वनाच्वन ।

हे मैत्रिय, अथ्ये व विश्वासघातक पापिया परिवारं वयागु लागि अनेक उपचार याना शान्ति स्वस्ति याना पूर्व संकल्प आदि अनेक दान धर्म सहित याना देव देवतापिन्तनं पूजा भाव याना विल नं छुं हे उपचार लगे मजू । वयागु कर्म फलं जूगु जुयाः नितिं वैत भन भन हे उगु रोगं ग्रस्त जुयाः न्हिं न्हिं हे व रोग वच्चे जुयाः छसिनंसेहे वैगु शरीर त्यादया, मिखा निगः जक पुलु २ कना म्हुतु छप्वा जक आयामा २ धका हालः फसिथ्यें छ्छवारा जुयाः च्वन ।

हे मैत्रिय, थथ्ये दुष्ट पापात्मायात तःधंगु कुष्ठ रोगं केकाः ल्हाः तुति मदयेका म्हया आकार मदयेका स्वास छगू जक वाँकी ज्वीक महा नरके चवनां चवन । अथे जुयाः चवनां च्वंगुलिं व देशे तसतहे दुर्गन्ध फिजे जुयाः समस्त देवतागणपिं जुल, लोकजनपिं जुल, उगु थासे चवने मफयाः भ्रष्ट जुयाः रोगं कयाः सम्पूर्ण हे थः थःगु छे त्वःता प्यहाँ वल । हे मैत्रिय छम्ह निम्ह जल खल त्वाया दार्जुकिजापिसं जक व विश्वास घातक ब्राम्हणया परिवारपिनिगु न्हचोने वना थुगु प्रकारं धाल । हे ब्राम्हणपिं आम पापात्मायात थन तयेमते आम वैगु शरीरयागु दुर्गन्ध यांना आपालं लोकापिं थुगुत्वा (अर्थात्) थुगु थाय् त्वःता थःगु छें नापं त्वःता मेमेगु त्वोले चवने धुकल । हे ब्राम्हणपिं थ्वैत छिमिसं माया काये म्वाल । याकनं हे थ्वैत तःधंगु दूर जंगले वायरीकः आम पापात्मायात । छिमिसं न्हचाकोहे उपाय याःसां रक्षा जुइमखु । वं यांना थःगु पापयाक्यें सकल देवतापिं फुक्कहे कोप जुयाः विज्याना च्वंगु दु । हे ब्राम्हणपिं छिमिसं राजा याके आज्ञा कयाः याकनं हे वैत दूर जंगले वाकेछो धका न्हि न्हिहे धावःगु खँ न्यना थ्वया परिवारपिसनं व पापिष्टयात स्वयाः चवने मफयाः नवया घचाया थिथिहे खँ ल्हाना सकल दाजु किजा पुत्र पौत्रापिं सकसिनहे राजाया थाय् जाहेर यावना राजाया आज्ञाथ्यें थुम्ह पापात्मा विश्वासघातकयातः निम्ह स्वम्हसिनं कुविया उगु थासं यंका महादूर वने सूर्ययागु किरण हे मदुगु थासे अघोर वने दुने वाना त्वःता लिहाँ वल ।

हे मैत्रिय धका श्री शाक्यमुनि भगवानं आज्ञा दयेका विज्यात ।

थ्व खँ न्यना मैत्रिय बोधिसत्त्वं हाकनं विन्तियात । हे भगवान् सर्वज्ञ थ्व महारोगीयात वने वाना थकुस्येलि छुजुलले गथे जुलले हे भगवान् प्रभू व उखुनुहे सितला अथवा वनजन्तुतेसं नलला सुं देव देवीपिंगु थासे लाना उद्धार जुलला गथे जुल । हे भगवान् जित आज्ञा दयेका विज्याहुं धका थथ्ये विन्ति यांना चवन । थुलि विन्ति याःगु न्यना श्री भगवानं थथ्ये आज्ञा दयेका विज्यात ।

हे मैत्रिय, व कुष्ठ रोग जूम्ह पापियात छुजुयाः चवन धाःसा उगु वन छगूलिहे व्याप्त ज्वीक आयाम २ धका हालाः ख्वयाः अति दुःख ज्वीका ग्वारा २ तुला जुयाः चवन । अथ्ये हालाः ख्वयाः जुलनं वैत अन वने च्वपिं जनावर सिंह, धूँ, भालु, किसि, चला आदि जन्तुतेसं सुनानहे थ्यू जकहे मवों । भन थ्व पापात्मा दुथाय् वने मच्चंसे मेगु थासे विस्सू वनीगु । हानं थ्व कुष्ठरोगी पापीं गन २ व न जनावर चवनां च्वंगुख अन २ हे थःत नकेत ग्वारा २ तुला इमिथाय् न्हचोने वनी अथे वःगु खना व जनावरत फुक्कहे त्रासं ग्याना विस्सू २ जुयाः चवनी ।

हे मैत्रिय, वथ्येनतुं उगु वने चवनां थः थःगु स्वर पिकया हालाः च्वपिं भंग पछिगणपिनं व पापी कुष्ठरोगी वन हे थ्वक आया २ धका हालाः च्वंगुलिं थुपिन फुक्कहे मेगु थासे व्वया च्ववन । हानं अन वने पुस्करिणी धयागु पुखू दया निर्मल जुयाः अत्यन्त वास वेक ह्या च्वंगु पलेस्वाँ, उफोस्वाँ, पारिजात स्वाँ, केतकिस्वाँ आदि ह्या भ्रमरगणपिसं रस कयाः चवनीगु अजागु नं फुक्कहे व कुष्ठरोगीयागु दुर्गन्ध यांना थ्व स्वाँतनं भवाःजुयाः वना विशोभा जुयाः वना चवन ।

हे मैत्रिय, अथ्ये हालाः ख्वयाः च्वंगु तन्हुमछि हे दया वसेलि छन्हु पांचाल देशयाम्ह राजाया मन्त्री काजी, भार्दार प्रमुखं असंख्य सैन्य सिपाहि सहित यांना सिखार म्हित वःगु जुयाः चवन । अथ्ये व राजाया सिखार म्हिता ववं २ छन्हुया दिने व कुष्ठरोगी ब्राम्हण चवनां च्वंगु थासे वने लाःवन । उगु वखते व कुष्ठरोगीया शरीर धोगिना अत्यन्त दुर्गन्ध नवया चवनां च्वंगुलिं फिजे जुयाः चवनां च्वंगुलि उगु वनस वनचर आदि सूं हे खने मदया राजां जूसां आज्ञा दयेकल ।

हे मन्त्रीगणपिं थनजा अकस्मात् हे महा अघोरं दुर्गन्ध वल । अति भयानकं हे आयामा २ धका हालानं हया च्वंगु शब्द वया च्वंगु दु । थुगु बनेजा जन्तु धैपिं सूहे खनेनं मद्दु, अतिहे भयानक जुयाः च्वनां च्वंगु दु । थ्व छु हेतू जुयाः च्वंगु । हे मन्त्रीगणपिं काः छिमिसं चाःहिला परीक्षा यानासो धका आज्ञा देकूगु न्यना अन बने वना थाय् थासे चाःहिला माला स्वोबले व कुष्ठरोगीया थासे लाःवन । व स्वयाः राजायात जाहेर याना कँवल । थ्व खँ न्यना राजा आदि सकलें वना स्वःवंबले उम्ह कुष्ठरोगी गजाम्ह जुयाः च्वन धाःसा अत्यन्त भयानकम्ह हचाउँसे, वँचुसे च्वंम्ह ल्हाः तुति मद्दुम्ह ल्होथ्ये छग्वारा जुयाः तुंजक वायां २ दायेका मिखा निगः जक पुलु २ कना आयामा २ धका हालाः च्वंम्ह व पापिष्ट ग्वारा २ तुला वया राजाया थाय् न्हचोने जित रक्षा याना बिज्याहुँ धका हाला च्वन । थ्व स्वयाः राजा आदि सकलें आश्चर्य चाया न्यन ।

हे मन्त्रीगणपिं थ्व सु खः, भूतला, प्रेतला, पिशाचला, राक्षस, मनुष्यला थुपिं सुज्वी धका धाःगु आज्ञा न्यना व पातकियाके न्यन । हे पापिष्ट छ सु खः गुम्ह खः जिमिगु बिचारं स्वे बलेला छ छम्ह महापातकि मनुष्यथ्ये च्वं खःला ? छंगु जात छु ? नां छु ? छें गन ? धका थथ्ये नयंस्येलि, थ्व खँ न्यना हे महाराज पांचाल देशयाम्ह ब्राम्हण खः । जि परिवार स्त्री, पुत्र, पुत्री आदि सकलें जीवित दया च्वंगु दनी । जि साभो वया बले व सात फुक्कहे बिस्यूवना जिं माला स्वोवना बले सा छम्हहे ल्वीके मफू ववं २ छगू बने छथाय् तितूसिमा दुगु थासे थ्यन । अन उगु तितूसिया लोभं याना उगु अगाध दहने कुतूबना धर्मकुवलाक्ष कपिराजां उद्धार याना बिल । वहे कपिराजयातनतुं जिं अपराध याना वया, वहे नतू जित छेंनं तवल । थयोम्हयात जिनं अपराध याना वंगुलि, थौं जित थथे कष्ट ज्वीका थयोगु बने च्वनां सास्ति नयाः च्वने माल । हे महाराज धका थथे बिन्तियात । व खँ न्यना राजाया मने अति करूणा वना धाल । हे अपराधि, हे पातकि छं तःधंगु दुष्ट कर्म याना वल । उगु पापं छ थथ्ये ज्वीका च्वने माल । हथाय्चाये मते, छं एकचित्तं श्री त्रिरत्नया नां लुमकि जिं छन्त उपदेश बी । हे पातकि ब्राम्हण, थनं उत्तर दिशापाखे हिमालया क्वसं नेपाल धैगु नगर छगू दु । अन उपछण्डोहपीठ धयागु अजागु पुण्य स्थाने श्री स्वयम्भू ज्योति रूप भगवान् थःथे थःम्हहे प्रकाश जुयाः जाज्वल्यमान बिज्याकम्ह हानं खगानना श्री गुहचेश्वरी आदि देवदेवीपिसं बासयाना श्री सम्बरया आकारन अति शोभा दयाच्वंगु हिमालयया दक्षिण भागे बागमति व मणिरोहिनी त्रिवेणी संगम जुयाच्वंगु शङ्कर तीर्थ धका नां प्रख्यात जुयाच्वंगु दु ।

उगु तीर्थे शंखपाल धैम्ह नागराज बास यानाच्वंगु अजागु तीर्थे वना नीछन्हुयंकं स्नान याना मोल्हुया एकचित्तं श्री त्रिरत्नया नां कया, षडक्षरी मन्त्र जप तप याना देवतापिन्त तर्पण बियाः पितृयातन तर्पण याना, बालुकायागु चैत्य दयेका थःम्हं फुथ्ये पंचोपचार पूजायाना धारणीस्तोत्र आदि बोना सेवायात धालसा आम छंगु शरीर दिव्य देह जुयाः वइ । हे ब्राम्हण ! छन्त जिनं उपदेश बी धुन (अर्थात्) आमकेयागु वास जि कने धुन । थुलि मयाय्कं छंगु पाप कतेज्वी मखुत ।

हे ब्राम्हण हानं छं थ्व मयास्ये मेमेगु धर्मयात धाःसाः न्हचागुहे याःसां आम छंगु पाप कतेज्वी मखु । उगु शङ्कर तीर्थयागु लखँ जक म्हे हाहा याना बियाः मात्रनं हे पंचेन्द्रिय जिते जुयाः शुद्ध देह जुयाः वइ । उगु लखँ मिखा जक पियामात्रनं तेज प्रकाश जुयाः सुदृष्टि ज्वी । हे ब्राम्हण, काः छ फःसा अनहे हुँ, मफुसा श्री त्रिरत्नया नां जक कयाः मात्रनं छन्त उद्धार ज्वी । हे ब्राम्हण धका आज्ञा दयेकुगु न्यना थथ्ये बिन्तियात ।

हे महाराज धन्य २ छल्पोल, छल्पोलया कृपां अमूल्य तुल्य जुयाः च्वंगु शङ्कर तीर्थयागु महात्म
न्यने धुन । थुलि जिं न्यना मात्र हे जिगु पाप नाश जुल । थौं देवता धाःसां छःपिं, गुरू धाःसां छःपिं
हे जुल । हे महाराज छःपिन्त जिं कोटि २ नमस्कार । छल्पोलपिसं जि पापिष्टयागु उपरे करूणा
कृपा तयाः उगु शङ्कर तीर्थे छक थ्येकाव्यू धका बिन्तियागु खँन्यना दया तयाः करूणा वंका थःम्ह
सैन्य सिपाहियात सःता धाल । हे सिपाहि छिमिसं थ्व पातकि ब्राम्हण्यात कुबिया नेपाल मण्डलय्
बागमती, मणिरोहिनी संगम जुयाः च्वंगु शङ्कर तीर्थया दोभाने यंका त्वःता थकि धाःगु आज्ञा न्यना
अनेक बने च्वंगु गुंखिपः कयाः हयाः थुम्ह विश्वासघात ब्राम्हण्यात उगु गुंखि चिना निम्हेसिनं
कुबिया तत्कार्ना उगु शङ्कर तीर्थे थ्येके हल ।

अन थ्येका व ब्राम्हणं राजां आज्ञा जू थ्येतुं एकचित्तं ओं नमो बुद्धाय, ओं नमो धर्माय, ओं नमो
संघाय धका श्री त्रिरत्नया नां कयाः तपस्या याना च्वन । अथ्ये तपस्या याना च्वच्चं २ नीछन्हु
दयावस्येलि व कुष्ठरोगी पापी ब्राम्हण्या शरीर चुलि जाया क्रमैसित ल्हाः तुति दयावल ।


हे मैत्रिय, अथ्ये थःगु शरीर चुलि जाया वःगु खना मने अति हर्ष जुयाः थथे धाल । धन्य २ तीर्थ
धयागु महापुण्य स्थल खः । जिनं तपस्या यानागु नीछन्हु तिनिदत जिगु अघोर पाप फुना शरीर
चुलिजाया वल, धन्य २ श्री त्रिरत्न देवताया नां कयाः न्हापा स्वयानं एकचित्त मन तयाः न्हिं स्वक
मोल्हुया बालुका चैत्य दयेका जप, ध्यान, पाठ याना पंचोपचारं पूजा यानां थुगु प्रकारं बिन्ति याना
च्वन । हे परमेश्वर ! न्हापा जिं अपराध यानागु पाप याकनं फुका । दिव्य देह शरीरयाना याकनं
सम्यक् संबुद्ध पदवी लायेफेमाः धका कल्पना याना तपस्या याना च्वन ।

हे मैत्रिय, थयोगु प्रकारं तपस्या याना च्वच्चं २ निदं प्यदं दया वस्येलि व ब्राम्हण्या कुष्ठरोग
धैगु रति शुधान्तहे मन्त अर्थात् (मदयेक) सम्पूर्ण पाप नाश जुयाः दिव्य देह जुयाः बोधिज्ञान लाना
शुद्धात्मा जुयाः श्री सूर्य थ्ये तेज प्रकाश ज्वीका उगु हे शङ्कर तीर्थे नतुं हे च्वनां तपस्या याना च्वन ।

हे मैत्रिय, अथे तपस्या याना च्वंगु ताकालं दयावस्येलि छन्हु दैव संजोग उगु हे तीर्थेस मृत्यु
जुयाः वन । थथ्ये व ब्राम्हण उगु हे तीर्थे मृत्यु जुयाः वंगुलिं स्वर्गसं कपिल देवपुत्र धायेका जन्म
काःवन ।

हे मैत्रिय, थुलि गुम्ह मनुष्य नं उगु शङ्कर तीर्थे जुयाः वंगु थथ्ये धका सीका एकचित्त याना,
स्नान, दान, जप, तप, ध्यान, यज्ञ आदि याइ थुजोम्ह मनुष्यपिन्त जूसां निश्चयन मोक्ष फल लाइ
धका श्री शाक्यमुनि भगवानं मैत्रिय बोधिसत्त्व आदि आपालं भिक्षुगणपिं सकल-सभालोक गणपिंगु
न्हचोने थुगु प्रकारं आज्ञा दयेका विज्यात ।

इति श्री स्वयम्भू पुराणे बागमती मणिरोहिनी रूद्रधारा संगभे शङ्कर तीर्थ माहात्म्य
तृतीयोऽध्याय ।



शंकर तीर्थ

धार्मिक परम्परागत वाखं स्वयम्भूराणपाखे वया च्वंगु खःसा थुगु वाखंनय गोपाल धयाम्हः सापू उद्धार जूगु खं उल्लेख जुयाच्चंगु जुल ।

सत्य युगानिसें आतकनं समान रूपं न्ह्यानावया च्वंगु नेपाःया बौद्ध धर्मावलम्बीपिं व नाप नापं सम्पूर्ण नेपामी पिंसं अतिकं श्रद्धा तथा हना वया च्वंगु तीर्थ खः थ्व शंख तीर्थ (शंखमो)।

थौकन्हय् ललितपुर उपमहानगरपालिका वडा नं. ९ स. लाना च्वंगु दु । थुगु तीर्थ, यलया, जन सहभागिताद्वारा न्हूगु पहलं शंखतीर्थ व्यवस्थापन समिति नीस्वना, धर्मशास्त्र अनुसार थीथी समुदायपिनि याइगु परम्परागत तीर्थव्रत निसें कया मृत्यु संस्कार याय्गु समेत सकतां व्यवस्था यानातःगु थौकन्हया व्यवस्थित तीर्थ घाटमध्ये थ्व नं छगू खः ।

वागमति नदी व मणिरोहिनि नदी नाप संगम जुया च्वंगु तीर्थ खः शंकर तीर्थ ।

थुगु तीर्थय्, दिवंगत जूपिनिगु नामं स्वला दइवले लय् पिण्ड थयगु चलनं हाकया च्वंगु दु । नवरथ वनेगु भोलयनं थुगु तीर्थे, स्वन्हु दुकुन्हुं मोह न्ह्यगु चलन अद्यापि दिन ।

थुगु तीर्थय् गुलाबी रंगम्हः शंखपाल नागराज वासयाना च्वना च्वंगु दु ।

पीठ महालक्ष्मी स्थान खः । थुगुतीर्थे पाठ याय्गु आर्य दशभूमिक सूत्र खः ।

थुगु तीर्थ व्रतः सेवा यानागुया पुण्यं नाना उपद्रवशान्त जुया वनिगु खः । थुगु तीर्थे मोह न्ह्यगु स्वांता लवँ जिस्वां खः ।

समय परिस्थितिं थौकन्हय् थुगु शुद्धगु, पवित्रगु, त्रिवेणी, शंकर तीर्थसं मोह न्ह्यगु लः नापं, अभाव जुया, थुगु पवित्रगु तीर्थसं, यल देया उत्तरपाखे च्वंगु बस्तीयागु दक्को थुगु तीर्थे दुर्गन्धं जाया च्वन ।

थौकन्हया न्हूगु समाज भिंगु देश धर्म संस्कृति यात म्वाका तय्या लागि नदी नाला, तीर्थ, शुद्ध याय्गु अभियान चलेयाना जनचेतना न्हयाका वनेमाःगु दु ।

राजतीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

पुनर्वार श्री शाक्यसिंह भगवान् मैत्रिय बोधिसत्वया स्वाः थुगु प्रकारं आज्ञा दयेका विज्यात । हे मैत्रिय ! छं एकचित्त याना न्यं । आहानं राजतीर्थयागु माहात्म्य कनेत्यना । हिमालयया दक्षिण भागया राजमंजरी धैगु व वागमती धैगु निगू मिले जुयाः वया च्वंगुयात राजतीर्थ धका नां जुयाः च्वंगु थाय् छगू दु ।

उगु व तीर्थे वास याना च्वंम्ह नागराजया नां सुरूप धयाम्ह खः । वैगु वर्ण गथ्ये च्वं धाःसा स्वेतवर्ण जुयाः फणि पतिकहे मणि माणिकया तेज प्यहाँ वया अत्यन्त शोभायमानं ज्वीका थुम्ह नागराजां वासयाना च्वनां च्वंगु थयोगु तीर्थे गुम्ह मनुष्यगणपिसं नीः छको यंकहे बरो एकचित्त स्नान याना मोल्हुइ, जप, तप, ध्यान आदि याइ पितृदेवतापिन्त अर्घतनी । अजापि मनुष्यपिन्त निश्चयनं राज्याभिषेक फल लाना राजाहे ज्वीदइ ।

हे मैत्रिय, धका थथ्ये आज्ञा दयेका विज्यागु न्यना हे भगवान् छल्योलया दयां थुगु राजतीर्थयागु खं न्यने दत । हे भगवान् थुगु तीर्थे सु उद्धार जुयाः वन । सुना तपस्या याना वन । हे सर्वज्ञ ! जिमि फुक्कसियां हे थुगु माहात्म्य न्यनेगु इच्छ जुयाः च्वन । हे प्रभु छल्योलं जिमिगु उपरे दया तयाः थ्व खं सम्पूर्ण हे कना विज्याहुं धका थथे विन्ति याना धाःगु खं न्यना श्री भगवानं थुगु प्रकारं आज्ञा दयेका विज्यात ।

हे मैत्रिय, पांचाल धैगु देशया सन्निधाने वन्धुमती धयागु नगर छगू दया च्वन । व नगरे वासयाना च्वनां च्वंम्ह बल धयाम्ह कर्ण सार्थवाह महाजन छम्ह दया च्वन । वया स्त्री वर्ण लक्ष्मी धैम्ह माहाजननी अतिहे प्रतिब्रता धर्मे च्वनां च्वंम्ह । थयोम्ह महाजनयागु छेंस असंख्ये धन दौलतयागु दुकुति पुरेजुयाः च्वनां च्वंम्ह । थःथेम्ह महाजनया स्त्री पुरुष निम्हहे बरो आनन्दं सुख भोग याना च्वं च्वं २ आपालं वर्ष बिते जुयाः वस्येलि छन्हुया दिने वर्णलक्ष्मी गर्भधारण जुयाः बल ।

उगु वखते व सार्थवाह महाजनं थः स्त्री महाजननीया न्ह्योने थथ्ये धाल । हे स्त्री छं जिगु खं छगू न्यो । आः छं थुगु छेंस बाँलाक भिनकहे विचार याना च्वने माल । जि जूसां रत्नाकर वनिज व्यापारया वनेत्यल धका थथ्ये धाल ।

थुलि थः स्वामीयागु खं न्यना वर्णलक्ष्मी महाजननीनं विन्ति याना धाल । हे प्रभू स्वामी क्षमा याना विज्याहुं । छःपिसं थुगु छगूवार उजं दयेका विज्यायमत्ये न्यना विज्याहुं जि जूसां गर्भधारण

जुयाः च्वंगु दु । थथेहे मचा बुल धाःसा छःपिं मदयेका च्वने माल धाःसा जित सुनां बिचा याना ब्यूवै । हे स्वामी धका थथ्ये थः स्त्री वर्णलक्ष्मीयाःगु खँ न्यना महाजनं थथ्ये धाल ।

हे स्त्री छं आमथे धायेमते । मचा बूसा छन्त छुहे अर्के ज्वीमखु । छं नेगु त्वनेगु यथेहे नयात्वना माःगु खर्च याना च्वं धन्दा कायम्बाल । हे स्त्री आः छुयाये जिगु वृतिहे थयोगु मयासे मगाः । थः इष्टमित्र भाइपिं पुलापिं तोतेमज्यू उख्ये थुसिहे मवस्ये मज्यू । छं जिक्कि याये मत्ये । हे स्त्री ! छन्त सेवा तलह याइपिं माःसा थुलिमछि दास दासिपिं दहे दु । छ्वाये धन्दा कयागु जि मदु धका छं नस्य मनस्ये याना च्वने मते, धका बुभ्ने याना नीम्ह स्वीम्ह बनियातेत आपालं मालताल ज्वंका रत्नाकर व्यापार वने धका थःगु छैनं प्रस्थान जुयाः पिहाँ वन ।

हे मैत्रिय, थथ्ये व महाजन प्यहाँ वना लछि निला दया वसेलि क्रमैसित उगु छें च्वंगु धन सम्पत्ति सुना वन (मदयावन) गुलिसिनं हेका यंकल, गुलिसिनं खुया यंकल । हानं गुलिसिके त्याना यंकातगु कायमफयाः वन । थःगु छें च्वनां च्वापिं न वया च्वापिं न सूहे द्वांहामवल । दास दासिपिनं बिस्सू वन । इष्टमित्रपिनं सुं मवल । अथ्य जुयाः व महाजनया छें दक्व अन्न आदि धन दौलत दक्वहे फुना वन ।

हे मैत्रिय, थ्व स्वयाः वर्णलक्ष्मी महाजननीया तसकहे दुःख जुयाः नेगु त्वनेगु सुधान्तहे मदयाः आ जि छु याना जीविका चले याना च्वने, सुना जित बिचा यावै मचा बुई बले जिं छु नयेगु गनकया खर्च यायेगु धका थथ्ये धन्दा कयाः अतिहे विलाप याना च्वन । थथे विलाप याना हालाः च्वंगु खबर न्यना न्हापा थःत मज्यू बले उद्धार याना तःम्ह महाजननीयात भरोसा बियाः थःत मज्यू बले उद्धार याना तःम्ह महाजननी न धन्दा कयादीम्बाः मिहग जित मज्यू बले छिक्किपिस्ये रक्षा याना तःगु दु । थ्व गुण जिके दनी । छित जिं प्रतिपाल यानाते । जिं फुथे बिचार याये धका थुलि भरोसा बियाः धाःगु न्यना हे पासा थौं जित छिसं द्योन न्वं वागुथ्ये धयाः दिल धन्य २ छिक्किपिं धयाः थःगु मन धिर्ज याना दुथे नयाः भुक्तमान याना च्वन धका श्री भगवानं मैत्रिय बोधिसत्वयात आज्ञा दयेका बिज्यात ।

पुनर्वार थुगु प्रकारं भुक्तमान याना च्वच्चं २ थ्व महाजननीया थःगु शरीरे मासै पुरेजुयाः वसेली छन्हुया दिने बालक छम्ह जन्म जुल । गयोम्ह बालख जन्म जुल धाःसा १८ भिंच्याता व भिंच्याता अलक्षण छु छु धाःसा ख्वाः हाकुम्हः संतःपुचिमिस सियूम्ह, छचों तःग्वो खर्बुजाथ्ये च्वंम्ह, मिखाफुसि तिंस्वाः सिंहया थ्ये न्हाय् प्याफःम्ह, न्हेपं किसियाथ्ये बोम्ह, म्हुतुसि तफलाम्ह, कपा निलंगु ब्याम्ह, गःप पत्याहाकम्ह, ब्वो ताहाकम्ह, ल्हापतिहाकम्ह, म्हः बागचाम्ह, प्वा तः ग्वोम्ह, नुगपाः कम्ह, तेफु ताहाकम्ह, मिखा सियूम्ह, लिङ्ग ताहाकम्ह । थयोम्ह भिंच्यातां कुलक्षणं पुरेजूम्ह बालख जन्म जूगुलिं वहे लग्ने, वहे बेलास थ्वया बौम्ह रत्नाकर व्यापार यावना च्वंम्ह महाजनया नं समुद्र पार याःबले अकस्मात् दोंगा नाउँ फातापुला थःम्हं ज्वना वयागु माल मता वस्तु धनद्रव्य दक्वहे समुद्रे कुतूबना दुवेजुयाः वन ।

हे मैत्रिय ! अनलि व महाजनया थःगु बाहु बलं याना ज्यू छगू जक बचे ज्वीका आपालं धनद्रव्य नाश जूल । हानं उख्ये थःगु छें तसकहे अलक्षणम्ह मचा जन्म जुयाः प्यन्हु खुनु दिने अकस्मात् मिदना छें मिनया स्वचा प्यन्हु तकहे उगु मि शान्त याये मफू बल्लं न्यान्हु खुन्हु दुबले तिनि जलः खलपिं सकसिनं याना उगु अग्नि शान्त याना विल ।

हे मैत्रिय, उगु बखते व महाजननीया अत्यन्तहे विलाप याना ख्वया: मचा छम्ह ज्वना छेलि
छगुलि बासयाना च्वन । थुथाय् न्हापा थःत भरोसा व्यूम्ह महाजननीया प्रेमम्ह पासां अथे कष्ट जुगू
स्वयां न्हापायागु गुण लुमंका उखें थुखें वना फोना त्याना हया: व वर्णलक्ष्मी महाजननीयात नका
त्वंका थःम्हं फुथ्ये विचायाना तया: तल ।

हे मैत्रिय, अर्नालि व मचा बूगु भिनिन्हु दया वल जातकर्म याना नां छुत । थ्वैगु नां कालपुरुष
जुल धका नां छुत । क्रमैसित व मचा हृष्टपुष्ट, जुया: तःधिक जुया: बलाना नं वल । उबले
माम्हेसिनं व मचा बोना फोंवन । थथे फोना ननं २ जीविका चले याना हना च्वन ।

हे मैत्रिय, थुगु प्रकारं जुजुं २ लिपा वयात भिक्षा बिया: हःपनि सकसियाहे थःथःगु धुकुतिनं
अन्न, धन सम्पूर्ण हे सुके जुया: फुना वंगुलि आश्चर्य जुया: ज्योतिषया थाय् केना स्वोबले छिसं व
कालपुरुषयात अन्न आदि भिक्षा बिया: छोगुलिं थुकिं याना छिमित सुधान्तहे अन्न आदि नाश
ज्वीका च्वने माःगु धका धास्योलि व खँ न्यना उम्ह कालपुरुषयात सुंछम्हेसिनहे अन्न छगः
लःछफुतिहे व्यूपिमन्त ।

हे मैत्रिय, थथे जुस्येलि व महाजननीया पासा छम्हेसिनं जक उखें थुखें वना ज्यायाना ज्याला
कया हया व कालपुरुषयात, वर्णलक्ष्मीयात प्रतिपाल याना तल । अथे याना च्वंगु खना थुम्ह
पासाम्हेसितनं हेलायाना गिजेयाना धया: अन्न आदिनं ज्या यायेगु सुधान्तहे सुनानं मविल बिया:
महल । अथे वोबिया धया: हःसानहे इपिं सकसितं बोधयाना धया: व्यूपिके कया हया नकात्वंका
प्रतिपाल याना तल । छन्हु थःप्रेमम्ह पासां वर्णलक्ष्मीयात धाल । हे वर्णलक्ष्मी मय्जु छिकिपिन्त जिं
नके त्वंके याये फैमखुत (कारण छाये धाःसा) आम कालपुरुषयागु निरतिं जित अन्न व्यूपिं सुधान्तहे
स्येनावन । वनाथाय् तकहे वोबिया हक्का पितिना हइगु । हे वर्णलक्ष्मी मय्जु छित आः जिनं पाले
यायेगु सामर्थ्य मन्त । छिकिपिं तंचाया दीमते । छि स्वया: यथेया आः जि वने धाःगु खँ न्यना व
वर्णलक्ष्मी मिखाँ ख्ववि वेका धाल । हे पासा जि अभागिगु कर्म भिंसा: भभिंसा: जि थःपुता गन
छोयेगु । जि कर्म गथे ज्वीमाःगुखः अथेहे भोग यायेमालि । हे पासा छित छुं दोष मदू भांसं धका
विदा बिया: छोटः ।

हे मैत्रिय, अथे प्रेमम्ह पासां त्वःता वंगु खना अपशोच याना थुम्ह वर्णलक्ष्मी आपालं दुःख कष्ट
नया: जीविका भोगयाना व मचा प्रतिपाल याना च्वन । अथे च्वच्वं २ थुम्ह कालपुरुष न्यादयागु
उमेर जुया: वल । छन्हु माम्हेसिनं थः पुत्रयात धाल-हे पुत्र ! आः छ तःधिक जुया: वल ज्ञाननं दत ।
हे पुता, भीगु छें नेगु त्वनेगु वस्तु छुं मदु उख्यें भीगु देशे त्वाले २ वना छं अन्न भति २ फोना
हति: धया: चायागु मिलाचा छगः बिया: तुतां छपुन ज्वंका थथे धाल । हे पुता, छन्त जाकि व्यू
गुजक आमथले तयाहिं धका धया: हानं थ्व तुतां छन्त भय वैबले अर्थात् खिचां उयि न्याःवयि बले
ख्याना छोयेत धका बियागु हे पुता धया: छोट । थुलि माँयागु खँ न्यना थुम्ह कालपुरुष भिक्षा फोंवने
धका वन । ववं २ वंथायतक खिचां उना हैगु वनं वनं वोबिया जक हइगु हे अलक्षण भस्मासूर वल
२ का: २ ज्वो २ दा २ केकि २ खिचां न्याकि चेचे धका हाला: च्वनी गुलिसिनं सिपु मुना दाइ, गुलि
सिनं अपां केको, गुलिसिनं घोसानकल, गुलिसिनं मिलाचा लाका तछ्छाना ब्वाँवनी, गुलिसिनं तुतां
लाका वांछोया बिइ । थथ्ये सकलें जानां मचातेस थःत सास्ति यावःगु स्वया: थःगु अतिहे योगु
मिलाचानं तछ्छाना व्यूगु, तुतां वांछोया व्यूगुलिं सहयाये मफया: भूमिसं ग्वारा तुला ख्वया: च्वन ।

हे मैत्रिय, थथ्ये ख्वया: च्वंम्ह खंसां अन स्वैकेंहे दया माया धैगु मवो । थ्व कालपुरुष मचा भूनहे ख्वल । अथे ख्व:गु घौ: प्यघौ: न्याघौ: जास्येलिं मांम्ह वर्णलक्ष्मीया अकस्मात् छें हाछिका वल । थथे जुस्येलि हा: जि पुत्र भिक्षा फोके छोयाम्ह आतकं ल्यां हां मवनी । थ्व मचा जकं छुं जुलला, ख्वय्का जक तलला थ: पुत्र लुमंका हथा २ सं पिहांवना मा: जुल । बल्लं तथाय् खंकल । अथे खनेसात सकल मचातेसं बोविया ख्वय्का त:गु खना हथासं २ हे व्वां २ वना ल्हा: ज्वना थना मचायागु ख्वा: स्वया: धाल । हे पुता छ्छाये ख्वया: च्वनागु । सुनां छन्त ख्वय्कल धया: मिखाय ख्ववि हुयेका न्यन । हे माता ! थ:म्हं धाथ्यें जिं भिक्षा फोना वया जिजक खनेवं इमिसं सकलें जाना जित सास्ती याना ख्वय्कुगु धका थथे जूगु खं खंक्व कन । थुलि पुत्रं धा:गु खं न्यना मांम्ह वर्णलक्ष्मी धाल । हाहा हे दैव, हे भगवान् जित थुलिमछि दु:ख छ्छाये सकसियां स्वयेमयेका च्वनेमा:गु । हे पुत्र ! थौं छन्त थुलिमछि मस्तेसं बिना अपराध मदयेका कष्ट याना सास्ति याका च्वने माल । हा: हे भगवान् थौं जि थुलि दु:ख जुल । मेपिन्त सुइतहे थयोगु दु:ख मज्जीमा: । हे दैव जिपिं थ्यें दुखीपिं थ्व संसारे सूहे मदयमा: । थौं जि काय्यात सुनां २ म्वाकं दाल, कुतिं न्याना सास्ति यात थुपिं २ फुक्कहे जि काय्या दाश जुया: च्यो जुया: जि काय्या पालि ज्वंवे मालेमा: । हे पुता ग्वायम्वा बाछि शुक्ल पक्ष बाछि कृष्ण पक्ष ख: धास्येलि थौं भीपिं मजिल धका सुनानं थुलि हचपेयाका च्वने म्वा: । हे पुता वा ख्वयेमते धका सुनानं थुलि हचपेयाका च्वने म्वा: । हे पुता ! वा ख्वयेमते धका बुभेयाना अनं व्वना हल । उख्ये वाणिज्य व्यापार यावंम्ह छं बुबा ता च्वनी मखुत याकनं हे लिहांवै । हे पुता छं बुबां लुं, ओ, हेरा, मोति आपालं ज्वना वइ । उबले छन्त अनेक प्रकारयागु तिसा दयेका बी । हे पुत्र ! ख्वयेमते २ धका थथ्ये बोध याना धया: च्वन ।

हे मैत्रिय, लिपा छुं वर्ष बिते जुया: वस्येलि थुम्ह वर्णलक्ष्मी निन्हुइ छसा: जकहे नया:सां द्वांलाना नहे मनस्ये दु:ख सिया थुगु प्रकार कष्ट नया: थ: पुत्रयात प्रतिपाल याना च्वन । थथ्ये व वर्णलक्ष्मीं दु:खसिया च्वंगु खना स्वय् मफया: सुनानं हे मसीक गुप्तं वैथाय् वना छम्हेसिनं तीजक समाधान याना धाल । हे वर्णलक्ष्मी मय्जु छित उपकार ज्वीगु खं छगू ल्हाये धका वया छिं न्यना दिसं धका धा:गु खं न्यना वर्णलक्ष्मी धाल । हे तताजु ! जित हित ज्वीगु छुखं थ्यें धया: दिसं धाल । व खं न्यना आपोष्ठायाम्ह पासां धाल । हे वर्णलक्ष्मी न्यना दिसं, छित आमथे दु:ख जूगु छ्छाये धा:सा छि काय् कालपुरुषया स्वभावं ख:, मेतां मखु, छि सुख ज्वी योसा आम कालपुरुषयात त्व:ता छोया व्यू । छि जिथाय् च्वं भासं थ्व मचाया माया कया: दीमते, जिं धैगु खं न्यसा थ्वैत गनं तीर्थे छोयद:सा असल ज्वीथें च्वं । हे वर्णलक्ष्मी थथ्ये या: सातिनि छि काय्या पाप नाश जुया: वनी । छित नं सुख ज्वी धका थुलिधा:गु न्यना जवाप बिल । छिसं धा:गु खं खजा ख: । तर थ्व बालखयात गथे जिं त्व:ता छोयेगु वं तीर्थ धैगु हे अनथन धैगु सीमखु छुयायेगुले भिंसा मभिंसा न्हचागुहे जूसां थ: पुता गन छोयेगु जिं । धका थुलि धा:गु न्यना खजा ख: छं धा:गु हे वर्णलक्ष्मी जिमिगु निम्ति मखु । थ:पिन्तहे भिनिगु खं धका थथे धाल । व खं न्यना वर्णलक्ष्मी थ:गु मन समाधान याना धाल ।

अहो आश्चर्य थ्व संसारे सकलेंहे मृत्यु ज्वी मानि । जि न्हापा मृत्यु ज्वीला, काय् न्हापा ज्वीला । निम्हहे मृत्यु ज्वी मानि । थयोगु अनित्य संसारे कालं तरे यायेत श्री परमेश्वर त्रिरत्नयागु नां कया अनेक तीर्थ सेवा तपोव्रत आदि जप, तप, ध्यान यातधा:सा दु:ख दैमखु सुखज्वी सुखंयाना धर्म चित्त उत्पत्ति ज्वी, परउपकार यायेगुली मन वनी, बोधिज्ञान धयागु लाना तथागत पदवी लाना

सदानं मृत्यु ज्वी म्वाःला बोधिसत्व धायेका च्वने दइ धका मने तयाः आखैत निश्चयनं माया तयां मजिल धका मने तयाः थ्व पुत्र याकनं हे तीर्थ सेवा तपोव्रत याके छोये धका धाल । हे पुत्र ! छं म्हिगः धर्मयाना मवःगु कारणं याना थथिंगु अवस्था नयमोल । हे पुत्र ! छं म्हिगः धर्मयाना वःगु दुगु जूसा थौं थयोगु अवस्था ज्वीका च्वने मालिमखु । धर्म याःसा छन्त हे जय ज्वी । थौं याःसा कन्हे हे जय ज्वी । हे पुत्र ! धर्म धयागु बालखं नस्ये न्यना यायेमा । थौं छ न्यादंया उमेर जुयाः च्वन उक्ये छं याकनं हे तीर्थ वना तपोव्रत याःहुं । अलेतिनि छंगु पाप नाश जुय पुण्यया शरीर जुयाः दिव्य देह जुयाः सुख ज्वी । हे पुत्र ! छ याकनं उत्तरापथ हिमालयया समीपस च्वंगु तीर्थ वना तपोव्रत या हुं धका थथ्ये माम्हं धाःगु खं न्यना व कालपुरुषं धाल । हे माता ! जिं तीर्थ धैगु हे मस्यू गन वनेगु, गथ्ये च्वनेगु धका धाःगु न्यना माम्हं धाल । हे पुत्र ! छ मस्यूसा लें वया च्वपिं लोकजनपिके न्यना २ हुं । इमिसं छन्त थनं २ हुं धका लं क्यना छोइ धका वैत भोलाम्हिचा छपाः, तुतां छपू बियाः थः पुत्रयात वेला बियाः तीर्थ सेवा याके छोल ।

हे मैत्रिय, कायनं तीर्थ सेवा याके छोया थःजक उम्ह पासायागु छें च्ववन । उख्ये कालपुरुषं उत्तरापथ दिशा स्वयाः ववं २ दुर भुवने थ्येका थःमानं धयाः हःथ्ये लें न्य न्यं २ वना उगु हिमालयया सन्निधाने नेपाल मण्डलय् थ्येका श्री स्वयम्भू भगवानयात नमस्कार याना अनं श्री गुहचेश्वरी खगानना देवीयात नमस्कार याना हिमालयया दक्षिण भागे राजमंजरि बागमती सङ्गम जुयाः च्वंगु राजतीर्थ धयागु थासे थ्येका उगु तीर्थयात नमस्कार याना अनहे च्वनां उगु तीर्थ नित्य २ हे स्नान याना पुनर्वार म्ये म्येपिं पुरुष पिनिनं स्नानया वःगु स्वयाः बालुका चैत्य दयेका पंचोपचारं पूजा याना थःमहं सःये जप, तप, ध्यान, स्तोत्र याना षडक्षरी मन्त्र धारण याना उगु तीर्थे तपस्या याना च्वन ।

हे मैत्रिय, थुम्ह कालपुरुषं उगु तीर्थे लखे च्वनां छु कल्पना याना च्वन धाःसा हे तीर्थराज ! जित दुःख ब्यूपिं सकलयातनं जिगु दसि यायेफेमा हे भगवान् धका थुलि कल्पना याना तपस्या याना च्वन । हे मैत्रिय, थनया खं थुलिहे ।

उख्ये बल सार्थवाह महाजनया वाणिज्य व्यापार याःवंह कालपुरुषया बौ महाजनया जूसां समुद्रे पारया बले नाउचा फाता पुला थःमहं ज्वना वको धन सम्पत्ति फुक्कहे नाश जुयाः फुना हाहाकार म्हाया अनेक प्रकारं दुःख कष्ट नयाः च्वन ।

हे मैत्रिय, थुखे तीर्थे सेवा याना च्वंमह कालपुरुषयागु प्रभावं याना बौम्ह कर्ण सार्थवाह महाजनया मदया वने धुंकुगु धन सम्पत्ति फुक्कहे भति २ याना थःत फाइदा जुयाः बल, अर्थात् उगु व्यापार याके याना न्हिं न्हिं हे थःत लाभ जुयाः ववं २ क्रमशः महाजनं सोगु वखते थःगु धन सम्पत्ति मालसामान दया च्वंगु खना पुनर्वार तीर्थे च्वनां तपस्या याना च्वंमह कालपुरुषया शरीरे जूसां न्हापायागु शरीरथ्ये मखया फुक्क अङ्ग लक्षणहे न्हिं न्हिं हे शान्त जुयाः दिव्य देह जुयाः वया च्वन । थ्येगुहे पुण्यनं बौम्ह कर्ण सार्थवाह महाजनया न्हापाथ्ये जस्ता कि तस्ता जुयाः वया च्वन । थुखे माम्ह वर्णलक्ष्मीयानं भति २ याना कथंनना नयेगु त्वनेगु दया बल । उखे तीर्थे च्वनां तपस्या याना च्वंमहेसियानं थःगु शरीर न्हापा स्वयाः भिदुग बाँलाना वःगु खना न्हापा स्वयानं एकचित्तं तपस्या याना च्वन ।

हे मैत्रिय, थथ्ये व कालपुरुषं तपस्या याना च्वंगु १२ वर्ष दया वनेधुंस्येलि उख्ये वाणिज्य व्यापार प्रकारयागु वस्तु धन दौलत माल ताल इत्यादि असंख्य भरियातयेत कुबीयेका उगु थासं

थःगु छें स्वयाः प्रस्थान याना वया च्वन । क्रमैसित ववं २ थःगु छेंया त्वाले थ्यन । थ्व महाजन थःगु छें वने धका स्वःबले उगु छें दक्व हे मैदान जुयाः च्वंगु खना थ्व स्वयाः थुम्ह महाजन आताँ च्वनां स्वयाः च्वन ।

हे मैत्रिय, पलख जायेका थ्व महाजनं थःगु छेंया जवं खवं च्वंपिंके न्यना स्वत । हे दाजु किजापिं थ्व जिगु छें गथें जुयाः मैदान जूगु । हानं जि स्त्री गन वन । जिं उलिमछि धन सम्पत्ति तयाः थकागु दु व धन द्रव्य फुक्कं गन वन गथे जुल धका व खँ फुक्कहे न्यना स्वत । थुलि खँ न्यना जवाफ विल । हे साहू छिकिपिं व्यापार वने धका पिहाँ भाया छुं लिपा छि जाहानया गर्भ कालपुरुष छम्ह जन्म जुल । थ्व मचा जन्म जुयाः प्यन्हु खुनु अकस्मात् थ्व छेंस उत्पात जुयाः सम्पूर्ण नाश जुयाः वन धका धाल । व खँ न्यना महाजनं धाल । हा हे दैव तचोतहे विपति जुल धका नुगमछिंका हे दाजु किजापिं जि स्त्री दनिला कि मन्तले, दनिसा छिकिपिसें छक भचा सता बियाः दिसं धाल । व खँ न्यना जलखलपिस वना महाजननी नाप लाना व महाजनं धयाः हःगु खँ कना चित्त बुझे याना व्वना हयाः उगु थासे थ्येंका विल । अनथ्येंका थुम्ह वर्णलक्ष्मी जूसां थः स्वामीया चरणकमले भोपुया थः स्वामीयागु ख्वाः स्वयाः विन्तियात । हे प्रभू छिकिपिन्त कुशल आनन्द जू मखुला धका न्यना निम्ह स्त्री पुरुषया थि थीः कुशल वार्ता याना च्वन । अथे वार्ता याये धुंका वर्णलक्ष्मी थः स्वामीयात थः च्वनां च्वनागु थासे व्वनायंका थःगु सम्पूर्ण खँ दुःख कनाच्वन । हानं प्यन्हु च्यान्हु दया वसेलि थुम्ह बल कर्ण सार्थवाहं थः स्त्री नापं सल्ला याना मेगुहे छें दनेगु सम्पूर्ण सादमि दयेका भिंगु दिन स्वयाः छेंया जग स्थापनायात । थुलि याना न्हापाथेंहे नतुं छुं दयेकल । उगु छेंस न्हापा थेंहे धन सम्पत्तिनं दयेका आनन्दं च्वनां च्वन ।

हे मैत्रिय, थथ्ये च्वच्चं २ वर्ष दिन विते जुयाः वस्येलि व बल कर्ण सार्थवाह महाजनं थः स्त्री वर्णलक्ष्मीयात थथ्ये धाल । हे प्रिये वर्णलक्ष्मी भी पुत्र गन छोयाले छुं विचा याये म्वाःला काय् मचा धयाम्ह तःधं छाया धाःसा माँ बौयात हित याइम्ह उकिसं ज्येष्ठ पुत्र क्रिया याना जलदान, पिण्डदान याइम्ह अथेया कारणे थुम्ह पुत्रयात गन तोते ज्यू । हे स्त्री धका धयाः सल्लायात । थ्व खँ न्यना वर्णलक्ष्मीं धाल । हे प्रभु स्वामी भी पुत्रयात जिं उत्तरापंथ धैगु हिमालय क्षेत्रे उगु सन्निधाने च्वंगु तीर्थे वना तपस्या याःहुं धका छोया बियाः धाःगु न्यना महाजनं धाल धयाः थथ्ये न्यन । हे स्त्री भी पुत्रया गथेच्वले अनुहार गयोगुले वर्ष गुलिदन । नां छु धका न्यसेलि वर्णलक्ष्मी थः स्वामीयात धाल हे स्वामी ! थ्व पुत्र गथ्ये च्वंम्ह धाःसा हाकुस्ये च्वंगु ख्वाःम्ह, छचों तःग्वम्ह, कपा औछि वलाम्ह, न्हापं किसियाथ्ये च्वंम्ह, मिखा गुलि २ च्वसे द्वांवम्ह, न्हाय् फ्याफम्ह, म्हुतुसि ख्वातुसे तबलाम्ह, मिखा फुसि तितिस्वाम्ह, म्ये हाकुम्ह, वा तपुम्ह, गप पतिहाक, बाहा तःधंम्ह, ल्हाः पतिहाकम्ह, नुगपाः कःतीम्ह, प्वा तःग्वम्ह, तेफुचा ताहाकम्ह, चिमिसँ सियूम्ह, लिङ्ग ताहाकम्ह थजोगु अलक्षणं संयुक्त जुयाः च्वंम्ह पुत्र जूगुया कारणं वैत सकसिननं कालपुरुष धका नां छुना तल । हे प्रभू न्यादँ दुबले तीर्थ वास छोयागु थौकने भिनिदँ ति दत । आःवैगु वर्ष भिन्हेदँ ति दतज्वी हे प्रभू । धका धाःगु खँ न्यना व महाजनं थः पुत्रयात माः वने धका छेंनं प्रस्थान याना पिहाँवल ।

हे मैत्रिय, थथे पिहाँ वया माः जुजुं २ ववं २ हिमालयया सन्निधाने नेपाल मण्डलय् थ्येंका श्री ज्योतिरूप स्वयम्भूयात नमस्कार याना थथ्ये प्रार्थना याना विन्तियात । हे परमेश्वर ! जि पुत्रयागु खबर याकनं दयेमा धका नमस्कार याना वया नेपाल मण्डलय् सकभनं माला जुल । हानं तीर्थ,

व्वंगाः, पुखु न्यंकनहे चाःहिला माःगु बखते वहे राजमंजरि वा बागमती मिले जुयाः च्वंगु राजतीर्थ धैगु थासे थ्यन । अन थ्यंका स्वगु बखते वहे महाजनया पुत्रं वरो एकचित्त याना न्हिं स्वक मोल्हुया बालुकायागु चैत्य दयेका पंचोपचारं पूजा याना जप, तप, ध्यान मिखा तिसिना षडक्षरी जप याना च्वंम्हेसित स्वयाः मने ल्वीका धाल । अहो आश्चर्य थुलिमछि तीर्थे चाःहिला मालानं थुलि बांलाम्ह तपस्वी पुरुष जिं मखना । थ्व जकं जि पुत्र खःला, थ्वैकेजा जिगु अङ्ग लक्षण भति २ दु । जि स्त्रीनं धाःसा विरूपम्ह अलक्षणम्ह धाल । थ्व पुरुष याकेला श्री सूर्य याकेला श्री याकेथ्ये पूर्ण लक्षणं युक्तगु शरीर जुयाः च्वंगु दु । अङ्ग लक्षण धाःसा जिगु अंश थ्व तपस्वी याके दु । अवश्य हे जि पुत्र थ्वहे ज्वी । जि स्त्रीनं धयाः हःसां मज्यू । धर्म शरीर व पाप शरीर धर्म थ्वैत लक्षण संयुक्त जुयाः दिव्य देह जुल ज्वी धका मने तयाः थथ्ये न्यना स्वत ।

हे तपधारि ! छिकिपिं सुथ्ये, थःगु छें गन, छिगु नां छु, जात छु धका थथ्ये न्यन । हानं थःपिनि माँ बौया नां छु, छाये तपोव्रत यानागु थ्व खँ छक जित कना दिसं धाःगु खँ न्यना तपस्वीनं धाल । हे महापुरुष ! छि सुले । थन छाये भायागु । जि जूसां छम्ह तपस्वी खः । छिगु छें गनले, नां छु, जात छु धका न्यंगु जवाफ न्यना महाजनं धाल । हे तपस्वी न्यना दिसं जिगु छें पांचाल देशया पिने वन्द्युमति धैगु नगरे । जिगु नां खः बल धयाम्ह कर्ण सार्थवाह महाजन हानं जि स्त्री वर्णलक्ष्मी धैम्ह । हे तपस्वी जि वाणिज्य व्यापार यावना च्वनां बले जि स्त्रीया पुत्र जन्म जुल थ्व पुत्र तीर्थ बास यावन धाःगु न्यना थौं जिं व पुत्र माले धका थुग स्थाने वया च्वनां धका धाःगु खँ न्यना तीर्थवासि तपस्वीनं धाल ।

हे तात ! हे पुरुष ! आम छिस्ये धाःगु खँया अनुसारं स्वेबले जि जन्म जुयागु थाय्यागु नां त्वलया नां न जुल । हानं जातनं मिले जुल । निश्चयनं जि छिकिपिं माँबौ हे जुल धका तत्कारन दना वया व तपस्वीनं विन्तियात । हे महापुरुष ! जि पिता धैम्हहे म्हमस्यू । जित मर्चानिस्ये तीर्थबास छोया हयातःगु थौं जिगु भाग्ये तीर्थ सेवाया पुण्ये जित तःधंगु माँ बौयागु खबर न्यने दत । थौं जि पिता छिहे जुल धका व तपस्वीनं नमस्कार याना चरण कमले भोपुया च्वन ।

थुगु बखते व महाजनं धाल । हे पुत्र ! भाग्यमानी ज्वीमा धन्य २ छ खः अजागु अलक्षण शरीर नाश याना भिंगु शरीर ज्वीके धुंकल धन्य २ हे तपस्वी, हे पुत्र ! आः आम तपोव्रत यायेगु गात, भी थः गु छें याकनं हे वनेनू धका धाःगु खँ न्यना तपस्वी पुत्रं धाल । हे पिता ! छिसं धाःगु खँ थिक जू तर जि आः थथ्ये वये मज्यूनी छाय् धाःसा थुम्ह तीर्थराज याके प्रार्थना यो यो मानी, विदा काये मानी हे पिता ! अथेया कारणे पलख विस्तार याना विज्याहुं धका धाल ।

हे मैत्रिय, अनंलि व तपस्वी नं पंचोपचारं सहित याना तीर्थराजयात पूजा भाव याना प्रार्थनायात । हे भदन्त, हे तीर्थराज ! छल्पोलया दयानं थौं जि पाप शान्त जुयाः दिव्य देह जुल । हे परमेश्वर ! छल्पोलं सदानं जित रक्षा याना विज्याहुं । जिगु देशे जि तःधंम्ह पुरुष ज्वीका विज्याये माल धका थुलि वरदान फोना विन्ति याना धका च्वन । जि बुवां जित छें व्वना यंके धका धयाः दिल थुगु कारण जिं छल्पोल याके विदा फोना च्वनां । हे परमेश्वर ! तीर्थराज धका माक्व खँ ल्हाना विदा कयाः थःगु छें वने धका बौम्हनं काय्म्हनं निम्हहे अनं प्रस्थान जुयाः बल । थः बौनं थः पुत्रयात न्हचोने तयाः थः लिउने च्वनां थुगु प्रकारं नं क्रमैसित थःगु देशेया समीपे थ्यंक बल धका श्री शाक्यमुनिं मैत्रिय बोधिसत्तयात आज्ञा दयेका विज्याना च्वन ।

इति श्री स्वयम्भू पुराणे श्री राजतीर्थ माहात्म्य कालपुरुष उद्धार चरित्र अष्टाध्याय सम्पूर्ण समाप्त ।
नन्दोत्तरे धर्म प्रकार आशा दयेका विज्यात ।

कैकेटारा म महाविहारे विज्याकम् उपगन्त भिक्षु अशोक महाराज आदि आपाल भिक्षु गणपिनिर्ग
हे भिक्षु धका श्री शाक्यसिंह भगवान् भिक्षु बोधिसत्त्वयात आशा दयेका विज्यात धका
रक्षा याना धः मां बोधि सकले न सुखे न च्चाना राज्य चलेयाना च्चन ।

पञ्चालोकापिन्त धर्म प्रतिपाल याना चरित्तियस राज्ये खयका पापिपट्टयात नाश याना सद्योजनयात
भरोसा विद्याः सदान् श्री विरत्नयाग सेवा याका वत मध्ये तःधर्म उपाषथ वतयाका सकल
याना विज्याहै धका धर्म लोकजनपिसे धर्मः खू न्याना धर्म सुरुष महाराज सकल लोकजनपिन्त
महाराज जिमित क्षमा याना विज्याहै । हे धर्म न्यापा जिमित अपराध याना क्षमा याना प्रतिपाल
धर्म सुरुष महाराज बोधयाग आशा न्याना सकल पञ्चालोकापिसे धर्म प्रकार विनिनयात । हे
मिच्छयाना सनेमते । हे पञ्चालोकागणपि धिक्किपिनि राजा जि उल खःला । धका धयाः बोधयात ।
२ धर्म पय्य धायेमज्ज । धया धायेमज्ज । आः न धिम्भस न्यापाय्य पय्य धाय, पय्य धाये धका
आपाहै दूःख विद्याः सास्तिनयात खःला हे पञ्चालोकापि धर्म जि पय्ये धाल धका धिपि न्यायेमते । उवल
मिलचा तछयाना विल धका जिक् फुकहै लमनि धिम्भके याद दूला । धर्म प्रकार धिम्भसे जि
सर्ग दूःखला जि लम, खं दाल, खं बोधिल, खं जि त केकल, धुम्हिसिन्त खसा नकल, धुम्हिसिन्त जि
वा जिर्ग खू छकन्तो मुता कारण मख । छाये धाःसा न्यापा जि दरेद जवले धिम्भसे जि त दूःख विद्याः
लोकजन पञ्चालोकापि मुक्का इमिर्ग नन्दोत्तरे धर्म प्रकार आशा दयेका विज्यात । हे पञ्चालोकागणपि धन
हे भिक्षु, अथ च्चव २ गालिछ काल विले जयाः वस्थिल छन्द्या दिने धर्म राजा जसै सकल

पञ्चालोकापिन्त प्रतिपाल याना वडो आनन्द राज्यभोग चलेयाना च्चन ।
प्रकारे तपस्या याना वःग पुण्यन सुरुष राजा धायेका उग देशे राज्य चलेयाना न्याये नीति धर्म
प्रकारे देशे जावा याना चाहिका उग राजगहेनर्त हाहा विज्याना आनन्द च्चाना विज्याकल । धर्म
भादर, अमान्य, साह महान अन्य सकल लोकजनपि फुकै ल्य ल्य तयाः नाच गान याका धर्म
नरखज, सिंहखज, वषटखज, गरुडखज आदि अष्टमंगल नन्दोत्तरे २ तयाः सकल मन्त्री, काजि,
न्याका अनेक प्रकार शङ्कर याना धर्म हस्तिरत्नयाग म्हे व सुरुषराजा विज्याका छव वकीका
पुनवारे । उम्ह हस्तिरत्न किस्तिनयात अनेक प्रकारयाग आभरण तिका सर्वयाग धमालि
नाना पुष्पमाल्यादि सिन्दूर ताय आखेन पूजा याना नमस्कार याना च्चन ।

नमस्कारयाका उग वखले भोग धासे यापिप्सन सीका आपालहै वया अनेक प्रकार नैत्य गीत वाद्य
जुल धका ना प्रख्यात याना सकसिनन नमस्कार, याना च्चन । म्हे म्हेपि सैन्य सिपाहि गणपिप्सन
धर्म यजकम् आदि याना अनेक धर्ममङ्गल याना भिर्ग वेलास राज्यभिक्षेक विद्याः सुरुपनाम राजा
ख स्वयाः अन राजदरवारेयापि मन्त्री, काजि, भादर, अमान्यजन, पुरोहितपिसे विधि विधान
धका उग राज गहै दूत धका सिहासने विज्याकल ।

तःख म्हे लना स्वा माल कोखयोका पदक्षिणा याना धर्म स्वध वया वैत धर्म म्हे तयाः च्चन
सेवायाग प्रभाव उम्ह हस्तिरत्न वना व महानया पुत्रयात धर्म कुरुया वःग अमृत धःले च्चर्ग
सुमक च्चाना च्चव २ धर्म पय्यी न्यायो जसेलि देवसयोग तपस्या याना व गीया पुण्य तीर्थ
किस्तिना जःखः नाप जयाः च्चन । अयोग वखले गम्ह तपस्वी महानया पुत्र जसै छयाये च्चन ।

रत्नयागं मालां कोखाया अत्यन्त नस्त्रा २ वःगं अन्तर आदि विचकनं वला राजा ज्योति इच्छा उम्ह
देश्यायापि सकल काणि भादारागणापि सकल वया राजा ज्योति इच्छा याना फयाफको वा लालाका
सेवर्णाया अमनघट विद्याः हस्तिरत्नयाग त्वःता राजा यायम्ह मायके छोल । ख स्वया अन
गुरुं पुरोहितपिप्पस विविध विधान य्मे कर्मकाण्ड याका भिर्ग वलास हस्तिरत्नयाग पूजा याना
ज्योका राजा मदयेकं भिर्ग देश भिर्गमख्थ एका निर्णय याना अनेक प्रकारयाग सामग्री दयेका
देश्याया शास्त्रा हेमख्थ अथवा कारणे आःछुयायाग एका थय्थ सकल मुना सन्ता साहिति याना निर्णय
भादारागणापि न्यना दिस । आः ख भिर्ग देशे राजा मदया वने धुकल, राजा मदयेक धाःसा ख
आदि याना सिधेका सकसिनन मन समाधान याना धाल । हे अमान्य महाजनगणापि सकल
थय्थ मर्त्य जयाः कम थ्थ मन्त्री, अमान्य, महानपिप्पस उम्ह महाराजयाग अतिन सत्कार दशकिया
हे भैत्रिय, थय्थ च्च २ थय्थ थय्थ दस्थिल उग देश्या राजा अकस्मात् मर्त्य जल ।

हे भैत्रिय, थय्थ च्च २ थय्थ थय्थ दस्थिल उग देश्या राजा अकस्मात् मर्त्य जल ।
सम्पूर्ण पूजा याये सिधेका तीर्थराजयाग नमस्कार याना थःग छे लिहा वया आनन्द च्चन च्चन ।
जित उग देश्या राज्य अधिपतियाग प्रसन्न जयाः विज्याहे । हे परमेश्वर । एका थय्थ प्राधान याना
याना विन्ति याना च्चन । हे परमेश्वरु तीर्थराज जिग पूजा कयाः छल्योल सन्धे जयाः विज्यायेमाः ।
विद्याः अनेक प्रकारयाग छत्र छत्रा व्येका पलाका छया सदाथ्थ जप, तप, ध्यान, स्तोत्र याना प्राधान
दयेका ज्वना विविध थ्थ स्नान याना उग हे तीर्थ वना वालका चैत्य दयेका पंचोपचार पूजा याना अर्घ
हे भैत्रिय, थय्थ च्च २ थय्थ थय्थ दस्थिल पुनर्वा ख महाजन पुत्र जैसा सम्पूर्ण सामग्री

न्यापायाथ्थ हे नर्त हे इष्ट मित्रादि दास दासिगणापि दयेका आनन्द च्चन च्चन ।

कैपा जि दिव्य शरीर धारणयाना वे दत एका स्वहसिया थिःथिः ख न्हाना अनेक प्रकार मंगल याना
न्यना कार्याहेसित न्हाः जोरेयाना माया चरण कमले भोपयाः थये विन्तियात । हे माता । थौ छल्योलया
तपस्या अधोर रूप त्वःता दिव्य शरीर धारण याना वल हे पुत्र । एका थय्थ विद्या याना धाल । ख ख
चरण कमले भोपया पुत्र कार्यायाग न्हाः स्वयाः धाल । हे पुत्र । छ कुशल जू मखला । धन्य २ छुग
व्का सर्गन सिन्दर स्वा आदि तयाः सर्ग विद्याः थःग छेस दकाल । थःग समय वर्णलक्ष्मी थः स्वामीयाग
वना भिर्ग लः कया हयाः गेलि चायका थःग छे लुखास पूर्ण धःत तयाः गुरु पुरोहित समुहल वाक्य
हया चाचा स्ववल । थय्थ थः पुत्रयाग ख्वाः खने सात अत्यन्त मनयात उत्साह वहे याना तत्कारण
च्चन । उजोग वखते माह्म वर्णलक्ष्मीया जक जिकाय वल धयाग खबर न्यने सात बरो हर्ष याना
खयाः ज्योम्ह, अपराधी ज्यो धुर्कम्ह एका हालाः सकसिनन व महाजनपिप्पस मिखाहे लिमकासे स्वयाः
फोना सकल मस्तेस थःत दायका लाय वयका खिया तेस लिल लिता हाःहेः याका त्वाः २ पतिकहे
हे भैत्रिय कारण छाय् धाःसा न्यापा ख अधोर रूप जयाः च्चवले त्वा त्वाले चाःहिला अन्न

दिव्य शरीर ज्योका वे फुम्ह धन्य २ वालख निस्ते थिल पराक्रम कयने फुम्ह वीर खः एका थयाः च्चन ।
छुना तःम्ह उजोम्हसित माह्मसित तीर्थ छोया तपस्या याके छोगिल उग पुण्यन थौ पाप नाश जयाः
गलिसिन धालिक हे पासपि न्यापा ख तसकहे अलक्षण जयाः बांमलाना सकसिन कालपुरुष एका ना
थिल गान वाला एका खला सकल लक्षण पुरजयाः अति सन्दर जयाः च्चम्ह एका हालाः च्चन ।
एका हालाः च्चन । गलिसिन धालकी व महाजनया कार्प हे खःला, मख्थे च्च स्वस्व खया कार्पला
थय्थ धाल । धन्य २ वीर धयाम्ह महाजन ख खः । थः मर्द वले जन्म जौम्ह पुत्रयाग म्हासिकाः च्चना हल
अनलि वी कार्प निम्ह वव २ थःग त्वाले थसेल उग त्वाले च्चापि सकल वया स्ववल, सकसिन

राजतीर्थ म्हसीका:



थुगु राजतीर्थ, स्वनिगःया दुने च्वंगु, थौकन्हये ललितपुर उपमहानगर, वडा नं. २ स. लाना च्वंगु खः । राजतीर्थ माहात्म्य स्वयम्भूपुराण पाख्ये वयाच्वंगु खनेदु । थुगु तीर्थय् भिंच्याता प्रकार अलक्षिनाम्हः उद्धार जूगु खँ थुगु माहात्म्ये केनाच्वंगु खः ।

सत्य युगनिसे थौतकहे, धार्मिक विश्वास जायाच्वंगु थुगुराजतीर्थय् वागमति व राजमंजरी संगम जुयाच्वंगु दोभान खः । राज तीर्थः राजमंजरी तीर्थ, वारी, पचलि भैरव खःसा पारिपाखे घाटे, वेचि सवा वगु लः वया वयाच्वंगु वुंझ्या लःयात कया, थौकन्हे उतिकं हे श्रद्धा व जनविश्वास दया च्वंगु खनेदनि ।

समय परिस्थिति हिलावयाच्वंगु नाप पुण्य थुगु तीर्थ या आसपास, छचाखेर, विभिन्न क्षेत्रयापि मनूत वया न्हूगु वस्ती वसे याःवगुलि याना थुगु तीर्थ या लःयागु मुहान हे सुकेजुया वन । न्हापा न्हापा थें थुगु तीर्थ लःयामुल तज्याना वाहा मवे धुकुगु भीसं खना च्वना ।

थुगु तीर्थप्रति राज्य व स्थानीय, मनु तयगु, धार्मिक आस्था, म्हो जुया वगुलिं याना थुगु तीर्थय् ललितपुरया पुलचोक निसे यागु, मलमूत्र धः हया, थुगु तीर्थया नापं वागमतिइ ल्वाकः छयाना तःगुलि थुगु तीर्थया धार्मिक, सांस्कृतिक, महत्व यातहे वुलुइका व्यूगु खनेदु ।

छुँदं न्हयेव लिसे, थुगु तीर्थे राजतीर्थ सुधार समिति धका सामाजिक संस्था नीस्वना, थुगु तीर्थयात सुधार यायगु कुतः याना वया च्वंगु खनेदु । थुगु संस्था छगू लिंजक, थुगु राजतीर्थ, संरक्षण याय् फैच्वंगु खने मदु ।

थुगु तीर्थे, धार्मिक विश्वासं नं, गाखं हाकया वया च्वंगु खनेदु छें छें खलः पुच पाखें थुगु तीर्थया लः वेचि सवाः वःगुलि थुगु तीर्थ या लखे थीथी आयुर्वेदिक तत्व तथा लः दायका सुथ न्हापां, सलंसः मनु तय् त्वकेगु ज्यानं या वयाच्वंगु खनेदु ।

थुगुतीर्थया लः आवश्यक कथं मवय् धुकुगु लिं याना राज तीर्थया बेची सवावगु लखय् वासः दायका त्वकेगु ज्यायनं मछिना वःगु खनेदु ।

स्वनिगःया, तीर्थ पतिकं, महानगरयागु फोहर हया ल्वाकः छयाइगु राज्यया कुनीतियाना थुगु तीर्थत धले हे परिणत जुई धुकुगु दु । धार्मिक दृष्टिकोण अतिकं च्वं न्हयाना च्वंगु थुगु राजतीर्थय् तयुगु वर्णम्हः सुरूप नागराजा बास याना वया च्वंगु दु । थुगु तीर्थ व्रत याइवले दान याईगु ज्वलं कथं कुसा, लाकां, तुतां-दान यायगु चलन दु ।

थुगुतीर्थ व्रत याइवले मोहल्लुयगु स्वाँ ताया रूपय् इता थिताया चा (वारी व पारी) कया मोह ल्लुयंगु चलन थौतक यथावत हे दनि । थुगु तीर्थया सेवा याइपिसं, तीर्थया नापंच्वंगु पचलि भैरव यात पीठ माने याना वया च्वंगु दु । थुगुतीर्थ व्रतयानाया फल राज्यय् पूर्ण जुइगु खः । नवरथा वनेगु भोले थुगु तीर्थय्, पञ्चमी कुन्हु, नवरथा मोहल्लुयगु चलन दु ।

थुगु तीर्थय् पाठयायगु आर्यसमाधिराज सूत्र खः ।

भीगु नेपाः देया अतिकं तःधंगु द्वादश तीर्थमध्ये यागु ४गु महान तीर्थ खः थुगु तीर्थ संरक्षण यायगु भिं सकसिंगु कर्तव्य खः ।

मनोरथ तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

पुनर्वार श्री शाक्यसिंह भगवानं मैत्रिय बोधिसत्वयागु ख्वाः स्वयाः थुगु प्रकारं आज्ञा दयेका विज्यात । हे मैत्रिय, आः हानं मनोरथ तीर्थयागु माहात्म्य कने त्यना छँ न्यं । हिमालययागु सन्निधाने केशावती, विमलावती संगम जुयाः च्वंगु मनोरथ तीर्थ धयागु छगू दु । थुगु तीर्थे वास याना च्वंम्ह कुलिक धयाम्ह नागराजां वास याना च्वंगु दु थ्व नागराजाया वर्ण गयोगु धाःसा छिरिविरि रंग जुयाः पंचारंगी सहित वर्ण जुयाः ग्यानापुस्ये च्वंगु रूप धारण याना फनापतिकं रत्नया तिसां तिया अत्यन्त जाज्वल्यमानं तेज प्रकाश जुयाः शोभायमान जुयाः च्वंम्ह थथोःम्ह नागराजा वास याना च्वंगु उगु तीर्थयागु मेला गुवले धाःसा मार्ग शुक्ल पञ्चमी धनु संक्रान्ति शनिश्चरवार थुलि योग चूलाइ बले अनया मेला लगेज्जी । थयो २ गु प्रख्यातगु दिने सुनां २ उगु तीर्थे वना स्नान याइ नोछको यंकहे मोल्हुइ जप, तप, ध्यान याइ देवतायात अर्घतनी, दान, धर्म, याइ थुजोपिं मनुष्य गणपिनि निश्चयनं थः थःगु मनोरथ पूर्ण ज्वीका च्वने दइ । हे मैत्रिय धका श्री भगवानं आज्ञा दयेका विज्यात ।

थथ्ये आज्ञा जूगु न्यना विन्तियात । हे भगवान् शासत्र थुगु तीर्थे स्नान याना सुसु उद्धार जुयाः वनले हे भगवान् छल्पोलं सकल लोजनपिन्त मन बोध ज्वीक आज्ञा दयेका विज्याहुं धका थथ्ये विन्तियात । थुलि विन्तियागु खँ न्यना श्री भगवान् आज्ञा दयेका विज्यात ।

हे मैत्रिय, पुरा पूर्व काले न्हापा २ पांचाल देशया राजा छम्ह वया दया च्वन । थ्व राजा गयोम्ह धाःसा बरो पराक्रम तेजवान् जुयाः च्वंम्ह थयोम्ह राजाया न्हिं न्हिं हे जूसां सिकार म्हिता अनेक प्रकारयापिं मृग, पंछि आदि वन्य जन्तुपिन्त प्रहार याना स्याना न्हिं न्हिं हे मासं (ला) मदयेकं अन्न आदि भोजन मया । थुगु प्रकारं परया जीव स्याना म्हिता जुजुं २ कालान्तरे छन्हुया दिने अकस्मात् रोगं कयाः कालया वशे लाना तःधंगु हे बेदना कष्ट नयाः मृत्यु जुल ।

हे मैत्रिय, थ्व राजा आपालं हे वनजन्तुतयूत स्याना वंगुया फलं थ्व राजायात पशुयोनि चला जुयाः जन्म काःवन । छन्हुया दिने तःधिक जुल वन क्रीडा याः वने सल । थथ्ये व चला हृष्टपुष्ट जुयाः वन आदि अनेक पर्वते म्हिता फलमूल नयाः शीतलगु थासे विश्राम याना च्वंबल अकस्मात् वहे बनेनतुं हे लुब्ध नं जुयाः च्वंम्ह व्याधा छम्ह वया वने मृग आदि पशुपंछिपिन्त थःगु बाणं कय्कू २ प्रहार याना दवं २ व सुन्दरी जुयाः च्वंम्ह चलायात खंका बाणं कय्का छोट । थुगु कय्गु बाणं

व चलायात लाना बिस्सुं वना च्वन । नापं २ व लुब्धक व्याधानं लिना यंकाहे च्वनां च्वन । उगु बखते व चलया मनं धालकि छ ब्याधां जित स्याइगुहे जुल । थौं छंगु ल्हातिं छाये सीगु । सीहे माःसा हूँ तःधंगु तीर्थे वना सीः धका बिस्सुं ववं उगु तीर्थे थ्येका व तीर्थयागु लंख छक त्वना तीर्थराजयाके प्रार्थना याना धाल । हे तीर्थराज ! थ्व ब्याधां विनाश कारणे जित प्राणान्ततक ज्वीक स्यायेत्यन । थ्वथ्येतूं लिपाया जन्मे थ्व ब्याधायातनं बाणं प्रहार याना स्याय् फयेक प्रसन्न जुयाः बिज्याहुँ हे परमेश्वर ! थुलि जिगु मनोरथ पूर्ण याना ब्यू धका प्रार्थना याना उगु तीर्थे च्वनां प्राण त्वःता मृत्यु जुयाः वन ।

हे मैत्रिय, व चलाया शरीर उगु तीर्थे चुइका यंका छुं दिन लिपा व चला उगु हे बने बराहया योनि जन्म काःवन ।

हे मैत्रिय, उम्ह ब्याधानं लिपा मृत्यु जुयाः उगु हे बने व्याघ्रयागु योनी जन्म जूवन । थथ्ये थुपिं निम्हहे सिना उगु बने जन्म जुयाः निम्हहे तःधिक जुयाः हाकनहे वहे बनेनतुं छन्हुया दिने थुपिं निम्हहे नाप लाना निम्हेसिया ववैत २ परस्पर द्वेष भाव तयाः ल्वात । अथे तस्सकहे ल्वाल्वां २ थःगु बल दक्वहे पिकया निम्हेसियां तच्चतहे युद्ध म्हिता च्वन । अथे म्हितुं २ स्वन्हु स्वचा दया वनेधुंकल अथ्यन त्याः बू सीमदुनी । अथ्य जुयाः थुपिं निम्हेसियां बल हीन जुयाः थकानि लगे जुयाः वया च्वन । हानं थुपिं निम्हेसियां बल पिकयाः ल्वात गजागु प्रकारं धाःसा (ब्याघ्र) धूं फक्व बन्हेलंयात हुँकार शब्दं हालाः न्याना स्यायेत सनी । (बराह) बन्हेलं फक्व बन्हेल हुँकार शब्दं हालाः थःगु त्वाथं दाया, प्रहार याना स्यायेत सनिगु । अथे थुपिं निम्हेसिया परस्पर ल्वाना निम्हेसियां चोत परे ज्वीका कष्ट नयाः आःथो जिगु प्राण त्याग याना तोते धका उगु बनं पिने वया ल्वाः वल । ल्वाल्वां २ ब्याधा बन्हेलयात तच्चतं प्रहारयाना ब्यूगुलिं मरणान्तक जुयाः मने ल्वीका हा हा छंगु ल्हातिंजा छाय् सी सीहेमाःसा गुगु तः धंगु तीर्थ स्थाने वना सी धका उगु मनोरथ तीर्थे थ्येक वल । अन थ्यंका तीर्थराज साछि तयाः उगु तीर्थया लंख त्वना मृत्यु जुल ।

हे मैत्रिय, ब्याघ्र धुंया नं व बराहं त्वाथं दाया प्रहार यागुलिं कष्ट जुयाः सहयाये मफयाः तत्कारण हे उगु स्थाने थ्यंका वया वहे तीर्थ लःख छको त्वना मृत्यु जुल । थथे निम्हेसिया थीः थीः ल्वाना थुपिं निम्हेसियांनहे थः थःगु मनोबांच्छा पूर्ण ज्वीका प्राण त्याग याना स्वर्गबास लाना तीर्थिक देवपुत्र धायेका च्वने दत ।

हे मैत्रिय, थयोगु प्रकारं थुपिं निम्हेसिया तःधंगु पदवी लाःगु स्वर्ण स्वर्गया देवराज इन्द्रं इपिं निम्हं हे सःता इमिगु न्हचोने थथ्ये आज्ञा दयेका बिज्यात । हे तीर्थिक देवपुत्र छिमिसं छु धर्म याना वयागु पुण्यनं थन स्वर्गे जन्म काःवयागु धका न्यन । थ्व खँ न्यना देवपुत्रपिसनं विन्तियात । हे देवेन्द्र पूर्व जन्मे जिपिं निम्हहे थीः थीः हे वैरिभाव शत्रु जुयाः तच्चतहे ल्वापु जुल । अथे ल्वापु जुजुं २ छन्हुया दिने जिपिं निम्हहे तःधंगु मनोरथ तीर्थे वया काःवयाः धका धाःल । थ्व खँ न्यना देवराज ईन्द्रं आज्ञा दयेका बिज्यात ।

अहोः मर्त्य मण्डलया नेपाल धयागु स्थाने गयोगु सत्य दुगु तीर्थ स्थल दु । स्वस्वः आः जि छकनं उगु तीर्थे वना प्रशंसा याना स्वेः धका मने तयाः थुम्ह देवराज इन्द्र उगु स्वर्ग भुवनं क्वहाँवया मर्त्य मण्डल धैगु नेपाल मण्डलय् च्वंगु मनोरथ तीर्थ धैगु स्थाने थ्यंका वल । अन थ्यने सात देवराज इन्द्र व केशावती, बिमलावती संगम जुयाः वया च्वंगु तीर्थ खना उगु तीर्थे च्वनां स्नान याना जप,

तप, ध्यान, पाठ, स्तोत्र पूजा आदि याना अत्यन्त वासना वःगु पारिजात स्वाँ, अनेक बास वःगु फलमूल आदि छाया चन्हे याना थुगु प्रकारं पूजा याना च्वन ।

अयोगु अवसरे नित्य २ हे उगु तीर्थे च्वनां स्नान याना च्वनां च्वंम्ह स्त्रीजन छम्ह न दया च्वंगु जुयाः च्वन । थुम्ह स्त्री जनया मनस छु कामना याना च्वन धालसा स्वर्ग भुवनया देवराज इन्द्र पुरुष लाये दयेमा धका कल्पना याना च्वनां च्वंम्ह थ्व मिसां छन्हुया दिनेस उम्ह देवराज इन्द्रयात खंकल । थथे खने सात हा हा धन्य २ जिगु भाग्य थ्व तीर्थराजया सत्य धक थौं जिगु मनोरथ पूर्ण ज्वीन धका धयाः थः च्वनां च्वनागु थासं दना वना इन्द्रयात नाप लाना छुं प्रेम प्रीतिया खँ ल्हाना थःके च्वंगु विद्यां उम्हं इन्द्रयागु वस्त्रे मोहनी तयाः बिल ।

थुगु बखते व देवराज इन्द्रया व स्त्रीयाके मन वन । वैगु न्हचोने वया थुगु प्रकारं धाल । हे केहेँ मय्जु ? छंगु छें गन, छंगु छें छक जि च्छि बास व्युरे धका धयाः मुसुहुनं न्हिला कोमल बचनं हालाः च्वन । थुलि इन्द्रया बचन न्यना थुम्ह मिसांनं केल्येहेँ मिखा कना कामबाण कयेका देवराज इन्द्रयागु न्हचोने धाल । हे महापुरुष ! जिगु छें थनहे नतुं खः बिज्याहुँ नु का धयाः थुम्ह इन्द्रयात थःगु छें बोना यंका छगू आसने तयाः व मिसां अनेक प्रकारयागु नकेगु सामाग्री हयाः न्हचोने तयाः भोजन याकल । व भोजन यास्येँ नस्येँ देवराज इन्द्रयात भनहे व मिसायागु मोहनी लगे जुयाः व मिसा नाप कामरसे भुले जुयाः च्वन ।

अथे च्वच्चं २ छन्हुया दिने इन्द्रया न्हचलं चाःम्हथ्ये भसंग वना लुमना वल । हा हा धिक्कार जि गुजोगु थासे लात । गनं वयागु जुल । हे स्त्री जि जूसां स्वर्गया राजा, देवताया राजा इन्द्र धयाम्ह, छ जुल मनुष्य, जि जुल देवता । आः गथेयाय्गु थ्व खँ देवलोकपिसं सिल धायवं जित गुलि हेला याना हायेकी । आःछुयायेगु, जि थन च्वने मजिल, जि स्वर्गे हे वने त्यल धका धाल । थ्व खँ न्यना व सुन्दरी सत्रीनं बिन्ति याना धाल । हे प्रभु महाराज इन्द्र धन्य २ जिगु भाग्येँ छपिथ्येँजाम्ह स्वामी पुरुष लाये धुन । हे प्रभु थौं छपिसं जित उद्धार याना बिज्याहुँ धका थुम्ह सुन्दरी स्त्रीनं इन्द्रयागु चरण कमले भोपुयाः बिन्ति याना च्वन । थथ्ये व सुन्दरी स्त्रीनं बिन्तियाना धाःगु खँ न्यना वैगु ख्वाः स्वयाः भरोसा बियाः थुगु प्रकारं वैत वरदान बियाः धाल । हे स्त्री छ धन्दा काय्म्वा । आःयात छ थन थुगुहे तीर्थे च्वनां श्री त्रिरत्नयागु भजन याना, पूजा भाव याना च्वं लिपा छ इन्द्रायणी देवी जुयाः सिद्ध ज्वी । छंगु नां सकल लोकजनपिसं मनमैजु धका प्रख्यात ज्वीतिनी । हे स्त्री धका थथे वरदान बियाः थुम्ह देवराज इन्द्र थःगु स्थाने स्वर्ग भुवनेस नतुं थाहाँ बिज्यात ।

हे मैत्रिय, उखनगु निस्ये इन्द्रया शक्ति जुयाः मनमैजु धायेका नामं प्रख्यात ज्वीका (जुया) थौया अद्यापितक हे स्थिर जुयाः च्वन ।

हे मैत्रिय, थःजाम्ह मनमैजुयात गुम्ह मनुष्यपिस्येँ सेवा याना पूजाभाव याइ, जप, तप, ध्यान याइ थजो २ पिं मनुष्यपिन्त मनोरथ पूर्ण ज्वीका च्वने दइ । हाकनं थुगु केशावती व बिमलावती सङ्गम जुयाः च्वंगु मनोरथ तीर्थे सेवा याइ स्नान, दान आदि धर्म याःवइ, अजोपिं मनुष्यगणपिन्त थः थःगु मनोरथ कल्पना पूर्ण जुयाः निश्चयनं सिद्धि फल प्राप्त ज्वी धका श्री शाक्यमुनि भगवानं मैत्रिय बोधिसत्व आदि सकल सभालोकपिन्त थुगु प्रकारं आज्ञा दयेका बिज्याना च्वनां च्वन ॥

इति श्री स्वयम्भू पुराणे मनोरथ तीर्थ माहात्म्य व्याघ्र, बराह उद्धार स्वर्ग प्राप्ति पञ्चमोऽध्याय समाप्त ॥

मनोरथ तीर्थ (तोखा दुवा) म्हसीका:



शाक्यमुनि, भगवान बुद्ध कनाविज्यागु द्वादशतीर्थ या माहात्म्य, स्वयम्भूराणपाखे वया च्वंगु खः । थुगु मनोरथ तीर्थया वाखंलय् मनमयजु उद्धार जूगु खं कना तःगुखः ।

थौकन्हये थुगु तीर्थ काठमाडौं महानगरया २९ वडा सामाखुसि गोगंबुया उत्तरपाखे गोगंबु गाउँ विकास समितिया वडा नं. ९ अन्तरगतय् लाना च्वंगु दु । धमाथूपाखे वा वया च्वंगु केशावति व तोखापाखेवा वया च्वंगु विमलावति, हव्ना च्वंगु थुगु मनोरथतीर्थ स्वनिगःया उत्तरपाखेच्वंगु न्हापांगु तीर्थ खः ।

थुगु तीर्थसः द्वादशतीर्थ उपोषठ व्रत दनीवले ५ कःगु तीर्थया रूपं काईगु खः । दिवंगत पिनिगु लय् पिण्ड थईवले नं न्याला या श्राद्ध यायगु चलन आतक दनि ।

नवरथया मोह ल्हयंगु चलन अनुसारं थुगुतीर्थय् न्हयेक अर्थात न्हय्नु दुकुनु मोह ल्हयगु चलन दुं ।

स्वनिगःया उत्तरपाखें लाना च्वंगु थुगु मनोरथ तीर्थ नं अतिक्रमणया दुने लाना, खुसि लिक लागु छगू सतः व प्रस्तर चैत्य जक बाँकी जुया तीर्थया लः मदया, दक्खों धः जुया बाःवना च्वंगु खनेदु ।

धर्मशास्त्र, स्वयम्भूराणय् सः उल्लेख जुया च्वंगु खतं- थुगु तीर्थस वाउंम्ह कुलिक नागराजा, बास याना च्वंगु खः । थुगुतीर्थ व्रत याइवले दानयाईगु ज्वलं सिलाकु व सिजःया पिण्ड पात्र खः । तीर्थ महास्नान यायगु स्वाँता नस्वाः खः ।

थुगुतीर्थ सः पाठ याःगु सफू आर्य लंकावतार सूत्र ख ।

थुगु तीर्थ व्रत याइवले पीठ माने याईगु फुसिंख्यले मनमयजु (इन्द्रायणि) पीठ खः । थुगु मनोरथ तीर्थ व्रत सेवा यानागुया पुण्ये राग द्वेषमोह पाप नाश जुईगु ख ।

मेमेगु तीर्थथे नतुं थुगुतीर्थयात संरक्षण याये माःगु अति आवश्यक खनेदु ।

निर्मल तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

श्री शाक्यमुनि भगवानं मैत्रिय बोधिसत्त्व आदि सकल सभालोक पिनिगु ख्वाः स्वयाः आज्ञा दयेका विज्यात । हे मैत्रिय, छं एकचित्त याना न्यो । गुगु मनोरथ तीर्थयागु माहात्म्य न्यनेहे धुंकल । आः निर्मल तीर्थयागु माहात्म्य कनेत्यना । थ्व खँ गथ्ये धाःसा नेपालया पश्चिम भागे श्री स्वयम्भू विज्याना च्वंगु गोपूच्छ पर्वतया सन्निधाने केशावती कुशुमावती सङ्गम जुयाः च्वंगु निर्मल तीर्थ धयागु तःधंगु तीर्थ छगू दु । उगु तीर्थे या वासिन्दा नागाधिपति जुयाः च्वंम्ह नागराजया नां खः । उपलाल धयाम्ह थ्व नाग अत्यन्त हे शोभायमान ज्वीक फणिपतिकहे मणि माणिकयागु तिसां तियाः अति तेज प्रकाश याना च्वंम्ह म्हासू वर्णम्ह थथिम्ह नागराजां वास याना च्वनां च्वंगु थुजोगु तीर्थे गुम्ह मनुष्यगणपिंस्ये जूसां थुगु तीर्थे छक जक वाः २१ नीछ्कोयंकनं हे स्नान याःवनी, दान धर्म आदि याना जप, तप, ध्यान याइ देवतापिन्त अर्घतनी, पितृन्ति तर्पण याइ थयो थयोपिं मनुष्यगणपिन्त जूसां निश्चयन तःधंगु अष्ट सिद्धि फल लाना दक्व पाप नाश जुयाः पुण्यात्मा जुयाः निर्मल शरीर ज्वीका च्वने दइ ।

हे मैत्रिय, हानं अनया पर्वकाल मेला गुबले धाःसा पौष शुक्लया षष्टमी मकर संक्रान्ति दिव्यवार थुलि योग चूलावै वले अनया मेला लगे ज्वीगु जुयाः च्वन । हानं न्हापा थुगु तीर्थे तपोव्रत याना सुसु उद्धार जुयाः वन थ्व खं थथे खः छं त्यो । न्हापा पांचाल देशया म्ह अपजश पण्डित छम्ह जश दयेका अष्ट सिद्धि लाना जुयाः वःगु दु धका श्री शाक्यसिंह भगवानं आज्ञन दयेका विज्यात ।

थथ्ये आज्ञा दयेका विज्यागु खँ न्यना मैत्रिय बोधिसत्त्वं थथे विन्तियात । हे भदन्त, हे गुरु, हे शास्ता, हे सर्वज्ञ थुगु तीर्थे तपस्या याना उद्धार जुयाः वंम्ह पण्डितयागु नां छुले । थुकिया माहात्म्य गथे खः हे भगवान् धका थथ्ये विन्ति याना धाःगु खँ न्यना श्री शाक्यसिंह भगवान् मैत्रिय बोधिसत्त्वयागु ख्वाः थुगु प्रकारं आज्ञा दयेका विज्यात ।

हे मैत्रिय, थ्व खँ गथ्ये धाःसा पांचाल देशया छम्ह वज्रपाद धयाम्ह पण्डित छम्ह दया च्वंगु दु व पण्डित गजोम्ह धाःसा महा विद्यावान् जुया च्वंम्ह बलवानम्ह गणित तान्त्रिक, वद्य, चतुषष्टि लिपि विद्या सम्पूर्ण शास्त्रे निपूनम्हे थयोगु सकल गुण ज्ञान दया न्याय नीति स्यूम्ह लोकजन प्रति करूणा दुम्ह थःथीम्ह पण्डित छम्ह दुगु जुयाः च्वन ।

हे मैत्रिय, थुजोम्ह पण्डितया व थःगु देशे च्वनां न्हचागुहे ज्यायासानं यश लाभ भजू अपजश जक हे वैगु । थुकिंयाना व पण्डितया थःत थःम्हहे बारम्बार निन्दा याना धयाः च्वन । आः छुयाये

धिक्कार थौं जिं न्हचाकोहे सःसां स्यूसांनं तबि गुबलेहे यश प्राप्त मजू सदांनहे अपजश जक वैगु । विद्वान् सज्जनपिनि धाःसा यश बीगु जकहे तिसा जुयाः च्वन । हानं जिंसकलयातनं शास्त्र विद्या आदि स्येना सेका बियाः आपलं हे वने धुंकल । थुपिं सुनानं हे जश काये मफु भन अपजश जक वयिगु ।

हे मैत्रिय, थुगु प्रकारं व पण्डितं स्यना सयेका कयाः तपिं शिष्यपिस्ये जक हे सःस्यू धकायका जशकया सकल लोकपिसं धन्य २ पण्डित धायेका अनेक प्रकारं मानेयाका जशकया च्वनीगु जया च्वन । व मूलम्हः पण्डितयात धाःसा सुनानहे जश मव्यू (गथ्ये धाःसा) थ्व पण्डितं पुराण आदि कथा कना स्यना बियाः पूर्ण ज्वीथ्ये च्वनकि अनेक मार वया शिष्यपिसं ल्वापु थया गनं हे सिलापाउ कायेमखैः अपमान जक कायमाः । थुगु प्रकारं व पण्डितया गुबलेहे गनंजकहे वंसांनं सुविष्ठा ज्वीक खै न्यना मनयात आनन्द ज्वीके मफु ।

हे मैत्रिय, थय्ये जुजुं २ ताकालं दया वस्येलि थुम्ह ब्रज्जपाद अपजश पण्डितया छन्हुया दिनस थःथःम्हहे अत्यन्तहे अपशोच अपमान नयाः थःगु मनं धाल । हा हा हे भगवान् थ्व जिगु जन्म धिक्कार । जिं थुलिमछि शास्त्र, तन्त्र, मन्त्र, विद्या आदि स्यना सयेका चतूषष्टि लिपि सम्पूर्ण हे पूर्ण ज्वीका पण्डित धायेका च्वनां हानं असंख्य अज्ञानी लोकपिन्त ज्ञान बुद्धि नं बिये धुन, जिके सःगु स्यूगु शास्त्र, मन्त्र, तन्त्र, विद्या आदि सकलयातनं स्यना कनाहे च्वनां च्वनागु दु धास्येलि थौं जित सुं छम्हेसिनहे जश गुण बियिगु धैगु नां मका, सकसिननं अपजश बियित जक स्वयिगु । थौं जिं स्यना तयाः तयापिं शिष्यपिसं धाःसा सयेका सीका कयाः इमिसं असंख्ये जश गुण लाना चदो तःधीपिं पण्डित धायेका आपालं सिल्पाउ कयाः माने याका जुयाः च्वन । थौं जिजा सुयाकेहे ल्याख मदयेका च्वनां माल । हा हा गुलिजक विवेक विचार मदुपिं लोकजनपिं धिक्कार २ थयोगु विवेक विचार मदुगु देशे च्वनां छुहे प्रयोजन मदु । थयोगु अविवेक याइपिनिगु ख्वाः स्वयाः च्वनेहे मखुतः । हा हा हे दैव आः जि गन वनेगु, सु देवताया भाव भक्ति याना च्वनेगु, छु धर्म यायेगु, छु तपस्या याःसा जित जश पदलायी । हाः जिं थौं छु पाय यानावःगु फल थयोगु दुःख भोग याना च्वने माल धिक्कार जिगु जन्म । आः जिं थ्व देश त्याग याना परदेश वनेगु । थुजागु देशे च्वनां जित कथं मलात धका मनेल्वीका तपिकया उगु देशयात त्याग याना पिहाँ वन ।

थय्ये पिहाँ ववं २ क्रमथ्ये दूर देशे थ्येक वन । अननं म्य म्यगु देशान्तर ग्राम २ नगर २ आदि चाःहिला ववं २ नेगुहे मदया भिक्षा फों २ नयाः थःगु जिविका चले याना जुजुं २ छगू काल बिते जुयां वस्येलि क्रमैसित वना नेपाल मण्डल थ्येक वल । थय्ये व पण्डित नेपाल धयागु थासे थ्यस्येलि आकाशं नस्येहे श्री स्वयम्भू ज्योतिरूप खन । नमस्कार याना उगु हे थासे थ्येक वना व पण्डितं न्हापां श्री स्वयम्भू ज्योतिरूपयात नमस्कार याना वस्पोलयागु न्हचोने च्वनां त्रि प्रदक्षिणा याना पंचोपचार पूजा याना अनेक जप, तप, ध्यान आदि अष्टाङ्ग प्रणाम नमस्कार याना अनं प्रस्थान जुयाः क्वहाँ वया निर्मल तीर्थे थ्येक वल ।

थुगु तीर्थ थ्येका व पण्डितं विचारयातकि अहो गुजोगु उत्तम जुयाः च्वंगु स्थान थ्व । थः थिंगु बौद्धया सन्निधाने तीर्थ संयुक्त जुयाः गयोगु तीर्थ स्थान धाःसा केशावति, कुसुमावती संगम जुयाः च्वंगु थः थिंजागु पुण्य क्षेत्रे त्वःता मेथाय् गन वनेगु । थयोगु पुण्य क्षेत्र मेथाय् दइहे मखु धका थःगु मनं धयाः निश्चय याना आः जिं थ्वहे थासे तीर्थे हे च्वनां तपस्या याये । थय्ये तपस्या याना तिनी थुगु पाप शान्तयाना अष्ट सिद्धि फल लायेगु धका मने तयाः थ्व पण्डितं जूसां उगु तीर्थ स्नान याना

बालुका चैत्य दयेका उपलाल धयाम्ह नागया मूर्ति नं दयेका विधिथ्यें पूजा याना जप, तप, ध्यान याना त्रिरत्नया सेवा याना प्रदक्षिणा याना अनहे कर्णद्वीपे चवनां धूया छेगुली आसन याना न्हिं न्हिं हे बंगल सिमाया हःले श्री प्रज्ञापारमितायागु मन्त्र च्वयाः उगु तीर्थे च्वीके छोया श्री विद्याधरी देवीयागु मन्त्र प्रयोग याना अनहे मशाने पुरश्चरणे चवनां थुगु प्रकारं व बज्रपाद पण्डितं तपस्या याना च्वन ।

थय्ये च्वच्चं २ खुदं न्हय्दं दयावस्येलि छन्हुयागु दिने पण्डितं आपालं दुःख कष्ट नयाः तपस्या याना च्वंगु खना व स्वयाः श्री विद्याधरी देवी सन्तुष्ट जुयाः व पण्डितं तपस्या याना च्वंगु थासे थ्यंक विज्यात । गुजोगु प्रकारं विज्यात धाःसा आकाशवाणी जुयाः थुम्ह पण्डितयात आज्ञा दयेका विज्यात ।

हे मानव ! धन्य २ छ खः छंगु तपस्या खना जि सन्तोष ज्वी धुन । हे मानव छँ छु इच्छा याना तपस्या याना च्वनागु खः । जित धाः जिंनं छंगु इच्छा पूर्ण ज्वीक वरदान बीः धका थय्ये आज्ञा दयेका विज्यात । थुलि श्री विद्याधरी देवीया आज्ञा आकाशवाणी जूगु खँ न्यना हथासं दना मिखा कयाः आकाशे थस्वयाः ल्हाः विन्ति याना थुगु प्रकारं धाल । हे परमेश्वर ! छपिं सुखः, गुम्ह ख, देव लाकि, दैत्य लाकि, राक्षस लाकि अथवा भूतला, प्रेतला, पिशाचला जित छले जकं यानागुला । छपिं सु खः जिं मस्यू धका थये विन्ति याना धाःगु खँ न्यना श्री विद्याधरी देवीं थुम्ह पण्डितयात जूसां थःगु रूप दर्शन बियाः विज्यात ।

गुजोगु प्रकारं दर्शन बिल धालसा अत्यन्त जाज्वल्यमान तेज प्रकाश याना धालपति स्वाँथ्यें निर्मल रक्तवर्ण जुयाः त्रिनेत्र धयागु स्वंगः मिखा कना वःगु ल्हातिं बज्र ज्वना, खःगु ल्हातिं करोटक ज्वना, जवःगु तुतिं यखुइका म्हालापतिंयागु च्वकां सहस्र दल पलेस्वाँया मूले दिका खःगुतुतिया पालि आकाशे छोया, खःगु ल्हातिं खगु तुति घेपुना स्वंगः मिखां आकाशे स्वयाः मुसून् न्हिला धालेयागु प्रमाणं भोलाःगु दन्त वा बोया जगत् संसारयाके करूणा तयाः सम्यक्बोधिज्ञान बिइम्ह दिव्य चक्षु नेत्र प्रकाश याना नरमूण्ड मालां क्वखाया सुवर्णयागु तिसां तियाः रत्न माणिकया मालां क्वखाया पंचबुद्धया मूर्ति दुगु सुवर्णया जटामकुट पुयाः अनेक प्रकारं रत्नया हारं तिया कोति सूर्ययागु तेज प्रकाश याना सिंघिनी, व्याघ्रिनी, जवय् खवय् तयाः जटाधारी जुयाः व बज्रपाद पण्डितयात थुगु प्रकारं मूर्ति जुयाः दर्शन बियाः विज्यात ।

थुजोगु मूर्ति रूप खनेसात अकस्मात्त्रनं व पण्डितनं जूसां थुम्ह दिव्य सुन्दरी श्री परमेश्वरी विद्याधरी देवीयागु रूप दर्शन याना हथासनं दना अनेक प्रकारं जप, तप, ध्यान, स्तोत्र, पाठ, आदि याना पंचोपचार पूजायना प्रदक्षिणा आदि याना ल्हानिपाँ विन्ति याना आकाशे थस्वया थुगु प्रकारं प्रार्थनायात । हे परमेश्वरी, हे माता, हे विद्याधरी, हे योगिनी, हे बुद्ध जननी, हे प्रज्ञापारमिता, हे गुह्यमाता, हे जगत् माता, हे भगवती, हे देवी छल्पोलया चरण कमले कोटि २ नमस्कार । हे जगत् व्यापिनि जि थः थींम्ह पापिया उपरे कृपा तयाः छल्पोलं जित दर्शन बिल । हे माता ! छपिनिगु चरण कमले कोटि २ नमस्कार हे महालक्ष्मी धन्य २ जिगु भाग्य छल्पोल थिंजाम्ह जोगिनीया दर्शनयाय धुन । थौं जि कृतार्थ जुल । हे उग्रतारा जित वरदान मेगु मखु छल्पोल बियाः विज्यायेगु जुलसा हे जगत्मा माता जित अपजश नाश याना जश प्राप्त याना अष्ट सिद्धि फल लायेगु वरदान प्रसन्न जुयाः विज्याहुँ धका थुगु प्रकारं विन्तियात । थुलि विन्ति याना धाःगु खँ न्यना श्री विद्याधरी देवीं आज्ञा दयेका विज्यात ।

हे बज्रपाद, हे मानव ! छँ याःगु तपस्या खना जि सन्तोष ज्वी धुन । आः छन्त जिं अष्ट सिद्धि बरदान बिये धुन । आः छ अष्टसिद्धि दुम्ह जुल । हे बज्रपाद, हे मानव आः जिगु थ्व अंश थन तयाः थक्य सकल मनुष्यगणपिन्त उद्धार याना च्वने । हे बज्रपाद थ्व जिगु मूर्तियात गुम्ह मनुष्यनं छँथ्ये नतुं थ्वहे तीर्थे २१ नी छन्हु यंक स्नान याना दान याना त्रिरत्नयागु भजन याना उगु मूर्तियात पंचोपचारं पूजायाना नमस्कार याइ अजोम्ह मनुष्य गणपिन्त जूसां निश्चयनं हे अष्टसिद्धि फल प्राप्त ज्वी ।

हे मानव, आः छ थःगु छें लिहाँहुँ । छें थ्येका छँ थःगु शास्त्रया गुण ज्ञान प्रकाश याना सम्पूर्ण लोकजनयात गुण ज्ञान बियाः अनेक तन्त्र, मन्त्र, शास्त्र स्यने कने याना श्री त्रिरत्नयागु भजन याना अष्ट सिद्धि लाना सदाकालनं त्रिरत्न याके मन तया बोधिब्रत धारण याना च्वं । हे बज्रपाद पण्डित आःछ थन च्वने म्वाल । थःगु छेंसं लिहाँ हुँ धका थुलि आज्ञा दयेका श्री विद्याधरी देवी तत्कारणं अन्तरधान जुयाः सिद्ध जुयाः बिज्यात ।

हे मैत्रिय, थुगु मूर्ति थौयागु अद्यापितक हे प्रसिद्ध जुयाः च्वंगु दु । अनलि व बज्रपाद पण्डितया श्री विद्याधरी देवीयागु कृपां जश पदवी लाना अष्ट सिद्धि नं लाना श्री देवीयागु आज्ञा थ्ये गोपुच्छ पर्वते थाहाँ वना श्री ज्योति रूप भगवान्यात प्रदक्षिणा नमस्कार याना अनलि श्री विद्याधरी देवीया प्रसादं तःधंगु जश पदवी समेत लाना अनं प्रस्थान जुयाः थःगु देशे ल्याहाँ वयाः उगु देशे च्वपिं सकल लोकजनपिं शिष्यगणपिं फुक्क मुंका अनेक प्रकारया पुराण आदि सत् कथा व्याख्या याना कना सकसितनं चित्त बुझे ज्वीका उगु पुराण कंगु न्योपिं सकल लोकजनपिं फुक्कसिनहे धन्य २ धायेका सकसिनं नमस्कार याका न्हापायागु खँ फुक्कहे लुमंका सकल लोकपिं फुक्कसिननं व पण्डितयाके क्षमा फोना च्वन ।

हे गुरु धन्य २ छल्पोल खःधका धयाः न्हापा थःत जश मव्यूसे हेलाया पिं थयो २ पिं फुक्कहे वया थुम्ह बज्रपाद पण्डितयागु न्हचोने च्वनां वयागु गुणयात लुमंका सकसिननं कोसेलि सिरपाउ आदि वीगु न्हचोने तयाः हे गुरु धका ल्हाः भिपतिं ज्वरे याना थःथः पिसं ज्वना वयागु कोसेलि आदि चन्हे याना थुगु प्रकारं बिन्ति याना च्वन ।

हे नाथ, हे गुरु, छल्पोलं जिमिगु उपरे करूणा तयाः क्षमा याना बिज्याहुँ । थौं छल्पोलं जिमिगु उपरे करूणा तयाः क्षमा याना बिज्याहुँ । थौं छल्पोलयात सकल लोकजनपिसंनं पूजायाये योग्य ज्वीका बिज्याना च्वंम्ह हे गुरु छःपिन्त सदा सर्वकालहे नमस्कार धका धायेका श्री विद्याधरी देवीया प्रसादं थुम्ह बज्रपाद पण्डितनं जुलसां अष्टसिद्धि लाना असंख्य गुण प्रशंशायाका अनेक लोकजनपिन्त हितयाना आनन्दं काल हना च्वन धका श्री शाक्यमुनि भगवान् मैत्रिय बोधिसत्व आदि सकल सभालोकपिन्तनं थुगु प्रकारं आज्ञा दयेका बिज्यात ।

थ्व खँ न्यना सकल सभालोक पिसंनं अहो निर्मल तीर्थयागु अमृत तूल्य जुयाः च्वंगु माहात्म्य कथा न्यना भीपिनं उगु हे तीर्थे वना सेवा याःवने माल धका थः थःगु मनयात बोधयाना च्वन धका श्री शाक्यमुनि भगवानं आज्ञा दयेका बिज्यात ।

इति श्री स्वयम्भू पुराणे निर्मल तीर्थ माहात्म्य बज्रपाद पण्डित उद्धार जश प्राप्ति अष्टसिद्धि लाभ षष्ठमोऽध्याय समाप्त ॥

निर्मल तीर्थ (भचा खुसी) म्हसिका



थुगु तीर्थ ये महानगरपालिकाया वडा नं. १५ या दुने लाना च्वंगु खः । स्वनिगःया तीर्थ मध्ये अतिक लोक
व्हाःगु तीर्थ खः थुगु निर्मल तीर्थ ।

थुगु तीर्थ उत्पत्ति सम्बन्धि मूल खं स्वयम्भूपुराणय् वया च्वंगु ख । थुगु तीर्थस वज्रपाद पण्डित उद्धार जूगु
खँ उल्लेख याना तगु दु । थुगु तीर्थ या नापं, च्वयपाखे बिद्याधरी देखि विराजमान जुया च्वंगु दु । उत्तरपाखें
शोभा चैत्य व शोभा भगवति, स्थापना जुया च्वंगु खः ।

थुगु तीर्थया नापं च्वंगु कर्ण दीप खः । थुगु कर्णदीप थुगु लागाय, गाकं प्रख्यातगु दीप खः । यें च्वपि,
सकस्यां आपाःथे थुगु तीर्थ नापं थुगु कर्ण दीप यात हे क्षला वया च्वंगु खनेदुः ।

ये देया थंने च्वपिं श्रद्धालु भक्तजनपि सुथे न्हापां स्वयम्भू धर्मधातु चैत्य, स्वयम्भूइ देके वनिपि,
भक्तजनपी सकसियां थुगु तीर्थस स्नान याना तिनी स्वयम्भू वनीगु चलन दु । द्वादश तीर्थ उपोषध व्रत दनिगु
इलय् थ्वं खुंगूगु तीर्थ खः ।

दिवंगत जुपिनीगु नामं, लय् पिण्ड (मासिक श्राद्ध) थयगु बले खुला दतकी याइगु खः । नवरथ वलें जक
न्हेनु दु कुन्हु नवरथया महास्नान याय्गु चलन दु ।

केशावति व पुष्पावति, व भद्रमति नदीनाप संगम जुया त्रिवेणी संगम जुया च्वंगु निर्मल तीर्थय् म्हाःसु
वर्णजुयां च्वंम्ह अपलाल नागराज च्वंना बिज्यागु थुगु तीर्थस दान याइगु ज्वलं खः कय्यागु ख्वलाय् घ्यः तथा
दान याय्गु चलन दु ।

थुगु तीर्थया पीठ खः लुतिमरू अजिमा (इन्द्रायणि) खः ।

थन पाठ याय्गु सफू आर्य सद्धर्मपुण्डरीक खः ।

थुगु तीर्थ, बिद्याधरी देवी प्रादुर्भाव जूगु खः । धर्मकर्म याय्गु श्रद्धा याना, अन्ध श्रद्धा व अन्ध भक्ति याना
सच्चा तीर्थ न्हना वना च्वंगु दुसा थुकथं स्यना वना च्वंगु तीर्थ यात सुधार याय् मागु भी सकसियां कर्तव्य खः ।

निधान तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

अथानन्तरं थनलि श्री शाक्यमुनि भगवानं मंत्रिय बोधिसत्वयात आज्ञा दयेका बिज्यात । हे मैत्रिय, निर्मल तीर्थयागु माहात्म्य छिमिसं न्यनेहे धुंकल, आः हाकनं मेगु निधानयागु माहात्म्य कने त्यना छिमिसं एकचित्तं याना न्यो धका थथ्ये आज्ञा दयेका बिज्यात । थथ्ये आज्ञा जुयाः बिज्यागु खँ न्यना मैत्रिय बोधिसत्वं भगवान् याके बिन्तियात । हे भगवान्, हे गुरु छल्पोलयागु कृपानं निर्मल तीर्थ माहात्म्य न्यनने धुन । आः हानं निधान तीर्थयागु माहात्म्य न्यनेगु इच्छा जुल । छल्पोलं दया कृपा तयाः आज्ञा दयेका बिज्याहुँ धका थथ्ये बिन्तियात । थुलि बिन्ति याना धाःगु खँ न्यना श्री भगवानं आज्ञा दयेका बिज्यात ।

हे मैत्रिय, गुगु केशावती व सुवर्णवती संगम जुयाः च्वंगु तीर्थयात निधान तीर्थ धका धाइ । उगु तीर्थस बासयाना च्वपिं नागराजयागु नां थ्व खः नन्द, उपनन्द धयापिं निम्ह जोरापिं नागराजां बासयाना च्वनां च्वंगु ।

हे मैत्रिय थ्व नागराज गजापिं धाःसा नन्द ५ फन्ना उपनन्द ७ थिना अत्यन्तहे सुन्दर रूप जुयाः मित्र भावं निम्हहे प्रेम जुयाः तीर्थे आनन्दं बासयाना च्वन ।

हे मैत्रिय, उगु तीर्थया मेला ज्वीगु गुबले धालसा माघ शुक्लयागु सप्तमी कुम्भ संक्रान्ति आदित्यवार थुलि संयोग ज्वीबले अनया मेला ज्वी । थजोगु उत्तम जुयाः च्वंगु तीर्थ धका सीका उगु पर्वकाल दिने जूसां गुम्ह मनुष्यं बिचारं सियका २९ दिन न्हिं छक यंकहे स्नान याःवनी, दानयाइ (अथवा) छक जक हे जूसां स्नान याना बालुका यागु चैत्य दयेका पंचोपचारं पूजा याना अर्घ तिना पितृयातनं तर्पण बियाः जप, ध्यान, पाठ आदि याना सिधय्का अतिथि गणपिन्त दान, धर्म याना बी थुजोपिं मनुष्य गणपिन्त जूसां निश्चयनं सकल दरिद्र दुःख नाश जुयाः धन द्रव्यं पूर्ण जुयाः सुवर्ण रत्न आदि सम्पत्तिनं पूर्ण जुयाः महाभाग्यमानी जुयाः च्वने दइ ।

हे मैत्रिय, हाकनं थुगु तीर्थे सेवा याना सु सु उद्धार जुयाः वन थ्व खँ न्यँ । न्हापा २ पांचाल देशया अधिपति जुयाः च्वम्ह पंचचूड धयाम्ह राजा छम्ह दया च्वन । व राजाया रानीपिं स्वम्ह दुगु जुयाः च्वन । थुपिं रानीपिनि स्वम्हेसियाहे म्हातिं छम्ह पुत्रपिं दुगु जुयाः च्वन । सुसु धालसा न्हापां दिन चूड धयाम्ह १ रत्नचूड धयाम्ह २ ज्ञानचूड धयाम्ह थुपिं स्वम्ह काय्पिं दया च्वन । थुपिं स्वम्ह

मध्ये ज्येष्ठाम् दीनचूड धयाम् गयोम् धालसा सापहे गुण्डाम् । साक्कभिक्क जक नयाः थःयःथे
फर्मास याना योयोथ्येहे म्हिता ज्वीमाःम्ह । राज्यय् धालसा छुहे विचार मयासे थःयथेहे नयाः त्वना
तियाः स्वच्छन्द म्हिता ज्वीमाःम्ह । थथे जुजुं ताकालं दया वस्येलि थःगु राज्य आदि असंख्य धनद्रव्य
आपालं फुका मदयेका बिल ।

हे मैत्रिय, थथ्ये व तः धिकम्ह दीनचूड धयाम् राजकुमारं आपालहे धन सम्पत्ति तिसा आदि
स्वाहा याना फुका जूगुलिं थ्व खना माँम्ह लक्षणा रानीया तसकहे अपशोच जुल । हरे थ्व काय्या
बानी गयोगु खराब स्वस्व जि न्हेथुपिनि कायपिं गुलिजक सत्गुणी ज्ञानी धर्मात्मा, स्व २ थ्व दीनचूड
छम्ह जक कुसंगत कुबानि हते यायगुलि फुक्क दाजु किजा माँ बौ कलाःपिसं गुलिखे प्रेमपूर्वकं
न्वाना खँ ल्हाना धाल । अहँ वैगु कुसंगत बानी तँकेहे मफु । छन्हु बौम्ह राजां दमन नीति कायेगु
विचार याःगु खः तर थ्व खँ रानीया अनुमति मदुगुलिं त्वःता छोट । क्रमैसित व दीनचूडया न्हिथहे
दरिद्रता व संतापं युक्त जीवन हना च्वने माल । थुगु प्रकारं आपालहे धन द्रव्य नाशयाना वस्येलि
बौम्ह राजां पंचचूडया मने ताप जुयाः छन्हुया दिने थः पुत्रपिं राजकुमारत स्वम्हहे सःतके छोया थःगु
न्हचोने तयाः थथ्ये आज्ञा दयेया विज्यात ।

हे पुत्र ! राजकुमारपिं छिमिसं जिगु खँ छता न्यो । छिपिं स्वम्हहे दाजु किजापिं थःथःहे छखे
अलग अलग च्वहुँ । छिमिगु सम्पूर्ण धन, द्रव्य, दक्वहे स्वभाग थलाः अंशवन्दा याना काः धका म्हितं
छ भाग २ इना बियाः थःपुत्र राजकुमारपिन्त छख्ये अलग २ याना तय्के छोट । अथे व राजकुमारपिसं
थः बुबाँ इना व्यूगु सम्पत्ति म्हितं छ भाग २ अंश कयाः अबुया आज्ञा थ्ये छख्ये च्वनां सुख भोग
याना च्वन ।

हे मैत्रिय, थयोगु अवसरे ज्येष्ठाम् दीनचूड राजकुमारया जक जूसां उगु सम्पत्तियागु छुहे माया
मकासे साकभिकं जक नयाः थः यथेहे म्हिता जुल । थुगु प्रकारं नयाः म्हिता जुजुं २ भिदं भिनिदं
बिते जुयाः वस्येलि थः बुबाँ बियाहःगु अंश, धन द्रव्य, दक्वहे सम्पूर्ण नाश जुयाः फुना नेगु, त्वनेगु
सुधान्तहे मदया सकल दासदासिपिन्त समेत नके मफयाः इमिसं समेत त्वःता वन ।

हे मैत्रिय, थथे थः थाय् तयाः तैपिं नोकर चाकर धयापिं सूहे मदयेका थः कलायागु क्वसः
समेत मियाः जीविका चले याना नल । थथे ननं ननं दक्वहे उगु सिबे क्वसनं फुक्कहे नजक नयाहे
फुक्कल । थथे जूगु स्वयाः व दीनचूड राजकुमारया कलाः रानीया थःगु मनयात सान्है दिक्क जुयाः
थः स्वामीया थाय् न्हचोने वना थथे धाल । हे स्वामी राजकुमार थ्ये जुयाः जि रानीथ्ये जुयाः च्वनां
धास्येलि थथ्ये न्हिं न्हिसिया आहार नापं चूमलाका थः थाय् चाकरी याका तयापिं समेत मदयेका
इमिसं नाप तोतका निर्लज्जा जुयाः लजगार ज्याः मिखाँ मखंका च्वम्ह । थजोम्ह छपिं साकभिकं
जक नयाः थःयथे स्वच्छन्द म्हिता ज्वी माःम्ह छपिं धास्येलि आः छपिंके छु दिन । छुहे दुगु मखे
धुंकल खाली राजकुमार धका नां छगू जक बाँकी दनी । थयोम्ह पुरुषयाके जि च्वनां च्वनां छु
प्रयोजन दनी । स्नेह माया प्रीतिजक कयाः च्वनां छुयाये । थौं जित रक्षा ज्वी मखुत, नयेगु त्वनेगु,
पुनेगु छु मन्त । जि मामं बियाहःगु, बुबाँ बियाहःगु सिबे ज्वलं क्वस सुधान्तहे मदये धुंकल । थौं
छिगु माया जक कयाः च्वनां छुयाये । जित भलो ज्वी मखुत, छि स्वयाः छि जु, जि स्वयाः जि ज्वी
धका तँ पिकयाः थः स्वामीयात् त्वःता थःगु छे वना माँ बौया न्हचोने च्वनां थः स्वामीयात् त्वःता
वयागु सम्पूर्ण खँ फुक्कहे कना माँ बौयागुहे थःम्हं फुथ्ये सेवा याना बरो आनन्द च्वनां च्वन ।

थनीलि दीनचूड राजकुमारया जक थःगु धन सम्पत्ति दक्वहे नयाः, त्वना, म्हिता, फर्मास याना जक फुक्का नाश याना थः न्हिं न्हिं सियाहे आहार यायेगु नेगु सुधान्तहे मखंका थःगु मनं भापिया धाल । हा हा आः गथ्ये यायेगु नेगु, त्वनेगु सुधान्तहे मफुया जिं आः छुयायेगु धका मतिइलुईका छगू देशे च्वपिं महाजनपिं बदो तःतःधपिं धनाद्य जुयाः च्वपिं दु धैगु मती ल्वीका थुमिकेहे धन त्याना हयाः नेमालि धका मने तयाः थःगु राजदरवारं पिहाँ वया व धनाद्यजुयाः च्वपिं महाजनपिनिगु छें वना इमिके धन त्याना कयाः हयाः हाकनहे न्हापा थ्यें नतुं फर्मास याना नयाः त्वना नतुंहे जुयासन । थये जुजुं दछि, निदं दया वस्येलि सकल महाजनपिं वया व राजकुमारयात थःम्हं त्याना कयाः तःगु धन साहु पुले म्वाःम्ह धका विपत्यार याना सुनानं वैत धन त्याये व्यूपिं मन्त ।

हे मैत्रिय, अयोगु बखते व दीनचूड राजकुमारया जूसां थःत धन, द्रव्य, अन्न आदि गेरा सुधान्तहे सुनानं हे वैत पत्यार मयात । पूर्व न्हापायागु पापयागु फल भोग याना च्वन । थुगु प्रकारं दुःख भुक्तमान याना च्वच्चं ताकाल दया वस्येलि छन्हु थः स्त्री लुमंका मिखाँ खोबि हायेका विरहयाना धाल । हाः हे दैव थौया दिने नकेगु, त्वंकेगु, पुंकेगु, तीकेगु मफुया कारणे थौं जित कलाःनं समेत हे वाना त्वःता थकल (त्वःता वन) हाः हे दैव ! थौं जित हाकनं माँ बौपिसनं छं नयधुनला धका न्वं सुधान्तहे सुनानंमत् । हाः जिगु कर्म धिक्कार छु नेगु छु त्वनेगु सुनानं जित पत्यार मन्त । आः सुनां जित रक्षा याइ । गुम्ह देवतां रक्षा याइ । गन वना जी, छु कर्म जित रक्षा ज्वी । हाहा थपायसकं दुःख ज्वीका जि थ्व देशे च्वनाया छु प्रयोजन दिन । थ्व ज्यूया माया कयाः च्वनां छुयाये मनयात दिक्क ज्वीका थःगु देशं त्वःता पिहाँ वन ।

हे मैत्रिय, अथे पिहाँ वना प्यन्हु च्यान्हु दस्येलि देश, ग्राम, नगर चाःहिला भिक्षा फोना ननं २ क्रमैसित ववं २ कालान्तरे नेपाल देशे थ्यंक वया श्री स्वयम्भू भगवानयात नमस्कार याना अनहे श्री स्वयम्भू भगवान् बिराजमान जुयाः च्वंगु उगु पुण्य क्षेत्र थ्येंक वना थुम्ह दीनचूड राजकुमारं ज्योतिरूप श्री स्वयम्भूयात थःम्हं फुथ्यें वेना थुम्ह दीनचूड राजकुमारं ज्योतिरूप श्री स्वयम्भूयात थःम्हं फुथ्यें पूजा भावयाना थः सःथ्यें जप, तप, ध्यान आदि याना प्रदक्षणादि अष्टाङ्ग प्रणाम याना प्रार्थना याना च्वन । हे परमेश्वर, हे स्वयम्भू, हे भगवान्, जि दरिद्र दुःखी थौं जिथ्यें जाःम्ह दुःखी थ्व पृथिवीले मदु । जि पापिं यानागु भक्ति खना छल्पोल सन्तुष्ट जुयाः बिज्याहुँ । जिगु दुःख मदयेका जित रक्षा याना बिज्याहुँ । हे परमेश्वर ! धका प्रार्थना याना उगु पर्वतया पूर्वपतियागु मार्ग क्वहाँ वया आपालं नेपित्यागुलि नेगु छुं मदया उख्यें थुख्यें स्वयाः जुल । थथ्ये स्वःगु बखते वं लः छधा वया च्वंगु धःचा छगू खंकल । हथाय्चाया व राजकुमारं उगु लः वया च्वंगु धःले थ्येंका क्वहाँ वना लःपना न्या लाय्त सन । थुगु प्रकारं व धः ले न्यालाना ववं २ उगु फोचाला मेगु खुसि थ्यन । थथ्ये मेगु निगू होना छगू जुयाः वया च्वंगु खुसि थ्यंस्येलि अन स्ववले लः आपा दया तःजा जुयाः च्वंगुलि अन वं न्या लाये मफु । आपालं नेमास्ति वया परिश्रम जुयाः न्हापा लाना तःपिं न्यात अथ्येहे कचिकं नयाः छोल । अयोगु बखते अन निधान तीर्थे स्नान याना मोल्हुइ धका वया च्वपिं मनूतेसं वं अथ्येहे कचिकं न्या नःगु खना धाल । हे महापुरुष ! आम न्या छँ छाये कचिकं नयागु, पाकयायेनं म्वाःला धका थथ्ये न्यनन । थुलि धाःगु खँ न्यना राजकुमारं धाल । हे लोकजनपिं जि सापहे नेपित्यागुलि च्वने मफयाः सनेगु सुधान्तहे मफुत, उख्यें जिं व न्यायात पाक मयासेहे नयागु खः । हे लोकजनपिं जि धालसा धनसम्पत्ति दक्वहे फुना सापहे कंगाल जुयाः नेमखना थजागु धःले च्वपिं न्या लाना

नेमाल छुयाये धका करूणा चायापुगु स्वरं धाल । थुलि खँ धाःगु न्यना उगु तीर्थे वयाच्चपिं सकल लोकजनपिसं मने करूणा चाया थथे धाल । हे महापुरुष ! छ जूसां आपालं दुःखिम्ह खः छन्त जिपिं सकसिननं उद्धार ज्वीगु खँया उपकारयागु खँ कने छँ जूसां न्यो । गथे धालसा हे महापुरुष ! छँ आम न्याः लाना वयागु ध गयोगु जुयाः च्वन धालसा सुवर्णवती धयागु खः । आम खुशी व व धःचा नाप लाना छगू जुयाः वया च्वंगु खुशीयात केशावती व सुवर्णवती धयागु नामं प्रसिद्ध जुयाः निधान तीर्थ धका धयाः तल । थुगु तीर्थे जिमिसं न्हिं न्हिं हे वया स्नान याना वयां च्वनां । हे महापुरुष ! आः छँनं थुगुहे तीर्थे सेवा याना च्वं । थुकियागु पुण्यं छन्त दुःख नाश जुयाः फुना धनाध्य ज्वीगु वरदान प्राप्त ज्वी । हे मानव धका धाःगु खँ न्यना व दीनचूड राजकुमारं जुलसां उगु निधान तीर्थे स्नान याना (त्रिकाय धैगु) काय, वाक्, चित्त शुद्धयाना बरा एकचित्तं श्री त्रिरत्नयागु भक्ति याना थःगु मनं कल्पना याना प्रकारं धाल । हे परमेश्वर ! तीर्थराज जित दरिद्र नाश याना धनाध्य ज्वीक प्रसन्न जुयाः विज्याये माल धका कल्पना याना वहे तीर्थे च्वना तपोव्रत याना च्वनां च्वन । थथे च्वच्चं ताकाल दया वस्येलि छन्हुया दिने व दीनचूड राजकुमारं तपस्या याना च्वंगु पुण्यया प्रभावं तीर्थराज खुसि जुयाः प्रसन्न जुयाः नन्द उपनन्द नागराजा निम्हहे उगु तीर्थ थाहाँ वया तत्कारणं दीनचूड राजकुमारयात दर्शन बियाः आज्ञा दयेकल । हे वत्स, हे भक्त, हे मानव धन्य २ छ खः छः छंगु तपस्या खना जिपिं सन्तुष्ट ज्वी धुन । आः छँ इच्छा जूगु वरदान फों धका थथ्ये आज्ञा दयेकू गु खँ न्यना दीनचूड राजकुमारं विन्तियात । हे परमेश्वर ! जित वरदान मेगु मखु । जि सापहे दरिद्र उक्थे थुगु दरिद्र नाशयाना उद्धार याना विज्याहुँ । हे परमेश्वर, थौं जि तीर्थ मेपिं सूहे मदु याकनं जित उद्धार याना विज्याहुँ धका धाःगु खँ न्यना हे मानव तथास्तू धका वरदान बियाः धाल । हे मानव मेगु छगू खं न्यं थौंयागु रात्रि छँ छगू ख्यले बासयाना च्वं थुबले बाचाया ताके अन मि छोइथ्ये छोइ उगु थासे छः वना चिन्ह तयाः थकि, सुथे नसंचा इलय् उगु थासे गाः म्हुयाः स्वः धनं पूर्ण जुयाः च्वंगु घः निगः लुया वइ । थ्व धन तयाः तःगु घः छँ कयाः यंका आनन्दं थःगु छँ च्वनां दक्क लोकपिं बशय् तयाः धर्म कर्म याना च्वं धका नागराजानं धाःगु थुलि आज्ञा न्यना व दीनचूड राजकुमारं उगु चौर, ख्यले वना बास याना स्वयाः चिन्ह तयाः नागराजां आज्ञा जूथे गाः म्हुयाः स्वःगु बखते धनं पूर्णगु घः खना व घः कयाः हयाः थःगु थासे तेहल ।

हे मैत्रिय, तत्पश्चात् अनलि उगु धन घःले स्वःगु बखते नवरत्न हिरामुतिं सहित जुयाः च्वन । मेगु छगले जक सुवर्णादि पूर्ण जुयाः च्वंगु अजागु धन घःयात स्वयाः नमस्कार याना तीर्थराजयात प्रशंसा याना हा हा आः जि गन वने । जि छँनं पिहाँ वयागु खुदं, न्हेदं दत । अथेनं जित जि माँ बौपिसं विचार याः मवो । जित तोते धुंकल धास्येलि छँ वने धालसा गथे वनेगु धका मने भापिया उगु नागराजां ब्यूगु धन फुक्क हे याचक धयापिं फोना नइपित हे न्हिन्हिसिया दान बीगु धका मने ल्वीका थुगु प्रकारं दान बियाः च्वन ।

हे मैत्रिय, थथ्ये राजकुमार दीनचूडयात माक्वो वरदान बी धुंका तीर्थराज अन्तरधान जुयाः विज्यात । थथ्ये तीर्थराज अन्तरधान जुयाः विज्यागु स्वयाः आश्चर्य जुयाः तीर्थराज लुमंका मन शान्त याना थःगु छे मवोंसे उगु हे तीर्थराज लुमंका मन शान्त याना थःगु मनोरथ पूर्णयाना याचकपिन्त सुवर्ण रत्नादि दान प्रदान याना आनन्द पूर्वकं च्वनां च्वन ।

हे मैत्रिय, थुजोगु प्रकारं व दीनचूड राजकुमारं थःगु नित्याचारथ्यें उगु तीर्थे सेवा याना श्री त्रिरत्नयागु भक्ति भाव याना यंकूँ २ आपालं वर्ष बिते जुयाः वस्येलि छन्हुया दिनस थुम्ह दीनचूड राजकुमार व तःधंगु निधान तीर्थेसनतुं मृत्यु जुयावन ।

हे मैत्रिय, थथ्ये व उगु तीर्थे तपस्या याना मृत्यु जुयाः वंगु पुण्यनं असंख्य धनसंपत्ति अन्न आदि पूर्णगु कूले नन्द उपनन्द नागराजाया वंशे जन्म जूवन । निधान तीर्थे च्वनां तपस्या याना वोगु पुण्यया प्रभावं याना पूर्व जन्मयागु खँ लुमंके फुम्ह जुयाः धाल । अहो आश्चर्य जि जूसां न्हापायागु पूर्व जन्मे महादुःखीम्ह दरिद्र जुयाः च्वनां । हानं राजवंश जुयाः छुंहे आहार समेत चूमलाना नेमफयाः महाकष्टं दुःखसिया च्वनाम्ह उगु हे दुःख मुक्त ज्वीत निधान तीर्थे च्वनां तपस्या याना थौ उगु पुण्यया प्रभावं जित उद्धार जुयाः थुजागु स्थान प्राप्त जुल । धन्य धन्य व तःधंगु तीर्थ खः धका थःगु मनं लुमंका थुम्ह नागपुत्र कुमार जुलसां छन्हुया दिने आपालं लोकपिं मुंका अनेक नवरत्नादि सुवर्ण, हेरा, माणिक सहित याना मेमेगु पंचोपचारं पूजा यायेगु सामाग्री छत्र, ध्वज, पताका सहित याना पुनर्वार हाकनं उगु हे तीर्थे थ्येंक वया न्हापाथ्येहे विधिपूर्वकं स्नान याना श्री त्रिरत्नयागु पूजाभाव याना अनेक प्रकारं जप, तप, ध्यान, पाठ, स्तोत्र आदि याना प्रदक्षिणा याना अर्घ बियाः पुष्प, धूप, दीप, गन्ध, रस, नैवेद्यादि सहित पंचोपचार पूजा याना नमस्कार याना थथ्ये सेवा याना च्वन ।

हे मैत्रिय, थथे तीर्थ सेवायाःगु पुण्यं याना न्हापानं थुम्ह दीनचूड राजकुमार जुयाः च्वंबले अथेहे तीर्थ सेवायाना दानधर्म याना वंगुलिं पूर्वानुस्मृति दुम्ह जुयाः तःधंगु नागकूले जन्म जुल । आः हानं थ्व नागपुत्रं पूर्वानुस्मृति दुगुलिं थुगुहे तीर्थे च्वनां तपस्या याना दान धर्म याना च्वंगुया प्रभावं याना तःधंगुहे फल प्राप्त ज्वीका अन्ते स्वर्गे मोक्षफल लाना आनन्दं थुम्ह नागपुत्रं बास याःवन धका श्री शाक्यमुनि भगवानं मैत्रिय बोधिसत्वयात आज्ञा दयेका बिज्यात ।

इति श्री स्वयम्भू पुराणे निधान तीर्थ माहात्म्य कथाया दीनचूड राजकुमार उद्धार सप्तम
अध्याय समाप्तम् ॥

निधान तीर्थ (लखुतीर्थ) म्हसीका:



भी नेपा:मि धका गौरव तायका वया च्वनागु धैगु भीगु देया, धर्म, संस्कृति याना भीपि, विश्वय म्हसिका वया च्वनागु ख: । नेपाल सम्वतया प्रवर्तक शंखधर साख्वा नं धर्म संस्कृतिपाखे फियात: लुं याना देया त्यासा केनाच्वंगु दक्वो पुला त्यासा (सावां) मुक्त याना नेवा जातिया: म्हसिका: कथं नेपाल सम्वत स्थापना याना वंगु ऐतिहासिक खीलस स्वापुदुगु थुगु तीर्थ, का.म.न.पा. वडा नं. १५ स. लाना च्वंगु दु । वारि पारि निखेरं शमसानघाट छप दया थुगु निधान तीर्थ (लखुतीर्थ)य च्वपिनि धर्मकर्म याय्त थुगु तीर्थ छयला वया च्वंगु खनेदु ।

केशावती व सुवर्णवती व्हना संगम जुया च्वंगु थुगु निधान तीर्थसं वाउँम्ह, उपलाल नागराजा वासयाना बिज्यागु थुगु तीर्थय याईगु दान प्रदान ख: वा:टपरी व लुं दान यायगु चलन दु ।

थुगु निधान तीर्थय पाठ यायगु आर्य तथागतव्यूह सूत्र ख: । थुगु तीर्थया पीठ ख:कंगु अजिमा (चामुण्डा) ख ।

थुगु तीर्थ व्रत सेवा यानागुया पुण्य, दु:ख, दरिद्रपित शान्ति जुइगु ख: । थुगु तीर्थे माहास्नान याय्त स्वाँता ख: अजुस्वाँ ।

थुगु तीर्थ उत्पत्ति या खं व निधान तीर्थया माहात्म्य स्वयम्भूपुराणपाखे उद्धृत जुया च्वंगु ख: । थुगु तीर्थे दिनचुड राजकुमार उद्धार जुया वंगु खं दु । नेपा: देया बौद्ध धर्म, गाकं हा: कया वया च्वंगु थुगु लखु तीर्थया, आस पासे ब्याकं हे हिंसादि यायगु थाय या रूपं, कया वया च्वंगु धैगु भीगु बौद्ध संस्कृति यागु दुर्भाग्य ख: ।

धर्म संस्कृति विपरित जुया वया च्वंगु अनैतिक ज्या मयाकेगुलि कुत: याय मागु भीगु धर्म प्रेमी सकल नेपामि पिनिगु थ:गु कर्तव्य नं ख: ।

ज्ञान तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

श्री शाक्यसिंह भगवानं पुनर्वार हाकनं मैत्रिय बोधिसत्वयात आज्ञा दयेका विज्यात । साधु हे मैत्रिय ! थुगु निधान तीर्थयागु माहात्म्य कथा छं न्यने हे धुंकल । आः हानं ज्ञान तीर्थयागु माहात्म्य कथा कन्ये छिमिसं न्यों धका आज्ञा दयेका विज्यात ।

अले मैत्रिय बोधिसत्वं थथ्ये विन्तियात । हे शास्ता, हे भगवान् छःपिंगु मुखद्वारा जिमिसं निधान तीर्थयागु खं न्यन्ने धुन । आः हाकनं ज्ञानतीर्थयागु खं न्यन्येगु इच्छा जुयाः च्वन छलपोलं कृपा तयाः आज्ञा दयेका विज्याहुं धका थथ्ये विन्ति याना च्वन । थथ्ये विन्ति याःगु खं न्यना श्री शाक्यमुनि भगवानं मैत्रिय आदि सकल सभालोकपनिगु ख्वाः स्वयाः थुगु प्रकारं ज्ञान तीर्थयागु माहात्म्य आज्ञा दयेका विज्यात ।

हे मैत्रिय, छं एकचित्त याना न्यों । गथ्ये धाःसा केशावति व पाप नाशनी मिले जुयाः संगम जूगु स्थानयात ज्ञान तीर्थ धाःगु खः । थुगु तीर्थे वास याना च्वंम्ह नागाधिपति बालसुकि धयाम्ह नागराज खः । व नागराज गुजोम्ह धाःसा तुयूम्ह अत्यन्त हृष्टपुष्टम्ह अतिहे बाँलाम्ह ९ गुंगू फना कयाः महा भयानक स्वरूपम्ह फना पतिकहे दिव्यरत्नया तिसां तियाः तःगुलिं अतिहे जाज्वल्यमान शोभा दयानं तेज थिना च्वंम्ह थुजोम्ह नागराजां वास याना च्वंगु थुगु ज्ञान तीर्थे मेला ज्वीगु गुवले धालसा फागुन शुक्लया अष्टमी मीन संक्रान्ति शनिश्चरवार थुलि योग चूलाइवले अनया मेला खः । थयोगु पर्व दिनस सुं गुम्ह मनुष्यपिसं थुगु तीर्थ वना स्नान, दान, जप, तप, ध्यान आदि याना बालुका चैत्य दयेका काय, वाक्, चित्त शुद्ध याना श्री त्रिरत्नयागु भक्तिभाव याना शास्त्रोक्त प्रमाणं तीर्थ सेवायाइ अजाम्ह मनुष्यया निश्चयनं अज्ञान नाश जुयाः बोधिज्ञानया खानी जुयाः च्वने दइ ।

हे मैत्रिय, हानं थुगु तीर्थ सेवा याना सु सु उद्धार जुयाः वनले धालसा थ्व खं थथ्ये खः न्यों । न्हापा २ उत्तर सिमानाय् छगू कर्पूरवती धयागु देशे राज्य याना च्वंम्ह अज्ञान सिन्धु धयाम्ह राजा छम्ह दया च्वंगु दु । व राजा गजोम्ह धालसा महामूर्खम्ह छुहे ज्ञान वुद्धि मगाम्ह, मदुम्ह, त्यागुनं मस्यूम्ह, बुगुनं मस्यूम्ह । थयोम्ह राजा जुयाः थुगु प्रकारं व देशया राजशासनया अधिकार सम्पूर्ण दक्वहे मूल मन्त्रीया ल्हाते लःल्हाना तयावियाः राज्य चलेयाका तयातल ।

हे मैत्रिय, थथ्ये मन्त्री राज्य चले याना च्वच्चं क्रमैसित मन्त्री वर्गया छगू खलवल उत्पन्न जुलकि गथ्य धालसा राज्य याना च्वनापिं भीपिं खः धका थथे मूल मन्त्रीयाके राज्यया शक्ति लाःगुलिं थःगु स्वार्थ सफल यायेगुया लागि क्रमैसित इमिसं थः योयोथे लालाथेहे मनपरि सनाहल । हानं राजायाके प्रतिनं अबहेला याना रानीयातनं थःगु वशय् तयाः थःम्हं प्रेमिका यायेत सना जुल ।

हे मैत्रिय, थथ्ये राज्य याना च्वच्चं असंख्य काल बिते जुयाः वसेलि छन्हुया दिने थथे याये त्यंगु स्वयाः थुम्ह अज्ञान सिन्धु राजाया कलाः रानीनं जूसां थः स्वामीयागु न्हचोने क्रोध नं तं पिकयाः थथ्ये धाल । हे मूर्खम्ह राजा धिक्कार छंगु जन्म ज्ञान धयागु छुहे मदुम्ह, अर्ति बुद्धि धयागु नं छुहे मदुम्ह राजा जुयाः च्वनां छुयाये धिक्कार थःगु राज्य सम्पूर्ण थः चाकरी मन्त्रीयात राज्य चले याका च्वनेमाःम्ह हे मूर्ख ! राजा छंके जि च्वनां छु प्रयोजन दिन । छंगु माया कयाः च्वनां जित छु ज्वालगे मजुल धका थुलि धयाः थः पुरुषयात त्वःता थःगु छें वना वौयागु, माँयागु चरण कमले भोपुया थः स्वामीयागु खँ दक्वों कना माँ वौयागु सेवायाना थःगु छें वास याना च्वन ।

हे मैत्रिय, थथे जुयाः च्यान्हु भिन्हु दया वसेलि थुम्ह अज्ञान सिन्धु राजाया सुसां थः कलानं त्वःता वंगु स्वयाः थुख्ये थःगु राज्यनं वाँमलागु खँ न्यनने माःगुलि थःगु मनस अत्यन्तहे ताप जुयाः चित्त भ्रष्ट जुयाः मनं धिर्ज याये मफयाः थुम्ह राजा जूसां अतिहे विरहयाना थःगु राजदरवारं पिहाँ वया थःगु देश समेतहे त्याग याना वन । थथे पिहाँ वना ववं २ महादूर भुवने थ्येक वन । अननं म्येम्येगु देश, ग्राम पतिकहे चाःहिला भिक्षा कयाः थःगु जीविका याना वया च्वन । थथे ववं २ वल्लं नेपाल मण्डलय् थ्येक वल । अथे नेपाल मण्डलय् थेनेसात न्हापाहे श्री स्वयम्भू ज्योति रूप भगवानयात दर्शन याना अन श्री स्वयम्भूयागु क्षेत्रेहे थ्येक वना थुगु शकरतीर्थे वस्पोलयात पंचोपचारं पूजा याना थः सःथ्ये जप, तप, ध्यान आदि याना थथ्ये विन्तियाना च्वन ।

हे परमेश्वर ! जिगु पूजां छल्पोल संतुष्ट जुयाः जिगु अज्ञान नाश याना दिव्य ज्ञान लाका प्रसन्न जुयाः विज्याहुँ । हे परमेश्वर ! धका थथे प्रार्थना याना अष्टाङ्ग प्रणाम याना नमस्कार याना सिधयेका उगु पर्वतं क्वहाँ वया केशावती व पापनाशनी व सङ्गम जुयाः च्वंगु ज्ञान तीर्थे थ्येक वल । उगु तीर्थे थेनेसात तीर्थ देवतायात नमस्कार याना अनहे तीर्थे वास याना नित्य नित्यहे स्नान याना बालुका चैत्य दयेका पंचोपचारं पूजा याना थः सःथें जप, तप, स्तोत्र, ध्यान आदि याना अतिथि गणपिन्त दानधर्म आदि याना बरो एकचित्तं उगु तीर्थे च्वनां तपस्या याना च्वन ।

हे मैत्रिय, थथ्ये तपस्या याना च्वच्चं २ दछि दया वसेलि छन्हुया दिने तीर्थराज देवता खुशी जुयाः प्रत्यक्षणं आकाशवाणी जुयाः थथ्ये आज्ञा जुल । हे महापुरुष ! छ सु खः ? छँ छु कामना याना तपस्या याना च्वनागु, धन्य २ छंगु तपस्या खना जि संतुष्ट ज्वी धुन । हे भक्त वत्सल ! छँ छु ईच्छां याना वरदान काये धका मने तयाः तैगु खः उगु इच्छां जिके वरदान फों धका थथे आकाशवाणी जुयाः आज्ञा दयेका विज्यात ।

थुलि तीर्थराजां आज्ञा जूगु खँ न्यना व अज्ञान सिन्धु राजानं थथे विन्तियात । हे परमेश्वर ! जिगु पाप नाश याना बोधिज्ञान प्रसन्न जुयाः विज्याहुँ धका थुलि वरदान फोन । थ्व खँ न्यना तीर्थराजा आज्ञा दयेका विज्यात । हे महापुरुष, अज्ञानसिन्धु राजा छँ पूर्वजन्मे न्हापा छुहे दानधर्म याना वःगु मदु । हाकनं छँ जूसां असंख्य शास्त्रयात हेला याना, गिजेयाना, स्येकानंवल उगु पापं

याना थौं छन्त थयोगु मूर्ख जुया: छुं मसीका सकल लोकं हेला याका अपमान याका दुःख कष्ट नया: च्वने माल । हे अज्ञान सिन्धुराजा छन्त दैवनं थन छोया हल, छ हथाय्चाये मते छं एकचित्त याना थ्वहे तीर्थे नतुं च्वनां तपस्या याना श्री त्रिरत्नयागु नाम स्मरण याना सधर्म चले याना च्वं हथाय्चाये मते । उगु हे पुण्यया प्रभावं छंगु अज्ञान नाश जुया: बोधिज्ञान प्राप्त ज्वी हानं दशाकुशल पाप नाश जुया, पुण्यात्मा जुया: सम्यक्संबुद्धयागु बोधिज्ञान समेत लाभ ज्वी । हे भक्तवत्सल हे अज्ञान सिन्धुराजा थथ्ये धका सीका छं एकचित्त हे तपस्या याना च्वं तत्कारण छंगु मनोरथ पूर्ण जुया: उगु पुण्यं याना लिपा छ राजा हे जुया: जातिस्मरण धयागु पूर्व जन्मयागु खं ख लुमंम्ह, स्यूम्ह जुया: ज्वी दइ तिनी । आयात छं थुगुहे तीर्थे च्वनां जकहे तपस्या याना च्वं । छन्त उद्धार ज्वी धका थथ्ये आज्ञा दयेका तीर्थराज उगु थासं अन्तरधान जुया: बिज्यात ।

हे मैत्रिय, अनलि थुम्ह तीर्थराजयागु आज्ञाथ्ये न्यना तथास्तू हे परमेश्वर ! धका व अज्ञानसिन्धु राजां न्हापा स्वयानं द्वरहे एकचित्त याना उगु हे तीर्थे च्वनां नतूहे न्हिं न्हिं स्नान याना बालुकायागु चैत्य दयेका त्रिकाय धयागु काय, वाक्, चित्त शुद्ध याना पंचोपचारं पूजा याना यथाविधिथ्ये जप, तप, पाठ, स्तोत्र, ध्यान आदि याना थुगु प्रकारं तपस्या याना च्वन ।

हे मैत्रिय, थथे च्वच्चं आपालं वर्ष बिते जुया: वसेलि थ्व राजां तपस्या याना च्वंगुया प्रभावं वयात सम्पूर्ण पाप नाश जुया: दिव्यदेह शरीर जुया: आपालं ज्ञानी व गुणी जुया: पुण्यात्मा जुया: दशाकुशल पाप नाश ज्वीका उगु हे तीर्थे बास याना च्वनां च्वच्चं छन्हुया दिने व राजायात अकस्मात् कालयागु बसेलाना उगु हे तीर्थे नतुं मृत्यु जुल । व राजां तपस्यायागु पुण्यया याना जूसां हाकनं थःगुहे देशे नतुं हे मन्त्रीया पुत्र धायेका जन्म जूवन । गजाम्ह पुत्र धालसा अत्यन्तहे सुन्दर सुलक्षणं संयुक्त जुया: बाँलाम्ह थथिंम्ह बालक जुया: जन्म जुल । क्रमथ्ये व बालकयात जूसां जातकर्म, नामकर्म आदि याना व बालकयात अज्ञानशोधन धका नं छुना तया: तल ।


हे मैत्रिय, थथ्ये थ्व बालक खना सकल मन्त्री, काजी, भार्दार थुपिं फुक्कहे अत्यन्त खुशी जुया: च्वनां च्वन । क्रम थ्ये व बालक धालसा शुक्ल पक्षया चन्द्रमा थ्ये बन्हे जुया: अत्यन्त हृष्टपुष्ट जुया: बाँलाना तःधिक जुया: सकल शास्त्र बिद्या सःम्ह स्यूम्ह जुया: वया च्वन । थ्व स्वया: छन्हुया दिने सकल मन्त्री, काजी, भार्दारपिं सकलें मुना सल्ला साहुति याना शुभ मूहुर्ते भिंगु दिन स्वया: व अज्ञानशोधन राजकुमारयात छत्रं क्वीका राज्याभिषेक बिया: राजा स्थापनायात । अथे राजा स्थापना याना उगु राजदरबारे सुखपूर्वकं न्याय नीति धर्म राज्ये भोगयाना प्रजागणपिन्त प्रतिपाल याना तया: तल ।

हे मैत्रिय, थथे जुजुं छन्हुया दिने थुम्ह अज्ञानशोधन राजां जूसां थःगु पूर्व जन्मयागु खं सम्पूर्ण लुमंका उगु राजदरबारे च्वनां च्वपिं सम्पूर्णहे मनू तेत सतके छोया इमिगु न्हचोने थुगु प्रकारं आज्ञा दयेका धाल । हे मन्त्री, काजी, भार्दार, सैन्य, सिपाहि, सकल लोकजनपिं ! छिमिसं थौं जिगु खं छगू न्यो । छु खं धालसा न्हापा पूर्व जन्मे महामूर्ख जुया: अज्ञान सिन्धुराजा जुया: च्वनां च्वनांम्ह जि उगु अवसरे जूसां जिं थुगु राज्यभार इत्यादि सम्पूर्ण हे त्याग याना हानं थःगु देशयात समेतहे त्वःता स्वयम्भू भगवानयात नमस्कार याना अनं वया ज्ञान तीर्थे वना अन च्वनां तपस्या यावया च्वनां । थुकेयागु पुण्यया प्रभावं याना सम्पूर्ण अज्ञान दको नाश जुया: बोधिज्ञान लाना अन्त्ये थुगु थासेहे अज्ञान शोधन राजा धायेका जन्म जुया: थुगु राज्य चले याना च्वनां । हे मन्त्री, काजी, भार्दार, सैन्य, सिपाही, लोकजनपिं धका थथे सम्पूर्ण बोधिज्ञानयागु खं कना ज्ञान तीर्थ धयगु तःधंगुहे तीर्थ खः

धका सकासया ह मन ल्वाका शास्त्रयागु प्रमाण अनुसारं विधिपूर्वकं सामाग्री दयेका जोरेयाना व सकल लोकजनपिं फुक्कहे मुंका उगु ज्ञान तीर्थे वने धका अन राजदरवारं प्रस्थान जुयाः वल । थथ्ये ववं २ उगु ज्ञान तीर्थ स्थाने थ्येका अनेक प्रकारं स्नान याना वालुका चैत्य दयेका छत्र ध्वजा पताका बोयका सकसियां हे थः थःगु यथा शक्ति प्रमाणं चाथ्ये पंचोपचारया पूजा सामाग्री दयेका पूजा याना जप, तप, ध्यान, पाठ इत्यादि याना प्रदक्षिणा याना नमस्कार याना यज्ञादि होम कर्म समेत याना देवतायात अर्घ समेत बियाः पितृयात तर्पण याना अतिथिगणपिन्त दान धर्मयाना थुगु प्रकारं तीर्थ सेवा याना च्वन ।

हे मैत्रिय, अथे च्वच्चं २ आपालं दिन बिते जुयाः वसेलि उगु तीर्थ सेवायाःगु पुण्यया प्रभावं थुम्ह अज्ञान शोधन राजा प्रमुख सकल प्रजालोकगणपिं फुक्कसियांहे अज्ञान नाश जुयाः बोधिज्ञानया ज्ञानी जुइका ज्ञान स्वरूपगु रत्नलाना महाधनाद्य जुयाः अन्त्ये स्वर्गे मोक्ष फल प्राप्त जुयाः आनन्द वास याना च्वन धका श्री शाक्यमुनि भगवान् जुलसां मैत्रिय आदि सकल सभालोकपिन्त खँ थ्वका ज्ञान तीर्थयागु माहात्म्य कना च्वन । थ्व खँ न्यना अन सभास च्वनां च्वपिं फुक्कसियां हे थःथःगु मनयात बोध ज्वीका आनन्दं च्वनां च्वन ।

इति श्री स्वयम्भू पुराणे ज्ञान तीर्थ माहात्म्य अज्ञान सिन्धुराजा बोधिज्ञान प्राप्ति
अष्टमोध्याय सम्पूर्णम् ।



ज्ञानतीर्थ (कहू खुसि)

सत्य युगे नागदह अर्थात कालिदह जुया चंवले, महाचीन विज्याम्ह महामंजुश्री बोधिसत्वं नागदह छेदन याये धुंका मानव योग्य वस्ती दय्के धुंका द्वादश तीर्थ, उत्पत्ति जूगु खं शाक्य मुनि भगवान बुद्ध, कना विज्यागु स्वयम्भूपुराणपाखे भीसं सिका काय व्हः जू ।

द्वादश तीर्थ मध्ये यागु थुगु ज्ञान तीर्थ (कहू) खुसि थौकन्ह्ये, काठमाडौं महानगरपालिका या वडा नं. १४ या दुने लाना वयाचवंगु दु । थुगु ज्ञानतीर्थ कहू खुसि वनेत, कालिमाटिया टाँमोले दुहाँ वने बले सुकुम्बासी वस्ती पुला भचा उखेर वनेबले कालिमाटि प्रहरी तयगु अफिस या ल्यूने चवंगु केशावति व पाप नासिनी संगम जुया चवयंगु दोभान यात, ज्ञान तीर्थ (कहू) खुसिधका भीसं म्हसिका वया चवनागु खः ।

थौकन्ह्ये शहरीकरण या कारण याना थुगु तीर्थे धैगु संज्ञा हे मदया न्हना वने धुंकुगु दु । खुसि ला छाया दोभानेनं छुनं कथंया धार्मिक चिं मदुगु कारण याना थुगु तीर्थ म्हसिकेत आहे गाक्वं थाकुई धुंकुगुदु ।

द्वादश तीर्थ माहात्म्यपाखे सि दु कथं थुगु तीर्थ तुयुगु वर्णम्ह वासुकी नागराजां वास याना चवंगु खः । थुगु तीर्थ व्रत याइवले दान याइगु ज्वलं त मत व सफु ख । थुगु तीर्थ पाख्ये नाला वयाचवंगु पीठ खतङ्गेगेश्वरी (नील बाराही) खः । थुगु तीर्थय पाठयागु सफू खः आर्य ललितविस्तर सूत्र । अथेहे थुगु तीर्थस महास्नान याइगु स्वांता खः तुयुगु सित । थुगु तीर्थस अज्ञान सिन्ध महामुर्खम्ह जुजु उद्धार जूगु खः ।

थुगु ज्ञान तीर्थ (कहू) खुसिया तीर्थ व्रत सेवा भक्ति यानागु पुण्य दुःख नास जुया, सुख प्राप्ति जुइगु खं उल्लेख जुयाचवंगु खः ।

भीगु थःगु देया धर्म संस्कृति त म्वाका तय्त, जनमानसायात धार्मिक सांस्कृतिक जनचेतना हयगु ज्या भीसकसंगु कर्तव्य खः ।

चिन्तामणि तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

थर्नालि मैत्रिय बोधिसत्त्वं श्री शाक्यमुनि भगवानयागु न्हचोने च्वनां थथ्ये धयाः विन्यात हे भगवान् छलपोलयागु मुखद्वारं कना विज्यागु ज्ञान तीर्थयागु माहात्म्य जिमिसं न्यने धुन । हे प्रभू ! आः हानं चिन्तामणि तीर्थयागु माहात्म्य न्यनेगु इच्छा जुयाः च्वन । छलपोलं जिमिगु उपरे करूणा तयाः आज्ञा दयेका विज्याहुं धका थथ्ये विन्ति याःगु खँ न्यना श्री भगवानं थथ्ये आज्ञा दयेका विज्यात ।

हे मैत्रिय, छ प्रभिति सकल सभालोकपिसें एकचित्त याना न्यों । थ्व खँ गथे धालसा वागमती व केशावती सङ्गम जुयाः च्वंगुयात चिन्तामणि तीर्थ धका नां प्रख्यात जुयाः च्वन । उगु तीर्थे वासिन्दा जुयाः च्वंम्ह वरूण धयाम्ह नागराजा खः । थ्व नागराजा गजोम्ह धालसा तुयुगु वर्ण जुयाः अत्यन्त तेज पिकयाः दिव्य रत्न मालां कोखाया ९ फन्ना धारण याना उगु फन्ना पतिकं हे मणि माणिकायागु तेजं जाज्वल्यमान जुइका च्वनां च्वंम्ह थजाम्ह नागराजां वास याना च्वंगु उगु तीर्थेया मेला पर्वकाल जुइगु गुवले धालसा चैत्र शुक्ल दशमी मेष संक्रान्ति शुक्रवार थुलि योग चुलाइ वले अन तीर्थेया मेला जुइगु खः ।

हे मैत्रिय, थथिंगु उत्तम जुयाः च्वंगु तीर्थस गुम्ह मनुष्यपिंस्ये सीका उगु तीर्थे वना स्नान दान याना श्री त्रिरत्नयागु सेवा याना जप, तप, ध्यान, पाठ आदि याना भिक्षु अतिथि गणपिन्तनं दान धर्म आदि याना विइ थयो २ पिं मनुष्यपिन्त निश्चयनं रत्न समानगु बोधिज्ञान लाना सुसन्तान प्राप्ति जुयाः कोटि धनं संयुक्तगु चिन्तामणि रत्न लाभ दइ धका श्री भगवानं थथ्ये आज्ञा दयेका विज्यात ।

थथ्ये आज्ञा जूगु खँ न्यना मैत्रिय बोधिसत्त्वं हानं विन्तियात । हे भगवान, हे निरञ्जन प्रभू, व चिन्तामणि तीर्थे सेवा याना सु सु उद्धार जुल, हाकनं उगु चिन्तामणि रत्न प्राप्त याना काःम्हः (अर्थात्) उगु रत्न प्राप्त जूम्ह सुखः हे भगवान् देवला, दैत्यला, मनुष्यला सुनां उगु रत्न फल लाना काःगु, थुकेया माहात्म्य आज्ञा दयेका विज्याहुं धका मैत्रिय बोधिसत्त्वं धाःगु खँ न्यना श्री भगवानं थथ्ये आज्ञा दयेका विज्यात ।

हे मैत्रिय, छिमिसं एकचित्त याना न्यों । परापूर्वकाले न्हापा २ वासव धयागु नगरे वास याना च्वंम्ह सैन धयाम्ह महाजन छम्ह दयाच्वंगु दु । थ्व महाजन गजोम्ह धालसा आपालं धन दया धनाद्य

धायेका गुंगु कोटि धन द्रव्य परिपूर्ण जुया: च्वंम्ह हानं अत्यन्त पुण्यात्मा सुमति भिंगु मनुजुया: च्वंम्ह बुद्धयागु भक्त जुया: च्वंम्ह थथिंम्ह महाजनया कोटिकर्ण धयाम्ह कायमचा छम्ह दया च्वन । थ्व मचा गजोम्ह धालसा अत्यन्त सुन्दर जुया: बाँलाना हृष्टपुष्ट जुया: च्वंम्ह थुजाम्ह महाजनया पुत्र न्हिं न्हिं सिया न्हिं न्हिंहे शुक्ल पक्षया चन्द्रमा बन्हे ज्वीथ्ये बन्हे जुया: क्रमथ्ये त:धिक जुया: भिन्त्यादं भिंखुदं दया उमेर जुया: वस्येलि बौम्ह: सेन धयाम्ह महाजनं थ: पुत्र कोटिकर्णयात थ:गु कुलधर्म अनुसारं ब्रतबन्ध चौडाछेदन आदि सम्पूर्ण याये सिधेका विवाह याना विल । थथ्ये विवाह कर्म समेत याना बी सिधस्येलि छन्हु निन्हु धार्धा दछि दया वस्येलि थुम्ह कोटिकर्ण महाजन पुत्रं जूसां मने ल्वीका धालकि अहो: जि थुलिमछि वर्ष दया वे धूंकल थजागु उमेर जुया: च्वने धुंकल धासेलि थौ जि अबू दयेका त:गु धन सम्पत्ति जक थ: यथे खेले याना म्हिता च्वनागु आपालं दये धुंकल आ: जिंनं बौनं थ्येहे थ:गुहे वृत्ति व्यापार यायेगु इच्छा जुया: वल । छाया धा:सा थौ वाज्या बौपिसं जक कमाये याना त:गु धन सम्पत्ति यथ्य ख्यले याना च्वंम्ह पुत्र काय् मचायात नामर्द धाइ, उक्ये याकनं हे जि थ:गु पराक्रम पिकया धन द्रव्य दयेका वनज व्यापार याना व:गु उगु धन द्रव्य जकहे थ:म्ह दान धर्मयाये दतसा अथवा फतसा अलेजकहे जित मर्द धका धाइ । थथ्ये धका मने ल्वीका थुम्ह कोटिकर्ण महाजन पुत्रं सकल वनिया पासापिं स:ता थथ्ये धाल ।

हे पासापिं ! जिगु खँ छगू न्यो । जि रत्नाकर वनज व्यापारया वनेगु सापहे इच्छा जुया: च्वन । छिपिनं वेय् न्हचा:ला धका थथ्ये न्यना स्वत । थुलि व साहुयागु खँ न्यना वनिया पासापिसं धाल । हे साहु कोटिकर्णज्यू भासँ जिपिनं छिक्पिं नापहे वये धका धाल । थुलि धा:गु खँ न्यना व कोटिकर्ण महाजनं जुलसां थ:त माकोहे धन सम्पत्ति हया: सकल भरिया तेत ज्वंकेत तयार याका सकसितनं तबवीका ज्वंका यंकेत थीक याना थ: बुबा सेन महाजनया थाय् वना चरणकमले भोपुया थथ्ये विन्तियात । हे बुबा जि रत्नाकर वनज व्यापार या: वनेगु इच्छा जुल । हे बुबा छिक्पिसं जित बेला विया: दिसं धका पुत्र कोटिकर्ण धा:गु खँ न्यना बौम्ह सेन महाजनया मने संताप जुयां छुं लिस: विय मफया: पलख सूमक च्वनां थथ्ये धाल । हे पुत्र ! छँ थौ अकस्मात् छु खँ ल्हावयागु थ्व छंगु खँ न्यना जित: सापहे मने ताप जुल । थ्व जिगु मने वज्रपातं क:गुथ्ये बेदना जुल । हे पुत्र ! जि थौ दतफतं छहे छम्ह जक काय् मचा धास्येलि थौ छँ छु धावयागु छँ रत्नाकर वनज व्यापार या: वने म्वानी । हे पुत्र ! छंगु भाग्ये जिं आपालं धन दौलत कमाय याना तया: तैगु दु । हे पुता छँ पुस्ताभ:रि उगु धन द्रव्य छँ यथे ख्यले याना म्हिता नया: जूसां पवीमखु । हे पुत्र ! आर्विनस्ये रत्नाकार वने वने मत्ये । म्वासां २ छँ दु:ख सियेमते । हानं उगु रत्नाकर वने अत्यन्तहे कष्ट ज्वीक वनमा । छाया धा:सा अनवपि महाजनत उस्त लिहाँ मव:पिं यकोहे दु । कारण आपालं जनावर धूँ किसि, भालु, चितुवा, सल आदि जनावरत दु । हानं चौर धयागु खुंतेसं भय नं डाँका तेगु भयनं आपालं वया च्वनीगु दु । हे पुता तानो, चिकु, प्यास चाल धका धायेमरू । जंगले बास च्वनेमा अनेक नदी गन्धकी, सागर, समुद्र आदि तरेयाना वनेमा: थयो २ गु भयानकगु थासे वनेत छंगु आम कोमल जुया: च्वंगु शरीर हानं छ बालकतिनि थयोगु कष्ट नया: दु:खसिया छ रत्नाकर वने वनेमते, म्वाकं आमजोगुलि कष्ट बी मते जिं दयेका तयागु धन दौलत त फुक्कुमेपिसें सुनां का:वइ । थ्व फुक्कहे छंगु यथेहे ख:नी थौ छंगु कर्म प्राप्त जूगु त्व:ता म्वाकं दु:ख सीम्वा: । हे पुता ! धया: थथ्ये सेन महाजनं थ: पुत्र कोटिकर्णयात आज्ञा दयेकल ।

थुलि थः पिता अबुं धाःगु खँ न्यना कोटिकर्ण थथ्ये विन्तियात । हे पिता ! न्यना बिज्याहुँ मेता कारण मखु छल्पोलया पराक्रमं धन सम्पत्ति, अनेक हिरा मोति माणिक सुवर्ण आदि असंख्य हे धन द्रव्य पूर्ण जुयाः च्वंगु खः । हे बुवा ! तर आजु, अबुजुं दयेका तःगु सम्पत्ति यकोहे दुगु खः । जिं दुःख सीम्वायेक सुख मोजं च्वनां थः यथ्य म्हिता नयाः ज्वीपिन्त भाग्यमानि धका धाइमखु । हे पिता, थःगुहे पुरुषार्थ कमाय् याना थः यथ्य छ्यले याना दान धर्म याई फतसा जकहे दुःखी दरिद्रपिन्त प्रतिपाल याना सुख ऐश्वर्य याये येकुसा जकहे वैत धाइ पुरुषार्थमह काय् मचा धकाः । थुलि याना च्वनी म्हेसित हानं कुलया काय्मचानं धाइ थः आजु अबुया नां तःम्हनं धायि, हे पिता ! जि नं छल्पोलं दयेका तःगु धन सम्पत्तिस थपे यानातये फुसा जक स्थिर ज्वी अथे याये मफेक न्हिं न्हिं उके च्वंगु जक कोकयां गन स्थिर ज्वी, हे बुवा ! थ्व शरीरे गुलि सुख, गुलि दुःख सुख दुःखयागु छुहे विवेक मदु सी धयागु जि काल त्योम्ह जूसा छें जक च्वनां च्वंसा सी अन वोंसा सी । सीहे मत्योनिम्ह जुलसा थन च्वनानं सीमखु । अन वोंसां सीमखु । बिना काल हे मत्येकं सुनं सीमखु । उक्यें जित गन बिज्याये मत्ये, छःपिसं हे पिता । काय्मचायात देश परदेश सीकेगु खः इष्ट मित्र सीकेगु खः कमाये यायेगु नं खः । उक्यें जित विदा फोने धका वया च्वनां । थुलि थः पुत्रयागु खँ न्यना सेन महाजनं धाल । हे पुत्र ! कोटिकर्ण सार्थवाह छें धाःगु खँ थिक जू तर म्वाकं दुःख कष्टसम्म नेमते धयागु खः आः छें आमथ्ये हे धास्येलि जि छु धाये हे पुत्र । छंगु मनोवान्छा पूर्ण ज्वीमाः छँन्त लाभ दयेमाः । लाभ दयेका याकनं लिहाँ वये फयेमाः । श्री त्रिरत्न देवतानं छन्त रक्षा यायेमाः धका थथ्ये आशिर्वाद बियाः थः पुत्रयात विदा बिल ।

हे मैत्रिय, अथ्ये थः बुवायाके विदा कयाः चरण कमले भोपुयाः व कोटिकर्ण हानं थः मांया थाय् वना मांया चरण कमले भोपुयाः विदा फोना च्वन । हे माता ! जिं रत्नाकर वनिज व्यापार वनेगु इच्छा जुल छःपिसं जित विदा बियाः बिज्याहुँ धका विन्ति याना च्वन । थुलि खँ न्यना मांम्हेसिनं धाल हे पुत्र ! कोटिकर्ण हाःहाः थौं छें छु खँ लहानागु । जिमिगु थ्व प्राणया आशा दतनं फतनं छहे छम्ह खः छें अथ्ये वनज व्यापार वनेवं थ्व जिमिगु प्राण लेनी मखुत हे पुताः अवश्य छंगु जक सुर्ताकयाः जिपिं व्यथा जुयाः मृत्यु जुइ सिना वनी । हे पुत्रः आम खँ छता ल्हायमते छ अति कोमल तिनीः छें दुःख सियागु बखत मखुनी । छथिंजाःम्ह काय् मदयेका जिमिगु प्राण गथेयाना स्थिर ज्वीका च्वने धका धाःगु खँ न्यना मांम्हेसित कोटिकर्ण थथे विन्तियात । हे माता ! छःपिनिसं अथ्य धयादी मते । छःपनिगु धर्म जित छुहे ज्वी मछुत । निश्चयनं रत्नाकर वने वनेगु जुल । हे माता ! जित छःपिसं आशिर्वाद बियाः प्रसन्न जुयाः बिज्याहुँ धका थः मांयागु चरण कमले भोपुयाः थः स्त्रीपिन्तनं सकल मेमेपिन्तनं बोधि बियाः थः पासापिं सकलें मुंका आपालं धन सम्पत्ति मालमत्ता फुक्क कयाः तयार याना उँथयागु गाडां सायेका असंख्य व्यापार याईपिं पासापिं सहित याना व कोटिकर्ण सार्थवाह महाजन रत्नाकर वन व्यापार वने धका उत्तरापथ दिशा स्वयाः थःगु छैनं त्वःता प्रस्थान जुयाः वन ।

हे मैत्रिय, थथ्ये ववं २ भिन्हु भिनिन्हु दया वस्येलि अनेक पर्वत नदी ग्राम पुला ववं ब्रम्ह पुत्र नदीस थ्येन व नदियात स्वयाः नमस्कार याना माभियात सःता धयाः माःगु दस्तुर पुला उगु नाउलि च्वनां कोटिकर्ण आदि सकल वनियापिं फुक्कहे उगु दुँगास च्वनां व ब्रम्हपुत्र नदी तरेयाना वन । अथ्य ववं कथँथ्ये ल्हासा देश छगुलि द्वाहाँ वना थः बुवाया पुर्लापिं पासापिं इष्टमित्र पिनिगु छें वना थि थि कुशल वार्तायाना विचार याना अनेक चिजबीज माल मत्ता मेरवानितयाः शिष्टाचार याना

धाल । हे महाजनगणपिं सेन धयाम्ह महाजनया पुत्र कोटिकर्ण धयाम्ह सार्थवाह जि हे खः जि जूसां छिक्किपिनिगु दर्शन यायेत वयाम्ह हे साहु जित छुं मालताल भतीचा दया तयाः दीमाल धका धाल ।

थुलि धाःगु खँ न्यना व महाजनपिसं धाल । हे कोटिकर्ण ! छिक्किपिनि बुबा सेन धयाम्ह महाजनपिं जिमिसं म्हस्यूपिंहे खः । आपालं हे दत, थन मभाःगु कुशल जू मखुला धका धयाः अत्यन्त मानेयाना अनेक चीजबीज हयाः न्हयोने तयाः खानपान याकाः मुख शुद्धि बियाः मेरमानि तयाः आनन्दं लछि निलातक अनहे बास बियाः महाजनपिसं व कोटिकर्ण सार्थवाहं धाःधाःगु नवरत्न हेरा मोति, माणिक, सुवर्ण रत्न, पात पीताम्बर आदि अनेक चीजबीज माल सामान असंख्य खरिद याना बिक्री याय्माको बिक्रीयात । थथ्ये थःत माको सम्पूर्ण माल खरीदयाना थः पासापिन्त सःता उगु सम्पूर्ण मालयागु भारी कसेयाना तयार ज्वीका प्यन्हु न्यान्हु तक अनहे मुकाम याना च्वनां माःगुतक खँ ल्हाना सिधयेका छन्हु थुम्ह कोटिकर्ण सार्थवाह महाजन जूसां व सम्पूर्ण मालयागु भारी गाडास थना थः नापं व्वना हयापिं वनियापिन्त जिम्मा बियाः अन च्वपिं साहु महाजन इष्टमित्रपिंके बिदा कयाः नेपाल वने धका अनं प्रस्थान याना प्याहाँ वल । ववं २ क्रमैसित ब्रम्हपुत्र नदीस नतुं थ्येका व नदी तरेयाना सम्पूर्ण माल तयाः हयागु गाडा उँथयात सायेका उगु सामान दक्वेसं चिन्ह तयाः न्हापा २ छोया हयाः च्वन । थथ्ये व दको मालयागु भरियातेसं जिम्मा कयाः चिन्तना याना वया च्वन । ववं २ प्यन्हु च्यान्हुयागु लेन लिहाँ वे धुस्येलि संयोगवश मरूभूमि थासे लाःवना छगू तस्सकहे ग्वोफेवया लँ तना व्याको पासापिं छख्ये लाःवन । थः याकचा जक छख्ये लात । थथ्ये जूगु स्वयाः मने हथायचाया त्रास जुयाः थःम्हं गया वयाम्ह गधायात व्वाकेयंकेगु बिचारं उगु लँयागु बासना नतुतुं बिस्तारं वया च्वंम्ह गधायात दाया सास्नायात थथ्ये सास्ना यागुलिं सहयाये मफयाः व गधा भनहे नरभस जुयाः लःयागु प्यास ज्वीका थःगु म्ये न्हचतुन्हचया स्ये स्ये फू फू वयेका न्यासि वनेगु तपहे दिना बिल । थ्व स्वयाः आपत् ज्वीका कोटिकर्ण सार्थवाह महाजनया मने दुःख ज्वीका धालकि हा हा थ्व छु धयागु जूगु स्वस्वः जि नाप वयापिं पासापिं गन ला वना जि गन ला वःगु थौं पासापिं नापं बियोग ज्वीका जक च्वने माल धयानं थ्व गधायात समेतहे परिश्रम ज्वीका लःयागु प्यास ज्वीका समेत सनेहे मफेका च्वने धुकल जितजा परिजावस धका थथ्ये धयाः व गधायात त्वःता थः याकचाहे पासापिं लुमंका अनं प्रस्थान जुयाः व्वाँ व्वाँ वन । अथे ववं भनं भनहे व कोटिकर्ण सार्थवाह महाजनयात मखु मखुगु लेन लाना दक्षिण दिशा पाखे स्वयाः वना च्वन ।

हे मैत्रिय, अयोगु बखते व सकल वनियातेसं थः साहु कोटिकर्ण सार्थवाह महाजन छख्येलाना सर्वत्र थासे पतिकं खोज तलास याना माः जुलनं लुइकेगु सामर्थ्य मदया सम्पूर्ण थः म्हं जिम्मा कयाः तयागु माल सामान दकोहे ज्वना थुपिं वनियात दक्वहे वना सेन महाजनयात बुभे याना बिल । उलि माल दको बुभे याना काये धुंकाः सेन महाजनं थः पुत्र कोटिकर्णयागु ख्वाल मखना थुगु प्रकारं धाल ।

हे वनियागणपि जिम्ह काय् कोटिकर्ण ग्वले गन वन ? छिमिसं छाय् नापं व्वना महयागु, गथे जुल, छु जुल धका थथ्ये न्यस्येलि थ्व खँ फुक्क न्यना व वनियापिसं धाल ।

हे नाथ ! क्षमाः संपूर्ण माल मत्ता खरिद याये धुस्येलि उगु देशं प्याहाँ वया ब्रम्हपुत्र नदी तरे याना वयाबले महा दुर्गा बनया दथ्वी लात । अनं वया मरूभूमिया थासे लात । अन थ्येका जिमित न्हापा छोया हल थः लिउने च्वनां वल । उबले लाक तःधंगु हे ग्वोफे वयाः फुक्कहे उख्येला थुख्येला मदयेक जुयाः वन । लिपा स्वयांला जिमिसं खँकेहे मफुत । अथेनं जिमिसं व सार्थवाहयात उख्ये

धुख्ये हे मखयेक माः जुयाः । थथ्ये मालानं ल्वीकेहे मफयाः नुगः मछिनका आ छुयायेगु सितला, म्वाःनिला, गन वन धका हालाः ख्वयाः विन्तियात ।

अथ्य व बनियापिसं धाःगु खँ फुक्क न्यना सेन महाजनया नुगः मछिना हाहाकार म्हया बिलाप याना शोक याना च्वन । उख्ये लँतना मखुगु लें वना च्वंम्ह कोटिकर्ण सार्थवाह महाजनयानं थः पासापिं बनियात लुइके मफयाः लःयागु प्यास चाःगु सहयाये मफयाः मनस त्रास जुयाः धाल । हाः हे दैव जि बुबांजक न्हापा धाःगु खः । आः व धाःगु थ्यें जुल । हाः हे भगवान् जि गन वना लः त्वं वनेगु, गन वना जित रक्षा ज्वी । हे दैव त्रिरत्न देवता धाका धयाः अननं दक्षिण दिशा स्वयाः सरासर हे गमन याना वनाहे च्वन ।

हे मैत्रिय, थथ्ये ववं प्यन्हु च्यान्हु वने धुस्येलि थःगु कर्मया प्रभावं उगु कर्मभूमि जमद्वारे लाःवन । अन आपालं मनुष्यपिसं थःथःगु कर्मानुसारं याना च्वंगु कर्मया भुक्तमान दर्शन जुल । थथ्ये कर्मयागु भोग याना च्वपिं दर्शन याये धुस्येलि हानं मेगु नगर छगू खने दया वल । व नगर गयोगु धालसा अत्यन्तहे भयंकरगु जुयाः मूलगु ध्वकास जवँ खवँ अतिहे भयानक कृष्णवर्ण हाकुस्य च्वंगु मूर्ति जुयाः च्वपिं थयोपिं निम्ह च्वनां गदा छगः २ पाछाया उगु ध्वकास जमदूत धयापिं निम्ह पाः च्वनां च्वन । थ्व स्वयाः लःयागु प्यास चाःगुहे चायेकानतुं सहयाये मफयेका थुम्ह कोटिकर्ण सार्थवाह महाजनया मने ग्यागु पहलं इमित स्वयाच्वन ।

थुखे थःगु छें पाखे बौम्ह सेन महाजनया थः पुत्र कोटिकर्ण यमलोक हे वन धयागु भालपा पुत्र व काय्या नामं जन्म पत्रिका दाहयाना थः गु कुलाचार थ्यें गृह शुद्ध होम याना माःगुकर्म कया आदि याना वयागु नामं आपालं हे दान, धर्म, याना वयागु नामं भिंगु क्षेत्रे शुद्धगु थासे बुद्धालय आदि तस्सकहे बाँलाक देवालय छगः दयेका व देवालये थाय् थासे सालिक शासनं (संस) तामापत्र शिलापत्रादि ताःचा अनेक सतल पौवा पाति सकतां दयेका प्राण प्रतिष्ठादि याना थः पुत्र कोटिकर्णयागु नामं दयेका तयागु धका ताँसे याना पुत्रया मचावले म्हितीगु न्हचवसा सितार, गितार, सारङ्गी, ध्वलक बाजा आदि छु छु खः सकतां हे उगु द्यगलेसं ताना वर्ष बन्धन गोष्ठि आदि याना पुत्र शोक ज्वीका च्वनां च्वन ।

हे मैत्रिय, उख्ये यमद्वारे वना च्वंम्ह कोटिकर्ण जमदूत आदि व देशया ध्वका सम्पूर्ण स्वये धुस्येलि थःगु मनं धालकि अहो थुलिमछि दये धुंकल जि लः त्वनेमखंगु, थौं तिनि जि तृप्त ज्वीक लः त्वने दइका धका मने तयाः व यमद्वारे पाः च्वनां च्वपिं जमदूत पिंके न्यना स्वत हे तयाः व यमद्वारे पाः च्वनां च्वपिं जमदूत पिंके न्यना स्वत । हे द्वारपाल पुरुषपिं थन थासे लः छक त्वनेगु दइला । जित लः छक त्वकिरे द्वाहाँ वने ज्युला धका न्यना स्वत । थथ्ये न्यना स्वतनं छुहे मधा । इपिं निम्हेसिननं स्वयाजकहे च्वन । थ्व स्वयाः कोटिकर्ण लः त्वने प्यास चाया च्वंगुलिं हानं छक न्यन । थथ्ये निक स्वक तक न्यननं इमिसं छुहे मधास्येलि लःया तृष्णा सहयाये मफयाः थ्व देशे लः अवश्य दइ धका छुहे मधासे मग्यासेहे निर्धक हे थूम्ह कोटिकर्ण उगु ध्वखाँ द्वाहाँ वना स्वःवन । थथ्ये स्वःगु बखते अन स्वः स्वःगु थास सुं छम्ह लोकपिं धकान दुगु मखु भंगपछि छम्ह धकानं सुं हाः स ताय दुगु मखु । कीः पतङ्ग तेगुनं छं शब्द मदु । महाभयानक भिंभा मभां दना उख्यें थुख्यें काचाक जोनाकाइथें । हानं न्हाय्पँ जक हुनुनुनू हालाः स्वेहे भयानक जुयाः ग्यानापुस्ये च्वनां च्वन ।

हे मैत्रिय, व नगरया दुने दध्वीसं अयसामकोस धयागु नयागु छें छखानं दु, उगु छेया दुने हुनुनुनूं हाला: क:गु शब्दनं ताये दया च्वंगु दु । उगु व शब्द न्यना धया: छोलकि: हे हे देशवासी जनपिं जित अतिहे तृष्णां पीडित जुया: च्वन जित जलदान छक व्यू धका धया: छेत । अथे ल:यागु शब्द न क:गु धया:ह:गु ताया उगु आयासाया दुने च्वनां च्वपिं प्रेतलोकपिं पिहाँवया थुपिं सकल प्रेतपिसं भुत्तुभुना व कोटिकर्णयात धाल । हे महापुरुष ! जिमित व्यूरे जलदान याकनहे हति: ल: त्वनेगु धका थथ्ये सकल प्रेतपिसं भुत्तुभुना व कोटिकर्णयात तोपुया हाला: च्वन ।

हे मैत्रिय, व प्रेतत गयोपिं धालसा हाकुस्य च्वनां सँ धा:सा फँ फँ कोय्थ्येक वया च्वपि, प्वा: धालसा पर्वत समानं तग्ग:पिं ग: प: धालसा चिकिपु, कथु प्वा: धालसा चिप्वापिं, म्हुतु धा:सा मुलुया के प्वाथ्ये, स: धालसा विशब्दं महा भयंकर, मिखा धालसा गुलि २ च्यासे द्वाहाँव थयोपिं भयानकं जुया: च्वपिं प्रेम लोकपिसं ल: नां का:म्ह सु ख: जिमितनं ल: तोकि, हे महापुरुष ! धका थथ्ये हाल च्वंगु स्वया: कोटिकर्ण इमित धाल । छु कारणं छिपिं थनला वलले, छिमिसं जित ल: तोके मफुला धयावले जिपिंहे थथ्ये धका धाल । थ्व खँ न्यना प्रेततेसं धाल । हे महापुरुष, जिपिं न्हापायागु जन्मे मनुष्य धायेका च्वनां बले थ:के दुगु चीज बीज खाली थ:म्हं जक थ:परिवारं जक नया: त्वना उपभोग याना वया सुं परिवारपिन्त लागि छुहे दान बिया: मवयागुलिं याना थौं थजागु कर्मभोग याये मा:गु ख: । हे महापुरुष, जिमिगु नां ख: सुचीमुख धयापीं प्रेत धायेका जन्म कया: दु:ख भोग याना च्वने मा:गु । हे महापुरुष, छिकपिं थन च्वने मते, जिपिंथ्ये ल: त्वने प्ये चायेका दु:ख ज्वी । थौं जिपिं आपालं हे वर्ष बिते जुया: वने धुंकल, थुगु दु:ख भोग याना च्वनागु । हे महापुरुष ! कोटिकर्ण छि याकनं हे थनं कुशल पूर्वकहे लिहाँ भासँ धका धा:गु खँ न्यना ग्याना हथासं हे उगु यमद्वाराया धवखाँ पिहाँ वल । थ्व स्वया: द्वारपालपिसं धाल । हे मानव छँ दुने वना छु स्वया: वया, छँ स्वये धुन मखुला काहुँ छ थन च्वने मते धका धया: हल: । थुलि धा:गु खँ न्यना थुम्ह कोटिकर्ण ग्याना दक्षिण दिशा स्वया: दुहाँ वन ।

हे मैत्रिय, थथ्ये ववं हानं मेगु छगू थासे थ्येक वन । उगु थासे नयागु दयेका त:गु छखा छें खन । अथे व छें खनेसात अनला अवश्यहे ल: त्वनेगु दइ धका मने तया: उगु छें द्वाहाँ वना चाकमलं स्व: जुल ।

हे मैत्रिय, थथ्ये स्व:बले वं अन भंगपछि छम्ह जकहे खंके नं मफु स्वैगुहे अगोचर खनेनं मद्दु । भींभांमभां दना व कोटिकर्णया त्रास चाया ग्याना अनवने थनवने मसिया छगू फलचाथ्ये दयेका त:गु खना अन वना छथाय् केकुना च्वनां च्वन । अथे च्वनां च्वच्वं क्रमैसित दिन बिते जुया: रात्रिया समय जुया: वल । रात्रिया छगू प्रहर जास्येलिं अकस्मात् स्वर्ग सुवर्णयागु विमाने प्यम्ह अप्सरापिं प्यकुने च्वनां दध्वी पुरुष छम्ह तया: उगु विमान व्वताहया: कोटिकर्ण च्वनां च्वंगु फलचा कोसं न्हचोनेहे दिकेहल । थ्व स्वया: व कोटिकर्णया अति अद्भूत आश्चर्य जुया: मनं भापिया धाल । अहो आश्चर्य थन छु ज्वीन ज्वी, अवश्य छगू हेतु ज्वीन धका इमित स्वया: च्वन ।

हे मैत्रिय, व अप्सरात गयोपिं धालसा साक्षात् लक्ष्मी, सरस्वती समान जुया: च्वपिं थजापिं अप्सरापिसं व कोटिकर्णयागु न्हचोने च्वनां दध्वी उम्ह पुरुषयात तया: अनेक मेवामिष्ठान मरिचरि मुखशुद्धि ग्वा: ग्वे आदि फुक्क तया: भोजन याका उम्ह पुरुषयात अनेक प्रकारयागु पात पीताम्बरयागु लासा लाया फुङ्ग तया: थ्यना वयागु सर्वाङ्ग शरीरे वस्त्र तोतका अनेक सुगन्ध वास

वया च्वंगु चिकं आदि बुइका व प्यम्ह अप्सरापिसंनं अति प्रेमभावं तुति तीका थीं थीं परस्पर
 ख्वाः स्वयाः चुम्बन आदि याका तनुमर्दन याका अनेक प्रकारं प्यम्ह अप्सरापिं नापं ख्या याना
 सुखं रसरङ्ग याना सुरतक्रिया याना आनन्दं म्हिता च्वन । थथ्ये रसरङ्गयाना च्वच्वं २ रात बिते
 जुयाः प्रभातकाल जुयाः वस्येलि थुपि प्यम्ह अप्सरापिसं व पुरुषयात जोना यंका कोटिकर्ण च्वनां
 च्वंगु फलचाय् थामे प्यपूंक चिना थुपि प्यम्ह विमानेसंतु च्वनां स्वर्गेनतुं थाहाँ वन । थ्व खना
 कोटिकर्ण जूसां व चिना तःम्ह पुरुषयात स्वयाः मने ल्वीका च्वन । थ्व सुखः, थ्वयात जिं म्हम्यम्ह
 थ्ये च्व । अहो आश्चर्य थ्वया सुख धालसा गयोगु सुख, दिने धालसा गयोगु बन्धन याना तल ।
 थ्व छु हेतु धका मने ल्वीका च्वन ।

हे मैत्रिय, अयोगु बखते अकस्मात् प्यम्ह खिचा महावेगं ब्वाँ २ वया व पुरुषयात स्वयाः व्हाँ
 व्हाँ उना च्वन । थ्व खिचात गजोपिं धालसा धुंयागु ख्वाथ्ये च्वनां च्वपिं, तीक्ष्ण दन्त धँवा
 ताःहाकम्ह जुयाः सिंहथ्ये भयानक मूर्ति जुयाः च्वपिं थजापिं खिचात प्यम्हेसिननं ब्वाँय् वयाकथनहे
 चिचिच्याना वांन्याना तुती पाली च्वंगु ला नल । निम्हेसिनं खम्पाया ला नल । हानं म्येम्हेसिनं
 जनफाया ला नल । अथ्ये व खिचातेसं पालंपा याना नःगुला भोरि पिकया नइला, गुलिं लप्पायागु
 लाः नइपिं, गुलिं न्यता पाँय्यागु ला नइपिं । थुगु प्रकारं थः यथ्ये खेले याना व पुरुषयागु म्हे च्वंगु
 ला चः चः फुना व खिचातेसं नयाः च्वन ।

हे मैत्रिय, अथे व खिचातेसं न्यना ला जक नयाः क्षण मात्रं क्वें जक ज्वीकयातनहे व पुरुष
 मसीः मृत्यु मजू । उगु वेदनां सहयाये मफयाः आयामः हील २ धका ख्वयाः ल्हों ल्हों व्वाना सर्वाङ्ग
 शरीरे फुक्कहे रक्तधारा हायेका विशब्दं २ ख्वयाः च्वन । अथे जूसाहे व खिचा प्यम्हेसिननहे व
 पुरुषयागु ला नयाः तृप्त ज्वीका प्यम्हहे लेले ताया ख्या याना विस्सुं वन । थथ्ये व पुरुषयात वेदना
 जुयाः ख्वयाः च्वंगु, कष्ट जुयाः, पीडा जुयाः हालाः च्वंगु थ्व सकताहे स्वयाः व खना ग्याना कोटिकर्ण
 आत्ते जुयाः स्वयाः च्वन ।

हे मैत्रिय, पुनर्बार हाकनं दिन बिते जुयाः रात्रिया समय जुयाः वइ । वहे प्यम्ह अप्सरापिसं
 न्हापाथें नतुंहे स्वर्ग क्वहाँ वया उगु थासे थ्यंका व पुरुषयात इमिसं खिपचिना तःगु फेना न्हापाथ्ये
 नतुंहे बिचार याना माःगु वासलं पाका बिल । व वास गयोगु धालसा न्हायपाका मात्रंहे तुरन्तहे ला
 बुया न्हापाथ्ये नतुं हे हृष्टपुष्ट शरीर जुयाः वाँलाना वैगु । अजागु वासलं पाकाः अत्यन्त वास वया
 च्वंगु चिकनं वैगु शरीरे न्यंकनहे बुयिका थुलि याये धुंकां अनेक प्रकारं न्हापा स्वयानं आपालं
 रसरङ्गयाका, सुरतक्रियादि याना बरो आनन्दं तयाः अत्यन्त स्वाद दुगु रसदुगु इत्यादि सामग्री तयाः
 भोजन याका मुख शुद्धि आदि बियाः आनन्दं उगु रात्रि हना च्वनां च्वनीगु ।

हे मैत्रिय, हानं सुथे ज्वी व पुरुषयात जोना उगु हे थासे फलचायागु थामेतुं प्यपूंक चिना
 थःपिं स्वर्गेनतुं थाहाँ वनीगु । अले न्हापायापिं खिचातअनतुं वया वयात सर्वाङ्ग शरीरे न्याना
 वयागु मांस ला नयाः वनीगु । थुगु प्रकारं वया अस्थिपन्जर धयागु क्वें जक ज्वीक आपालं कष्ट
 नका दाह ज्वीका आयाम जि च्वने मजिल, हील, स्यात धका ख्वयाः हालाः म्हछम्हँ हि स्वोस्वो
 वयेका थथ्ये सास्ति नयाः च्वनां च्वनीगु थुगु प्रकारं कष्ट नयाः ख्वयाः हालाः च्वंगु खना हाकनं
 व पुरुषया रात्रि जुल धायवँ धालसा स्वर्गयापिं अप्सरा नापहे सुख क्रीडा याना च्वने दुगु स्वयाः
 थ्व खना आश्चर्य जुयाः उगु फलचाय च्वनां च्वम्ह कोटिकर्ण सार्थवाहया जुलसां मने खँ न्हाना

धालकि अहो थ्व पुरुषयात गयोगु जुयाः च्वंगु स्वो सुखनं याकातल, दुःखनं ज्वीकातल । थ्व छु धयागु जुयाः च्वंगु धका मने तयाः ग्या ग्या तीजक व पुरुषयाके न्यन । हे पुरुष ! छ सू, छला निं म्हस्यूम्हथ्ये च्वो छला तसकहे अघोरं पाप याना वोगु दुथ्ये च्वं । छाये धालसा आमछं कष्ट नयाः च्वंगु खना जि तसकहे आत्ते जुल । रात्रि धालसा गयोगु सुख, दिने धालसा गयोगु दुःख, कष्ट । हे पुरुष, छं छु याना वयागु पापं थयोगु कष्ट नयाः च्वने माल धका कोटिकर्णयागु थुलि खं धाःगु न्यना व पुरुष धाल ।

हे भाजु छित जिंनं म्हहेस्यूनी भी जि छगू परिचित व्यक्तिहे खः आपालं दं दुगु मखुनी । जि न्हापायागु जन्मे बासव धयागु नगरेसं नाय्यागु कूले जन्म जूम्ह जि खः । जि काय्पिं प्यम्ह दु । जि सुथ न्हापां दना नसंचांनिसें अनेक देव देवीपिन्त पूजा भाव याना च्वनेगु । अनेक तीर्थ चाःहिला ज्वीगु । न्हिने जुल धाय्वं थःगु वृत्ति व्यापार अनेक पशु म्येत आदि स्यानाला मियेगु व्यापार याना च्वनागु । हे भाजु, थुकेयागु फलं थौं थुगु कष्ट भोग याना च्वने माःगु । आःछुयाय, छिस्ये स्वयाः दी धुन मखुला जिगु कर्मभोग । अं छिकपिं छायेले थन भायागु छिकपिंनि बाःयागु नां सेन धयाम्ह महाजन मखुला ? छिगु नां कोटिकर्ण सार्थवाह धयाम्ह मखुला । हे भाजु, थन इहलोक मखु । थनजा परलोक धयागु छिन दैवं केना हल खः । आः छि थन च्वने म्वाल याकनं भासं, बरू थ्व जिगु बुखं छता जि काय्पिन्त थ्येका व्यू । मेतां मखु मांस ला मियागु ज्या व्यापार छता यायेमत्ये धका धाः, थुलि जिगु दुःख कष्ट जुयाः च्वंगु सकतां हे खं छक कना व्यू । हे भाजु, खर्च मदुसा अन छेया छ्यली कुती प्वाकले तःलेतया जिं स्वोथना थुनातया तैगु सुवर्णया घःले असर्फि दंक तयातैगु दु व लिकयाः उक्थे चाछि अनेक तीर्थ यात्रा आदि धर्म कर्म याना याचकपिन्त दान दातव्य याना व्यू धका धयाः दिसं । मूलज्या मांस लाःमिगु व्यापार छता त्वःता व्यू धकानं थुलि जिगु बुखं छक लुमंक धयाः व्यू । हे भाजु । थुलि छिके जिगु कोटि २ बिन्ति धका धाःगु व नाय्यागु खं न्यना कोटिकर्णया मनस अति पश्चातापचाया वयागु न्हचोने थथ्ये धाल । हे नाय् पुरुष जिं छिमिकाय् प्यम्हेसितनं धयाः वीगु जुल । छं छु धन्दा कायम्वाः धका थुलि धयाः कोटिकर्ण उगु थास हथासहे थःगु छे वने धका लिहाँ वःगु बखते हाकनं मेगु थासे लाःवन । थुबले दिनहे तिनी । अननं अथ्येहे पुरुष छम्हेसित चिना तयातल । उगु बखते छगू बिमान जुकेहल । उके छम्ह नारकी पुरुषनं तल थ्व नापं छम्ह दिव्य सुन्दरी मिसा छम्ह वया न्हिं न्हिं हे व पुरुषयात नापं तयाः अत्यन्त सुखपूर्वक दिन हने धुंका जब रात जुस्येलि उगु बिमान व मिसानं अन्तरधान जुयाः वन । अले व मिसाया सत्ताय् अत्यन्त ग्यान पुस्य तः धिकम्ह न्हेबि छम्ह वल । व न्हेवीं उम्ह पुरुषयागु म्हे तुतिं नस्य छ्चोने थ्येकहे न्हेवीहिना वैगु छ्चोने न्याना न्हचपुहे नयाः कष्ट वियाः च्वन । थ्व स्वयाः कोटिकर्णयात आश्चर्य जुयाः व पुरुषयात धाल । हे पुरुष ! छं छुकारणे थथ्ये प्रत्येक दिने सुख, प्रत्येक राते कष्ट भोग याये माःगुया कारण छाये ले । थ्व सास्ना नेःम्वाक उद्धार यायेगु छुं उपाय उपकार दुसा धाः धका धाःगु खं न्यना व पुरुष धाल ।

हे पुण्य महेश छं जित म्हस्यूहे ज्वी । जि न्हापाया जन्मे बासव नगरया छम्ह ब्राम्हण जुयाः च्वनाम्ह जि खः । जिं न्हिं न्हिहे थःगु कुलं वःगु ब्राम्हण ज्या चले याना जीबिका याना च्वना, राते परस्त्री गमन याना वया । थयोगु मखुगु कुकर्म ज्या याना वयागुलिं थुगु पापं याना थौं थुजोगु कष्ट नयाः च्वने माःगु । आः जित थ्व सास्ना नये म्वाय्क उद्धार, रक्षा ज्वीगु विचार दुसा हे पुण्य महेश,

जिं धयागु थ्व बुखँ छगू ज्वना जिगु छें काय् म्हचाय् जहान परिवारपिन्त थन जित जुयाः च्वंगु व्याकोहे खँ छक कना बोधयाना धयाः व्यू । खर्च मदुसा जिं न्हापा होम यायेगु अग्नि सालाया कवे सुवर्णया चीगोगु कलश छगः गारे याना तया तइगुदु । थ्व चीज लिक्काः जिगु नामं दान प्रदान याना छगू तीर्थे पिण्डदान छक जि काय् पिनि पाखें याका व्यू । थुलि याःसा तिनी थन जित रक्षा ज्वी धका थथ्ये धाःगु बुखँ छकूचा उम्ह नारकी पुरुषयागु पाखें न्यना थुम्ह कोटिकर्ण हथाय् चाय् थःगु छें वने धका वया च्वन ।

थर्नालि हे मैत्रिय, सेन धयाम्ह महाजनया थःपुत्र कोटिकर्ण दिवंगत जुयाः परलोक वन धका निश्चय याना वयागु नापं संपूर्ण माः माःगु क्रिया आदि याये धुनका वैगु हे नामंनतुं छगू शहरया क्वसंतू देगः छगः दयेका न्हचोनेसँ सतल, हिति, पुखू आदि सुमेतं कीर्ति दयेका प्रतिष्ठादिन धुंका वहे कोटिकर्ण बालक बले म्हितीगु न्हचवसा ज्वलं दक्वहे वस्तुत फुक्क वहे देगलेस शासनताना कोटिकर्ण सार्थवाह महाजनयागु नापं दयेका स्थापना याना तयागु धर्म कीर्ति धका शिलापत्रस, तामापत्रस उल्लेख याना च्वया उगु देगले ताना, तिका तयातल ।

थुजोगु बखतस थुम्ह कोटिकर्ण आपालं नारकी पुरुषतेगु वेदना जुयाः च्वंगु स्वयाः थःम्हं म्हस्यूपिं निम्हेसिगु बुखँ ज्वना वया च्वंगु बखते छगू दैव संजोगं गुगु कर्मभूमिं उत्रे जुयाः आपालं थाय्थासे बिस्तार याना वये माःगु लँ लिना ववं २ दँ दँहे बिते ज्वीका बल्लं २यागु देशे थ्येक वया सकल लोकपिन्त न्वोतुया कुशल वार्ता याना ववं वहे थःगु कीर्ति दयेका तयाः तःगु स्थाने थ्यन । अन उगु स्थाने स्वया मने ल्वीका धालकि अहो अजोगु अपूर्व जग्गाय् दयेका तःगु थ्व स्वयागु जग्गा न्हापा मदुगु धका धया उगु अत्यन्त मनोहर जुयाः बाँलाना च्वंगु थासे चाहिलाः स्वो जूगु बखते हाकनं मेगुनं खनः थः मचाबले म्हित्येगु वस्तु आदिनं फुक्कहे व देगले शासन ताना तःगु खना थ्व स्वयाः धालकि अहो, थ्व वस्तुजा जिगु फुक्कं हे खः मेपिनिगु मखु । थ्व छाये थन ताना तयाः तःगु लाःसा जिगु नामं जकं दयेका तःगुला धका मती तयाः अन तिका ताना तःगु शिलापत्रस च्वयाः उल्लेख याना तःगु आखः ब्वोना स्वत, व फुक्क हे थःगु नामं दयेका तःगु कीर्ति जुयाः च्वन थ्व स्वयाः व कोटिकर्ण धालकि, हाहाः थ्व जिगु जन्म धिकार २ थौं जि जूसां मृत्यु जूम्ह जुल । आः जि थःगु छें वने मजिल । जि गन वने गन च्वने धका थथ्ये हालाः च्वंबले उथाय् मगध देशयापिं ब्राम्हण निम्ह गृधकूट पर्वते श्री स्वयम्भू भगवान् दर्शन याये धका वया च्वन । थथ्ये थुपिं निम्ह वःगु खना इमित व कोटिकर्ण धाल ।

हे महापुरुष, छिकपिं गन भाये त्यनागु, धका धाःगु थुलि खँ न्यना इमिसं धाल । हे महापुरुष ! जिपिं गृधकूट पर्वते बिज्याकम्ह श्री स्वयम्भू दर्शन याःवने धका वया च्वनागु । छाये थ्ये धका धाःगु खँ न्यना कोटिकर्ण धाल ।

हे महापुरुष, आसेसा जि छम्हनं बोना यंकी । जिनं श्री स्वयम्भू भगवान् दर्शन याःवये धका धाःगु थुलि खँ न्यना ज्यू २ भासं, भासं धयाः थुपिं स्वम्हं हे गृधकूट पर्वते वने धका अनं थाहाँ वना श्री स्वयम्भू भगवान् दर्शन याना जप, तप, ध्यान आदि याना पंचोपचारं पूजा याना अष्टाङ्ग प्रणामं नमस्कार याना च्वन । अयोगु अवसरे श्री भगवानं व कोटिकर्ण सार्थवाहयागु ख्वाः स्वयाः आज्ञा दयेका बिज्यात ।

हे कोटिकर्ण ! छ छ्वाय् गुबलेसं हे मवःमह थौं अकस्मात् थन वल । छ्वा कारणं थन वयागु धका थथ्ये न्यना बिज्यास्येलि थ्व खँ न्यना कोटिकर्ण ल्हा निपां बिन्ति याना धाल । हे भगवान् सर्वज्ञनाथ ! जिं छल्पोल याक्के छ्वा बिन्तियाय । जिगु दुःख छःपिसं सिया बिज्यागु हे खै । हे परमेश्वर ! धका थुलि बिन्ति याना धाःगु खँ न्यना श्री भगवानं आज्ञा दयेका बिज्यात ।

हे कोटिकर्ण, छँ परलोके च्वापिं पुरुषपिसं धयाः हःगु बुखँ फुक्क कना वये धुनला । हानं छँ माँ बौयात दर्शन याना वये धुनला धका आज्ञा दयेका बिज्यात ।

थुलि आज्ञा दयेका बिज्याःगु खँ न्यना कोटिकर्ण बिन्तियात । हे भगवान्, जिनं व बुखँ फुक्क कना मवयानी । माँ बौयातनं दर्शन याना वेय् मधुनी । हे भगवान्, आः वना जिं व खँ कना वेय् ज्यूला । हानं जि माँ अबुयातनं दर्शन याना वेय् ज्यूला धका थथ्ये बिन्ति याना धाःगु खँ न्यना श्री भगवानं आज्ञा दयेका बिज्यात ।

हे कोटिकर्ण छ ल्याहाँ वना माँ बौयागु ख्वाः स्वयाः दर्शन याना छन्त धयाः हःपिनिगु बुखँ कना वा धका आज्ञा जूगु खँ न्यना श्री भगवानया चरण कमले भोपुया अनं लिहाँ वना थःगु त्वाले थ्येका खड्गीयागु छें वना धाल । हे खड्गी ! लोकपिं, छिमि बुबाँ परलोके थन्यागु दुःख कष्ट नयाः च्वंगु दुकि, तसकं हे जिं स्वयाः वयागु दु । निश्चयनं खः । छिमि बुबाँ जित धयाः हःगु दु । व बुखँ छगू छिमित कने धका वया मेतां मखु छिमिसं मांस ला मियेगु व्यापार छतानं यायेमत्ये धका धयाः हल । हानं वयागु नामं तीर्थ यात्रा आदि अनेक दान धर्म छक याना व्यू धकानं धयाः हल । छिमि खर्च मदुसा आम छिमिगु छेलिया कुति प्वाकले तःले तयातःगु असर्फि दंक दुगु सुवर्णयागु घः छगः गारे याना स्वो थना तयाः तःगु दु । व घः ल्होना कयाः उके च्वंगु दको धन खर्च याना जिगु नामं धर्म कर्म याना व्यू धका थथ्ये धयाः हःगु दु धका थुलि बुखँ छिमित काःवयागु धका धाल । थ्व खँ न्यना खड्गी लोकपिं पत्यार मजुयाः च्वन । थ्व स्वयाः कोटिकर्ण हानं धाल । हे खड्गी लोक ! छिपिं पत्यार मजुयेम्बाः, जिन छिमित हेका धा वयागु मखु धाःगु खँ न्यना इपिं प्यम्ह काय्पिसंनं खय्यो धका मती तयाः उगु थासे वना गाः म्हुया स्वत । थथ्ये स्वःवले थः बुबाँ धयाः हःथ्ये धन द्रव्य खना मन पश्चाताप चाया उगु धन सम्पत्ति दकोहे वैगु नामं दान धर्म याना बिल । थुकेयागु पुण्यनं थुमि बौया पाप नाश जुयाः वना आनन्दं च्वने दत ।

हे मैत्रिय, हानं उलि धयाः धर्म याके धुंका वहे त्वालेनतुं छ्वाय् ब्राम्हणया छें वना इमितनं सःता नाप लाना थथ्ये बुखँ कन । हे ब्राम्हणजु छिकपिनि बौनं परलोके तसकं हे दुःख कष्ट नयाः च्वनां च्वंगु दु । थ्व जिं स्वयाः वयाः जित काय्पिं जहानपिन्त थ्व खँ कना बोध याना व्यू धका धयाः हल । गथ्य धालसा जिगु अग्नि शालास के स्वो थना तयागु चीग्वगु सुवर्णयागु कमण्डलु (अर्थात्) कलश छगः गारे याना सोथना तयागु दु, व लिक्काः जिगु नामं दान प्रदान व तीर्थे पिण्डदान समेत याना व्यू याकी धका थथ्ये बुखँ ल्हाना हःगु दु । हे ब्राम्हणगणपिं ! छिमिसं निश्चय याना स्वयाः वयात उद्धार याना व्यू धयाः चित्तबुझे याना उलि याका अनं प्रस्थान याना लिहाँ वया थुम्ह कोटिकर्ण जूसां थः माँ बौया थाय् वना नाप लाना इमिगु चरण कमले भोपुयाः थःगु परलोकयागु खँ फुक्कहे कना बिदा प्यहाँ वया हानं गृधकूट पर्वते वना श्री भगवान्यात नमस्कार याना बिन्ति कया याना च्वन ।


हे भगवान्, छल्पोलया आज्ञा थ्ये परत्रया खँ नं कना वये धुन । हानं माँ बौयात दर्शन याना वये धुन । आः जितः रक्षा याना बिज्याहुँ । हे सर्वज्ञ हे मुनि, आः जित व्याकर्ण आदि स्यना सम्यक्संम्बुद्धयागु बोधिज्ञान प्रकाश जुयाः बिज्याये माल धका थुलि कोटिकर्णयागु बिन्ति न्यना श्री भगवानं थथ्ये आज्ञा दयेका बिज्यात ।

हे कोटिकर्ण, आः छ जूसां न्हापां चूडाकर्म प्रवज्याब्रतनं धारण यायेमाल धका वयात श्री भगवानं चतुरार्य सत्ये तयाः बोधिज्ञान धारण याका उकियागु खँ कना काषाय वस्त्रं पुंका श्री भगवानं चिवर निवासं कोखायेका बोधिज्ञानया खँ माकोहे कना थुम्ह कोटिकर्णयात गुगु बागमती व केशावती सङ्गम जुयाः च्वंगु थासे चिन्तामणि तीर्थे सेवा याना च्वहुँ धका श्री भगवानं आज्ञा दयेका बिज्यात । थथ्ये आज्ञा दयेका बिज्यागु खँ न्यना वस्पोलयात नमस्कार याना उगु गृधकूट पर्वतं लिहाँ वयाः श्री भगवान्या आज्ञानुसारं वहे चिन्तामणि तीर्थे थ्येक वल ।

हे मैत्रिय, थथ्ये उगु तीर्थे च्वना न्हिं न्हिं स्नान याना सुवर्ण बालुकायागु चैत्य दयेका पंचोपचारं पूजा याना अनेक प्रकारं जप, तप, ध्यान प्रदक्षिणा याना थुगु प्रकारं श्री भगवानं गथ्य आज्ञा जूगु खः अथेहे नियम पालन याना न्हिं न्हिसिया न्हिंन्हिं हे विधिपूर्वकं पूजा याना बोधिज्ञान धारणा याना थुगु प्रकारंहे व तीर्थ सेवा याना च्वन । थथ्ये च्वच्वं २ आपालं वर्ष दया वस्येलि उगु पुण्यया प्रभावं याना थुम्ह कोटिकर्ण सार्थवाह महाजनयात जुलसां आपालं तः धंगु गुयिगु कोटि धन द्रव्य लाना बोधिज्ञान प्राप्त जुयाः अन्ते तथागतया पुत्र बोधिसत्व धायेका च्वने दत धका श्री शाक्यमुनि भगवानं मैत्रिय बोधिसत्व आदि सकल सभालोकपिनिगु न्हचोने थुगु प्रकारं आज्ञा दयेका बिज्यात ।

इति श्री चिन्तामणि तीर्थ माहात्म्य कोटिकर्ण उद्धार नवमोऽध्याय सम्पूर्ण ॥

चिन्तामणि तीर्थ (टेकु दोभान) म्हसीका:



ये देया, दक्षिणपाखेच्वंगु थौकन्ह्ये वागमती व विष्णुमति निगु होनाच्वंगु दोभान यात चिन्तामणि तीर्थ (टेकु दोभान) धका म्हसीका वया च्वंगु खः ।

थुगु चिन्तामणि तीर्थ (टेकु दोभान) का.म.न.पालिका वडा नं. १२ स. लाना च्वंगु दु । थुगु तीर्थया उत्पत्तिया खं स्वयम्भूपुराणपाखें वया च्वंगु खः । द्वादश तीर्थया भोलय् थुगु तीर्थ ९ गुंगू तीर्थ खः ।

ये देया दुनेच्वंगु नादंगु स्वंगु छप मध्ये छगू छप खः । थ्व चिन्तामणि तीर्थ टेकु दोभान स च्वंगु छप खः । पुर्वपाखे आर्यघाट छप खःसा पश्चिमपाखे कर्णदिप अथेहे दक्षिणपाखे अतिकं लोक ह्वागु चिन्तामणि तीर्थ (टेकु दोभान) व धन च्वंगु दीप नं खः ।

धार्मिक दृष्टि कोणं अतिकं लोक ह्वाना वयाच्वंगु थुगु तीर्थय् वागमति केशावती व कणकमति नापं स्वंगु ह्वना च्वंगु जुगुलि त्रिवेणी संगम चिन्तामणि तीर्थ धका धयावया च्वंगु खः ।

थुगुतीर्थस, तुयुगु वर्णम्हः वरूण नागराजां बास यानाच्वंगु दु । थगु तीर्थ व्रत याइगु ईले दानयाइगु ज्वलं गुल्पा व नवरत्न खः । थुगु तीर्थपाखे मानेयाना वयाच्वंगु पीठ नैअजिमा खः । थुगु तीर्थ पाठ यायगु सफू आर्य सुवर्णप्रभास सूत्र खः । तीर्थ व्रत सेवा यायनागुया फल धन सम्पत्ति प्राप्त जुइगु खः । दिवंगत पिनिगु नामं लय् पिण्ड थय्गु भोले थुगु गुकःगु तीर्थ खः । थुगु तीर्थस महास्नान याय्गु स्वा ता खः पञ्च सुगन्ध । यें देशये दुनेच्वंगु त्रिवेणी संगम जुया च्वंगु थुगु पवित्रगु तीर्थ थौकन्ह्ये घाट व छुं छुं सतः व देग जक लेना च्वंगु खने दनि । थुगु महान तीर्थ संरक्षण याय्त बृहत जनचेतना हय्मागु ताय्का च्वना ।

प्रमोद तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

अथानन्तरं थनलि श्री शाक्यमुनि भगवानं मैत्रेय आदि सकल सभालोकपिनिगु ख्वाः स्वयाः थुगु प्रकारं आज्ञा दयेका बिज्यात । हे मैत्रेय ! गुगु छं चिन्तामणि तीर्थयागु माहात्म्य कथा न्यनेहे धुंकल । आः हाकनं प्रमोद तीर्थयागु भिंगु माहात्म्य कथा व उकेया निश्चितगु पुण्य फल ब्रत आदि व्याकोहे जिन कने त्यना धका खँ थ्वका बिज्यात । थुगु खँ न्यना श्री भगवान्याके थथ्ये बिन्तियात । हे भगवान् ! उगु प्रमोद तीर्थयागु माहात्म्य पुण्य फल पर्व तिथि गुबले २ खः, गथ्य २ खः थ्व सम्पूर्ण बिस्तृत रूपं छल्पोलं आज्ञा दयेका बिज्याहुँ धका थथे बिन्तियात ।

थुलि बिन्ति याना धाःगु खँ न्यना श्री भगवानं मैत्रिय बोधिसत्त्वयागु ख्वाः स्वयाः थुगु प्रकारं आज्ञा दयेका बिज्यात ।

हे मैत्रिय ! गुगु बागमती व रत्नावती सङ्गम जुयाः च्वंगु प्रमोद तीर्थे बास याना च्वंम्ह तुइस्ये च्वंम्ह अत्यन्त बाँलाम्ह पद्म नाम नागराजा खः । थ्व नागया गपतस रत्नया मालां क्वखाया तःम्ह, फन्ता पतिकहे रत्न माणिकयागु तेज प्याहाँ वया बरो शोभायमान ज्वीका च्वंम्ह थथिंम्ह नागराजां बास याना च्वनां च्वंगु उगु तीर्थया मेला ज्वीगु बैशाख शुक्लया द्वादशी बृश्चिक संक्रान्ति गुरूवार थुलि योग चूलाइ बले अनया मेला लगे जुइगु ।

हे मैत्रिय, थन्योगु पर्वकाल तिथि दिने सुं गुम्ह मनुष्यपिसं उगु तीर्थे २१ नीछन्हु यंक स्नान याः वनी, अथवा छन्हुहे जक जूसां स्नान याना, दान याना बालुका चैत्य दयेका पंचोपचारं पूजा याना जप, तप, ध्यान आदि याना देवतापिन्त अर्घ बियाः, पितृपिन्तनं तर्पण याइ अजा २ पिं पुरुषयात निश्चयनं अष्ट सिद्धि धयागु फल लाना स्वर्ग, मर्त्य, पाताले सकल बशय्याये फुम्ह ज्वी । हे मैत्रिय धका श्री भगवानं आज्ञा दयेका बिज्यात ।

हे मैत्रिय, पुरा पूर्वकाले न्हापा छगू समये कापिल्ल नगर धयागु देशे राजा छम्ह दया च्वंगु दु । व राजाया देशेनतुं च्वनां तान्त्रिक धयाम्ह ताकसीं पण्डित छम्ह दया च्वंगु दु । व पण्डित गजोम्ह धालसा शास्त्र बिद्याया नामं छुंहे मसःम्ह साक्षात् ताकसीं जक अनेक प्रकारया खःसां मखुसां ताक ताःकं जक खँ ल्हाना नकल दयेका थत्ता थित्ता याना सकल लोकपिं हरहरं हे न्हीका थःगु बशय् तया तल ।

हे मैत्रिय, थथ्ये याना जूगु सिया उगु देशया राजां समेतहे थ्वैत सतके छोया राजदरबारे तयाः वयाके छुं न्यनेगु कनेगु याका तल । अजागु बखते व ताकसिं पण्डितं खः गुनं खँ ल्हाना राजा, रानी, मन्त्री आदि सकल बशय् तयाः तल । थुपिं सकसिन नं वयात धन्य २ तान्त्रिक पण्डित धायेका राजां अति पत्यार याका मन्त्री, काजि, भारदार सकसिन अति मानेयाका तल । थुगु प्रकारं मानेयाका तगुलिं व तान्त्रिकया छुंहे गुण मदुसां लोकपिनिसं धन्य २ धायेका प्रशंसायाका च्वन । हाकनं थ्वथ्येनतुं मेमेगु अनेक देश, ग्राम, मेमेगु मुलुकं नापं कापिल्य धैगु देशे च्वंम्ह राजाया थाय् छम्ह तान्त्रिक धयाम्ह पण्डित बडाहे जान्ये वथ्ये सःस्यूम्ह मेम्ह गनहे मदु धाःगु धका थथ्ये परदेशेहे जाहेर जुयाः च्वन ।

हे मैत्रिय, थथ्ये च्वच्चं ताकालं दया वस्येलि थुगु समाचार दक्षिण दिशाय् काशी च्वंम्ह तीर्थक धयाम्ह छम्ह पण्डितं न्यना आः जि व नेपालयाम्ह तान्त्रिकयागु छको परीक्षा याना स्वयाः वेय् धका थुलि मती तयाः उगु बारणशी धैगु काशी देशं प्रस्थान जुयाः वया च्वन । ववं २ क्रमैसित वयाः उगु तान्त्रिकया मुलुके थ्येक वयाः राजाया थाय् वना जाहेर याना धाल ।

हे महाराज, क्षमा स्वो, जि जूसां काशी देशं वयाम्ह तीर्थक धयाम्ह पण्डित खः । जिनं छल्पोल दर्शन याना छल्पोलया पण्डित तान्त्रिक नाप छको वादविवाद यायेया निमित्ते थन वया च्वनां । हे महाराज धका थुगु प्रकारं बिन्ति याना धाःगु खँ न्यना महाराजं आज्ञा दयेकल । हे तीर्थक ! जिमि तान्त्रिक नापं छँ वाद याये फैला, फैमखु अथ्येनं छक वाद याये धका वस्येलि ज्यू जिं सतके छोये धयाः राजां तत्कारणं दूत छोया सतके छोत । थुम्ह तान्त्रिक पण्डितं राजाया आज्ञा थ्ये व दूतत नाप वया तत्कारणं राजायात दर्शन याना बिन्तियात । हे महाराज, जित छु निमित्ते सतके हयागु आज्ञा दयेका बिज्याहुं धका बिन्ति याःगु खँ न्यना राजां आज्ञा जुल । हे तान्त्रिक, मेतां मखु । थौं छ नाप वादविवाद याये धका काशी देशं वःम्ह पण्डित छम्ह थन वया च्वंगु दु, धाःगु राजाया आज्ञा न्यना तान्त्रिकं धाल ।

हे महाराज ! निश्चयनं खःला थ्व खँ, ग्वले, गन च्वनां च्वनले, जित नाप लाका व्यू धका थथ्ये धाःगु खँ न्यना राजां आज्ञा जुल । हे तान्त्रिक छँ बाँलाक वाद याना, छँ वाद याना वाद बुकल धालसा जित बेइज्जत ज्वी, इज्जत वनी अले जिं सहयाये फैमखु । छंगु सर्वस्व कयानं छंगु ज्यान समेतनं कायेफू यदि छँ व नाप वाद याना त्याकल जिगु नां तयाः बिल धालसा छन्त जिं भारि नकसां तःधंगुं सिरपाउ बिइ । हे तान्त्रिक छँ बाँलाक बिचारं जक व नाप बादय परमुलुक यापीं पण्डितत वया च्वंगु छँ जिगु नां बिकेयाय मज्यू धका धाःगु राजायागु वचन न्यना हनां बिन्तियात । हे महाराज छल्पोलं धन्दा कयाः बिज्याये म्वाः आनन्दं च्वनां बिज्याहुं । थ्व छम्हजा छु अयोपिं द्वालंद्रो काशीया पण्डितपिं वः सांनं जित फइमखु । छल्पोलया प्रतापं जिं मारे याना छोये फू । छःपिसं संखा हे कायेम्वाः आम तीर्थक पण्डित याकनं हे नाप लाका व्यू । थ्व नाप वाद याना वयात बुका छल्पोलयात थकयाः बी धका थथ्ये तान्त्रिकं बिन्ति याना धाःगु खँ न्यना राजाया मने अति हर्ष याना सम्पूर्ण थःगु राज्ये च्वनां च्वपिं सकलें सःता मेमेपि लोकजनपिनं सःता छथाय् मुंका छगू सभा मण्डल दयेका व तान्त्रिक पण्डित व तीर्थक पण्डित निम्हं नाप लाका वाद विवाद याकल ।

हे मैत्रिय, अयोगु अवसरे तान्त्रिकं तीर्थकयात नमस्कार याना धाल । वँ नं अथेहे हे तान्त्रिक नमो नमो धका धाल । थुलि नमस्कार याना तीर्थकं धाल । हे तान्त्रिक ! छँ नाप भी वादविवाद याये

जिलला धाल । थुलि खँ न्यना तान्त्रिकँ धाल । हे तीर्थक जिल, आ छँ जिके छुं शास्त्रया खँ न्यनेगु इच्छा दु न्यो धा:गु खँ न्यना धाल ।

हे तान्त्रिक थौं कन्हे थ्व संसारे छु याना त:धं ज्वी, छु उत्तम ज्वी धका थथ्ये न्यन । थ्व खँ न्यना तान्त्रिकँ धाल । हे तीर्थक ! थुलि नापं छं गथ्ये मसिल । थ्व संसारे त:धंगु, उत्तमगु धैगुहे लोकाचार धयागु त:धं धाल । व खँ न्यना तीर्थकँ धाल ।

हे तान्त्रिक आम छं मखूगु खँ धाल । लोकाचार गथ्ये ज्वी, त:धं, थ्व संसारे सत् धयागु सत्य धर्म, तीर्थ स्नान, त्रिरत्न पूजा दान, दातव्य जप, तप, भावभक्ति जक त:धं धका धाल ।

पुनर्वार तान्त्रिकँ धाल । हे तीर्थक: आम गनया खँ ख: । थ्व संसारे गथ्य याना धर्म ख:, गथ्य याना पाप ख:, सुनां धर्म यात, सुनां पापयात छं धाये फुला । धर्म धका हाला: जूसा: आहार नापं चूलाइ मखु । कत:यात नुगले मस्याक चितबुभ्ने याना थ: कतिलाका परयागु नये, काये दतले थ:गुली लिकाये म्वा: । हे तीर्थक ! परन्तु म्यवयात म्वा:कं प्रहार यायेगु, म्वा:कं स्यायेगु म्यवया जीव कायेगु थुलि यायेमत्यो । म्यवयात चितबुभ्ने याना थ: कतिलाथ्ये, थ: नेदुथ्ये, त्वने दुथ्ये लोके चलेयाना त:थ्ये स्वया: लोकाचार याना जूमह, ख: त:धंगु धका धाये धाल । थुलि खँ न्यना तीर्थकँ धाल । आम अपराध खँ छाये ल्हानागु । नेमदुसां, तीमदुसां, पुनेमदुसां एकचित्त याना, एकभक्तं हे श्री त्रिरत्नया सेवा यायेमा: थुलि याये फतसा न्हिं न्हिं हे तीर्थ सेवा याना अतिथिगणपिन्त दान दातव्य याये । थ: साखा सन्तान रक्षा ज्वी । हे तान्त्रिक अन्तकालस मोक्ष प्राप्त ज्वी । थ:गु साखा सन्तानयात समेत रक्षा ज्वी । उक्थे म्वायेकं मेपिनिगु किस्मत नयेमत्यो । न्हचाथे यानानं परयात छुं छकू दान दातव्य याये हेमा: । थ:गु छुं परयात नकेत्वंके, परयात स्येक छुं म्येक थ:मह नयेमत्यो । दु:खी दरिद्र खना दया तया: संसार उद्धार ज्वीमा धका मती तया: मेपिनि दु:खगु जिगु दु:ख ख: धका भा:पा । मेपिनि कष्टगु जिगुहे कष्ट ख:, मेपिन्त पीडा बीगु, बोबियेगु, मेपिनिगु धने लोभ तयगु, परस्त्रीयाके मनतेगु, मेपिनिगु ज्यूबे घा:यायेगु थुलि त्व:ता त्रिरत्नयागु भाव तया: चतुर्ब्रम्ह बिहार धयागु धरेयायेगु हे तान्त्रिक संसारे त: धंगुहे थ्व ख: । मेपिनिगु शेष नया, त्वना कया: त:धं मजुस्ये नके त्वंके बी: फसा जक त:धं धाइ हे तान्त्रिक धका थथ्ये धा:गु खँ न्यना तीर्थकयात धाल । हे तीर्थक: छं गनया पण्डित ख: । आम खँ जित चितबुभ्ने मजू । आम खँ छन्तहे तया:ती । छंगु आमजोगु खँ न्यना जूसा न्हिं छछानं नेखनी मखु । छाया धा:सा खुया छता नेमज्यू, मेपिनि राज्ये खुसि याना थ: कतिलाका जुयां छुयाये पापलाइ । आम धर्म धका जूसा न्हिं छछाहे चूलाके फइमखु, उक्थे आम छंगु खँ छन्तहे जिमित मज्यू । छिमिगु मुलुके ज्यूसा जिमस्यू । थ्व जिमिगु देशे जा लोकाचार हे त:धं धका धाल । थ्व खँ न्यना तीर्थक धाल । हे तान्त्रिक छं छाया आमथ्ये खँ ल्हानागु, धर्म कोथुना पापयात थकया: नास्तिक मते वना परन्तु लिपते लोक सकलें दुरात्मा जुया: सकलया चितेस पाप बधे ज्वी मखुला । इहत्रेनं म्दु, परत्रेनं म्दु खँ ल्हात । त्रिरत्नया भाव तीर्थ स्नान दान दातव्य या:सा इहत्रेनं दु परत्रेनं दु । हे तान्त्रिक छं गथ्य मसिल धका धाल । व खँ न्यना तान्त्रिकँ धाल । हे तीर्थक आम गनया खँ खँ धर्म धका जूपिला साक्षात् व का वै तर धर्म धका जूपिं सुथायहेनं मला, त: धंगुजा छु । त:धं धयागुजा लोकाचार छाया धा:सा हाय २ गुलि हिसि दु धायेक खँ ल्हायेगु परया चितबुभ्ने यायेगु प्यमह नाप मिले ज्वीगु, थ: कतिलाकेगु, लोकं गथे गथ्य व्यवहारयात अथ्येहे याना ज्वीगु धका त:धं धाइ, थयोगु उत्तमगु लोकाचारयात त्व:ता धर्म त:धं धाइमह थयोमह मूर्खमह पण्डितं जित गुबले वादयायेफै धिक्कार काशी देशयामह पण्डित धायेका

च्वनं । आमथ्य खँ ल्हायेगुला । आम खँ जा छँहे नतुं न्यो । जिमित प्रयोजन मदु धका धयाः राजा आदि सकल जक खँ सदर याना नीच उच याना, उचनीच याना व सत्यधारि तीर्थक पण्डितयात थुम्ह तान्त्रिक पण्डित जूसां हास्य यायेथ्ये सन ।

हे मैत्रिय, अथ्य व तान्त्रिक उकथं हास्य याना अवाच्य मखुगु लालाथ्य खँ ल्हाना सकल वशय कयाः हरर न्हीका थः त्याकेत तयारयागु स्वयाः हाकनं अथ्य राजा आदि सकलेहे व तान्त्रिक वशय काःगु खना थःतनं अथ्य हाहुयागु स्वयाः तीर्थक पण्डित थःगु मने भापिया धाल । अहो आश्चर्य गयोगु अविवेकगु थाय् ज्वी स्वो २ व तान्त्रिकजा थ्व देशया राजा, प्रजा आदि सकसितनं हे वयात धन्य २ तान्त्रिक पण्डित धायेका मानेयाका तयाः तल । थयोम्ह ताकसिं पण्डितयागु वशय लाना च्वंगुलिं राजा, प्रजा आदि सकसिनहे जित निन्दायात, हेपेयात, गिजेयात । थौं सारयागु खँ गुणयागु खँ धर्मयागु खँ ल्हाम्हेसित हाहुयाना वें थ्यें याना बिल । हा हा गयोगु अविवेक जुयाः च्वम्ह राजा धिक्कार आः थन च्वनां बाद यानां मजिल । जिं थ्व तान्त्रिकयात त्याके फैमखुत । आपालं मूर्खया मूर्ख दुगु थासे गुण दुम्ह छम्हेसिनं छुयायेगु धका मती ल्वीका थुम्ह तीर्थक पण्डित जूसां व तान्त्रिक पण्डितयात धाल ।

हे तान्त्रिक छ् नापं वाद याना छन्त थन वाद याये फैमखुत । दको लोक हे छंगु वशय दु । आः थथ्ये मखुत त सत्यगु स्थाने पुण्य क्षेत्रस वना तीर्थ स्थाने च्वनां छ् नापं भी वाद यायेनु धका धाल । थुलि खँ न्यना तान्त्रिकन वैत धाल ।

ज्यू हे तीर्थक छ् धाःगु थासे च्वनां वाद यायेनु धका धयाः खँ ल्हाःगु न्यना राजां धाल । हे तीर्थक ! तान्त्रिक ! छिपिं थन च्वनां वादविवाद याये मत्ये । छगू तीर्थे च्वनां वादया हुँ धका थुलि धयाः निम्हसितनं छोया हल थथ्ये थुपिं निम्हहे उगु स्थाने वना अनथ्येका गुगु तीर्थ स्थाने छथाय् च्वनां तीर्थक पण्डित व तान्त्रिक पण्डितयात धाल ।

हे तान्त्रिक छ् न्यो, थ्व थाय् खः महापुण्यभूमि पवित्र जुयाः च्वंगु सत्ययागु थाय् खः । थुगु सत्य पवित्र जुयाः च्वंगु बागमती व रत्नावती सङ्गम जुयाः वया च्वंगु प्रमोद तीर्थे गुम्हेसिनं न्हिं २ हे वया स्नान याना मोल्हु वइ, वया जुलसां निश्चयनं रत्न समानगु सिद्धि फल लाना स्वर्ग, मध्य, पाताल आदि समेत थःगु नां तयेफइ । हे तान्त्रिक ! थ्व तीर्थे छक मोल्हुयागु व मेगु काशी प्रयाग गंगासागर थयोगु तीर्थे सछिक मोल्हुयगु उतिहे फल लाना च्वन । हे तान्त्रिक धका धयाः तीर्थक जूसां आः थ्वयात जिं सत्य थ्येहे कने माल धका प्रार्थना याना धाल । हे तीर्थराज ! जिपिं निम्हेसिया वादविवाद जुइगु छल्पोलं सत्यथ्ये केने माल धका तान्त्रिकया न्हचोने थथ्ये धाल । हे तान्त्रिक ! जिं छत कनेहे धुना थुगु तीर्थ अति तःधंगु खः धका आः छ् नाप थन च्वनां वाद यायेगु धका धाःगु खँ न्यना व तान्त्रिक धाल ।

हे तीर्थक आम छ् धाःगु खँ मखु । छाये धालसा थजागु अपवित्रगु थासेयात पवित्र धका धाइम्ह छ् गनया पण्डित खः सुचिन मस्यूम्ह असुचिन मस्यूम्ह हे तीर्थक थ्व तीर्थ गथ्य शुद्ध, पवित्र ज्वीगु काः छ् हे स्वो । थ्व तीर्थेजा अपवित्रगु घःचाइपुस्ये च्वंगु थी नापहे मयपुस्ये च्वंगु थजोगु असुचि तीर्थयात सुचि पवित्र धाइम्ह छ् हानं मनुष्यतयेगु न्हिं, खै, ला, आदि चुयिके हइगु थ्व तीर्थया लिकस श्मसाने मृतक सीपिं दाह यायेगु । आदुगु गन्धं व्यापक जुयाः च्वंगु थयोगु थाय् नतुने सुधान्त मज्यू

घच्याइपुसे च्वंगु थयोगु । हे तीर्थक हानं अनेक मृतक सीपिं थुने हइगु थयागु अपबित्रगु थासेयात जा छं सुचि, पबित्र सत्यगु स्थान खः धाइम्ह छथ्येजाम्ह मूर्ख पण्डित सुदै, गनहे दयि मखु । हे मूर्खम्ह पण्डित तीर्थ धयागु थजागु असुचि स्थान गन दु, गनं हे मदु । थुगु तीर्थया लः फतसा थीः सुधान्तहे मत्यो धाल । थुलि धाये मात्रं हे थुम्ह तान्त्रिकयात तील्वे वया म्ह थरररं खाना अचेत जुयाः मचाया वन ।

हे मैत्रिय, थुगु प्रकारं व तान्त्रिकयात तीर्थ रोगं कयाः हाकनं चेष्टा दयाः वस्येलि व तीर्थक पण्डितं धाल । हे तान्त्रिक छं छाये अपराध खं ल्हानागु थुजोगु तःधंगु तीर्थयात निन्दायात हेलायात । हे तान्त्रिक ! न्यो छं थ्व तीर्थया माहात्म्य जिनं कने त्यना । थ्व खं गथ्य धालसा पुरा पूर्वकाल न्हापा दानासुर धयाम्ह दैत्य छम्हेसिनं थाहाँ वया थुगु तीर्थे च्वनां तपस्या याना च्वन । गुजोगु प्रकारं तपस्यायात धालसा छचाख्यरहे तारन तयाः देव, मनुष्य सुनानहे बिघ्न बाधा याये मफयेका मजीका थथ्ये तारन तयाः न्हिं न्हिं हे स्नान याना अनेक प्रकारं जप, तप, ध्यान याना पूजाया सामग्री दयेका तीर्थराजयात पंचोरपचारं पूजायाना अनेक प्रकारं स्तोत्र पाठ याना चानं न्हिनहे उगु तीर्थे च्वनां बरो एकाग्र चित्त याना थ्व दानासुर दैत्यं तपस्या याना च्वन । हे तान्त्रिक थयोगु प्रकारं तपस्या याना च्वच्चं २ भीनिदं दया वस्यलेलि थ्व वहे प्रमोद तीर्थ छगू बाहेक अन्य मेपिं सुं देवदेवीयागु सेवानं मयाः, मेगु छुं धर्म सुधान्तनं नां मकासे बरो एक भक्तं अति प्रीतिनं उगु हे तीर्थ छगूलि जक च्वनां नित्य नित्यहे स्नान याना मोल्हुयाः तपोव्रत याना तीर्थ राजयागु सेवा याना च्वन ।

हे तान्त्रिक छं न्योला थुगु प्रकारं व दैत्यं उगु तीर्थे च्वनां तपोव्रत याना यंकुं यंकुं आपालं वर्ष बिते जुयाः वस्येलि स्वर्गे देवराज ईन्द्रयागु सिंहासनहे लिगि लिगीं दगे जुयाः सन । थ्व स्वया ईन्द्र बिचार यना स्वतकि अहोः पातालपूरं थाहाँ वया दानासूर दैत्य तपस्या याना च्वंगुलिं धका सीका ग्याना च्वन । अयोगु बखते स्वर्गे च्वनां च्वपिं प्यम्ह अप्सरा मेनका, रम्भा, उर्वशी, तिलोत्तमा थुपिं प्यम्हेसितन सतके छोया थुगु प्रकारं धाल । हे अप्सरापिं छिमिस्ये जिगु खं न्यना मर्त्य मण्डले क्वहाँ वना गुम्ह दानासूर दैत्ययागु तपस्या भंग याना वा धका धाःगु धाल ।

हे महाराज ईन्द्र ! छपिसं धन्दा कयाः बिज्याये म्वाः जिपिं दहे दुनी धका धयाः थुपिं प्यम्हहे स्वर्ग क्वहाँ वया व दैत्यं तपस्या याना च्वंगु थासे थ्येक वन । अन थ्यंका इमिसं व दैत्ययात अनेक प्रकारं लीला याना क्यना न्ह्योने वने धका सन । वनेहे मफू व दैत्यं तारन तयाः तःगुलिं अन वने मफयाः आः गथ्ये याये धका धन्दा कयाः थुपिं प्यम्हेसियां सल्ला याना व दैत्ययागु न्ह्योने स्वयाः इमिसं अनेक प्रकारं रसरङ्ग याना म्ये हालाः प्याखं हुला क्यने धका थुपिं प्यम्हेसिननं सना क्यन । थथ्ये याना क्यननं व दानासुरयात छले याये मफू । थ्व स्वयाः आश्चर्य चाया थथ्ये धाल । हे क्यहे मय्जु अप्सरापिं ! आः छुयायेगु उलिमछि लीला याना सना क्यनानं थ्व दैत्य ला इकि धिकिहे मसं आः अथे मखुत धका थुपिं प्यम्हहे व दैत्ययागु छे वना अन सकसितनं मोहयाना क्यना व दैत्ययागु धन सम्पत्ति दक्वहे कयाः हयाः थुगु प्रमोद तीर्थे व दैत्यं खकहे उगु धन, सम्पत्ति फुककं चयके छोया हयाः च्वन । थ्व सम्पूर्णयागु सकतां हे व दैत्यं खना च्वंगुहे दु, स्वयाः च्वंगु नं दु । अथे याःसा तबिनं वं थ्व जिगु तपस्या पूरे मज्जीकं दनेहे मखु धका माया त्वःता एकचित्तं हे तपस्या याना च्वन । व दैत्यं अथ्य भाव याना च्वंगु खना छन्हु तीर्थराज सन्तुष्ट जुयाः उगु तीर्थ थाहाँ वया व दैत्ययात थःगु रूप क्यना दर्शन बियाः आज्ञा दयेका बिज्यात ।

हे दैत्यराज ! छँ छु निमिते तपस्या याना च्वनागु । छंगु आम तपस्या खना जि सन्तुष्ट जुल । छँ छु वरदान फोने, छँ धाःगु वरदान वीगु जुल धका व दैत्ययात थय्ये वरदान बिल । हे दैत्यराज ! छ स्वंगू राज्ये कैलाश वैकुण्ठ ब्रम्हाया देश सहितं छन्त वशय् जुल धका थय्ये वरदान बियाः थुम्ह तीर्थराज अन्तरध्यान जुयाः बिज्यात ।

थर्नालि व दानासुर दैत्यया जूसां तीर्थराजयागु कृपां गम्भीरगु वरदान लाना हर्षयाना तीर्थराजया आज्ञा थ्ये देव, दैत्य, मनुष्य आदि सकल वशय् याना दानासुरं देशे राजा जुयाः च्वपिन्त त्रास बियाः छ्याना च्वन । थ्व स्वयाः ग्याना व राजातय्सं दैत्ययात पूजा याना, माने याना सन्तोष ज्वीका राजा प्रजा आदि सकलया निर्भय ज्वीका आनन्दं च्वनां च्वन । थ्व थ्येन तुं मेमे थाय् देशे राजापिं थाय् देश पतिकहे वना इमिसंन माने याका असंख्य धन लाभ दयेका थुगु प्रकारं वं सकल दैत्यगणपिं मुंका स्वर्गे अमरावती वना ईन्द्र नापं युद्ध यायेयात थय्ये व दैत्यनं स्वर्गे ईन्द्र नापं युद्ध याःबले ईन्द्र जिते याये मफ्याः देवलोक हथाय् हथाय् चाया बिस्सू वन । अननं कैलाशे महादेवया थाय् वन । अननं व दैत्य थ्येक वल । थ्व स्वयाः ईन्द्रया दैत्य नापं युद्ध यायेगु समर्थ मदया ब्रम्हाया थाय् वन । ब्रम्हायानं व दैत्य नापं छुं यायेगु शक्ति मदया थुपिं प्यम्हहे ब्रम्हा, विष्णु, महेश्वर, ईन्द्र समेतहे गुगु मृगस्थलि गुहचेश्वरीयागु शरणे वना थुम्ह दानासुर दैत्यं स्वर्गया राज्ये कैलाश, वैकुण्ठ, ब्रम्हाभुवन सहितं राज्य याना ईन्द्रादि ब्रम्हा सकल लोकयात जिते याना र्वीगु कोटि ईन्द्रयागु धन समेत लुटे याना हयाः प्यबो धन तीर्थे छाया सम्पूर्ण देवलोकपिन्त पितिना हयाः सुख आनन्दं राज्य याना च्वन ।

हे तान्त्रिक, थय्ये व दैत्यं राज्य याना च्वंगु खना सकल देवतापिं मुना सल्ला साहुतियात । हानं ब्रम्हा, विष्णु, महेश्वर, ईन्द्रादि सकसियाहे थुगु बास सुधान्तहे मदयेका तयाः तःगुनं आपालं दया वःगु जुयाः वस्येलि थुमिसं धाल ।

हे देवलोकगणपिं व पापिष्ट दानासुर दैत्यं भीगु स्वर्ग कैलाश, वैकुण्ठ, ब्रम्हाभुवन समेतहे हरण याना राज्य याना च्वन । आः भी थाय् नं मदु बाय् नं मदु, गतिनं मदु, पति नं मदु । हे देवलोकगणपिं ! सदानं भीपिं थय्ये च्वना च्वनेगुला ? भीगु राज्य भीत म्वाःला, वयाके लितकायेगु छुं जत्न मदुला, बिचार याना स्वये म्वाःला धका धयाः सकल देवलोकपिं फुक्कहे सल्ला याना मुना श्री गुहचेश्वरीया थाय् शरणे वना वस्पोलयात अनेक प्रकारं पंचोपचार पूजा याना फक्व जप, तप, ध्यान आदि भाव याना श्री गुहचेश्वरी माताया चरण कमले भोपुया ईन्द्रादि सकल देवलोकपिसं प्रार्थना याना च्वन । हे माता ! गुहचेश्वरी देवी जिपिं सकलयागु बास स्वर्गया राज्य कैलाश, वैकुण्ठ, ब्रम्ह लोक सहित हे व पापिष्ट दानासुर दैत्यं जितेयाना राज्य याना आनन्दं च्वना च्वन । हे जननी, हे माता ! आः जिपिं सकसियां बास मदयेक पितिना हंयातल । हे जगत् माता आः जिमिसं व राज्य गथ्ये याना लितकायेगु । हे गुहचेश्वरी, हे माता ! जिमित सुं हे म्वाःला सदानंहे व दैत्ययात राज्य याका तयेगुला । हे माता ! छल्योलं जिमित कृपा तयाः व दैत्ययाके च्वंगु राज्य लितकयाः प्रसन्न जुयाः बिज्याहुं धका ईन्द्रादि सकल देवलोकपिसं थुगु प्रकारं बिन्ति याना च्वन ।

थुलि बिन्ति याना धाःगु खँ न्यना श्री गुहचेश्वरी देवीं आज्ञा दयेका बिज्यात । हे देवलोकपिंः प्रमोद तीर्थयागु प्रभावं व दानासुर दैत्ययात उलि यायेगु शक्ति प्राप्त जूगु खः । हे देव लोकपिं अथेया निमित्तें जिनं छिमित व दैत्ययाके च्वंगु राज्य लितकयाः छिमित वीकेगु समर्थ जिके मदु । हे देवलोकपिं ! बिना भगवानंहे मखेक उगु राज्य लितकायेगु समर्थ यायेफै । छाये धालसा गुम्ह श्री

भगवानं सकलया पाप नाश याना विज्याना च्वंम्ह अजाम्ह भगवानं जकहे वयाके च्वंगु राज्य लतकाये फै । थौं थुम्ह भगवान् जेतवर्ण महाविहारे विज्याना च्वंगु दु । हे देवलोकपिं आः छिपिं अनहे भगवान्या थाय् शरणे हुँ । छिमिगु मनोवाञ्छा पूर्ण ज्वी धका थय्ये आज्ञा दयेका विज्यात ।

थुलि श्री गुहचेश्वरी देवीयागु आज्ञा न्यना थुपिं सकल देवलोकया मने हर्ष ज्वीका श्री देवीयात नमस्कार याना अनं प्रस्थान याना जेतवने वने धका व सकल देवलोकपिं अन थ्यंक वन श्री गुहचेश्वरी अन्तरधान जुयाः विज्यात उख्ये सकलदेवपिं जेतवने थ्येका श्री भगवान्यात दर्शन याना वस्पालेलया चरण कमले भोपुयाः नमस्कार याना पंचोपचार पूजा याना जप, तप, ध्यान आदि याना दण्डवत, अष्टाङ्ग प्रणाम याना सकल देव लोकया मिखाय् खोवि हायेका ल्हाहा ज्वरे याना विन्तियात । हे भगवान् ! जिपिं फुक्क छल्लपोलयागु शरणे वयागु मेता कारणं मखु । हे प्रभू थौं दानासुर दैत्य दुःख विया तल जिमिगु वास सुधान्तहे मदयेक हे भगवान् हानं जिमिगु राज्यनं हरण याना कयाः व दैत्यं चले याना जिमित पतिना हल । हे परमेश्वर ! थौं जिपिं च्वने थाय् मदु, छलपोलं रक्षा याना विज्याये माल । हे सर्वज्ञ मुनीश्वर ! धका ईन्द्रादि देवलोकपिनिसं विन्ति याना धाःगु खँ न्यना श्री भगवानं व ब्रम्हा, विष्णु, महेश्वर ईन्द्र आदि सकल देवलोकपिं खना करूणा तयाः तत्कारणहे थःगु मायां पृथिवीले रूद्राक्ष माला बुइका रूद्राक्ष कयाः वहे जपमाला दयेका श्री भगवान् शोधन याना व रूद्राक्षमाला श्री महारूद्रयात ल्हाते लःल्हाना वियाः थुगु प्रकारं आज्ञा दयेका विज्यात ।

हे ब्रम्हा ! विष्णु ! महेश्वर ! छिपिं स्वंम्ह हे उगु प्रमोद तीर्थे वना आम जिं वियागु रूद्राक्ष माला धारण याना अन तीर्थे च्वनां तपस्या याना च्वँहुँ धका आज्ञा दयेका विज्यात ।

थुलि श्री भगवान्या आज्ञा थ्ये प्रमोद तीर्थे वना एकचित याना न्हिं न्हिं हे मोल्हुया बालुका चैत्य दयेका पंचोपचारं पूजा याना श्री भगवानं वियाः हःगु रूद्राक्ष माला धारण याना स्वङ्ग मिखाँ तिसिना तपस्यायात । हे तान्त्रिक पण्डित ! धका श्री भगवानं थः शिष्य गणपिनिगु बोधिसत्त्वयागु न्हचोने थय्ये आज्ञा दयेका विज्याना च्वन । हे बोधिसत्त्व ! छ थय्ये वना दानासुर दैत्ययात सःता थन जिथाय् व्वना हति धका थय्ये आज्ञा दयेका विज्यात ।

थुलि श्री भगवानयागु आज्ञा न्यना व दानासुर दैत्यया थाय् वना धाल । हे दानासुर दैत्येन्द्र जिमि गुरू श्री भगवानं आज्ञा जूगु थय्येहे छक छपिं अन भगवानया थाय् वयेमाल धका धयाः हःगु दु धाःगु खँ न्यना दैत्यं धाल । हे बोधिसत्त्व ! जिं थुगु प्रमोद तीर्थे विना मेपिं सुं देवताः हे सेवा मयाना । जि आमकन वयेगु प्रयोजन मदु धका धाःगु दैत्ययागु थुलि खँ न्यना बोधिसत्त्व लिहाँ वना श्री भगवान्या थाय् न्हचोने विन्तियात । थुलि बोधिसत्त्व दैत्ययागु खँ धाःवगु न्यना पुनः श्री भगवानं आज्ञा दयेका विज्यात ।

हे बोधिसत्त्व थुलि व दैत्यं धयाः हस्येलिं हाकनं वना छँ व दैत्ययात थय्ये धयाः वा । हे दैत्यराज छन्त प्रमोद तीर्थराजां वा धका सःतके हःगु धका धयाः व्यू धका श्री भगवानं आज्ञा दयेका विज्यागु थुलि खँ न्यना बोधिसत्त्व अन दैत्यया थाय् थ्येक वना अथ्यहे धाः वन । थुख्ये श्री भगवान् तत्कारणहे उगु प्रमोद तीर्थे थ्येक विज्याना च्वन । अन बोधिसत्त्व वया व दैत्ययात श्री भगवानं गथे धयाः हःगु खँ खः अथ्ये धाःगु थुलि खँ न्यना थुम्ह दैत्यराज हथाय् चाया उगु प्रमोद तीर्थे वने धका वल । अन थ्येका उगु तीर्थे नित्यथ्ये स्नान याना थः माक्व कर्मयाये धुंका श्री तीर्थराजयात पंचोपचारं पूजा याना फको जप, ध्यान, स्तोत्र पाठ आदि याना च्वन ।

थनलि श्री भगवानं तीर्थराजयागु रूप धरेयाना व दैत्यया भाव स्वयाः थुगु प्रकारं आज्ञा दयेका बिज्यात । हे दैत्यराज ! धन्य २ छंगु भाव खना जि सन्तोष ज्वी धुन । हे दैत्यराज मेता कारणं मखु छन्त सःतके हयागु । जि गुरूया थाय् छक वनेनु धका सःतके हयागु धका थथ्ये आज्ञा दयेका तीर्थराज रूप श्री भगवान् व दैत्ययात थः नापहे व्वना हयाः थःगु बिहारे यंका छगू सभा मण्डले थासे तयाः थुगु प्रकारं बिस्तारं बोधिसम्बरयागु खँ कना न दैत्ययात चित्तबुझे ज्वीका प्रवज्याव्रत बियाः बोधिज्ञान आदि षत्पारमिता बोधिब्रत धर्मस चले याकल । हाकनं काषाय वस्त्रं पुंका चीवर खिखिलिका पिण्डपात्र लल्हाना अनेक प्रकारया बोधिज्ञानया खँ कना धर्म उपदेश बियाः श्री भगवानं व दैत्ययात हित याना थथ्ये आज्ञा दयेका बिज्यात ।

हे दैत्येन्द्र छँ मने क्रोध तयेमत्ये, अहंकार यायेमत्ये । क्रोध धयागु हे पाप गथे क्रोध परयात म्वाकं दुःख बिल अथ्येहे नतुं थतनं दुःख कष्ट नयेमाली, संसार धयागु हे अनित्य खः । अनित्य धयागु सदां च्वने मद्दु, छन्हुयागु दिने अवश्य त्वःता वने मानी । हे दैत्येन्द्र, उक्ये अकर्तव्य यानागु फलं थःम्हहे भोग यायेमा, मयास्येहे मगाः । हे वत्स, गुम्ह वैर जुयाः च्वंम्हयाः उपरे क्रोध मयास्ये शत्रुयात रक्षा याःपिं उक्येयागु पुण्य तथागतयागु पदवी लाइ । हे वत्स, उक्ये छनं इमिगु राज्य लितव्यू धका श्री भगवानं आज्ञा दयेका बिज्यात ।

थथ्ये आज्ञा जूगु न्यना दैत्येन्द्रया चित्तबुझे जुयाः शत्रुया उपरे माया तयाः ती भगवान्यागु आज्ञाथ्ये स्वर्गया राज्य कैलाश वैकुण्ठ-ब्रम्हाया सहितं त्वःता बिल । हाकनं इन्द्रयागु ग्वीगुकोटि धन लुतेयाना हयाः तःगुनं त्वःता बिल, वथ्येनतुं कैलाशया राज्य महादेवयात त्वःता बिल । वैकुण्ठपुरी विष्णुयात त्वःता बिल । ब्रम्हाभूमि ब्रम्हायातहे त्वःता बिल । स्वर्गभुवन जक इन्द्रयात त्वःता बिल । हे तान्त्रिक, थथ्ये श्री भगवान्यागु कृपानं थुपिं ब्रम्हा, विष्णु, महेश्वर, इन्द्र थुपिं प्यम्हे सियाहे थः थःगु राज्य लितकयाः आनन्द उगु राज्य नतुंहे च्वनां च्वन । दानासूर दैत्यया जक श्री भगवान्या कृपानं चूडाकर्म प्रवज्याव्रत आदि कयाः अनेक बोधिज्ञानं पूर्ण ज्वीका शत्रुया उपरे क्रोध शान्त याना स्वता प्रकारया बोधिज्ञान लाना श्री भगवान्या चरण कमले भोपुयाः थथ्ये विन्तियात ।

हे भदन्त, हे गुरू, जिगु विन्ति छगू न्यना बिज्याहुँ । छलपोलयागु दया कृपां याना जिगु पापदेह शान्त जुयाः पुण्यदेह जुल । हे शास्ता, लिपा कलिकालया समय ज्वी बले सकल मनुष्यया चित्ते पाप दुष्ट चित्त ज्वी, आपा लोभी, पापी ज्वी । थी थी हे पाप चेष्टा ज्वी, उबले छलपोलयागु नाम, त्रिरत्नया नामनं सुनां नांका दइ मखु, सकसिनहे शिवया जक प्रशंससा याना ज्वी । गुरू बुद्धया माहात्म्य नाश याना शिवया माहात्म्य मन तयाः थथ्ये सकल मनुष्यपिसं पापया रसे भुले जुयाः ज्वी तिनी । हे शास्ता, थुगु अवसरे थ्व संसारे महाअघोरं पापं दाह जुयाः सकल लोकपिसं महा दुःख भुक्तमान याना ज्वी तिनी । हे गुरू, थवले जि जूसां थ्व तीर्थ थाहाँ वया छलपोलया नामं जप, तप, ध्यान, स्तोत्र, पाठ आदि बुद्धया नामं चले याना च्वनेत वये । सकल लोकयात छलपोलं जित गथ्य बोधिज्ञान, ब्रत, उपदेश बियाः बिज्याथ्ये जिनं छलपोलया माहात्म्य सकल लोकयात उपदेश बियाः सकसिनहे छलपोलया माहात्म्य सकल लोकयात उपदेश बियाः सकसिनहे छलपोलया माहात्म्य सकल लोकयात उपदेश बियाः सकसिनहे छलपोल बुद्धया मत चले याकेत वये धका थुलि दैत्य धया श्री भगवान्याके विदा कयाः चरण कमले भोपुयाः उगु हे प्रमोद तीर्थ नतुंहे ल्यहाँ वना व दैत्य तीर्थस दुबिना लीन जुयाः वन ।

हे तान्त्रिक व दैत्यराजा थौयागु अद्यापि तकहे उगु तीर्थे च्वनाहे च्वन । हे तान्त्रिक थुजोगु उत्तमगु तीर्थयात छँ मखुगु खँ ल्हात, अकर्तव्यं योयोथ्यहे धाल सीलला छँ । तीर्थ धयागु बडाहे तःधंगु उत्तमगु खः धका तीर्थक पण्डितं जुलसा व तान्त्रिक पण्डितयात थथ्ये धाल ।

हे मैत्रिय, थुगु प्रकारं तीर्थक व तान्त्रिक पण्डित निम्हेसिया वादविवाद याना थुगु तीर्थे च्वनां च्वंगु असंख्य दया वस्येलिनं इपि निम्हंहे थुगु तीर्थे च्वनां खँ ल्हाना वाद याना च्वन । तान्त्रिकं जक ताकसिं खँ ल्हाना च्वन । तीर्थकं जक सार सारगु खँ ल्हानाहे च्वन । निम्हं हे मबूः । थुगु प्रकारं वाद याना च्वच्चं च्वच्चं कथंथ्ये थुपिनिम्ह हे वृद्धावस्था जुयाः कालया बशय् लाना थुपिं थुगु हे तीर्थे न्तु मृत्यु जुयाः प्राण त्याग याना सिना वन ।

हे मैत्रिय, थथ्ये थुपिं निम्हं प्राण त्याग याना वंगु पुण्यया प्रभावं स्वर्ग भुवनेसं बास लाना भगवानया कुले जन्म काःवन धका श्री शाक्यमुनि भगवानं मैत्रिय बोधिसत्व आदि सकल सभालोकपिनिगु स्वाः स्वयाः थुगु प्रकारं आज्ञा दयेका विज्यात ।

इति श्री स्वयम्भू पुराणे प्रमोद तीर्थ माहात्म्य कथाया तीर्थक तान्त्रिक संवाद
दशमोऽध्याय सम्पूर्ण ॥

प्रमोद तीर्थ (दानगा:) म्हसीका:



धार्मिक तीर्थ स्थल म्हसीका वने मागु थौयागु थुगु परिस्थिति वया गोकर्ण निसं थुगु प्रमोद तीर्थ (दान गा:) थ्यंवले प्रमोद तीर्थ धैगु थ्वहे खलाकि मखु धका: शंका काय मा:गु अवस्था जुल ।

धार्मिक कठन अनुसार स्वयम्भूपुराणपाखें द्वादश तीर्थ माहत्म्य कनावयाच्वंगु प्रमोद तीर्थ थौहन्त्ये कीर्तिपुर नगरपालिका वडा नं. १४ वल्खु स लाना च्वंगु ख: । थ्वहे प्रमोद तीर्थ (दानगा) ख: धैगु प्रमाणित जूवल ।

थुगु तीर्थस वागमती व रत्नावती निगु संगम जुयाच्वंगु तीर्थ ख: प्रमोद तीर्थ दानगा: । थुगुतीर्थय तुयुगु वर्णम्ह पद्य नागराजा वासयाना च्वंगु दु । थुगु तीर्थ व्रत याइबले दान यायगु ज्वलं बस्त्र (काप:) थुगुतीर्थ लिसे स्वापुदुगु पीठ ल्वहं द्वेपारी पीठ मानेयाना वयाच्वंगु खनेदु । थुगु तीर्थस पाठ यायगु सफू पञ्च रक्षा सूत्र ख: ।

थुगु तीर्थ व्रत यायबले महास्नान यायगु स्वाँता ख पलेस्वाँ । तीर्थ व्रत सेवा यानागु या पुण्य फल राजप्रीति सुख प्राप्ति जुइगु ख: । थुगु प्रमोद तीर्थस दानासुर दैत्य उद्धार जुगुलिं याना थुगु तीर्थ यात दान गा: धायगु याना वयाच्वंगु ख: ।

धार्मिक संगम तीर्थ स्थल, ल्यंका तयगु ख:सा, न्हुगुपहलं जनचेतना हयमागु नितान्त आवश्यक जुगुदु: । थुगु महान पुण्य कार्यस भी सकले अवश्यनं लगे जुईमा ।

सुलक्षण तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

श्री शाक्यसिंह भगवानं मैत्रिय बोधिसत्त्व आदि सकल सभालोकपिनिगु ख्वाः स्वयाः थुगु प्रकारं आज्ञा दयेका बिज्यात । हे मैत्रिय छिमिसं जूसां प्रमोद तीर्थयागु माहात्म्य खं न्यनेहे धुंकल । आः हाकनं सुलक्षण तीर्थयागु माहात्म्य खं कने त्यना, छिमिसं एकचित्त याना न्यों धका आज्ञा दयेका बिज्यागु खं न्यना मैत्रिय बोधिसत्त्वं थथ्ये बिन्तियात ।

हे भगवान् छल्पोलया दयां जिमिसं प्रमोद तीर्थयागु खं न्यने धुन । आः हाकनं सुलक्षण तीर्थयागु माहात्म्य खं न्यनेगु इच्छा जुल । हे भगवान् धका बिन्ति याना धाःगु खं न्यना श्री भगवानं थथ्ये आज्ञा दयेका बिज्यात ।

हे मैत्रिय, बोधिसत्त्व थुगु बागमती व चारूमती सङ्गम जुयाः च्वंगु सुलक्षण तीर्थ खः । थुगु तीर्थे बासयाना च्वंम्ह महापद्मधयाम्ह नागराजा खः । थ्व नागराजा गयोम्ह धालसा अतिहे सुन्दर जुयाः पलेस्वां थ्ये चकंगु ख्वाः, तुयुगु वर्ण जुयाः च्वंम्ह थजाम्ह नागराजां बास याना च्वंगु थुगु सुलक्षण तीर्थया मेला पर्व दिन गुबले धालसा जेष्ठ शुक्ल द्वादशी, मिथुन संक्रान्ति बुधवार थुलि योग चूलाइ बले थनया पर्व मेला खः । थयोगु दिने गुम्ह मनुष्यपिसं थुगु तीर्थे नयाः नीछन्हु यंकहे स्नान याः वइ बालुका चैत्य दयेका थःम्हं फुथ्ये सामाग्री दयेका पंचोपचारं पूजा याना जप, तप, ध्यान, पाठ आदि याना देवतायात अर्घ बियाः पितृयात तर्पण बियाः अतिथिगणपिन्त दान, दातव्य, धर्म, कर्म याइ थुकेयागु पुण्यनं निश्चयनंहे वयात सम्पूर्ण अलक्षण नाश जुयाः सुलक्षणं पूर्ण जुयाः बोधिज्ञान लाना तथागत पदवी समेत लाइ धका श्री भगवानं थथ्ये आज्ञा दयेका बिज्यात ।

थुलि आज्ञा न्यना मैत्रिय बोधिसत्त्वं हाकनं बिन्तियात । हे भगवान् थ्व तीर्थे सेवा याना सु सु उद्धार जुयाः वन । हे प्रभू बृतान्तहे खं जिमित छल्पोलं आज्ञा दयेका बिज्याहुं धका धाःगु खं न्यना श्री भगवानं आज्ञा दयेका बिज्यात ।

हे मैत्रिय, छं एकचित्त याना न्यों । थ्व खं गथ्य धालसा पुरा पूर्वकाले न्हापा कौसिक धयागु नदीया तीरे कुसीद धयागु नगर छगू दया च्वंगु दु । थुगु नगरे राज्य चलेयाना च्वंम्ह सुलक्षण धयाम्ह राजा महा पराक्रम दया च्वंम्ह थयोम्ह राजा छम्ह दु । थ्वया स्त्री महारानी सुलक्षणी धयाम्ह महारानी खः । हे मैत्रिय, थथिंजापिं राजारानी सहित च्वनां च्वंगु कुसीद धयागु नगरे यथाक्रमहे

प्रजा गणपिन्त प्रतिपाल याना आनन्दं थःगु राज्य चले याना च्वन । थथ्ये च्वच्चं असंख्य वर्ष बिते जुयाः वस्येलिं छन्हुया दिने व देशे अकस्मात् पंचमहापाप याःगु फल छगूहे लग्ने, छगूहे बेलाय साक्षात् कुपुत्र स्वीनितां अलक्षणपिं स्वम्ह थजोपिं जन्म जुल ।

हे मैत्रिय, थुपिं स्वम्ह कुपुत्रस्वयाः छें जन्म जुल धालसा राजायागु कुले छम्ह, मन्त्रीया कुले छम्ह, महाजनया कुले छम्ह याना थयोपिं अघोरं स्वीनितां अलक्षणं सहित जुयाः च्वपिं कुपुत्र सन्तान जन्म जुल ।

हे मैत्रिय, थुमिगु अङ्ग लक्षण गथ्य च्वं धालसा न्हापां छयों तग्वो खर्वुजा थ्यें च्वं १, कपाः अउँछिव्या २, मिखाफुसि सँ स्वाः ३, मिखाया चिमिसँ फुक्क तितिं स्वाः ४, न्हाय्पं छुंयागु थ्यें ५, मिखा हचाउँसे च्वं ६, न्हाय्प्वालं थस्वो ७, म्हुतुसि तबला ख्वातुस्ये च्वं ८, म्ये हाकु ९, वा तःपू आपामदु १०, न्यतापाँय् गाःगावं ११, छयोने च्वंगु सँ सियू १२, चिमिसँ अखतं चातू १३, न्हाय् मरू १४, मिखा गुलिच्याना द्वाहाँवं १५, म्हुतुसि गँ १६, हचँ ग्वा थ्यें हाकुगु वर्ण १७, गःप ताहाक १८, नुगःपा कःति १९, पाः ताःहाक २०, ल्हाः पतिहाक २१, तेफुचा ताःहाक २२, प्वाः तग्वो २३, लिङ्ग ताःहाक २४, म्ह बागचा २५, पुलि धुंयाथ्यें २६, छिसिपालि उँथया थ्यें २७, नयेगु आपाम्ह २८, आतापति तःपुम्ह २९, लुसि दक्व क्वन्हालुम्ह ३०, पाली दथ्वी हो दुम्ह ३१, स्वर धालसा महा भयंकरं तसःम्ह ३२ थुलि स्वी नितां अलक्षणं पूर्ण जुयाः च्वपिं कुपुत्र स्वम्ह उगु देशे जन्म जुल ।

हे मैत्रिय, संयोगवश थुपिं जन्म जुस्यें नस्यें थुमिगु प्रभावं व देशे अमंगल व अलक्षणं थिया न्हापा मजगु कथं अनेक उपद्रव दुर्घटनां ग्रष्ट जुल । छु जुल धालसा उगु देशबासी लोकजनपिन्त महामारि अनेक प्रकारया रोगं कयाः असंख्य मृत्यु जुल । हानं राजायानं असंख्ये धनद्रव्य अन्न आदि राजभण्डार दक्वहे सुना वन । सल, किसि, पशु पंछित आदि नाश जुल । पर राजा शत्रु वैरि जुयाः भय दया वल । सकल लोकपिं हाहाकार जुयाः व देशे भय दया वल । थ्व थ्यें नतुं सकल देशे दुर्भिक्ष जुयाः अन्नहे मदया वल । सकलया नये मखना, नय मदै धका मेपिनि नये त्योगु नयाः बगु समेतहे लाका नयाः जुल ।

हे मैत्रिय, अथ्ये व देशे उपद्रव जुजुं २ खुया नइपिं आपा जुयाः असंख्येहे खुंयागु भय दया वल । अथ्ये आपालं पाप बन्हे जुयाः ईश्वरया भाव दक्व हीन जुयाः सकलया हाहाकार म्हया च्वन । थथ्ये व कुलक्षणपिं जन्म जुस्यें नस्यें व देशे अनेक प्रकारया भय पीडा जुइका च्वने माल । हानं अकस्मात् अग्नि उत्पात जुल । देशहे मिनयाः दाह जुयाः असंख्ये लोकपिं मृत्यु जुयाः धन द्रव्य समेत नाश जगु स्वयाः सकल लोकजनपिं हाहाकारं ख्वयाः हाल जुल । अथ्ये हालाः जगु खना राजाया मने त्रास चाया धन्दा जुयाः थ्व छुयाये निरतिं उपद्रव जुथु धका मने भाःपिया थःगु देशेयापिं ज्ञानी गुणी पण्डित ज्योतिष आदि सकलयात सःतके छोया क्यना सोत । थथ्ये क्यना स्वबले ज्योतिषं धाल । थ्व देशे स्वीनितां अलक्षणं पूर्ण जुयाः च्वपिं कुपुत्र स्वम्ह छन्हुह दिने छगूहे लग्ने थुपिं स्वम्हं हे थ्व देशे जन्म जगुया निम्तिं अजाःगु उपद्रव जगु खँ । हे महाराज ! धका थथ्ये राजाया थाय् न्हचोने बिन्तियात ।

थुलि ज्योतिषं धाःगु खँ न्यना राजाया मने त्रास जुयाः तत्कारणहे थःगु देशे त्वाःत्वाः पतिकहे बिहार, बहि आदि अनेक चैत्य बिम्ब बुद्ध भगवान्पिं हाकनं अनेक क्षेत्रपाल देवतापिंके मातृका देवी देवता, थान देवता, इष्ट देवता थःथःगु कुल देवतापिंके अनेक प्रकारं पूजा भाव याना बज्राचार्य, ब्राम्हणपिसनं यज्ञ होम, जप, पाठ, ध्यान थाय् थासेहे याके बिल (याका तल) ।

हे मैत्रिय, थुगु प्रकारं भाव याका तलनं, याना च्वसानं व देशे ईश्वरपिसं फल बिये मफयाः च्वन । कारण छाया धालसा कुलक्षणपिं जन्म जुया, धर्म हीन जुया, पाप वृद्धि जुयाः च्वंगुलिं हे मैत्रिय ! थुम्ह राजां जूसा धालकि आः छुयाये थजोपिं सन्तान जन्म जुयाः थुगु प्रकारं देशे उपद्रव जूगु थःगुहे बीजं जन्म जूपिं सन्तान कुलक्षण जूसां छुयायेगु हे परमेश्वर ! जि पुत्रया कुलक्षण नाश जुयाः सुलक्षण प्रसन्न जुयाः बिज्याये माल । थ्व जिगु देशेनं प्रजालोक सकसियाहे दुःख शान्त ज्वी माल धका थथ्ये कामना याना व राजां सकभनहे शान्ति, स्वस्ति याकाहे च्वनां च्वन ।

हे मैत्रिय, अय याका तःसानंतवि व अलक्षणपिं स्वम्हेसिगु प्रभावं याना व देशे छतिहे जय जुयाः मवो । थुगु प्रकारं याना च्वच्वं व अलक्षणपिं स्वम्हंहे भनभनहे हृष्टपुष्ट जुयाः न्हिं न्हिहे शरीर वन्हे जुयाः तःधिक जुयाः वया च्वन । कथंथ्ये थुपिं न्यादया उमेर जुयाः वल । थुगु प्रकारं महाजनयागु छेसनं कुपुत्रम्ह अलक्षण सन्तान जन्म जूगुया प्रभावं व महाजन यानं दक्व सम्पत्तिहे नाश जुयाः इष्ट मित्रादि दास दासी सकल नापहे बियोग जुयाः न्हिं छछा जक हे नयेगु मदयाः, मफयाः कष्ट जुयाः च्वन । थथ्ये जुयाः वःगु स्वयाः व महाजनया मने फयाँफछि धिर्ज याना धाल ।

हा हा हे भगवान् गयोम्ह पुत्र छम्ह जन्म जूगु सापहे अलक्षणम्ह, थजाम्ह पुत्र जन्म जूगुलिं याना जिं थौं थयोगु कष्ट नयेमाल । आथ्व अलक्षणम्ह पुत्र याक्ये माया कयाः च्वनां, गुलिं कष्ट नयाः च्वने धका मती तयाः छन्हुया दिने निम्ह स्वम्ह पासापिं बियाः व पासापिन्त न्हचोवहे दुबिष्टाया खँ दयेका व कुलक्षण पुत्रयात व्यापार याके छोट ।

हे मैत्रिय, थ्व महाजनया कुपुत्रं जुलसां बुवायागु खँ न्यना थः बुवां व्यूपिं पासापिं नाप व्यापार यावने धका थःगु छेनं प्रस्थान याना पिहाँ वन । अथ्य ववं प्यन्हु च्यान्हुयागु लें थ्यनका महाजनं दुबिष्टा खँ ल्हाना हःगु लुमंस्य वया पासापिसं छपु लँपु बितेयाना व कुपुत्रयात छले याना त्वःता थःपिंजक लिहाँवया उम्ह महाजनयात अनयागु खँ फुक्कहे विस्तारं कना च्वन ।

हे मैत्रिय, उगु वखते उख्ये लें त्वःता वाना थकूम्ह कुपुत्रया लिहाँ वये मसया थः पासापिंनं मखना उख्ये थुख्ये चाकमकलं स्वयाः बिलाप याना गन वनेर धका हालाः ख्वयाः जुजुं २ दैव संयोग नेपाल मण्डल धयागु क्षेत्रे थ्येकवल ।

हे मैत्रिय, व कुपुत्र अलक्षण जूसां उगु नेपाल मण्डले थ्येका श्री स्वयम्भू दर्शन याना अनं वया बागमती व चारूमती सङ्गम जुयाः च्वंगु सुलक्षण धयागु तीर्थस थ्येकवन । अन थ्येका उगु तीर्थयात नमस्कार याना थुम्ह अलक्षण कुपुत्रं जुलसां उखुनु नस्येहे वहे तीर्थ च्वनां नित्य २ न्हिं न्हिहे स्नान याना मोल्हुया बालुका चैत्य दयेका पंचोपचारं पूजायाना थःम्हं सःथ्ये जप, तप, ध्यान याना ईश्वर याके मन तयाः एकचितं तपोव्रत याना च्वन ।

हे मैत्रिय थुगु प्रकारं तपस्या याना च्वच्वं आपालं वर्ष बिते जुयाः वस्येलि उगु तपस्याया प्रभावं छन्हुया दिने तीर्थराज सन्तोष जुयाः आकाशवाणीं आज्ञा दयेकल । हे भक्तजन ! छंगु तपस्या खना जि खुशी जुये धुन । छँ छुंहे धन्दा कायेम्वाः जि दु धका थथ्ये आज्ञा जूगु न्यना तपस्या याना च्वम्ह अलक्षण कुपुत्रं बित्तियात ।

हे परमेश्वर ! तीर्थराज, जिथिंजाम्ह अलक्षणम्हयात छल्पोलं सुदृष्टिं स्वयाः याकनं हे थुगु अलक्षण नाश ज्वीका सुलक्षणं संयुक्त याना दिव्य देह शरीर याना बिज्याहुं । हे भदन्त जिगु पाप

नाश याना पुण्य शरीर ज्वीका बिज्याहुँ धका थथ्ये वरदान फोना च्वन ।

थुलि खँ धयाः हःगु शब्द न्यना तीर्थराजां तथास्तू धका वरदान बियाः सम्पूर्ण अलक्षण नाश सुलक्षण संयुक्त ज्वीका दिव्य शरीर याना बिल । थथ्ये थुम्ह तपस्वीया जूसां तीर्थराजाया कृपां थःत दिव्यदेहे सुलक्षण वरदान लाना मनस अति हर्ष याना थःगु शरीरे थःमं नतुं पितुपियाः थियाः स्वयाः धन्य २ जिगु भाग्य म्हिगया दिने सम्पूर्ण अलक्षणम्ह धका बोबियेका च्वनाम्ह जि धास्येलि थौयागु दिनस तीर्थराजयागु कृपानं सम्पूर्ण लक्षण पुरे जुयाः सुलक्षण जुल धका हर्ष याना थुम्ह तीर्थराजायात पंचोपचारं पूजा याना अनेक प्रकारं स्तोत्र प्रदक्षिणा याना ल्हाहा ज्वरे याना प्रार्थनायात । हे परमेश्वर, छःपिनिगु दयां जि मनोरथ पूर्ण जुल हे प्रभू आः जि माँ बुवायागु दर्शन याःवने जित बिदा बियाः प्रसन्न जुयाः बिज्याहुँ धका थथ्ये प्रार्थनायात ।

थुलि खँ न्यना तीर्थराजां आज्ञा जुल । हे भक्तजन ! जिगु खँ छगू न्यो, मेगु मखु । छँ तपस्या याःगुया प्रभां छन्त उद्धार जुल । आः छ छिमिगु देशे वना व अलक्षणपिं मेपिं निम्ह दनि । इमि थाय् छ वना जिं छन्त उद्धार यानागु सम्पूर्ण खँ कना चित्तबुझे ज्वीका थन इमितनं छोया हति । थुमितनं उद्धार याना सुलक्षण याना बिये धका थथ्ये आज्ञा दयेका बिज्यात ।

थथ्ये आज्ञा जूगु न्यना थुम्हे तपस्वी महाजन पुत्रं बरो हर्षमान याना बिन्तियात । हे भदन्त ! छल्पोलया आज्ञा तथास्तू जिं थनयागु खँ सम्पूर्ण हे राजायागु न्हचोने वना बिन्ति याये । अले राजपुत्र, मन्त्रीपुत्र निम्हहे थन छोयाहये । हे परमेश्वर, छल्पोलया चरण कमले कोटि २ नमस्कार धका नमस्कार याना जि वने धका बिदा कयाः थुम्ह महाजनया पुत्र थःगु छें वने धका वल ।

हे मैत्रिय, अथ्य ववं २ क्रमैसित वया देशवासी मनूतयेके न्यना २ ववं २ बल्ल थःगु देशे थ्येक वल । थ्व स्वयाः देशवासीपिसं वयात धालकि अहा भी फलानाम्ह महाजनया पुत्र मखुला छिकपिं गनं भायागु । न्हापा स्वीनितां अलक्षणम्ह आः लक्षणं पुरे ज्वीका दिव्यदेह ज्वीका लिहाँ भाल धका हालाः सकसिननं धन्य २ छु तपस्यां थयोगु सुलक्षण जुल । सु देवतां थयोगु पुण्यया शरीर याना बिल धन्य २ बीर महाजनया पुत्र स्वो स्वो धका सकल देशवासी लोकपिसं प्रशंसायाका खँ ल्हाना च्वन ।

हे मैत्रिय, अथ्य सकल देशवासी लोकजनपिन्त शिष्टाचार याना थःगु छें थ्येक वना माम बुवायागु चरण कमले भोपुयाः थःगु कुशल वार्ता खँ ल्हाना बिन्ति याना च्वन । हे माता ! पिता छःपिनिगु कृपां जि नेपाल मण्डले वना श्री स्वयम्भू भगवान् दर्शन याना अनं सुलक्षण तीर्थे वना तीर्थराजयात नमस्कार याना अनहे च्वनां न्हिं न्हिं स्नान याना मोल्हुया यानागु प्रभावं जिगु अलक्षण नाश जुयाः सुलक्षण प्रसन्न जुयाः बिज्याये माल धका कल्पनां तपस्या याना च्वनां । हे माता ! पिताः थुलि जिनं तपस्या यानागुया प्रभावं तीर्थराज प्रसन्न जुयाः जिं धयाथ्ये सुलक्षण वरदान बिल । हाकनं थुम्ह परमेश्वरं जित थुगु प्रकार नं आज्ञा दयेकाल कि हे तपस्वी छिमिगु देशे स्वम्ह पातकी मध्ये छ छम्हेसिगु पाप कतये जुल । व मेम्ह राजाया पुत्र छम्ह, मन्त्रीया पुत्र छम्ह थुपिं निम्ह पातकी अलक्षणपिं दनी । थुमितनं छँ धयाः थन हे तपस्या याक्यहिं । इमितनं छंतथ्येहे उद्धार याना हये धका थथ्यन आज्ञा दयेका हःगु दु । हे माता ! पिता थुलि खँ राजा याक्य बिन्ति याःवने मानी । जिं थुलि राजायात बिन्ति याना उम्ह राजपुत्रयात मन्त्रीपुत्रयात निम्हेसितनंहे अन तपोव्रत याक्य छोये धका काय्म्हं बुवा याक्य बिन्ति याना च्वन ।

थुलि थः पुत्रयागु खँ न्यना हर्षमान याना माँ बौ नं थः पुत्रया ख्वाः स्वयाः थथ्ये धाल । धन्य २ हे पुत्र ! छंगु पराक्रम खना खुशी जुल । धन्य २ जिमिगु भाग्यनं, छाये धालसा थौं छर्थिजाःम्ह सुलक्षण पुत्र जिमित प्राप्त जुल । आःतिनि जिमिगु कुल थाम्य् ज्वीगु जुल । हे पुत्र ! स्यावास छंगु उपरे सदानहे श्री परमेश्वरं रक्षायाये माल धका थथ्ये आशिर्वाद वियाः राजाया थाय् समाचार कंके छोट ।

हे मैत्रिय थथ्ये व महाजनया पुत्रं राजाया थाय् वना समाचार कंवःगु न्यना राजां मन्त्रीयात सःतके छोया थःगु न्हचोने तयाः व महाजन पुत्रं धाःगु तीर्थराजयागु सम्पूर्ण खँ गथ्य धाःगु खः अथ्यहे राजां मन्त्रीयात आज्ञा दयेकल । राजां थथ्ये आज्ञा दयेकूगु खँ न्यना मन्त्री नं राजायात नमस्कार याना थथ्ये विन्तियात ।

हे महाराज थुगु खँय् जिगु सही जू । छल्पोलया जक गथ्य विचार ओ धयाः विज्याहुँ । हे महाराज धका विन्ति याना धाःगु खँ न्यना राजा, मन्त्री निम्हेसियाहे थः थःगु मने अत्यन्त हर्षमान याना व महाजनया पुत्रं धाथ्ये नतुहे राजकुमारनं मन्त्री पुत्रनं निम्हेहे सःता न्हचोने तयाः माःगु तकहे खँ ल्हाना चितवुम्हे याना इपिं निम्हेसितनं विदा वियाः नेपाल मण्डले तीर्थ सेवा याक्व छोया हल । थुख्ये महाजन पुत्रयात जक अनेक प्रकारया सामान तयाः सिरपाउ वियाः हल । थथ्ये राजां व्यूगु प्रसाद कयाः व महाजन पुत्र आनन्दं च्वनां च्वन ।

हे मैत्रिय, अनलि थुम्ह राजपुत्र मन्त्रीपुत्र निम्हेहे तपस्याया येगु निमिते नेपाल क्षेत्र वने धका थःगु छेनं प्रस्थान याना ववं २ क्रमैसित वया वल्ल वल्ल नेपाल क्षेत्र थ्येका तःधंम्ह परमेश्वर श्री स्वयम्भूया दर्शन याना अनं सुलक्षण तीर्थ धयागु थाय् वागमती व चारूमती सङ्गम जुयाः च्वंगु थासे थ्येक वना गुगु अलक्षण नाश जुयाः सुलक्षण प्राप्त ज्वी माल धका कल्पना याना थुपिं निम्हेसिनहे बरो एकचित्त उगु थासे च्वनां स्नान याना मोल्हुया बालुका चैत्य दयेका पंचोपचारं पूजा याना षडक्षरी मन्त्र धारण याना बडो एकचित्तं हे तपोव्रत याना च्वनां च्वन ।


हे मैत्रिय, थथ्ये च्वच्चं गुलिखे काल बिते जुयावस्येनिल थुमिगु तपस्या खना तीर्थराज प्रसन्न जुयाः थुमितनं सुलक्षणं संयुक्तगु पुण्य शरीर ज्वीगु वरदान वियाः थुपिं निम्हेसितनं विदा वियाः छोया हल । थथ्ये तीर्थराजं वरदान व्यूगु शिरोपर याना कयाः थुपिं राजपुत्र, मन्त्रीपुत्र निम्हेसियाहे थः थःगु तपस्यां तीर्थ राजया कृपां थः थःपिनिगु पाप शान्त याना पुण्यया शरीर प्राप्त ज्वीका सम्पूर्ण सुलक्षणं संयुक्त याना थःगु शरीर थःम्हहे स्वस्वों अत्यन्त हर्षमान याना तीर्थराज याक्वे विदा कयाः थःगु देशेहे वने धका अनं प्रस्थान जुयाः वल । थथ्ये ववं २ क्रमैसित वया थःगु देश थ्येका थः थःगु खबर कंके छोया अनेक शुभ मंगल देशे जात्रा याना भिंगु वेलाय् थःगु राजगृहे प्रवेश याना कुशल वार्ता आदि शिष्टाचार याना आनन्दं राज्य भोग याना च्वन ।

हे मैत्रिय, उखुनुयागु दिनं नस्ये व देशे शुभ मंगल जुयाः वल । हानं उगु देशे जग्गा भूमि आदिनं आपालं अन्न सया बन्हे जुयाः वल । सकल देशवासी लोकजनपिनिगु दुर्भिक्ष नाश जुयाः भिक्ष जुयाः वल ।

हे मैत्रिय, हाकनं राजानं बरो न्याय नितिं राज्य चले याना थःगु देशे च्वपिं प्रजा गणपिन्तनं पालन पोषण याना सुख आनन्द याना वियाः तल धका श्री शाक्यमुनि भगवानं मैत्रिय बोधिसत्त्व आदि सकलयागु ख्वाः स्वयाः थुगु प्रकारं आज्ञा दयेका विज्यात ।

इति श्री स्वयम्भू पुराणे सुलक्षण तीर्थ माहात्म्य कथाया तृतीय अलक्षण पुरुष उद्धार एकादशोऽध्याय सम्पूर्ण ॥

सुलक्षण तीर्थ (भाजङ्गाः) म्हसीकाः



द्वादश तीर्थ उपोषठ अष्टमी व्रत दनेवले ११ भिं छको यागु धलं दनेगु सुलक्षण तीर्थ भाजङ्गाःलय दनेगु खः । गोकर्ण निसें शुरू जूगु उपोषठ व्रत, थीथी तीर्थ दक्वो थासें सिधेकु कुं वागमति, विष्णुमतिस च्वंगु दक्वो त्रिवेणी संगम त आःयागु थुगु परिस्थिति तीर्थ व्रत सेवा यायगु तीर्थ वना न्हापा न्हापाथें तुं तीर्थय मोहल्लुया लालां दंदं, तीर्थव्रतयाये बहगु तीर्थ गनहे मदया वने धुंकल ।

थुगु सुलक्षण तीर्थया खँ द्वादश तीर्थ उत्पत्ति सम्बन्धी व सुलक्षण तीर्थ यागु वाख व्रत सम्बन्धी सम्पूर्ण खं स्वयम्भू पुराणपाखे वयाच्चंगु खः ।

वागमति व चारूमती संगम जुयाच्चंगु दोभानयात हे सुलक्षण तीर्थ भाजङ्गा धका म्हसीका वया च्वंगु खः । थुगु तीर्थ थौकन्त्ये कीर्तिपुर नगरपालिका वडा नं. १३ स लाना च्वंगु खः ।

थन तुयुगु वर्णम्ह महापद्म नागराजां वासयाना च्वंगु दु । थुगु तीर्थ व्रतसेवा याईगु इले, दान याइगु खः वहःयागु आत्माविम्ब खः । थुगु तीर्थ लिसें स्वापु दुगु पीठ खः पाँगा वनेगु लँय च्वम्ह वैष्णवि देवीयात, पीठ मानेयाना वयाच्चंगु खनेदु । थुगु तीर्थय पाठ यायगु सफू खः आर्य सप्तवार धारणी खः । थुगु तीर्थे माहास्नान यायगु स्वाँता कपुसिन्हयां स्वाँ खः ।

थुगु तीर्थ व्रत सेवा यानागुया पुण्यं रूप यौवन नापं सौभाग्य प्राप्त जुइगु खः । स्वयंम्भु पुराण अनुसार थुगु तीर्थय स्वीनीता अलक्षणम्ह मनू छम्ह उद्धार जूगु खं दु ।

मेमेगु तीर्थसं थें नतुं थुगु तीर्थय नं, फोहरं फोहर बाः वयाँ च्वंगु लियाना सम्पूर्ण तीर्थत दक्वो हे समय सापेक्ष जुइकथं सरसफाई यागु महान अभियान सञ्चालन याना वने माःगु महशुस याना च्वना ।

जय तीर्थ

बिहरति कनकाद्रौ शाक्यसिंहो मुनीन्द्रः । अपरिमित सुरसंघैः सेव्यमान जनौघैः ॥

कुवलय दलनेत्रा लक्षणैर्युक्तगात्रः । समभव हिततस्थः सर्वलोकेहितस्थ ॥

॥ ओं नमोबुद्धाय गुरुवे नमो धर्माय तारिणे नमः संघाय महत्तमाय ॥

ओं नमो रत्नत्रयाय ॥

श्री शाक्यमुनि भगवान् मैत्रिय बोधिसत्त्वयात आज्ञा दयेका बिज्यात । हे मैत्रिय छिमिस्ये जूसां सुलक्षण तीर्थयागु माहात्म्य न्यनेहे धुंकल । आः हानं जयतीर्थयागु माहात्म्य खँ कने त्यना छिमिसं न्यों धका थथ्ये आज्ञा दयेका बिज्यागु न्यना मैत्रिय बोधिसत्त्वं श्री भगवान् याक्ये विन्तियात ।

हे भगवान् छल्पोलया दयायाक्ये सुलक्षण तीर्थयागु खँ न्यने धुन । आः हाकनं म्येगु खँ न्यनेगु इच्छा जुल । हे भगवान् सर्वजनाथ छल्पोलं जिमित आज्ञा दयेका बिज्याहुँ धका विन्ति याना धाःगु खँ न्यना श्री भगवान् मैत्रिय आदि सकसिगुनं ख्वाः स्वयाः जयतीर्थयागु माहात्म्य खँ आज्ञा दयेका बिज्यात ।

हे मैत्रिय, परापूर्व काले दानासुर धयाम्ह दैत्यया कलाः कान्ति दैत्यनी छम्ह दया च्वन । थ्वया भाःत दैत्य व थ्व दैत्यनी थुपिं निम्ह स्त्री पुरुषया चानन्हिनं कलह ल्वापु जुयाः च्वनीगु कारण छाये धालसा छगू दैत्यया न्हापायागु धन फूगुलीं, निगू थः स्त्री दैत्यनीया पाखें सन्तान मदुगुलीं । थ्व निगूलीं यानानं नुगलं सहयाये मफयाः व दानासुर दैत्यं थः स्त्री कलायात बराबर घुर्की न्यंका च्वनीगु । चानन्हिनं थुगु प्रकारं घुर्की ल्वापु जुयाः च्वंगुलिं व दैत्यनीया थः स्वामीयागु अहंकार, कोप खना सहयाये मफयाः ग्याना मनय् तःधंगु शोकया छु धर्म जित सन्तान दइ । आः जिं छु धर्म याये, गन वने, गन च्वने धका बिलाप याना ख्वयाः थुम्ह दैत्यनी थःगु छेनं पिहाँ वया सकल नगर, देश, ग्राम आदि अनेक वनान्तरे भ्रमण याना चाःहिला उख्यें थुख्यें जुयाः च्वन ।

हे मैत्रिय, थुगु प्रकारं सर्वत्र हे थथ्ये भ्रमण याना जुजुं २ दैव संजोगं नेपाल धयागु पुण्य क्षेत्रे थ्येके वल । अन थ्येका व दैत्यनीनं उगु पुण्य क्षेत्र नेपाले सकभनं स्वयाः हर्षमान याना श्री स्वयम्भू धर्मधातु बागीश्वरयात नमस्कार याना अग्नेय कोणस च्वंगु अति उच्च जुयाः महापवित्र जुयाः च्वंगु फुल्लोच दानास थाहाँ वना व दैत्यनीनं उगु थास बिज्याना च्वंम्ह श्री महालक्ष्मी देवीयात नमस्कार याना थःगु मने प्रतिज्ञा याना च्वनकि हे परमेश्वरी जित छल्पोलं पुत्र, पुत्री दयेका बिज्याये माल धका थुलि प्रतिज्ञा याना बागमतीया तीरे स्नान याना श्री परमेश्वरी महालक्ष्मी देवीयात पंचोरपचारं पूजा याना एकचित्तं तपस्या याना च्वन । थुगु प्रकारं अतिहे कष्ट नयाः तपस्या याना च्वच्चं आपालंहे दया वस्येलि थुम्ह दैत्यनीया भाव श्री महालक्ष्मी बसुन्धरा देवी अत्यन्त खुशी जुयाः व दैत्यनीया न्ह्योने वस्पोल प्रसन्न जुयाः थःगु मूर्ति केना बिज्यात । गयोगु प्रकारं केना बिज्यात

धालसा साक्षात् श्री महालक्ष्मी जुयाः सुवर्णयाथ्ये च्वंगु वर्ण जुयाः षद्भुज खुका ल्हाःहा धरे याना पंचबुद्धया चिन्ह दुगु मुकुट धारण याना अनेक प्रकारयागु रत्न जदे याना तःगु सुवर्णया मुकुटं पुयाः हानं रत्नया मालां कोखाया जःगु मुलगु ल्हातं तथागतयात बन्दना याना नमस्कार याना बिज्याना च्वंम्ह निकागु ल्हातं संसारयात उद्धार याये धका रत्नयागु भुप्पा ज्वना बिज्याकम्ह । स्वकागु ल्हातं अभयवर बियाः बिज्याकम्ह । खःगु मूलगु ल्हातं सधर्म उपदेशया ज्ञान दुगु प्रज्ञापारमिता धयागु पुस्तक ज्वना बिज्याकम्ह । निकागु ल्हातं संसार प्रतिपाल यायेत श्री लक्ष्मी जुयाः वाग्बीं ज्वना बिज्याकम्ह । स्वकागु ल्हातं सुगति लायेगु अभिषेक बियाः पाप नाश ज्वीगु अमृत लंख तयातःगु पूर्ण कलश ज्वना अत्यन्त शोभायमान ज्वीके तेज प्रकाश याना जाज्वल्यमानं थःगु दिव्य रूपगु मूर्ति दर्शन दर्शन बियाः बिज्यात ।

थ्व खना व दैत्यनीया मनस अतिहे हर्ष याना हथासं दना वना वस्पोलया थाय् न्ह्योनेसं च्वनां ल्हाः भिक्तीनं ज्वरे याना चरण कमले भोपुया अष्टाङ्ग प्रणाम याना थुजोगु प्रकारं प्रार्थना याना च्वन । हे परमेश्वर ! छल्पोलया चरण कमले कोटि २ नमस्कार । हे लक्ष्मी देवी छल्पोल गथिंम्ह धालसा संसारया लक्ष्मी देवी जुयाः सकल लोकयात प्रतिपाल याना बिज्याना च्वंम्ह छल्पोलयात नमस्कार । हे परमेश्वरी, हे बसुन्धरा देवी धयाम्ह छल्पोल, सिद्धिलक्ष्मी धयाम्हनं छल्पोल, जगत् जननी धयाम्हनं छल्पोल, बुद्ध जननी धयाम्हनं छल्पोल, प्रज्ञापारमिता धयाम्हनं छल्पोल, उग्रतारा बज्रयोगिनी धयाम्हनं छल्पोल, आर्यतारा धयाम्हनं छल्पोल, थथिंम्ह छल्पोल बुद्धजननी संसारया माँ जुयाः बिज्याकम्ह छल्पोलयात जिनं कोटि २ नमस्कार । हे सर्वव्यापिनी छल्पोलं जिगु दुःख आप्त शान्त याना, रक्षा याना जित रक्षा याना बिज्याहुँ धका थथ्ये स्तोत्र याना, प्रार्थना याना वस्पोलया चरण कमले भोपुयाः च्वन ।

थयोगु बखते श्री लक्ष्मी बसुन्धरा देवीं व दैत्यनीयात थना वयागु ख्वाः स्वयाः थुगु प्रकारं आज्ञा नं दयेका बिज्यात । हे दैत्यपत्नी आः छुं छुं हे धन्दा कायेम्वाः जि दु धका थःगु जवगु तुतिया पालीं आसन याना तःगु सुवर्णया कलशं तत्कारण हे जलधारा हायेका छगू नदी उत्पत्ति याना बिल । थ्व नदीया नां खः प्रभावती धका नां छुना उगु नदी न्ह्याका बागमती सङ्गम ज्वीका तीर्थ ल्वीका बिल । थुलि याये धुंका श्री महालक्ष्मी बसुन्धरा देवीं जूसां थुम्ह दैत्यनीयात पुनः आज्ञा दयेका बिज्यात ।

हे दैत्यपत्नी, आः छुं जुलसां थ्व जि श्रृष्टि यानागु प्रभावती नदी व बागमती नदी मिले जुयाः वंगु उगु उत्तम तीर्थे वना अन च्वनां बरो एकचित्तं श्री त्रिरत्नयागु नां कयाः तपोव्रत याना च्वंहुँ । थुबले तिनि छन्त पुत्री सन्तान प्राप्त जुयाः छंगु मनोवाञ्छानं पूर्ण ज्वी धका थथ्ये आज्ञा दयेका व दैत्य पत्नीयात वरदान बियाः वस्पोल श्री बसुन्धरा देवी अनहे अन्तरधान जुयाः बिज्यात ।

थनंलि थ्व दानासुर दैत्यया पत्नी जुलसां श्री देवीया आज्ञा न्यना थःगु मने अति हर्षमान याना उगु थासं प्रस्थान जुयाः वयाः वस्पोलं श्रृष्टि याःगु प्रभावती गंगा सङ्गम जूवंगु थासे वया उगु तीर्थे च्वनां न्हिं न्हिहे स्नान याना श्री त्रिरत्नयागु भाव याना एकचित्तं हे तपस्या याना च्वन । थथ्ये व कान्ति दैत्यनीनं तपस्या याःगु आपालं वर्ष बितये जुयाः वस्येंलि श्री देवीयागु प्रभाव छन्हु व दानासुर दैत्यया थः स्त्रीयात थःम्ह बोबिया कडागु बचन धाःगु सम्पूर्ण खँ लुमना वया थ्व दैत्यं थः स्त्री नाप लायेगु निमित्ते थःगु अभिमान, घमण्ड, क्रोध फुक्कहे त्याग याना मदेका गन थःस्त्री च्वनां

च्वंगु खः, अनहे थ्येक वन । अन थ्येका व दैत्यराजां थः स्त्रीयात नाप लाना निम्हेसिया परस्पर धर्मयागु खँ ल्हाना उगु तीर्थराजयात नमस्कार याना विदा कयाः निम्हे थःगु छें स्वयाः ल्यहाँ वन । थथ्ये थःगु छें च्वच्चं २ छुं समय बिते जुयाः वस्येलि । तीर्थ सेवाया प्रभावं व कान्ति दैत्यनीया गर्भ पाख्ये अत्यन्त सुन्दरी स्वीनिता लक्षण दुम्ह पुत्री छम्ह जन्म जुल । थ्व स्वयाः व दैत्य पत्नीया अत्यन्त हर्षमान याना व पुत्रीयात उक्त नदीया नामं अनुकरण याना प्रभावती गंगा धका नामाकरण याना तल । थथ्ये याना लहिना ततँ २ उम्ह थः पुत्री प्रभावती बालकया पाख्ये याना थुम्ह दैत्य पत्नीयात जय जुयाः वल । थथ्ये जूगुया कारणं उगु तीर्थयात जय तीर्थ धका नां प्रख्यात जुल ।

हे मैत्रिय, अथ्य व दैत्यपत्नीया थःम्ह पुत्री प्रभावती गंगा बालकयात प्रतिपाल याना ततँ २ तःधंगु उत्तमगु पदवी समेत प्राप्त याना थःगु जीवनभर सुखं हे म्वाना छन्हु स्वर्गारोहण जुल ।

थुबले निस्ये न्यखुया नां प्रभावती सिद्ध जुयाः च्वन । हे मैत्रिय, थुगु हे उत्तमगु तीर्थेहे म्येम्ह छम्ह बल धयाम्ह दैत्य नं वया वहे प्रभावतीस नित्य २ हे स्नान याना मोल्हुया तपस्या याःवल । व दैत्ययातनं तपस्या यावःगु पुण्यया प्रभावं जय जुयाः सुनानं हे त्याक्ये मफयाः देव दैत्य सकलयात जितये याना स्वर्ग, मर्त्य, पातालया अधिपति जुयाः आनन्दहे च्वनां च्वन ।

हे मैत्रिय, हाकनं थुगुहे तीर्थेन तुं नरसिंह सौदागर धयाम्ह राजकुमारनं तपस्या याना सकल नरमांस भक्ष याना प्राणी हिंसा यानागु पाप शान्त याना दिव्य स्वरूप लाना महावीर पराक्रम दयाः मोक्ष पदवी समेत लाना वन ।

हे मैत्रिय, थुगु जयतीर्थ सिद्ध जुयाः ताकालं दयाः वस्येलि कच्छपाल पर्वते ओदियानाचार्य स्थापना याना तःम्ह बोधिसत्वयागु रथ जात्रा याना हःबले उत्तरापथं लुताहात वयाः थुम्ह बोधिसत्वयात लुटे याना कयाः यंकल । लिपा ताकालं थुम्ह बोधिसत्वयागु नामं कलश छग जक जात्रा याना तल । अयोगु अवसरस बैशालिनगर जीर्ण जुयाः वथासे तःधंगु बही छगू दया च्वन । थ्व बहिली स्थापना याना तःम्ह आदिनाथ धयाम्ह बोधिसत्व छम्ह दुगु जुयाः च्वन । थ्व बोधिसत्वयात उगु वैशालि नगरया संघ सहित याना भिनकं पूजा भाव याना माने याना च्वन, माने याना तल । अथ्य पूजा याना ततँ २ आपालं वर्ष बिते जुयाः वस्येलि छगू समय व बहिली च्वपिं सकसियां थिथीहे कलह ल्वापु जुयाः दक्वहे लोकजनपिं फुना मदया वन । अजागु अवसरे व थासे केवल पूजावारी द्यो पाला छम्ह जकहे बाँकी ज्वीक सकलें मृत्यु जुयाः वन । अजागु बखते थुम्ह पूजावारीं आदिनाथ देवयागु ख्वाः स्वयाः ल्हाः ज्वरे याना मिखाँ ख्ववि हायेका अति विलाप याना थथ्ये धाल ।

हे नाथ, थ्व बहिली अघोर संग्राम जूगु छल्पोलं छु स्वयाः बिज्यानागु । आः थन जि याकचा जक ज्वी धुंकल छल्पोलयात थन गथ्य याना जिं बिचार याना च्वनेगु । हे नाथ, आः जिं धर्म धका धयाः च्वने फैमखुत धका थुलि धयाः व पूजारीं बोधिसत्वयात ल्वाचाक ल्होना बुयाः दक्व तिसा तोका पोचिना पाछ्याया हयाः नदीस चुयेक्ये छोया बिल ।

हे मैत्रिय, थथ्ये व आदिनाथयात नदीस चुयिके हःहँ २ बागमती थ्येके हल । थथ्ये बागमती थ्येने सातकि आदिनाथ उगु लंखया द्योने बिज्याना थःगु शरीरं पंचरश्मि पिकयाः आकाशे हावलासा त्वोगुथ्ये अत्यन्त तेज पिकयाः जाज्वल्यमानं उगु बागमती लंखया द्योने बिज्याना च्वन । थयोगु अवसरे आकाशे देवलोक गणपिनिस्येनं सीका आकाशंनंतू हे वस्पोलयात पुष्प वर्षा स्वाँ वागाका

हल । हाकनं उगु हे तीर्थे च्वनां च्वपिं नागराज गणसिपसनं वस्पोलयात दर्शन याना पूजा आनन्दं
 थुगु जयतीर्थे थ्येक बिज्यात । थयोगु बखते कच्छपाल पर्वते च्वंम्ह ग्वालजात जुयाः च्वंम्ह खना व
 स्वयाः आश्चर्य जुयाः धाल । हाहा थौ बागमती तीर्थे सु बिज्यात ज्वी अवश्यहे थ्व बिज्याम्ह छम्ह
 तःधंम्ह हे ईश्वर ज्वी । आः जि वना व खुशीं थकयाः लाना हये धका मने लुइका जिल्हा जुयाः अन
 वना खुशी व्वव्वाना लालाकयाः वना वहे बोधिसत्व मूर्ति ज्वना सातु साला हयाः च्वे उगु पर्वते थत
 हल । अथ्य व आदिनाथयात ज्वना थःत हयाः च्वंगु खना वस्वोया अन च्वपिं सकल लोकजनपिं
 फुक्क हे आश्चर्य जुयाः अत्यन्त हर्षमान याना सकसियाहे थी थी खँ ल्हाना धाल । अहो भीगु भाग्ये
 थथिंम्ह परमेश्वर थन भीथाय् बिज्यात, सो सो थन भीथाय् न्हापायाम्ह द्यो मदया वंगु आपालं
 दत । आः थौयागु दिनसं भीथाय् न्हापाथ्ये नतुं हे ईश्वर स्थापना याना पूजा भाव याना च्वने दैन
 धका थः थःगु मनं भालपा राजायात बिन्ति चढे याये माल धका जाहेर याना धावन । हे महाराज
 ! थौयागु दिनसं कच्छपाल गिरिपर्वतसं देव मदुगु आपालं दया वने धुंकल । आः मेम्ह परमेश्वर छम्ह
 स्थापना याये मज्यूला धका बिन्ति चन्हेयात । थुलि प्रजालोकपिसं बिन्ति याना धाःगु खँ न्यना राजां
 ज्यू धका आज्ञा दयेका बिज्यात ।

थुलि राजायागु आज्ञा न्यना सकल लोकजनपिं खुशी जुयाः थः थःगु थासे नतुं लिहाँ वया व
 खँ सकसितनं कना भिंगु दिने जूसां उगु बागमती व प्रभावती सङ्गम जूगु थासे वना बिधिथ्ये पूजा
 याना चैत्र शुक्लया अष्टमी थ्व खुनुया दिने शुभ बेलास श्री बज्जाचार्य गुरूं जुलसां दुर्बाकुण्ड धयागु
 (द्राफोस्वाँ) तयाः आराधना याना च्वन । थुगु बखते थुम्ह बोधिसत्वं थःगु तेजं खयेका उगु द्राफो
 स्वाँने लखे म्हिता च्वन । अजागु बखते व आराधना याना साला च्वंम्ह बज्जाचार्य सीका उगु
 द्राफोस्वाँने चोम्ह बोधिसत्व द्योयात लाना कयाः सुवर्णयागु कलशे तयाः हयाः न्हापां खुशी चुयिके
 हःम्हयागु शरीरे लीन याना बिधिथ्ये पूजा आदि याना जात्रा दयेका स्थापना याना तयाः तल ।

हे मैत्रिय, थुगु जयतीर्थे थौयागु अद्यापि तकं हे चैत्र शुक्लयागु अष्टमी खुन्हु मेला लगे जुयाः
 च्वन तिनी । थुगु म्येलाय्सं सकल लोकजनपिं वयाः वर्ष बन्धन धका थ्व तीर्थेस स्नान याना
 तलतिनि धका श्री शाक्यमुनि भगवानं मैत्रिय बोधिसत्त्वया न्ह्योने थुगु प्रकारं आज्ञा दयेका
 बिज्यात ।

इति श्री स्वयम्भू पुराणे जयतीर्थे प्रभावती उत्पत्ति कान्ति दैत्यनी, बल दैत्य,
 नरसिंह सौदागर उद्धार द्वादश अध्याय सम्पूर्ण ॥

जय तीर्थ (न्येखु) म्हसीका:



द्वादश तीर्थ उपोषढ अष्टमी व्रत दनेगु भोले थुगु तीर्थ, भीनिकोगु अर्थात पूर्ण यायगु धुंकेगु ज्याभो थुगु तीर्थस जुइगु खः ।

धार्मिक दृष्टिकोणं थुगु तीर्थ अतिकं तःधना च्वंगु खनेदु । थुगु जय तीर्थया पश्चिमपाखे, चोभा डोंयाच्चय, श्री आनन्दादि लोकेश्वर विराजमान जुया बिज्याना च्वंगु दु । श्री आनन्दादि लोकेश्वर या न्हवंयाय्त थुगु हे जय तीर्थया लः यंकाः न्हवं आदि पुजा याइगु खः ।

थुगु जय तीर्थ (नेखु) ललितपुर जिल्ला बुंगमति गाविस व कीर्तिपुर नगरपालिका वडा नं. १३ स लाना वयाच्चंगु खः । धार्मिक दृष्टिकोणं थुगु तीर्थ वागमति व प्रभावति संगम जुयाच्चंगु अति तःधंगु तीर्थ खः जय तीर्थ । थन तुयुगु वर्णम्ह श्रीकान्ति नागराजां बास याना बिज्याना च्वंगु खः ।

तीर्थ व्रत पूजा याइगु अन्तिम जुईगु जुगुलि थुगु तीर्थसं सहश्राहुति यज्ञ याना धुंकेगु चलन दु । तीर्थ व्रत धुकिवले याइगु दान खः शैया दान यायगु चलन दु । पीठ थुगु तीर्थया वारिसं तु साधना याइगु खः । थुगु तीर्थ पाठ याईगु करूणापुण्डरीक सूत्र खः । थुगुतीर्थ व्रत यानागुया पुण्य खः संग भेद पाप नाश जुइगु खः ।

थुगु तीर्थे माहास्नान याइबले स्वां ता खः सर्वोषधि ।

स्वयम्भूपुराण अनुसारं थुगु तीर्थस दानासुर दैत्यया कलाः प्रभावती उद्धार जुगुखः ।

तीर्थतः मध्ये दकले लिपायागु तीर्थ अर्थात ये देया दकले सिथेयागु खुसि जुगुया कारणं याना ये देया सम्पूर्ण धः थुगुहे तीर्थ जुया वनिगु जुगुलि थुगु तीर्थस शुद्धगु जल न्हयाइ धैगु सम्भव मदय धुंकेगुलिं थुगु तीर्थया स्वरूप हाकनं छक लित हय्तः सकले बृहत जनचेतना लगे जुयमागु ताय्का च्वना ।



आर्यावलोकेश्वर (जनबाहा द्योः)

श्री जनबहा:द्य:या ऐतिहासिक खँ

थौकन्हे साधारण कथं बाहा:यात 'जनबाहा:' (मच्छेन्द्र बहाल) धा:सां थ्व बाहा:या मू नां 'कनक चैत्य महाविहार' खः । लिच्छवी कालया अभिलेख्य थ्व विहारया उल्लेख मदुसां नेसं. २५६ या जुजु नरेन्द्र देवया पालय्या छगू हस्तलिखित ग्रन्थय् थ्व कनक चैत्य महाविहारया खँ न्ह्यथना तःगु दु । थुकें कनक चैत्य महाविहार येंया पुलांगु बिहारत मध्ये ला:वः धैगु खनेदु ।

अभिलेख दसि मलूनिंसां तबि थ्व विहारया पुलां पहः (प्राचीनता) अनुमान यायेगु यक्व लिधंसा दु । यक्ष मल्लया पालय् च्वया तःगु छगू हस्तलिखित ग्रन्थय् थ्व विहारय् चर्चा यासें 'कोलिग्रामया उल्लेख लिच्छवि अभिलेखय् नं दक्षिण कोलीग्रामया रुपय् अनेक थासय् खनेदु । शाक्यपिं थें कोलीतनं सभ्य व उन्नत जाति खः । कोलीत भगवान् बुद्धया मावली खलकय् लाः । रोहिणी खुशीया पूर्वपाखे कोलीतय्गु राज्य नं न्हनावंबलय् यक्व मात्राय् कोलीत व शाक्यन नेपाःगालय् दुहा वल । व हे कोलीतय्गु वस्ती जुयाः च्वंवले 'कोलीग्राम' धकाः नां जूगु खः । व हे कोलीतय्गु दुतिनाया नापं बौद्ध धर्म नं दुहां वःगुलिं थ्व विहार दयेकेगु ज्या जूगु खनेदु ।

थ्व प्रसंगया ल्यू 'कनकचैत्य महाविहार' नां च्वंवंगुलिइ बिचाः यायेगु आवश्यक जू । कपिलस्तुइ च्वंगु कनकमुनि भगवान् चैत्ययात सम्राट् अशोकं जीर्णोद्धार याःगु शिलालेखय् दु । अथेहे यानाः थनया "कनक चैत्य महाविहार" नं कनकमुनिया लुमंतिइ दयेकूगु खः धैगु दु गुगु वास्तविक जुइ

फइगु यक्व हे सम्भव जू । थ्व विषयय् अनुसन्धान यायेगु आवश्यक जू । कालीग्रामया अपभ्रंश हे केलत्वाः खः । थ्व त्वालय् नां जाःम्ह लिच्छवि जुजु मानदेवं ल्वहंहिति दयेकाः तया व्यूगु छगू ल्वहपौ (शिलालेख) नं लूगु दु । थुकें नं थ्व धापूया पुलांपहः (प्राचीनता) - या बारे छुं जः लाः ।

थ्व कनक चैत्य महाविहारय् जनवाहाः छः या मूर्ति स्वना नांजाः म्ह मल्ल जुजु यक्ष मल्लया पालय् जक जूगु खः धैगु वर्णन वंशावलीइ लाःगु दु गुगु सत्य खनेदु तर थ्व जनवाहाः छः (आर्यावलोकितेश्वर) धाःसा लिच्छवि कालयामह हे खः धैगु खनेदु । थ्व खँ सी दु । लिच्छविकालया अभिलेखत वाला स्वयेवलय् उगु प्रसिद्ध वस्ति “जमयम्बी” हे जमल खः धैगु खनेदु । कारणवश उगु वस्ति ल्हानां वंवलय् जनवाहाः छः नं ल्हाना वन ।

लिपा म्हुया स्वःवलय् व मूर्ति लूगु जूगुलिं थ्व जनवाहाः छःयात जमलेश्वर आर्यावलोकितेश्वर नं धाःगु न्यनेदु । लिच्छविकालय् आर्यावलोकितेश्वरया नां तत्त्वतं चाकःन्यं धैगु खँ लिच्छविकालया अभिलेखं सी दु ।

थुलि खं कनकचैत्य महाविहार व जनवाहाःछः नितां यक्को पुलां धैगु सी दु थनया विहारय् च्वनां विज्याःपिं शाक्यभिक्षु व बज्राचार्यपिनि संयुक्त संघं नं थुकिया विशेषतायात उलाच्वंगु दु ।

लक्ष्मी नरसिंह मल्लया पालय् जनवाहाःछःया देगःया विशेष रूपय् जीर्णोद्धार जुल । कारणं जनवाहाःछःया ल्हातय् च्वंगु बालाय् नं लक्ष्मी नरसिंह मल्लया समय किया तःगु दु ।

प्रताप मल्लया पालय् थ्व जनवाहाःछःया रथजात्रा नहयाकुगु धैगु खँ वंशावली च्वया तःगु दु ।

जनवाहालय् च्वंगु ल्वहंपौ, शान्ति सफू आदि वाला स्वत धाःसा मल्ल, शाह जुजुपिंस इलय् इलय् जनवाहाःछःया पूजा आजाय् व्यूगु विशेष पुलुं (दृष्टि) यक्वं खँ सीका काये फइ ।

थ्व जनवाहाःछः व विहारया बारे विस्तृत अनुसन्धान यानाः प्रकाशित यानाः प्रचार याये मालाच्वंगु दु ।

(जनवाहाःछःया बाखँ प्राप्त मज्जुगुलिं थन जनवाहाःछःया ऐतिहासिक खँ जकसां न्हयव्वयागु जुल । थ्व विशेष लेख नांजाःम्ह इतिहासविद् भाजु धनवज्र बज्राचार्यपाखें प्राप्त जूगु खः ।)



बुंग द्यः

रक्तायावलोकितेश्वर (बुंगद्यः) या बारखें

जुजु नरेन्द्रदेवया स्वम्ह कार्पिं दु । तःधिकःम्ह पद्मदेवयात पिंबहाः धयागु थासय् तयाबिल । दथुयाम्ह रत्नदेवयात तेबहालय् (तीर्थ विहार) बन्धुदत्त आचार्ययाथाय् तयाबिल । चिधिकःम्ह वलदेवयात थः च्वनागु मध्यपुर (थिमि) देशया लाय्कुली तयाः राज्याभिषेक नापं बियाः थःगु सिंहासनय् तयाः नरेन्द्रदेव जुजुं राजकाज फुक्क त्वःताः शहरं निक्वय्ति पाक अलक विहार धयागु दयेकाः आनन्द च्वंच्वन ।

वलदेव राजा थः बौ नरेन्द्रदेवं लाय्कु त्वःता वःगु विरहं अन मच्चंसे तपाय्बाज्या वीरदेव जुजुं ललितकशीयापाखें दयेका ब्यूगु ललितपुर धयागु यल देश्य लाय्कु दयेकाः च्वंच्वन । थ्वहे जुजुयाः पालय् नारायणया अंश गोरखनाथं श्री आर्यावलोकितेश्वर दर्शन यायेत नेपालय् श्री करुणामय बिज्यायेत गुम्ह नाग ज्नाः मृगस्थली वनया च्वय् नाग ज्वनाः तपस्या यानाच्वन । अनंनिसें नेपालय् वा मवयाः हाहाकार जुयाः नयेत्वने नापं मखंनाः भिनिदँतक दुर्भिक्ष जुयाच्वन । थथे नेपालगु दुःख कष्ट जुयाः वलदेव जुजुं यक्व उपाययातं नं दुर्भिक्ष शान्ति याये मफयाः गन गन ज्याथज्यथित दु अन अन वनाः चिवा कयाः खँ न्यवने माल धकाः वलदेव जुजु चांचां दुनियातय् छँय् वनाः सुनानं मखंक चिवा काः वंबलय् तेबहालय् बन्धुदत्त आचार्य व कलाःम्हेसिया खँ ताल । बन्धुदत्तयाके कलाःम्हेस्यां न्यन- हे स्वामी, छलपोल थेंजाःम्ह शक्तिवान् आचार्य दयेकं नं नेपाल थथे भिनिदँ तक

वामगानाः दुःख सियाच्चन, छु याःसा थ्व दुर्भिक्ष शान्ति जुयाः सुभिक्ष जुइ ? कलाःम्हेसियां थुकथं न्यंसेलि बन्धुदत्तं धाल- हे प्रिये, थ्व देशय् विघ्न जुयाच्चंगुया कारण न्यं- थन देशय् जुजुयाः काय् व बौ निम्ह जाये मफयाः नरेन्द्रदेव लाय्कुलिं पिहां वनाः बौद्ध विहार दयेकाः च्वंचन । काय्म्ह वलदेवं ययःथें यानाः न्याय विचाः मयासें राजकाज यानाच्चन । उकिसनं गोरखनाथं श्री करुणामय आर्यावलोकितेश्वरयात नेपालय् हयाः दर्शन याये धकाः गुम्ह नाग आसन यानाः मृगस्थलय् च्वनाः तपयोग यानाच्चन । थ्वहे कारणं भीगु देशय् वा मगानाः दुर्भिक्ष जुयाच्चंगुं खः । थ्व खँ सिलला धकाः कलाःम्हेसिके न्यनाच्चंगु वलदेव जुजुं न्यनाः थःगु लाय्कुलिं पिहां वया कन्हय्खुनु सुथन्हापां थः बौ नरेन्द्रदेव च्वंचंगु विहारय् वनाः अनेक प्रकारं विन्तिभाव यानाः चित्तबुझे यानाः थःगु लाय्कुली च्वना हयाः माःगुतक सल्लाह यानाच्चन ।

थनलि वलदेव जुजुं तेबहाःया बन्धुदत्त आचार्य सःतके छवयाः आज्ञा जुल- हे बन्धुदत्त आचार्य, ! भीगु देशय् वा मगाःगुलिं अशान्ति जुयाच्चंगु भिनिदं दयेधुंकल । अनेक उपाय यानां नं थव दुर्भिक्ष शान्ति जुइ धकाः वलदेव जुजुं न्यंसेलि बन्धुदत्त आचार्य विन्तियात- भो महाराज, थ्व अनावृष्टि विघ्न श्री करुणामय आर्यावलोकितेश्वर थन नेपालय् बिज्याके मफयेकं शान्ति याये फइमखु । वसपोल थौंकन्हे कामुनि धयागु देशय् (पोतलक) पर्वत स्थानय् यक्षपिनिगु कुलय् अवतार कयाः व देशय् च्वंपित उद्धार याः बिज्यानाच्चंगु दु । वसपोल थन नेपालय् बिज्याकेत आपालं हे दुःख कष्ट याये माली । तर न्हयाक्व हे दुःख सिये माःसां देशया लागि दुःख सियेत जि मग्थाः । थ्व ज्या यायेत उत्तर साधक धयाम्ह जजमान मदयेकं मज्यू । व जजमान छलपोलया पिता जुजु नरेन्द्रदेव हे जुइमाः । अले माःमाःपिं धकाः गुरु बन्धुदत्तया वचन न्यनाः वलदेव जुजुं बन्धुदत्तया आज्ञाकथं यायेगु निश्चय यानाः माःमाःगु सामाग्री ज्वरे यानाविल ।

थनलि बन्धुदत्त आचार्य व नरेन्द्रदेव जुजु निम्ह साहयंगुपर्वतय् स्वयंभूया शान्तिपुरय् बिज्यानाच्चंम्ह शान्तिकराचार्य नापलानाः वसपोलयाके नं माक्व सल्लाह यानाः उपदेश कयाः न्हापां ललितपुरया दोल धयागु थासय् बन्धुदत्त आचार्य व नरेन्द्रदेवं निम्हं च्वनाः श्री योगाम्बर ज्ञानडाकिनी आराधना यानाः कोटि संख्याया प्रमाण जपयोग यात । पुरश्चरण याये धुसेलि श्री योगाबरया वल प्रसाद आदि लानाः पूजा सरजाम कलश आदि क्ववियाः वनीम्ह मालिन धयाम्ह भरिया छम्ह व गोरखनाथं मृगस्थलि आसन यानाच्चंम्ह कर्कटनाग छम्ह नं बन्धुदत्त आचार्यया वलं छुटे यानाः हयाः साधकया कामुनि देशया पोतलकया पर्वतपाखे स्वयाः प्रस्थान यानावन । वँ वँ वँ अनेक पर्वत, खुसि, देश पारयाना वनेत कर्कोटक नागं गन गन गथे गथे यानाः यंके मालाच्चन । खुसि ताःमदुथाय् ता जुयाः थःगु म्हय् तयाः थाय्थासय् च्वंच्वंपिं भूत, प्रेत, पिशाच, राक्षस आदि अनेक मार, विघ्न वयाच्चंपित शान्ति यानाः बन्धन ताडन यानाः पोतलक पर्वत कामुनि देश सतक थ्यंकः छगू थासय् स्वम्हं च्वनाः पुरश्चरण यानाः श्री आर्यावलोकितेश्वरयात आक्हान यानाच्चन ।

उगु इलय् कामुनि देशय् अवतार कया च्वंम्ह श्री आर्यावलोकितेश्वरं नेपालनिसें वयाः थःत साधन यानाच्चन धयागु सीकाः थथे विचार याना बिज्यात । हिमालयया दक्षिणपाखे मञ्जुश्रीनं कालिदहया लः पितछवयाः देश दयेका श्री स्वयम्भू ज्योतिरूप आदि देव देवता स्थापना जुयाच्चंगु नेपाल देशय् थौंकन्हय् अनावृष्टि जुयाः दुर्भिक्ष जुयाच्चन । व उपद्रव शान्ति यायेत जिगु नांजक लुमंका च्वंसां जिं वनाः रक्षा याना बियेगु खः । आः जितः हे दर्शन याये धकाः गोरखनाथं गुम्ह नाग

आसन यांना: मृगथली तपयोग यांना च्वने धुंकल । उकिं भिनिदँतक वा मगा:गुलिं मेपिं देव देवतापिसं गोरखनाथं आसन यांनाच्वपिं गुम्ह नागयात त्व:तके मफया: वन्धुदत्त आचार्य वयागु सिद्धिया वलं कर्कोटक नाग छम्ह हया: थनथ्यंक नापं व्वना हल । उकिया कारणं आकाश मार्ग विज्याना: आराधना यांनाच्वंगु थाय्या आकाशय् विज्याना: वन्धुदत्तयात दर्शन विया: मा:गुतक संकेत सल्लाह विया: अनं लिहां वया: थ: मां यक्षनीयाथाय्तुं च्वनां विज्यात । थनील वन्धुदत्त आचार्य श्री करुणामयं संकेत विया विज्या:कथं छगू पवित्र स्थानय् च्वना: लुंया कलश स्वना: श्री आर्यावलोकितेश्वरयात आराधना यायेत जुजुयात थथे धाल- हे महाराज, जिं थ्व कलशय् श्री करुणामय साधन यायेवल्य् श्री करुणामय भंव:या रूप कया: कलशय् दुहां विज्याइ । उवल्य् छलपोलं नं कलशय् किसिलिं छग: उघरिमे देछाया विज्याहुं । बांलाक एकचित्त यांना विज्याहुं अले जिगु कार्य सिद्ध जुइ धका: वन्धुदत्त आचार्य श्री करुणामययागु मन्त्रं साधना यांनाच्वन ।

उगु इलय् श्री करुणामयया चित्त चञ्चल जुया: थ:गु सम्भोग कार्य त्व:ता: भंव:या रूप कया: आचार्य साधन यांनाच्वंगु कलशय् दुहां विज्यात । दैवसंयोग उवल्य् हे जुजुया: न्हय: वया च्वंगुलिं निक्व:तक दुहां विज्याना: हानं पिहां विज्यात । स्वक्व:तक नं मन्त्रया वलं हानं कलशय् भंव: दुहां विज्यात । उथाय्तक नं जुजुया: न्हय: वयेका च्वंगुलिं वन्धुदत्त आ:ला ज्या स्यनीगु जुल धका: जुजुयात थ:गु पुलिं ख्वाना: न्हयलं चायेका विस्येलि उघरिमे हयलं चायेका: दना वनाकथं कलशय् किसिलि देछायो विल । उवल्य् जुजुया: मनय् भतिचा अहंकार जुया: जि थेजा:म्ह जुजुयात आचार्य पुलिं ख्वाना विल, थ्वयात तलवारं प्यदंक हे पाला वी धका: मनय् च्वाक्क वंकल । थनील कामिनी देशय् करुणामयया प्राणांश मदुगु म्ह खना: सकल यक्षलोकापिं व वया मां यक्षनी नापं मुना: वन्धुदत्त आचार्य नं आक्कान यांनाच्वंगु थासय् थ्यंक वया: त्वा: वल । आचार्य नं नेपालयापिं वीर वीरपिं देवतागणपिं आराधना यांना: कामिनी देशं व:पिं सकल राक्षस, भूत, आदिपिन्त त्याका: थथे धाल- हे यक्षलोकगणपिं छिमिसं धन्दा कायेमते, इलय्व्यलय् छिमिगु देशय् नं पूजा याकेत श्री करुणामययात छ्वया: हये । आ: छक्व:निं जिमिगु नेपालय् विज्याका: सुभिक्ष जुइके माल । थथे धार्सेलि अनच्वपिं यक्षलोकगण सकसिनं आ: छिमिसं नं अवश्य जिमि काय्मचा श्री करुणामययात नेपाल यंकीगु जुल, गुवलें गुवलें थन विज्याकेत लं म्हसीकेगु चिं तयेत थ्व सिमाया तुं पुसा विया छ्वये । थ्व पुसा हवला यकिं । अले लिपा व सिमा स्वया: जक थन विज्या:सां गाइ धका: यक्षलोकापिसं आचार्ययात धया: थसिमाया पुसा विया छ्वत । अनील गुरु वन्धुदत्त आचार्य भरिया मालाकारयात कलश क्ववुइका: जुजु नापं तया: तसकं उत्सव यांना: श्री करुणामयया कलश जात्रा यांना नेपालपाखे स्वका: थसिमाया पुसा लँय् ह्वला: हल । यक्ष यक्षनीपिं नं ल्यूल्यू वया कोदुवाल तक थ्यंके हल । अन थ्यसेलि कामुनि देशं व:पिं यक्ष यक्षनीतय्त पूजा सत्कार आदि मान विया: थनं उखे छिपिं वये मदु धका: विदा वियाछ्वत ।

अनील वन्धुदत्त आचार्य थसिमा पुसा सिया: सिमा मसइकथं ह्वला: श्री करुणामयया कलश महामंगल यांना: कोदुवाल उत्तरपाखे स्वका: हल । उवल्य् हयग्रीव भैरव, हरिसिद्धि भैरव, लुंभुया तुंतवाहा:या भैरव व त्यांकाभैरव थुपिं प्यम्ह भैरवपिसं क्ववुयेका ह:वल्य् ब्रम्हा ल: हायेका:, इन्द्र छत्रं कुयेका:, यमराजं धूप थंका:, वरुण नागं शंखलखं छ्वाका: वा वयेका:, कुवेरं धन, द्रव्यया धा: हायेका:, अग्नि देवतां मतं क्यंका:, यक्षलोकापिसं विघ्न चीका:, वायुदेवतां वासा लायेका: व

प्रताप लायेका: तधंगु उत्सव याना: जात्रा याना: नेपाल देशय् दुत विज्याकल । थुलिमछिं देव देवतापिं वया: श्री करुणामययात लसकुस यानाच्वंगु बन्धुदत्त गुरु छम्ह व नरेन्द्र देव छम्ह निम्हस्यां जक खं । मेमेपिं सुनानं हे मखं । नेपालय् दुत हयेवं हे गोरखनाथ तपयोगं दना: श्री करुणामयया दर्शन या: वल । अले आसन यानात:पिं नागत सकलें थ:थ:गु भुवनय् वना: नेपालय् सुदृष्टि याना: वा वयेका विल । थुकथं उत्सव जात्रा याना: बन्धुदत्त गुरु, नरेन्द्रदेव, मालाकार स्वम्ह ल्यूल्यु वया च्वँच्वं छगू थासय् थ्यंवल्य् हरिसिद्धि भैरव खिचाया रूप कया: वँय् क्वस्वया: वु धका: संकेत व्यूगु ख: । उकिं थन तकं देवलोक सकलें वया: वसपोलयात विज्याकल । आ: थुगु थासय् हे छँ, देश दयेका: अमरावतिपुर वुंगदेश धका: नां छुना: थन हे श्री आर्यावलोकितेश्वर विज्याके माल । देवालय छगू देका: श्री करुणामयया ब्रम्हरूप प्राणांश दुगु कलश मूर्ति स्वरूप याना: दयेका: दशकर्म आदि प्रतिष्ठा कर्म याये धुंका: वसपोलयात नित्य पूजा यायेत स्वयम्भूया पूजारी छम्ह तीर्थवहा:या बन्धुदत्तया सन्तान छम्ह निम्हेसित पालपा: याना: माक्व आयस्ता तया: च्वनेत छँ नापं दयेका: तयाविल ।

थुलि बन्दोवस्त फुक्क सिधयेका: बन्धुदत्त गुरु, नरेन्द्र देव जुजु, मालाकार स्वम्ह वलदेव जुजुयाथाय् वने धका: लँय् वँव आ: वसपोलयात दँय् छक्व: रथजात्रा यायेगु थिति नं दयेके माल धका: सल्लाह जूवल्य् बन्धुदत्त गुरु वसपोल करुणामययात जिमिगु यँ देशय् विज्याके माल धका: धाल । नरेन्द्र देव जुजुं ख्वप देशय् विज्याके माल धका: धाल । मालाकार भरियां 'मखु मखु, जिमि यल देशय् विज्याके माल धका:' धाल । थथे स्वम्हेसिया सल्लाह मिले मजूसा: कचकच जुजुं इखादोल धयागु थासय् थ्यनेव अन यक्व मनूत मुनाच्वंगु खना: बन्धुदत्त, नरेन्द्रदेव निम्हेसिनं थथे धाल- आ: भ्मी थुकथं ल्वानाच्वनेगु मखु, थन देशय् यक्व मनूत दु उपिं मध्ये दक्वसिवे थकालिम्ह हया: वं धा:गु थासय् तयेगु धका: क्व:छित । अन देशय् च्वंम्ह दक्वसिवे थकालिम्ह छम्ह स:तके छवया: व्वना हल । वयात धाल- हे थकालि, श्री करुणामययात जिमिसं कामिनी देशं निसें थन थ्यंक हया: तये धुन । आ: जिमि थवंथ: सल्लाह मिले मजुया: थ:थ:गु देशय् यंके धका: हालाच्वन । छंगु धर्म स्वया: श्री करुणामययात गन विज्याके धाल अन जिमिसं विज्याकेगु जुल । थुलि धया: थकालियागु छ्यनय् धर्म भाखय् याकेगु यानाविल ।

उम्ह थकालिं स्वम्हस्यां धा:गु खँ न्यना: मनय् थथे विचा:यात- वसपोल श्री करुणामय विज्याकेगुली श्री बन्धुदत्त गुरु, श्री नरेन्द्र देव जुजु व मालाकार भरिया थ्व स्वम्हस्यां उतिकं मिहेनत दु, तर थ्व ज्याया मुख्य दानपति जुजु नरेन्द्रदेव हे ख: । उगु विचारं स्वयेवल्य् जुजुयाथाय् ख्वप देशय् तयेमा:गु अवश्य ख:, तर व ख्वप देश चिकिधंगु व यँ देशय् नं वस्ति आपा: मदु । थन यल देशय् वस्ति नं आपा: दया: मनूत नं अप्व: दु । उकिं श्री करुणामययात थन हे विज्याका: रथयात्रा यायेगु याये माली । छगू हानं नरेन्द्रदेव जुजुया: काय् वलदेव जुजुं नं थन राज्य यानाच्वंगु दु । थथे जूगुलिं थन हे विज्याके मा: धका: जिं धया: वी, आ: जिं नरेन्द्र जुजुया: कारणय् असत्य खँ ल्हाये मा:गुलिं जि थन हे तुना: सिना वने मालीगु जुल धका: सकसितं सत्य प्रभाव क्यनेत न्हय्ग: उग: कायेके छवया: न्हय्गलं उग: तँतँ चिना: उकिया च्वय् थहाँ वना: लोकापिं सकसियां न्हय:ने थथे धयाविल- हे महाराज, बन्धुदत्त गुरु, मालाकार, पञ्चलोकगणपिं, श्री करुणामय लोकेश्वर कामिनी देशं निसें थन हया: विज्याके धुकल । वसपोल स्वंगू लोकया नाथ, स्वंगू लोकया मंका:म्ह ख अयेसां छिमित थौ जिं सत्य प्रभाव क्यने-

थुलि धया: श्री करुणामय लोकेश्वर थन हे विज्याके माल धका धाल । थुलि धायेमात्रं न्हयगल उग: स्वाररं तुनावन । व थकालि नं अन हे तुना: सिना वन । थौ तकं उगु थाय्या नां थितिइति जुया: नां जुया: च्वंगु दु ।

थुलि जुयेव जुजु, गुरु, भरिया स्वम्हस्यां चित्त बुझे जुया: श्री करुणामय थन हे विज्याके मा:गु जुल धका: निश्चय याना: सुनय श्री मिश्र भिक्षुं दयेकात:गु विहार मध्यय् स्वंगूगु विहार (थौकन्हय् त:वहा:) य् तया: देवालय दयेका: श्री करुणामयया कलश दुगु मूर्ति हया: व हे देवालयय् स्थापना याना: अन नं प्रतिष्ठा कर्म याना: वन्धुदत्त आचार्य च्वेछ्छं धयागु थासय् पुरश्चरण योगय् च्वनां विज्यात ।

हानं स्वंगू कालया भविष्य ज्ञान सियेका: वन्धुदत्त गुरुं उत्तरायण जुइगु वखतय् श्री करुणामय अमरावतीपुरं ललितपुरया त:वहालय् विज्याकेगु चैत्रकृष्णया प्रतिपदाखुनु महास्नानया त्रिनया याना: वैशाखशुक्लया प्रतिपदाखुनु रथ जात्रा याना: थिति धयागु थासय् थ्यनेव भिंगु दिन स्वया: दक्षिणायण जुइगु ई मिलय् याना: जावलाख्य:तक साला: अनं खतय् विज्याका: अमरावतीपुर वंगदेशय् विज्याकेगु । हानं भिनिदँय् छकव: वुँगानिसें रथजात्रा याना: यल दे चा:हुयेकत भिंगु दिन स्वया: दक्षिणायण जुइका: अमरावतीपुरं वुंग थ्यंका: रथजात्रा याना: यंकेगु इत्यादि रितितिथि दयेका: दँय्दसं श्री करुणामयया रथजात्रा यायेगु याना: न्हापां यल देशय् धारोछ्छंया लोकेश्वर स्वथनारायणयागु मीननाथ लोकेश्वर आदि न्हयगू रथजात्रा दुगुली खुगू रथजात्रा श्री करुणामयया रथय् हे मिलय् याना: छगू जक रथजात्रा यायेगु यात । श्री मीननाथ लोकेश्वरयागु जक श्री करुणामय लोकेश्वरयागु रथजात्राय् स्वागत याना: हानं जात्रा ज्व:छि नं श्री करुणामयया रथ ल्यूल्यू तया: विचा: याना: जात्रा सिधयेवं वसपोल करुणामययाके विदा कया: तिनि लिहाँ विज्यायेमा: धयागु स्वप्नवाचा जूगुलिं श्री मीननाथ चाकुवहा:घ:या रथजात्रा छगू मिलय् मयासे अलग रथ दयेका: जात्रा यायेगु थिति नं दयेकल । व थिति दयेके धुसेलि जुजु, वन्धुदत्त, मालाकार स्वनं आनन्दं च्वंच्वन ।

छन्हु वन्धुदत्त आचार्य थ:गु कालज्ञान विचा: याना: नरेन्द्रदेवया थाय् वना: विन्तियात- भो महाराज ! छलपोलया व्याक्क मनोकामना पूर्ण जुल ला, मेगु छुं याये मानिगु दनिला ? थथे वन्धुदत्तया विन्ति न्यना: जुजुं आज्ञा जुल- हे गुरु वन्धुदत्त ! छलपोलयागु तधंगु दयाकृपा व सिद्धिवलं श्री करुणामय थन नेपालय् विज्याका: भिनिदँतक वा मगाना: जनतायात जुयाच्वंगु दु:ख पीर फुक्क शान्ति जुया: सुभिक्ष जुल । सकल लोकपिं नं खुसि जुल । आ: जि छुं हे ज्या याये मानिगु मन्त धका: जुजुं आज्ञा जूगु न्यना: श्री वन्धुदत्त गुरुं थथे विन्तियात- हे महाराज, छलपोलया मनय् तुनात:गु छगू ल्यं दनि, व छु धा:सा श्री करुणामय कलशय् साधन यानाच्वनावलय् वसपोल भम्ब:या रूप जुया: स्वक्व:तक कलश दुने दुहाँ विज्यातं नं छलपोलया न्हय: वया: किसलिं देछ्छये मफुगुलिं जिगु ज्या विघ्न जुइगु जुल धका: ग्याना: जिं छलपोलयात पुलिं छक: खाना: न्हयलं चायेके वियागु ख: । उवले छलपोलया मनय् छु वंगु ख:, व ज्या नं ल्यंका तये मजिल धका: गुरुं धा:गु न्यना: थ:म्ह गुरयात प्रहार याना विये धका: मनय् जक तयागु खँ लुमंका: अहो व गुरुं गुज्व: गु खँ सीका विज्यात । साक्षात् परचित्त ज्ञान थूम्ह गुरु ख: । थुज्व:म्ह गुरयात जिं गथे थुज्व:गु ज्या यायेगु धका: तत्वकं मनय् दु:ख तया: गुरयाके अनेक प्रकारं विन्ति याना: क्षमा फवन । तर गुरुं उगु



चोभा द्यः

श्री आदिनाथ लोकेश्वरया बारखँ

(आनन्दादि लोकेश्वर)

न्हापा कच्छ (पाल) पर्वत च्वय् बिज्यानाच्चम्ह करुणामय श्री आदिनाथ लोकेश्वरयात चैत्र शुक्ल प्रतिपदाखुनु महास्नान न्हवं यानाः चैत्रशुक्ल अष्टमि खुनु प्रतिष्ठा कर्मयानाः रथजात्रा यायेगु चलन जुयाच्चंगु जुल । छगू सालय् रथ जात्रा याना हहं दानगाः खुशी थ्यंसेलि खुशी रथ तुनाः प्यन्हु खुन्हु तकं अथें अनहे थानाच्चन । उबलय् केरुङ देश व नेपालया दथुइ युद्ध जुयाच्चंगु जुयाच्चन । छन्हु चान्हय् श्री आदिनाथ लोकेश्वर रथं क्वहाँ बिज्याना भिंखुदँया मिसायागु भेष कयाः जि गन वने, गन च्वने धकाः ख्वयाः हालाच्चन । केरुङ व नेपालया युद्ध जुयाच्चंगुलिं केरुङयापिं सँय्त न्हि न्हि नेपाल वयाः चिवा काःवइगु जुयाच्चन । वहे चिवा कायेत वःपिं सँय्तय्सं वयात बुया यंकुबलय् व मिसामचां बुयायंकूहेसिया ब्वहलय् वान्याना बिल । सँय्तसें थ्व ला मनू मखु? द्यः जुइमाः धकाः शंका यानाः केरुङ थ्यंकाः अनहे बिज्याकाः पुज्याना तल । कन्हय् खुन्हु निसें दानगालय् देय्के वःपिंस द्यः मदुगु खनाः आदिनाथ लोकेश्वर मन्त धकाः ख्वयाः हालाः जुयाच्चन । वहे आदिनाथयात नित्यस्नान याकेत नन्दगवाः धयाम्हेसिनं (सल्लाह यानाः) वयागु दुरु आदिनाथयात छायाः ल्यंगु दुरया धौ आदि दयेकाः व्यापार यानाः निम्ह त्यपूया सुखं जीवन हनाच्चंगु जुल । छन्हु नन्दगवाःया सा जयाच्चंबलय् वहे तःदहया कर्कोटक नागया कलाः नं गवाःतीर्थया नागनाप सम्भोग यानाः ल्यवः

कयाच्वंगु खनाः सह याये मफयाः घाय् क्वबुयेत ज्वना वःगु न्वलं निम्हेसितं दायाः विसिके छ्वत ।
 कर्कोटक नागया कलाःयात तच्चकं घाःपाः जूगुलिं बलंतलं थःगु नाग भुवनय् थ्यंका थःगु दोषयात
 त्वपुयाः नन्दग्वालां दाया हःगु खँजक थः भाःतयात कनाच्वन । व खँ न्यनाः कर्कोटक नागं तं
 पिकयाः थ्व नन्दग्वाःयागु छयंहे ध्यनाः छंगु न्हयःने तये हयाः बी धकाः कलाःयात बोध यानाः
 नन्दग्वाः च्वंच्वंगु थासय् थ्यंकः वन । नन्दग्वाःयात कर्कोटक नागं स्याये धकाः नन्दग्वाःया घाय्
 क्वबुइगु न्वलय् दुहां वनाच्वन । नन्दग्वाःया सायात नकेत घाय् माः वनाः क्वबुया वःबलय् घाय्कु
 तच्चकं भ्यातुयाः बलं थःगु छँ थ्यंकः वल । इमि निम्हत्पू द्यनाच्वंबलय् कर्कोटक नागया कलातं
 ल्यवः कयाच्वंगु फुक्क खँ नन्दग्वाःलां थः कलायात कनाच्वन । व खँ फुक्कं कर्कोटक नागं न्यनाः
 न्वःया प्वालं पिहां वयाः नन्दग्वाःया तिकाभ्यालं छयं दुतछ्वयाः नन्दग्वाःया छयं ध्यने धकाः वने
 धुकुंम्ह हानं लिहां वल । व नन्दग्वालां धाःगु खँ न्यनाः अजुगति चायाः थ्व खँला स्वपाः ख्वाः चुलानाः
 निर्णय मयासें अथे थ्वयात स्याये मजिल धकाः मनय् तयाः कर्कोटक नाग मनूया रूप कयाः
 नन्दग्वाःयात ह्ययेका थःगु नागपुरय् यंकल । अन थः कलाःया न्हयःने तयाः उगुं थुगुं खँ ल्हाका
 तःबलय् नागनीनं साजवाःया ख्वाः हे स्वये मछ्छालाः तं जक पिकयाच्वन । उबलय् साजवालं श्री
 करुणामय आदिनाथयात लुमंके मात्रं केरुड देशय् च्वनां विज्याःम्ह आदिनाथ थ्व साजवाःया
 विनाकारणय् ज्यान वनीगु जुल धकाः तुरुन्त वहे नाग भुवनय् थ्यंकाः साजवाःयाके दुविना बिल ।
 उबलय् नन्दग्वालां भचा मग्यासें थःम्हं खंक्व जुक्व खँ फुक्क कर्कोटक नागयात फूर्तिसाथ कनाच्वन ।
 थ्व साजवाःया खँ फुकं न्यनाः थः कलाःयागु हे अकर्तव्य व तधंगु दोष खः धइगु सीकाः कलाःयात
 व्वः वियाः नाग भुवनं पितछ्वये त्यंबलय् कलाःम्हं ग्यानाः विन्तियात- हे प्रभु, ! थ्व छगू वार जिगु
 द्रंगु अपराध क्षमा यानाः थ्व नन्दग्वाःयात भीगु खँ सुयातं नं कनेमदु धकाः त्वःता छ्वया विज्याहुं
 धकाः धाःगु कलाःया खँ न्यनाः कलाः खनाः माया वनाः नन्दग्वाःयात सःताः धाल- हे नन्दग्वाः, छन्त
 खनाः जि तसकं लय्ताल, तर थ्व खँ छं सुयातं हे कनेमते वरु छ सा लहिनाच्वंम्ह जूया निंतिं छन्त
 सायागु भाय् थूम्ह यानावी । थ्व खँ सुयातं कन धाःसा म्हुतुजक संके हे मात्र छंगु ज्यान वनी धकाः
 नन्दग्वाःयात सायागु भाय् स्यनाः साप हनेवने यानाः व नागदहनं थत हयाः वयागु छँ थ्यंक
 तयाबिल । छेय् थ्यंकाः कलाःम्हस्यां थुईतक चान्हय् गन वना च्वनां धकाः न्यंसेलि, खः, पासापिसं
 पिने व्वना यंकाः नकाः त्वंकाः ख्याः यानाः लठ्ठ यानातःगुलिं भचा लिबात धकाः कलाःयात चित्त
 बुभेयात । उखुनु चछिं याउँक द्यनाः कन्हय्कुन्हु जुइव न्हापा थें सा जयाः धौ दुरु मीगु ज्या
 यानाच्वन । छन्हु, सा जः वनाच्वंबलय् तसकं वाफय् वयाः सात फुक्कं उखे मदयेक वन ।
 नन्दग्वालां सात फुक्क मुंकाः लिहां वये मफुगुलिं चछिं कच्छपाल पर्वतय् तं बासं च्वनेमाल ।
 उबलय् साया मां व म्हाचाय् निम्ह कच्छपाल पर्वतया च्वय् च्वः भालय् लात । काय्मचा जुक्व
 क्वय्सं लाना च्वन । अले वा फय् वःगु दिसेलि मांम्ह सां क्वयनासं च्वपिं काय्मचातय् छिपिं
 आम्कन च्वने मते, चिकुसे च्वनी थन जिपिं च्वनाथाय् श्री आदिनाथया लुंयागु रत्नघः स्वंगः दुगुलिं
 व हे तेजं थन लुमुसे च्वं, उकिं छिपिं नं थन च्वय् वा धकाः सःता छ्वत । थथे मांम्हसिनं सःता हःगु
 तायाः क्वय्नाप् च्वपिं द्वहंचातसें धयाः हल- हे माता ! थौं जिपिं थनं वये फइमखु लिबात, थन नं
 लुंयागु घः निगः दु । थुकियागु तेजं जिमित नं लुमुसे च्वंच्वंगु दु, धन्दा काये म्वाः । थथे सातय् खँ
 ल्हानाच्वंगु न्यनाः इमिगु भाय् फुक्कं थुयाः लय्तायाः, धन्य धन्य जिगु भाग्य उखुनु कर्कोटक नागं
 स्यनाहःगु सातय्गु भाय् आः तिनि ज्याख्यले जूगु जुल धकाः सात फुक्क मालाः छथाय् मुंकाः

सातय्सं रत्नयागु घः दु धाःगु थासय् चिं छगू छगू तयाः थःगु छें लिहां वयाः सातय्सं धाःगु खँ फुक्क थः कलाःयात कनाः बेलि यानाः घन । कन्हय्कुन्हु सुथ न्हापां दनाः सागलय् सुचुकःवने धकाः वन । उगु इलय् मांम्ह सां धाल- हे मचाखाचात, श्री आदिनाथ च्वःभाःद्यः खुया यंकूथाय् सुनानं मखंक जि दुरु भचा हायेकाः छाया वये, छिपिं थनसंतुं च्वंच्वं धकाः व सा पिहां वन । थथे धाःगु साजवालं थुइकाः अहो, थ्व सां छु धाःगु, च्वःभाःद्यः खुयाः यंकल धाःगु जकं न्यना, गन दु धयागु जिं नं मस्यूनि । थ्व सां गन वनाः दुरु हाये कि, स्वःवने माल धकाः साया ल्यूल्ह वनाः चिवा कयाः स्वयाच्चन । अले व सा दानगाः खुशी न्हापा रथ तुनाः च्वःभाःद्यः खुया यंकूगु हे थासय् लाक वनाः दुरु छायाः थःगु सागलय्तुं लिहां वल । साजवालं व खनाः अजुगति चायाः थज खँ गथे सीकल धकाः उगु थासय् चिं छगू तये माल धकाः थःम्हं ल्ह वनेफक्व तग्वःगु ल्वहं छगः पाछायाः अन चिं तयाः थःगु छेंय् लिहां वल । छेंय् थ्यंकाः जा नये धुंकाः न्हापायाथें सात मुंका सा जः वंवल्य् मांम्ह सां थः मस्तय् धाल- हे मस्त, छिमिसं सुयातं कने मदु, उखुनु धयागु रत्नया घः छिमित क्यने यंके स्वः धकाः लँय् वँव न्हापायाथें आदिनाथ च्वभाद्यःयाथाय् दुरु छायाः थन हे खः लँयागु रत्न घः धकाः मचातय् कनाच्चंगु साजवाः नन्दगवालां थुइकाः अन नं चिं छगू तयाः आः धाःसा जितः रत्नयागु घः लाभ जुइगु जुल धकाः लय्ताया उखुनु न्हापां हे छेंय् लिहां वयाः बेलि यायां कलाःयात सातसें धाःगु खँ कनाः छन्त कन्हेहे व थासय् यंकाः क्यना बी धकाः कन्हय् खुनु सुथ न्हापां कच्छपाल पर्वतय् थहां वनाः थःम्हं चिं तयाः थकागु थासय् क्यनाः लिपा सुनानं मखंक काः वये माली धकाः थःगु छेंय् तुं लिहां वन ।

थुगु बखतय् केरुङ व नेपालया युद्ध जुयाः केरुङयापिसं मिसामचा धकाः खुया यंकूम्ह आदिनाथ च्वःभाःद्यः अन हे स्थापना याना तल । नेपाःया जुजुं सकभनं मायेके छवतं नं लुइके मफयाः उबलेनिसें हे आदिनाथ च्वःभाःद्यःया रथजात्रा दिनावन । वसपोल खुया यंकूगु थासय् सादुरु हायेका वःगु थासय् ल्वहं छगः तयाः थकाः प्यन्हु दुःखुनु हे श्री आदिनाथ करुणामय च्वःभाःद्यः थः थम्हंतुं व हे ल्वहंतय् प्रकट जुयाः बिज्याःगु नन्दगवालां खनाः तच्चकं अजुगति चायाः धन्य धन्य संसारय् द्यः धयापिं धाथें हे दयाच्चंगु दु खनि धकाः पत्याः यानाः श्री करुणामय आदिनाथयात साजवाः नन्दगवालां दण्डवत् प्रणाम यानाः भक्तिपूर्वक बिन्तियात- हे मानव, छं आजुपिनि पुस्तानिसें छिमिसं सा लहिनाः जितः स्नान याकेत दुरु बियाच्चंगु खः । अथे जूगुलिं छ भाग्यमानी हे खः । जि जगत् उद्धार याये धकाः च्वंच्वनागु खः । जि थन मदुगु भिनिदं दत । आः छं कच्छपाल च्वय् जितः स्थापना याना ब्यू । जितः तंगः बहाः (तःबहाः) लय् च्वपिं पूजारी तयाः यलया जुजुयात बिन्ति यानाः माक्व बन्दोबस्त याना ब्यू । श्री आदिनाथया आज्ञाकथं नन्दगवालां श्री आदिनाथयात दानगालं निसे बुयाः हयाः कच्छपाल पर्वतय् तयाः यल देशया जुजुयाथाय् वनाः तःबहाःयापिं पूजारी ब्वना हयाः नित्य पूजा यायेगु नियम दयेका बिल ।

थनंलि नन्दगवालां अथेंजक बुया हयाः कच्छपाल पर्वतय् तयेहःम्ह श्री आदिनाथ बिज्याकेत यल देशया जुजुं माक्व विधि विधान यानाः देवालय दयेकाः प्रतिष्ठा कर्म नापं यानाः च्वःभाल धकाः नां प्रख्यात याना बिल ।

उबसें निसें सकल लोकपिसं च्वःभालय् वयाः श्री आदिनाथयात दर्शन, पूजा आदि भक्तिभाव यानाच्चन । पान्जुपिसं नं पूजारी जुयाः नित्य पूजा यानाः द्यःपाःलाःया ज्या यानाः सुखं जीवन

हनाचन । थनीलि छन्हु श्री आदिनाथ नन्दगवा:यात आज्ञा जुल- हे नन्दगवा: मानव, छ खना: जि तच्चकं लयताल, छं छु फवने, छं धा:गु वरदान बी, छं जित: दानगालनिसें कुबुया: थन थ्यंक तये हल, थुलिमछि लोकपिसं पूजाभाव याकेगु बन्दोबस्त याना बिल । उकिं छन्त वरदान बी धका: च्वनां । थुकथं श्री आदिनाथया आज्ञा न्यना: चरणकमलय् भवपुया: नन्दगवालां विन्तियात- भो परमेश्वर आदिनाथ, जि मेगुं वर फवने मखु, जिगु शरीरय् बांमला:गु ल्वचं थियाहल । थ्व ल्वय् भं भं तच्च: जुया: वल धायेव जिं तसकं दु:ख सी माली । जिं छु यानागु कर्मभोगं थथे जूगु, जिं स्वयेला मेगु छुं पापकर्म मयाना थें च्वं । व हे कर्कोटक नागया कलातं थ: भा:तया उपरय् धर्म त्व:ता: गवा:तीर्थया नागनाप सम्भोग यानाच्वंगु स्वये मफया: जिं न्वलं दाया: बियागु ख: । आ: न्हचागु हे जूसां जिगु कर्म थ्व ल्वय् तच्च: जुइ मलावं ल्वय् याकनं शान्ति याना: न्हापा थेंयागु जिगु शरीर याना बिज्याहुं । थथे सकल लोकपिन्त नं छलपोलयागु सेवा यानागु फलं थुज्व:गु ल्वय् गुब्ले सुयातं हे मजुइमा: धइगु धैगु खँ छलपोलयाके वर फवने धका: सा जवालं विन्तियात ।

थुलि साजवा:या विन्ति न्यना: श्री आदिनाथ करुणामय लयताया: थनिनिसें छंगु शरीरय् बांमला:गु महारोग दक्कं शान्ति जुया: न्हापाया सिवे नं शरीर बांलाना वयेमा: थथे हे छं धा:थें सुनां सुनां एकचित्त याना: थुज्व:गु ल्वय् जूपिसं जित पूजाभाव याइ, इमित नं महारोग आदि ल्वय् शान्ति जुया: वनेमा: धका: नन्दगवा:यात वर बिया: लयताया बिज्यात ।

थुबलेनिसें संसारय् च्वपिं मनूतय् कुष्टरोग आदि ग्यानापुगु ल्वय् जुयाच्वपिं वसपोल आदिनाथया सेवा भाव उपासना याना: थ:थ:गु श्रद्धा भाव तया: थुगु ग्यानापुगु ल्वय् लायेमा धका: छगू जक मनय् तया: पूजायात धा:सा व ल्वय् लाना हे वनीगु जुयाच्वंगु दु । थ्व छगू वसपोल आदिनाथ आनन्दादि लोकेश्वरया सत्य आ:तकं प्रत्यक्ष रुपं दयाच्वंगु दु ।

थ्वसपोल आदिनाथ लोकेश्वरयात महास्नान याकेगु दिन चैत्र शुक्ल प्रतिपदाखुनु व अष्टमि खुनु दशकर्म प्रतिष्ठा कर्म यायेगु दिन जुल । थुकिया फुक्क खँ बांलाक च्वभा:द्य:या वंशावली च्वयात:गु दु । थ्वसपोल आदिनाथ आनन्दादि लोकेश्वरयात स्वयम्भू पुराणकथं कच्छपाल लोकेश्वर धका: नं नां तयात:गु दु ।

न्हापा श्री मञ्जुश्री नं कलिच्छेदन याये धुंका: मञ्जुपत्तन धका: देश दयेके धुंका: थ्व नेपाल देश त्व:ता: वने मास्ति मवया: पिंबहा: छगू दयेका: व हे बिहारय् मञ्जुश्री काश्यप बुद्धनाप च्वना: सकलयात धर्म उपदेश बिया: च्वँच्वं लिपा कलिकालय् थथे लोकपिंनाप खँलाबला याना च्वने मजिल धइगु भविष्य बिचा: याना: निम्हं मौन धारणा याना: नमवाना विसेलि सकल लोक वया: अने कथं पूजाभाव याना: नवाकेत कुत:यातनं नवाके मफया: द्य:पा:ला पूजारी निम्हं बुया: हया: बागमतीया लखय् चुइके व्छया बिल ।

अले काश्यप तथागतयात लाना कया: यलय् छगू विहार दयेका: अन स्थापना याना त:गुलिं थौतकं व विहार क्वबुबहा: धका: नांजाया च्वंगु दु । मञ्जुश्रीयात आदिनाथ धका: चुइके ह:म्ह चैत्र शुक्ल अष्टमि खुनु जय तीर्थ (न्यखु) य् थ्यन् । अन म्व:लुहयाच्वंम्ह सुवाल नांम्ह आचार्य साधन याना: कच्छपाल पर्वतया च्वय् देवालय दयेका: आनन्दादि लोकेश्वर धका: स्थापना यानातल । थ्व खँ श्री वर्णबज्र बज्राचार्यया सफुती च्वयात:गु दु ।



नालाकरुणामय

श्री सृष्टिकान्त लोकेश्वरया बाखं

(श्री नालाकरुणामयया बाखं)

न्हापा छगू इलय् वन्देपुर (भवतः बनेपा) धयागु देशया पिने नागिरि धयागु देश छगू दु । व देशय् दीर्घरथ धयाम्ह जुजु व वया रानी शुभलक्ष्मी धयाम्ह दयाच्वन । दीर्घरथ जुजुं दशाकुशल पाप कर्म जक चलय् यानाः न्याय नीति त्वःताः प्रजापिन्त बिचाः याना मच्चंगुलिं उगु देशय् थःथवय् ल्वापु जुयाः अनेक प्रकारया विघ्न उपद्रव जुयाः इलय् व्यलय् वा मवयाः दुर्भिक्ष जुयाः उगु नागिरि देशय् च्वंपिं सकल प्रजापिनि नये त्वने मखनाः भिनिदँतक दुःख कष्ट नयाच्वन ।

थथे जुयाः च्वंसा नं दीर्घरथ जुजुं छुं हे बिचाः मयासे थः जक साक्क भिंक नयाः लाय्कुली च्वनाः सुखभोग यानाच्वन । थुकथं नागिरि देशवासीपिसं तसकं दुःख कष्ट नयाच्वंगु सुखावती भुवनय् बिज्यानाच्वंम्ह श्री करुणामयं सीकाः खंका बिज्यानाः इमि उपरय् तसकं करुणा उत्पति यानाः थःगु समाधि योगपाखें नागिरि देशय् भिनिदँतक वा मगानाः सुक्खा जुयाच्वंगु देशय् जलवृष्टि यानाः सुभिक्ष यानाविल । थुलि जुयेवं उगु देशया सकल प्रजापिनि नयेगु त्वनेगु दयाः रोग आदि नं शान्ति जुयाः सुभिक्ष जुयाः वल । थुलि जुइ धुंसेलिं श्री करुणामयं थः भक्त जुयाच्वंम्ह सुधर्मदेवीयात आज्ञा जुल- हे सुधर्मदेवी, छ जम्बुद्वीपय् नागिरि धयागु देशय् वनाः धर्महीन जुयाच्वंपिं दीर्घरथ आदि अनच्चंपिं सकल प्रजापिन्त नं जिगु अष्टमी ब्रत चले याकाः धर्म प्रचार याना वा धकाः

श्री करुणामयया आज्ञा न्यनाः सुधर्मदेवी गुरुया वचं शिरय् तयाः याकनं हे नागिरि देशय् थ्यंकः वल । आः गथे याःसा थः देशया जुजु कामभोगय् तच्चंक हे भुलय् जुयाच्चंम्ह धकाः सीकाः नागिरि देशया छगू पीठया सिथय् वनाः अत्यन्त बांलाःम्ह स्वयेव हे सकल लोक मोह जुइगु मिसाया रूप कयाः अने अनेकथं धर्म कथाया म्ये हालाः म्येयागु खँ नं बांलाक सकल लोकपिंत थुइकाः कारण व्यूह सूत्रया खँ कनाच्चन । थथे मनोरञ्जन जुइकाः धर्म कथा कनाच्चंगुलिं नागिरि देशया जनता फुक्क हे अन वयाः धर्म कथा न्यनाच्चन । थथे थःगु धर्म कथास रस यानाः न्यनाच्चपिं सकल नागिरि देशया जनतातय् त्रिरत्नया नां कायेकाः अष्टमी ब्रतया महिमा कनाच्चन ।

थनलि नागिरि देशया जनतातसें थ्व खँ भी जुजुयात कवन धाःसाः भी जुजु मिसाम्हः जुयाच्चंगुलिं थ्वयात बाखं न्यनाः धर्मय् च्वनी, भीत नं छुं मान बी धकाः सकल लोकपिं लाय्कुली वनाः दीर्घरथ जुजुयात बाखं कंगु न्यं वने मत्यः जि वये मखु धकाः भन लाय्कूया दुने क्वथाय् थ्यंक सुलाच्चन । थ्व फुक्क खँ सुधर्म देवीं सियाः आः थ्व जुगु बाखं न्यं वइ मखुत गथे याःसा थ्व जुजुयात लाय्कुलिं पिकाये फइ विना लाय्कुलि पिकयाः धर्म उपदेशया खँ मककं थ्व जुजुं धर्म याइमखुत धकाः मनं विचाः याना उगु पीठ त्वःताः जंगलय् वनाः श्री करुणामय लुमंकाः आः थथे च्वने मजिल धकाः अत्यन्त बांलाःम्ह तुयूम्ह सलया रूप कयाः बांलाःगु काथि नापं थःगु म्हय् तयाः जंगलं पिहां वयाः नागिरि देशय् चाःचाः हिलाच्चन । थ्व खनाः देशवासी प्रजातसें नं आश्चर्य जुयाः सलया ल्यूल्यु लाय्कू वन । उबलय् दीर्घरथ जुजु भ्यालं क्वस्वयाः च्वंगु पाःलाना सलजक खनेवं सलयात गयाः देशय् चाःहचू वनेजगु मनय् तयाः लाय्कुलिं पिहां वयाः सलयागु लगाम ज्वंबलय् सल सुम्क च्वनाः बिसेलि दीर्घरथ जुजु सलया म्हय् च्वनाः लगाम ज्वनाः चाःहचू वन । सल नं खः थे च्वंक विस्तारं व जुजुयागु देश सकभनं बुलु बुलुहुं चाःहुइकाः भतिचा तापाक थ्यँसेलि आकाश मार्ग व्वयेका यंकाः तापालय् थ्यंक देवरथ धयागु तीर्थया लिक्कच्चंगु ख्यः छगुली त्वःताः सलया रुप नं त्वःताः थःगु हे स्वरूप जुयाः तुरुन्त सुखावती भुवनय् वनाः श्री करुणामययात थुगु खँ विस्तारं बिन्तियात । थ्व खँ न्यनाः श्री करुणामयं आज्ञा जुल- हे सुधर्म देवी आ छं पंचोपचार आदि अष्टमी ब्रतया ज्वलं माक्व ज्वनाः अप्सरापिं नं व्वना यंकाः छ हे गुरु जुयाः व दीर्घरथ जुजुयात अष्टमि ब्रत दनाः क्यनाः व जुजुयात नं धर्मय् तयाः वा धकाः श्री करुणामयया आज्ञा न्यनाः सुधर्म देवीं नाना प्रकारया पूजाज्वलं अष्टमी ब्रतया ज्वलं नं माक्व ज्वनाः भिनिंम्ह अप्सरापिं मुंकाः देवरथ तीर्थय् वयाः थःतुं गुरु जुयाः अप्सरापिन्त अष्टमी ब्रत याकाः श्री करुणामय माहात्म्य कनाच्चन । उगु बखतय् दीर्घरथ जुजु घोर जंगलय् दथुइच्चंगु ख्यलय् थः याकःचा जक जुयाः अन वने थन वने मसियाः लः त्वने धकाः लः माःवंबलय् व हे देवतीर्थय् थ्यन । तीर्थयागु लः इच्छापूर्ण जुइक त्वनाः छचाःखेरं मिखा व्वयाः स्वःबलय् अप्सरागणपिं छथ्वः मुनाः ब्रत दनाच्चंगु खनाः आश्चर्य जुयाच्चन । अप्सरागणपिसं व जुजुयात स्वयाः सःताः धाल- हे मानव, थुज्वःगु सुं मदुगु वनय् गन वनेत वयागु, छंगु नां छु ? गन देशयाम्ह धकाः फुक्क खँ न्यँसेलि दीर्घरथ जुजुं धाल- हे देवीगणपिं, जि नागिरि देशया जुजु खः, जितः सल छम्हसिनं चाः हुके हयाः थन थ्यंकाः त्वःता थकल, आः जि थःगु देशय् वनेगु दिशा हे मलुयाः, गन वने गन वने जुयाः लः त्वने प्याय्चायाः थन वयागु खः, जिगु भाग्य छपिं थेंज्याःपिं देवीया दर्शन दत । आम छपिसं सु ईश्वरयागु छु ब्रत दनागु आम ब्रतया महिमा छु धकाः जुजुं न्यसेलि अप्सरापिसं दीर्घरथ जुजुयात धाल - हे महाराज दीर्घरथ, जिपिं ला स्वर्गलोकया अप्सरापिं

खः, जिमिसं व्रत मध्ये तःधंगु अमोघपाशयागु व्रत यानाच्चनागु खः धकाः अप्सरातसें धासेलि हानं सुधर्मदेवीं आज्ञा जुल- हे राजन छलपोलया थ्व व्रत दनेगु इच्छा दत धाःसा थःगु हे नागिरी देयय् पुण्यमाता धयागु तीर्थ दु उगु तीर्थय् च्वनाः थगु व्रत या, जिं माःगु तक ज्वलं कनाः याका बिये धकाः देवीं धाःगु खँ न्यनाः दीर्घरथ जुजुं बिन्तियात- हे देवी आः जि थःगु देशय् वनेगु लँ हे मसिल, गथे वनेगु गनं वनेगु धकाः धासेलि सुधर्मदेवीं छपिसं छुं धन्दा कयाः बिज्याये म्वाः जिं छःपिनिगुदेशया राजकुलय् थ्यंक तयाबी, भतिचा तना बिज्याहुँ, थ्व अष्टमी व्रत सिध्येकाः जिपिं निम्ह छःपिनिगु देशय् वने धकाः अप्सरापिन्त व्रत सम्पूर्ण याकाः इमित स्वर्ग भुवनय् छवयाः सुधर्मदेवीया ऋद्विवलं जुजुयात आकाशमार्ग व्वयेका यकाः नागिरी देशया ध्वाकापिने थ्यंके हल । थ्व खनाः जुजु विस्मय जुयाः मन्त्रीपिन्त खबर बीके छ्वसेलि राजपरिवारपिं सकलें मुनाः सिंदूर जात्रा यानाः लाय्कुली दुत यंकाः कुशल वार्ता यानाच्चन । दर्घरथ जुजुं थःत सलं व्वयेका यंकूगु खँसेलि जंगलयागु खँ दक्कं कनाः आनन्दं च्वँचन ।

थनलि दीर्घरथ जुजुं अष्टमी व्रत दनेगु इच्छा यानाः सुधर्मदेवी गुरुमां नाप सल्लाह यानाः माःमाःगु ज्वलं फुक्कं ताःलाकाः नागिरी देशया प्रजापिं नं मुंकाः अष्टमी व्रतयागु ज्यायात । सुधर्मदेवीं जुजु प्रमुखं सकल प्रजापिन्त नं अष्टमी व्रत दने धकाः मुनाच्चंगु खनाः आः थुमित न्हापां व्रत यायेत नियम कने माल धकाः सकल जुजु रानी प्रजापिनिगु ख्वाः स्वयाः आज्ञा जुल- भो महाराज, प्रजागणपिं थुगु व्रत दनेत न्हापां दशाकुशल धयागु भिगू पाप त्वःताः अष्टशील धयागु च्यागू शीलय् च्वनाः आर्याष्टांग मार्गय् च्वनाः थ्व अष्टमी व्रत दनेमाः धकाः व्रतयागु नियम फुक्कं कनाः पुण्य मातातीर्थय् जुजु नापं सकलयात स्तुति स्नान याकाः त्रिरत्नया शरणय् तयाः श्री अमोघपाशया लोकेश्वरया अष्टमी व्रत भिनिन्हु यंकं सकसितं एकचित्त याकाः धर्म व्रत याकाच्चन । थथे धर्म याःगुलिं अमरावति स्वर्ग भुवनया इन्द्रयागु सिंहासन कम्प जुयावन । व खनाः इन्द्रं विचाः यानाः स्वःबलय् पुण्यमाता तीर्थय् जुजु नापं सकल प्रजापिसं एकचित्त यानाः व्रत यानाच्चंगुलिं जिगु सिंहासन हे कंप् जुयावल, आः थुमिगु व्रत भंग यानाः स्यंकः मवंसे मजिल धकाः देवराज इन्द्रं च्यापा ल्हाः जुयाः निजनिनया हथियार ज्वनाः देवलोक सकलें मुंकाः पुण्यमाता तीर्थय् वयाः रण संग्राम यायेथें भयंकर रुपं मार वयाः व्रत विघ्न यायेत तयार जूबलय् सुधर्मदेवीं श्री करुणामय लुमंकाः भिंच्याका ल्हाः दुम्ह साक्षात् भगवतीया रुप धारणा यानाः इन्द्रादि सकल देव लोकपिन्त ख्यानाः बिसिके छ्वत । सुधर्मदेवीया थुगु चमत्कार खनाः जुजु आदि सकल प्रजागणपिसं धन्य धन्य सुधर्मदेवी जि सकलयात रक्षा यायेगु कारणय् साक्षात् भगवतीया रूप कयाः बिज्यात धकाः बारंवार नमस्कार यानाः जुजुं हानं बिन्तियात- हे भगवती, छलपोल आः सदां थ्व हे नागिरि देशय् बिज्यानाः जिपिं सकस्यां भय मदयेकीम्ह जुयाः बिज्याहुँ, छलपोलयात माःगु विधिं छलपोलयात जिमिसं सदां पूजाभाव याये । थथे जुजुया बिन्ति भाव न्यनाः भगवतीया आज्ञा जुल- हे राजा ! जिगु भाव छिमिसं थन सदां यायेगु इच्छा दुसा जिगु तेज पिकयाः थन तग्वःगु ल्वहँ छगलय् त्वःता थके । थ्वयात जि हे धकाः भाव यानाः मन्दिर दयेकाः सेवा याना च्वँ धकाः धाःगु श्री भगवतीया आज्ञा न्यनाः दीर्घरथ जुजुं हानं बिन्तियात- हे देवी ! अथे जूसार आः छलपोल न्हापायागु हे मूर्ति जुयाः जिमित दर्शन बियाः बिज्याहुँ धकाः जुजुया बिन्ति न्यना भगवती आज्ञा जुल- हे राजन् दीर्घरथग ! आः जिगु न्हापाया मूर्ति दर्शन यायेत जि गुरु श्री आर्यावलोकितेश्वर सकल लोक व पापीपिन्त नं उद्धार

यायेत तुयूवर्ण निपा ल्हाः दुम्ह जुयाः थन बिज्याइ तिनि । आः थ्व छलपोलया जीवनया इलय् जुइ फइ मखुत । थन किराती जुजुयाः प्रजात जुयाः वसेलि बंगमती देशय् बिज्याना च्वंम्ह करुणामय खुया हयाः थुगु लँपुं उत्तरपाखे यंकीबलय् थन थ्यनेव थन यंके मफयाः थ्व हे पुण्यमाता तीर्थय् क्वफाना थकी । उगु बखतय् सकल लोकपिं जानाः थ्व पुण्यमाता तीर्थ श्री करुणामययात थकयाः मन्दिर दयेकाः थन स्थापना याइ । उबलय् सकल दुष्टजनपिन्त नाश यायेत जि थुगु थासय् ल्वहँतय् प्रवेश जुयाः भगवती धकाः प्रसिद्ध जुइ । अले थुगु मूर्ति थुगु देशय् मन्दिर दयेकाः स्थापना याइ । हे राजन् दीर्घरथ, छन्त रक्षा, यायेत जि सुखावती भुवनं वयाम्ह खः, छं धन्दा कायेमते, छ उद्धार जुइम्ह जुल । आः छं थुम्ह श्री आर्यावलोकितेश्वरया अष्टमी व्रत गबलें हे त्वःते दइमखु । छंगु देशय् सुभिक्ष जुयाः वइ धकाः आशिर्वाद बियाः भगवती रुपी सुधर्मदेवी सुखावती भुवनय् वनाः श्री करुणामययात फुक्क खँ बिन्ति यानाच्चन ।

थनलि दीर्घरथ जुजुं अष्टमी व्रत यानाच्चँच्चं काल वयेव श्री करुणामयं स्वाँयागु विमान क्वत छवया हयाः राजपरिवार सकलें विमानय् तयाः तुषिता भुवनय् थत यंकल ।

गुलिछिं काल वँसेलि कलियुगया इलय् किराती जुजुं थन राज्य यानाच्चंबलय् उम्ह जुजुं बंगद्यःयात साधन यानाः वासुकि नाग समेत साधन यानाः उत्तरपाखे यंके धकाः थुगु लँपुइ हयाः पुण्य तीर्थ थ्यंबलय् आकाशय् तसकं सुपाँय् वयाः, वा फय् वयाः तसकं खुसिबाः वसेलि श्री करुणामय बंगद्यः अनं यंके मफयाः खुशी वांञ्छयाः साधकत बिसिवन । थनलि बंगदेशय् बंगद्यः मदुसेलि पांजुपिन्त म्हगसय् खन- हे पांजुपिं जितः साधकपिसं यंकाः पुण्यमाता तीर्थय् वांञ्छया थकल, जि च्वनाथाय् लः कीत आपालं बुयांच्वंगु दु । जितः छिमिसं थकाः वा । थथे म्हगसय् खन । बन्दिपुरया जुजुयात नं नागिरी देशया चन्द्रपाल धयाम्ह द्यःलायात नं थथे म्हगसय् खन । थुकथं स्वखलःसित नं अथे हे म्हगसय् खंगुलिं स्वंगुलिं थर च्वनाः सल्लाह यानाः फुपिसं फुफुगु ग्वाहालि यत्नयात नं श्री करुणामय व खुसिं थत हये मफयाः आखिरय् चन्द्रपाल धयाम्ह द्यःलां पैथं वालाः जालं क्यंकाः पुण्यमाता तीर्थ थकयाः स्वःबलय् च्वापुथें तुयू वर्ण जुयाः जटा मुकुटं पुयाः देपा ल्हातिं पलेस्वां ज्वनाः जब ल्हातिं वरद मुद्रा क्यनाः बिज्यानाच्चंम्ह अत्यन्त बांलाःगुलिं स्वस्वं स्वये मगाःगु रूप जुयाच्चंम्ह श्री करुणामयया दर्शन सकसितं लात ।

थनलि स्वंगू देशया जुजु, प्रजापिं मुनाः थुगु थासय् अनेक विधि विधान यानाः शास्त्रोक्त बमोजिम देगः दयेकाः माक्व ज्वलं तयाः अनेक जात्रा उत्सव यानाः श्री करुणामय देगः स्थापना यानाः प्रतिष्ठा नापं यानाः सकल लोकपिसं नालागिरि करुणामय धकाः नां छुनाः सेवा यानाच्चन ।

द्वादश तीर्थ उपोषध ब्रत माहात्म्य सफू लागि आर्थिक ग्वाहालि याना बिज्यापि/दीपिनुगु नाँ धलः ।

क्र.सं.	चन्दा दाताया नाँ	थाय्	दाँ
१	स्व. तीर्थ रत्न वज्राचार्यया श्रुमितिसं श्रीमती दुर्गा लक्ष्मी वज्राचार्य व काय् भाजु मूलआचार्य सुजन रत्न वज्राचार्य	हेमवर्ण महाविहार(गम्वाह)	३०००/-
२	कजी सुकुकाजी महर्जन व दशमाया महर्जन परिवार	गोगवुँ	१५५५०/-
३	स्व तप माया श्रेष्ठ पाखे कृष्ण मान श्रेष्ठ	गल्कोपाखा	१११११/-
४	चन्द्र मान महर्जन	कमलाक्षी	५०६०/-
५	सानु छोरी महर्जन	गोगवुँ	४५५५/-
६	तीर्थ महर्जन व अष्ट माया महर्जन	खिचापोखरी (म्हय्पी)	३३३३/-
७	प्रतिभा डंगोल	गल्कोपाखा	२७००/-
८	सुमि महर्जन	गोगवुँ	२५५५/-
९	जगत माया महर्जन	गोगवुँ	२५५५/-
१०	महेश्वरी सिं	गोगवुँ	२५५५/-
११	तुल्सि महर्जन / नानी मयजु महर्जन	टेंगल	२५०५/-
१२	स्व पिता नारायण महर्जन/स्व माता कान्छी महर्जन या श्रुमितिसं का.ये शान्तराज महर्जन	लैनचोर	२२०२/-
१३	हिरा दवी तण्डुकार	पकनाजोल	२००५/-
१४	नाती काजी महर्जन	सामाखुशी	१५१५/-
१५	सानु महर्जन व मोति महर्जन	सुकुवाहा.	१५००/-
१६	नारा महर्जन	लाजिम्पाट	१५००/-
१७	सगिता वज्राचार्य	मखँवाहा.(स्वयम्भू)	११२२/-
१८	नानी मुनिकार	कालोपुल	११२०/-
१९	सरस्वती वज्राचार्य	म्हय्पी	११११/-
२०	नानी छोरी वज्राचार्य	म्हय्पी	११११/-
२१	मीना वज्राचार्य	म्हय्पी	११११/-
२२	कमल वज्राचार्य	म्हय्पी	११११/-
२३	जमुना मुनिकार	कालोपुल	११११/-
२४	छोरी महर्जन	गोगवुँ	११०५/-
२५	अष्टबुद्ध बुद्धाचार्य / श्रीमती उत्तर शोभा बुद्धाचार्य	कलंकी	११०२/-
२६	बाल कुमारी वज्राचार्य	स्वयम्भू	११०१/-
२७	लक्ष्मी कुमारी तुलाधर	स्वयम्भू	१०५०/-
२८	लक्ष्मी श्रेष्ठ	स्वयम्भू	१०५०/-
२९	श्रीमान / श्रीमती वेखा नारायण महर्जन	पाको	१०५०/-
३०	हेरा नारायण महर्जन व देव माया महर्जन	लैनचोर	१०२०/-
३१	जमुना वज्राचार्य	स्वयम्भू	१०२०/-
३२	सविना महर्जन	च.मति	१०११/-
३३	रत्न महर्जन	थँवही	१०१०/-
३४	सुरेन्द्र रत्न वज्राचार्य / सुमित्रा वज्राचार्य (मणिसिं माहाविहार)	लगन	१०१०/-
३५	मयजू महर्जन	सामाखुशी	१०१०/-
३६	पूर्ण देवी मानन्धर	स्वयम्भू	१००५/-
३७	शीलशोभा कंसाकार	स्वयम्भू	१००५/-
३८	नानी छोरी शाक्य	किमडोल	१००५/-

३९	स्व दिल वहादुर शाक्य या श्रुमितिसं श्रीमती नन्दा शाक्य	म्हयपी	१००१/-
४०	हेरा नारां महर्जन व देव माया महर्जन	सुकुवाहा	१०००/-
४१	रोहिणी रत्न वज्राचार्य व सरिता वज्राचार्य	भवावाहा	१०००/-
४२	हेरा देवी	गोंगवुं	६१०/-
४३	सन्तु माया महर्जन	पकनाजोल	६०५/-
४४	अष्ट माया प्रजापती	गोंगवुं	६००/-
४५	विष्णु ज्योती महर्जन व विनु देवी महर्जन	लैनचोर	६००/-
४६	प्रदीप डंगोल	गणवाहा	५५५/-
४७	कृष्ण माया महर्जन	बालाजु	५५०/-
४८	कान्छी महर्जन	गोंगवुं	५२५/-
४९	सानु काजी / लक्ष्मी प्रजापति	गोंगवुं	५२५/-
५०	शोभा महर्जन	गोंगवुं	५२५/-
५१	नारायण / लक्ष्मी	वसिको लाजिम्पाट	५२०/-
५२	प्रतिभा महर्जन	वनस्थली	५२०/-
५३	मेती महर्जन	न्हँखा	५११/-
५४	तुल्सी नारायण महर्जन	मैतिदेवी चोक	५१०/-
५५	हेरा काजी / नानु छोरी	वनस्थली	५१०/-
५६	बाबु राजा डंगोल व मैया डंगोल	लैनचोर	५१०/-
५७	लक्ष्मी महर्जन	यँटखा	५०६/-
५८	सरस्वती महर्जन	स्वयम्भू	५०६/-
५९	नाति महर्जन	बलाजु	५०५/-
६०	कान्छी महर्जन / नान छोरी महर्जन	टेगल	५०५/-
६१	शान्ता लक्ष्मी क्षेष्ठ	बल्खु	५०५/-
६२	प्रमिला शाक्य	म्हयपी	५०५/-
६३	नानी मैया महर्जन	सामाखुशी	५०५/-
६४	बाल कृष्ण महर्जन	सामाखुशी	५०५/-
६५	मचा नानी महर्जन	खुशिवुं	५०५/-
६६	रत्न देवी महर्जन	कालधारा	५०५/-
६७	मचाराम महर्जन / सुर्य माया महर्जन	मैतीदेवी	५०५/-
६८	मोति काजी महर्जन	मैतीदेवी	५०५/-
६९	शान्ता महर्जन	थँवहि	५०५/-
७०	पुर्ण काजी / कान्छी महर्जन	बालाजु	५०५/-
७१	हेरा देवी	खा.वाहा	५०५/-
७२	तेज माया महर्जन	सामाखुशी	५०५/-
७३	पूर्ण देवी महर्जन	थँवहि	५०५/-
७४	शभिना प्रजापति	ज्याठा	५०५/-
७५	नानशोभा प्रजापति	ज्याठा	५०५/-
७६	गंगा मुनिकार	वनस्थली	५०५/-
७७	लक्ष्मण महर्जन	वाफल	५०५/-
७८	सानु मैया महर्जन	थँवहि	५०५/-
७९	हेरा काजी	घटेकुल्लो	५०५/-
८०	पूर्ण महर्जन	भिमसेनस्थान	५०५/-
८१	पूर्ण देवी महर्जन	असन कमलाक्षी	५०५/-
८२	गोपी महर्जन	नयाँवजार	५०५/-
८३	धर्म नारायण महर्जन	मैतीदेवी चोक	५०५/-

८४	बुध लक्ष्मी तुलाधर	स्वयम्भू	५०५/-
८५	हेरा देवी महर्जन	ताम्सीपाखा	५०५/-
८६	लक्ष्मी महर्जन	इनबाहा	५०५/-
८७	लक्ष्मी महर्जन	इनबाहा	५०५/-
८८	नान छोरी महर्जन	लाजिम्पाट	५०५/-
८९	रामबाबु / तुल्सी माया	थँवहि	५०५/-
९०	विष्णु महर्जन	थँवहि	५०५/-
९१	वेखा लाल / माया देवी	ज्याठा	५०५/-
९२	पवित्र मानन्धर	सामाखुशी	५०५/-
९३	मचा काजी महर्जन	एराहिटी	५०५/-
९४	देव नाराण / सुभद्रा महर्जन	पुतलीसडक	५०५/-
९५	राधिका मुनिकार	कालोपुल	५०५/-
९६	नानी छोरी महर्जन	गोगबुँ	५०५/-
९७	सृजना महर्जन	गोगबुँ	५०५/-
९८	तुल्सि माया महर्जन	गल्कोपाखा	५०५/-
९९	चैते माया महर्जन	नयाँबजार	५०५/-
१००	रिता महर्जन	गोगबुँ (मित्रनगर)	५०९/-
१०१	छोरी महर्जन	भोटेबाहा	५०९/-
१०२	चन्ता महर्जन	सामाखुशी	५०९/-
१०३	हेरा काजी प्रजापति व जित माया प्रजापति	लैनचोर	५००/-
१०४	राज भाई महर्जन व दुर्गा महर्जन	ज्याठा	५००/-
१०५	सैचा महर्जन व आशा माया महर्जन	खुशिवुँ	५००/-
१०६	शरण डंगोल व विमला महर्जन	सामाखुशी	५००/-
१०७	बाबु राजा महर्जन व शान्ति महर्जन	किलाघ	५००/-
१०८	नानु महर्जन	असन	५००/-
१०९	हसिना महर्जन	चागल	५००/-
११०	सुर्ज महर्जन	मर्ख	५००/-
१११	नानु महर्जन	कमलाक्षी	५००/-
११२	राम रत्न वज्राचार्य	क्वा:बाहा	५००/-
११३	महेन्द्र व पदमा तारा महर्जन	नायपुचो	५००/-
११४	बाबु राजा व रेनु महर्जन	गोगबुँ	५००/-
११५	बिनिता प्रजापति	ढल्लको	५००/-
११६	राम नारायण महर्जन	चागल	५००/-
११७	लक्ष्मी महर्जन	सामाखुशी	५००/-
११८	शान्ता लक्ष्मी वज्राचार्य	वागवजार	५००/-
११९	नानु मुनिकार	भोटाहिटी	५००/-
१२०	चक्र हेरा	वनस्थली	५००/-
१२१	रत्न शोभा	खुशिवुँ	५००/-
१२२	मचा बाबु महर्जन	क्वा:बाहा	५००/-
१२३	मचा नानी महर्जन	भुरंग खेल	५००/-
१२४	कासी माया डंगोल	छाउनी	४२२/-
१२५	तुल्सि मुनिकार	मैतीदेवी	४२९/-
१२६	रमा देवी प्रजापति	वनस्थली	४९०/-
१२७	कविणा महर्जन	ओबाहा	३२०/-
१२८	कृष्ण देवी महर्जन	ओबाहा	३२०/-

१२९ छोरी महर्जन	थाय मरु	३१०/-
१३० मोहन कुमार रजक व कृष्ण रजक	लैनचोर	३१०/-
१३१ चक बहादुर शाही व मैया शाही	लैनचोर	३१०/-
१३२ रानी देवी महर्जन	ललितपुर	३०५/-
१३३ पूर्ण माया महर्जन	न.घल	३०५/-
१३४ लक्ष्मी महर्जन	सामाखुशी	३०५/-
१३५ रिना महर्जन	सामाखुशी	३०३/-
१३६ देव नारायण व मिश्री	च.मति	३००/-
१३७ राम देवी महर्जन	गोंगबुँ	३००/-
१३८ निर्मला श्रेष्ठ	बाफल	२६०/-
१३९ रोशनी डंगोल	दवाई टोल	२५५/-
१४० राकेश महर्जन	टेंग:	२५१/-
१४१ चन्ता महर्जन	टेंग:	२५१/-
१४२ मनिका महर्जन	नयाँबजार	२५०/-
१४३ विष्णु देवी महर्जन	नयाँबजार	२५०/-
१४४ निर्मला महर्जन	थँवहि	२५०/-
१४५ गंगा महर्जन	कुसुम वियालाछी	२५०/-
१४६ केशरी महर्जन	थँवहि	२५०/-
१४७ कमला देवी शाक्य	न.घ:	२५०/-
१४८ सारिका महर्जन	कुलेश्वर	२५०/-
१४९ रसु महर्जन	सामाखुशी	२५०/-
१५० पूर्ण देवी महर्जन	सामाखुशी	२५०/-
१५१ तारा महर्जन	गोंगबुँ	२५०/-
१५२ म गुरु	मैतिदेवी	२५०/-
१५३ चन्द्र माया	कलंकी	२५०/-
१५४ नेमका शाक्य	नयाँबजार	२५०/-
१५५ राम महर्जन व नानी छोरी महर्जन	ढल्को	२४०/-
१५६ ज्ञानी मुनिकार	मैतीदेवी	२२२/-
१५७ मंगल देवी महर्जन	टेवाहा:	२२२/-
१५८ हिरा कुमार महर्जन	गोंगबुँ	२१०/-
१५९ हेरा देवी महर्जन	स्वयम्भू	२१०/-
१६० सानु माया महर्जन	स्वयम्भू	२१०/-
१६१ ज्ञानी शोभा	जोडल	२१०/-
१६२ रमा महर्जन	यट्खा	२१०/-
१६३ राम माया महर्जन	स्वयम्भू	२१०/-
१६४ रविना महर्जन	चिकमुगा:	२१०/-
१६५ शोभा महर्जन	च.मती	२०५/-
१६६ पूर्ण देवी महर्जन	च.मती	२०५/-
१६७ रिता महर्जन	नरदेवी	२०५/-
१६८ गुणकेशरी प्रजापति	नरदेवी	२०५/-
१६९ शान्ति सिंह	नरदेवी	२०५/-
१७० विद्या लक्ष्मी महर्जन	नरदेवी	२०५/-
१७१ लक्ष्मी महर्जन	नरदेवी	२०५/-
१७२ राम देवी महर्जन	नरदेवी	२०५/-
१७३ आशा माया महर्जन	खिचापोखरी	२०५/-

१७४ सुमित्रा महर्जन	कोहिटी	२०५/-
१७५ दश माया महर्जन	टेंग	२०५/-५
१७६ देव माया महर्जन	मरुहिटी	२०५/-
१७७ रत्न माया महर्जन	धापासी	२०५/-
१७८ उर्मिला डंगोल	थँवहि	२०५/-
१७९ मचा बाबु	सामाखुशी	२०५/-
१८० लक्ष्मी मानन्धर	ताहाच	२०५/-
१८१ गंगा महर्जन	टेबाहा	२०५/-
१८२ सविना महर्जन	नरदेवी	२०३/-
१८३ तानु महर्जन	नरदेवी	२०२/-
१८४ मैया महर्जन	डल्लु	२०२/-
१८५ दया लक्ष्मी प्रजापति	नरदेवी	२०२/-
१८६ अविना मानन्धर	सामाखुशी	२०२/-
१८७ नाती महर्जन व मयजु महर्जन	वालाजु	२०१/-
१८८ निर्मला प्रजापति	ब्रम्ह मार्ग	२०१/-
१८९ लक्ष्मी महर्जन	नरदेवी	२०१/-
१९० नर बहादुर चित्रकार	नरदेवी (नेतपाँचो)	२०१/-
१९१ लक्ष्म शाक्य	ताहाचल	२०१/-
१९२ मन्दिरा वज्राचार्य	मैतीदेवी	२०१/-
१९३ छोरी महर्जन	थँवहि	२०१/-
१९४ लक्ष्मी महर्जन	थँवहि	२०१/-
१९५ नारायण देवी महर्जन	मैतीदेवी	२००/-
१९६ कृष्ण माया महर्जन	गोंगबुँ	२००/-
१९७ गुनकेशरी महर्जन	चावहिल	२००/-
१९८ सर्मिला महर्जन	क्वा:वाहा	२००/-
१९९ सान छोरी महर्जन	गोंगबुँ	२००/-
२०० भुवनेश्वरी महर्जन	क्वा:वाहा	२००/-
२०१ सरस्वती महर्जन	सामाखुशी	२००/-
२०२ गंगा महर्जन	सामाखुशी	२००/-
२०३ पूर्ण देवी डंगोल	कुसुम वियालाछी	२००/-
२०४ अनु प्रधान	प्यूखा	२००/-
२०५ करुणा महर्जन	सामाखुशी	२००/-
२०६ तीर्थ माया महर्जन	अन्नपूर्ण चोक	२००/-
२०७ सरिता महर्जन	वालाजु	२००/-
२०८ सानु माया महर्जन	वालाजु	२००/-
२०९ दश माया महर्जन	ताम्सीपाखा	२००/-
२१० कमला डंगोल	खुशिवुँ	२००/-
२११ मैया महर्जन	यल	२००/-
२१२ शिला देवी महर्जन	यँटखा	२००/-
२१३ छुनु मैया महर्जन	गोंगबुँ	२००/-
२१४ लक्ष्मी महर्जन	गोंगबुँ	२००/-
२१५ राम देवी महर्जन	गोंगबुँ	२००/-
२१६ माईला महर्जन व ज्ञानी महर्जन	नयाँ बसपार्क	२००/-
२१७ बद्री महर्जन व ज्ञान शोभा महर्जन	किलाघ	२००/-
२१८ मचाम महर्जन	गल्कोपाखा	२००/-

२१९ मनिना महर्जन	वानेश्वर	२००/-
२२० रिता डंगोल	भिमसेनस्थान	२००/-
२२१ रिता शाक्य	गल्कोपाखा	१६०/-
२२२ जानी प्रजापती	सामाखुशी	१५५/-
२२३ रमिला महर्जन	सुन्ता गल्ली	१५५/-
२२४ मुना महर्जन	नरः (टुडालदेवी)	१५५/-
२२५ विद्या स्थापित	टेवाहा	१५९/-
२२६ रुकमणि तण्डुकार	वनस्थली	१५९/-
२२७ नजर माया प्रजापति	विशालनगर	१५९/-
२२८ पन्ध माया डंगोल	चावही	१५९/-
२२९ केशरी तण्डुकार	ढल्को	१५९/-
२३० सानु मैया महर्जन	गल्कोपाखा	१५०/-
२३१ शैलेन्द्र महर्जन	डल्लु	१५०/-
२३२ मिना महर्जन	म्हयपी	१५०/-
२३३ पूर्ण माया महर्जन	खुशिवुं	१५०/-
२३४ मैया महर्जन	वलुवा पाती	१५०/-
२३५ नानी हेरा महर्जन	तःननी	१५०/-
२३६ सजना महर्जन	तःननी	१५०/-
२३७ तारा महर्जन	वाफल	१५०/-
२३८ सरस्वती महर्जन	खिचापोखरी	१५०/-
२३९ शान्ति महर्जन	खिचापोखरी	१५०/-
२४० सारदा महर्जन	खुशिवुं	१५०/-
२४१ निरु प्रजापति	लैनचौर	१५०/-
२४२ सुनिता प्रजापति	लैनचौर	१५०/-
२४३ मिना प्रजापति	लैनचौर	१५०/-
२४४ तीर्थ महर्जन	वसुन्धारा	१५०/-
२४५ मिश्री महर्जन	किलाघ	१५०/-
२४६ मचा नानी महर्जन	गोंगबुं वसपार्क	१५०/-
२४७ सीता महर्जन	स्वयम्भू	१५०/-
२४८ अनिता महर्जन	खिचापोखरी	१५०/-
२४९ सानु महर्जन	लैनचौर	१५०/-
२५० हेरा महर्जन	खुशिवुं	१५०/-
२५१ रोजी डंगोल	वागडोल	१५०/-
२५२ रोशनी डंगोल	किलाघ	१५०/-
२५३ रजनी नापित	चिकमुगल	१५०/-
२५४ पूर्ण माया महर्जन	सामाखुशी	१३०/-
२५५ विजुली माया श्रेष्ठ	लाजिम्पाट	१२५/-
२५६ नानी माया महर्जन	जोगिंपाकु	१२५/-
२५७ मचा नानी महर्जन	तुकंवाहा	१२५/-
२५८ हिरा देवी डंगोल	वघे	१२५/-
२५९ गंगा डंगोल	वघे	१२५/-
२६० नानी हेरा महर्जन	खुशिवुं	१२५/-
२६१ तुल्सी माया महर्जन	खुशिवुं	१२५/-
२६२ सविना महर्जन	तुकंवाहा	१२५/-
२६३ सानु माया	खुशिवुं	१२५/-

२६४ लजना	वनस्थली	१२५/-
२६५ तारा देवी डंगोल	सानेपा	१२९/-
२६६ कृष्ण देवी महर्जन	त्रिपुरेश्वर	१२९/-
२६७ सानु छोरी महर्जन	बैहटी	१२९/-
२६८ हिरा लक्ष्मी महर्जन	कोहिटी	१२०/-
२६९ सविना शाक्य	यट्खा	१२०/-
२७० पन्ना काजी महर्जन	डल्लु	१२०/-
२७१ विष्णु देवी महर्जन	नयाँबजार	१२०/-
२७२ कल्पना सिखाकार	चागल	१२०/-
२७३ संगीता महर्जन	यट्खा	१२०/-
२७४ राम देवी महर्जन	स्वयम्भू	१२०/-
२७५ विनिता महर्जन	स्वयम्भू	१२०/-
२७६ राम माया महर्जन	च.मति	१२०/-
२७७ लक्ष्मी महर्जन	बल्खु	१२०/-
२७८ चन देवी महर्जन	युतू ननि	१२०/-
२७९ रति डंगोल	चावहिल	१२०/-
२८० अमिता महर्जन	लगन	१२०/-
२८१ नानु छोरी महर्जन	अनामनगर	१२०/-
२८२ सुनिता महर्जन	यट्खा	१२०/-
२८३ हेरा माया महर्जन	म्हय्पी	१२०/-
२८४ सरस्वती महर्जन	म्हय्पी	१२०/-
२८५ निलु महर्जन	वनस्थली	११५/-
२८६ सवीना महर्जन	ताम्सीपाखा	११९/-
२८७ निरु महर्जन	ताम्सीपाखा	११९/-
२८८ कान्छी महर्जन	सामाखुशी	११९/-
२८९ लक्ष्मी मुनिकार	कालोपूल	११९/-
२९० मनका डंगोल	लैनचोर	११९/-
२९१ रमिना महर्जन	दलाछि	११९/-
२९२ जिता माया महर्जन	सामाखुशी	११०/-
२९३ सीता महर्जन	लाजिम्पाट	११०/-
२९४ विजुली माया श्रेष्ठ	लाजिम्पाट	११०/-
२९५ नानी महर्जन	ताहाचल	११०/-
२९६ सविता महर्जन	कालधारा	११०/-
२९७ रमिता महर्जन	म्हय्पी	११०/-
२९८ कृष्ण देवी महर्जन	नरदेवी	११०/-
२९९ सान छोरी महर्जन	नरदेवी	११०/-
३०० जमुना महर्जन	बल्खु	११०/-
३०१ लक्ष्मी डंगोल	बल्खु	११०/-
३०२ नानी महर्जन	वनस्थली	११०/-
३०३ न्हुछे नारायण महर्जन	सामाखुशी	११०/-
३०४ नानी छोरी महर्जन	सामाखुशी	११०/-
३०५ हेरा महर्जन	ताम्सीपाखा	११०/-
३०६ लक्ष्मी श्रेष्ठ	च.मति	११०/-
३०७ प्रमिला महर्जन	म्हय्पी	११०/-
३०८ नानी मयजु महर्जन	त्यौड	११०/-

३०९ तीर्थ माया महर्जन	सितापईला	११०/-
३१० निरा महर्जन	सामाखुशी	११०/-
३११ सुनिता महर्जन	सामाखुशी	११०/-
३१२ लक्ष्मी प्रजापति	मैतीदेवी	११०/-
३१३ कान्छी माया महर्जन	च.मती	११०/-
३१४ हिरा देवी प्रजापति	गोंगबुँ	१०७/-
३१५ घन लक्ष्मी महर्जन	न्यूरोड	१०६/-
३१६ पञ्च लक्ष्मी महर्जन	डल्लु	१०६/-
३१७ नानी मयजु महर्जन	वाफ.	१०६/-
३१८ समिला महर्जन	थँबहि	१०५/-
३१९ मैया महर्जन	वाफ.	१०५/-
३२० सुनिता डंगोल	सामाखुशी	१०५/-
३२१ मैया महर्जन	यल	१०५/-
३२२ न्हुछे माया महर्जन	सामाखुशी	१०५/-
३२३ नक्कली प्रजापति	सामाखुशी	१०५/-
३२४ लक्ष्मी	गल्कोपाखा	१०५/-
३२५ माया देवी	सामाखुशी	१०५/-
३२६ कृष्ण माया	सामाखुशी	१०५/-
३२७ जमुना	सामाखुशी	१०५/-
३२८ नाती काजी महर्जन	किलाघ	१०५/-
३२९ विष्णु देवी महर्जन	किलाघ	१०५/-
३३० नानी महर्जन	घुम्बाराही	१०५/-
३३१ रत्न देवी डंगोल	कलंकी	१०५/-
३३२ रिता महर्जन	कालिमाटी	१०५/-
३३३ नारायण देवी डंगोल	चागल	१०५/-
३३४ सुभद्रा महर्जन	लाजिम्पाट	१०५/-
३३५ नानी शोभा डंगोल	न.बाहा	१०५/-
३३६ रिना महर्जन	कीर्तिपुर	१०५/-
३३७ नानी छोरी महर्जन	सामाखुशी	१०५/-
३३८ तारा देवी महर्जन	सामाखुशी	१०५/-
३३९ ज्ञान देवी महर्जन	लैनचोर	१०५/-
३४० सानु माया प्रजापति	गोंगबुँ	१०५/-
३४१ राम देवी महर्जन	च.मती	१०५/-
३४२ हिरा माया महर्जन	चाग.	१०५/-
३४३ माया देवी श्रेष्ठ	थानकोट	१०५/-
३४४ सूर्य माया महर्जन	मर्ख	१०५/-
३४५ सुनिता महर्जन	गोंगबुँ	१०५/-
३४६ उषा महर्जन	गोंगबुँ	१०५/-
३४७ नीला महर्जन	गल्कोपाखा	१०५/-
३४८ सरिता महर्जन	लैनचोर	१०५/-
३४९ शर्मिला महर्जन	लैनचोर	१०५/-
३५० सीता महर्जन	यंगाल	१०५/-
३५१ शुभद्रा महर्जन	वाफ.	१०५/-
३५२ राम देवी महर्जन	स्वयम्भू	१०५/-
३५३ नानी हेरा प्रजापति	म्हयपी	१०५/-

३५४ मन्दिरा महर्जन	डल्लु	१०५/-
३५५ सानु माया श्रेष्ठ	च.मती	१०५/-
३५६ जन्म लक्ष्मी महर्जन	च.मती	१०५/-
३५७ शान्ति महर्जन	रविभवन	१०५/-
३५८ ब्रिजिता महर्जन	खिचापोखरी	१०५/-
३५९ जगत माया महर्जन	च.मती	१०५/-
३६० जमुना महर्जन	च.मती	१०५/-
३६१ सानु मैया महर्जन	असै	१०५/-
३६२ ज्ञानी शोभा महर्जन	ह्युमत	१०५/-
३६३ हिरा शोभा महर्जन	खिचापोखरी	१०५/-
३६४ मैया महर्जन	ब्रम्हटोल	१०५/-
३६५ पूर्ण माया महर्जन		१०५/-
३६६ ज्योति डंगोल	लैनचौर	१०५/-
३६७ नानी छोरी डंगोल	ज्याठा	१०५/-
३६८ सपना डंगोल	कालीमाटी	१०५/-
३६९ पूर्ण हेरा महर्जन	टेग	१०५/-
३७० बांला मयजु	सामाखुशी	१०५/-
३७१ सुनिता महर्जन	सामाखुशी	१०५/-
३७२ रामेश्वर श्रेष्ठ	त्यौड	१०५/-
३७३ अष्ट माया महर्जन	गल्कोपाखा	१०५/-
३७४ मोती महर्जन व तारा देवी महर्जन	न्होखा	१०५/-
३७५ भगवती अर्याल	ताहाचल	१०५/-
३७६ छोरी महर्जन	च.मती	१०५/-
३७७ सरिता नापित	वंध	१०२/-
३७८ सुवर्ण नापित	वंध	१०२/-
३७९ सानु मैया महर्जन	कालीमाटी	१०२/-
३८० उमा महर्जन	मैतीदेवी	१०२/-
३८१ नान छोरी महर्जन	वनस्थली	१०२/-
३८३ लक्ष्मी नकमी	थनकोट	१०१/-
३८३ विनु महर्जन	ताम्सीपाखा	१०१/-
३८४ सन्त माया महर्जन	कालोपुल	१०१/-
३८५ तारा महर्जन	दलाछि	१०१/-
३८६ दिव्येश्वरी महर्जन	ओन्दे	१०१/-
३८७ ज्ञान शोभा डंगोल	न.बाहा	१०१/-
३८८ नानी मैजु	सामाखुशी	१०१/-
३८९ लक्ष्मी महर्जन	बँहटि	१०१/-
३९० मन्दिरा बज्राचार्य	मैतीदेवी	१०१/-
३९१ सानु नानी महर्जन	थँबहि	१०१/-
३९२ ज्ञानी महर्जन	थँबहि	१०१/-
३९३ श्री कुमारी प्रजापति	रानीबारी	१००/-
३९४ सत्य लक्ष्मी महर्जन	नयाँबजार	१००/-
३९५ नानी मैया महर्जन	नयाँबजार	१००/-
३९६ वसु माया महर्जन	मैतीदेवी	१००/-
३९७ दश माया महर्जन	किलाघ	१००/-
३९८ कान्छा महर्जन व नानी छोरी महर्जन	टेग	१००/-

३९९ मन्धाराम महर्जन व सुर्ज माया महर्जन	मैतीदेवी	१००/-
४०० लक्ष्मी महर्जन	बटु	१००/-
४०१ मैया महर्जन	नयाँबजार	१००/-
४०२ लक्ष्मी महर्जन	जैशी देवल	१००/-
४०३ मैया महर्जन	ज्याठा	१००/-
४०४ परु महर्जन	न्हू घा	१००/-
४०५ नारायण देवी महर्जन	लगा	१००/-
४०६ रिबा महर्जन	टेकु	१००/-
४०७ कमला प्रजापति	गोगर्बु	१००/-
४०८ नानी शोभा प्रजापति	गोगर्बु	१००/-
४०९ सन्तु माया प्रजापति	गोगर्बु	१००/-
४१० सविना डंगोल	दमाई टोल	१००/-
४११ ज्ञानी लक्ष्मी महर्जन	स्वयम्भू	१००/-
४१२ गीता डंगोल	कालीमाटी	१००/-
४१३ विष्णु देवी महर्जन	म्हर्पी	१००/-
४१४ पञ्च कुमार महर्जन	चमती	१००/-
४१५ पञ्च माया महर्जन	नयाँबजार	१००/-
४१६ सोफिया महर्जन	सामाखुशी	१००/-
४१७ हेरा शोभा महर्जन	नयाँबजार	१००/-
४१८ यमुना महर्जन	नयाँबजार	१००/-
४१९ लक्ष्मी माया महर्जन	भिमसेनस्थान	१००/-
४२० निरा महर्जन	लाजिम्पात	१००/-
४२१ सानु मैया महर्जन	गोगर्बु	१००/-
४२२ मैया महर्जन	गोगर्बु	१००/-
४२३ प्रभा देवी सिं	गोगर्बु	१००/-
४२४ निर्वाचन वानिया	भोछे	१००/-
४२५ समिता बज्राचार्य	ओवाहा	१००/-
४२६ हेरा शोभा मानन्धर	न्यूरोड	१००/-
४२७ नुतु महर्जन	ओवाहा	१००/-
४२८ नाना छोरी महर्जन	अनाम नगर	१००/-
४२९ लक्ष्मी महर्जन	थँवहि	१००/-
४३० मैया महर्जन	थँवहि	१००/-
४३१ अनिता प्रजापति	भिमसेनस्थान	१००/-
४३२ मनहरा महर्जन	किलाघ	१००/-
४३३ निर्मला महर्जन	थँवहि	१००/-
४३४ अनिल महर्जन	थँवहि	१००/-
४३५ मैया महर्जन	टेगा	१००/-
४३६ छोरी महर्जन	थँहिटी	१००/-
४३७ आशा माया प्रजापति	टेगा	१००/-
४३८ धन मैजु	सामाखुशी	१००/-
४३९ विनिता महर्जन	खुशिवु	१००/-
४४० नानी शोभा	कुलेश्वर	१००/-
४४१ कमला प्रजापति	गोगर्बु	१००/-
४४२ नानी शोभा प्रजापति	गोगर्बु	१००/-
४४३ सन्तु माया प्रजापति	गोगर्बु	१००/-

४४४ विजय रत्न वज्राचार्य	भिमसेनस्थान	१००/-
४४५ लक्ष्मी डंगोल	खुशिवु	१००/-
४४६ पञ्च महर्जन	बलाजु	१००/-
४४७ कमला महर्जन	खुशिवु	१००/-
४४८ नानी हेरा महर्जन	खुशिवु	१००/-
४४९ नारायण देवी महर्जन	गोगवु	१००/-
४५० मिति शोभा वज्राचार्य	कुमाननी	१००/-
४५१ विन्दु महर्जन	कलंकी	१००/-
४५२ कृष्ण देवी महर्जन	लाजिम्पात	१००/-
४५३ सरस्वती महर्जन	चिकमुगल	६०/-
४५४ पार्वती महर्जन	बन्जा हित्ती	५५/-
४५५ नानी माया महर्जन	वाफल	५५/-
४५६ रीता महर्जन	भलननी	५५/-
४५७ लक्ष्मी महर्जन	ताम्सीपाखा	५९/-
४५८ नानी छोरी महर्जन	वालुवाटार	५९/-
४५९ शान्ति महर्जन	लैनचोर	५०/-
४६० लक्ष्मी महर्जन	लैनचोर	५०/-
४६१ शान्ति महर्जन	चिकमुगल	५०/-
४६२ लक्ष्मी महर्जन	वालुवाटार	५०/-
४६३ जमुना महर्जन	वालुवाटार	५०/-
४६४ माया देवी महर्जन	खुशिवु	५०/-
४६५ रविना महर्जन	लैनचोर	५०/-
४६६ सानु महर्जन	कलंकी	५०/-
४६७ कल्पना मानन्धर	कलंकी	५०/-
४६८ विछवी महर्जन	नरदेवी	५०/-
४६९ मैया महर्जन	बटु टोल	५०/-
४७० हेरा देवी महर्जन	पानीपोखरी	५०/-
४७१ सविना मुनिकार	नयाँवजार	५०/-
४७२ लक्ष्मी महर्जन	बालाजु	५०/-
४७३ सदिच्छा महर्जन	लैनचोर	५०/-
४७४ सविना नापित	चिकमुगल	५०/-
४७५ राधिका नापित	चिकमुगल	५०/-
४७६ करुणा महर्जन	भलननी	३०/-
४७७ मैया महर्जन	बटु	२५/-
४७८ प्रेम राज भण्डारी	मरु	२५/-
४७९ शान्ति लक्ष्मी श्रेष्ठ	सानेपा	२०/-
४८० सम्भना महर्जन	वनस्थली	१०/-
४८१ कल्पना महर्जन	वनस्थली	१०/-
४८२ बिना महर्जन	सामाखुशी	१०/-
४८३ रिभा महर्जन	सामाखुशी	१०/-

सूच: थुगु सफू छापेयाना ल्यवंगु दाँ ल्याचा: व्याकं लुमन्ति पौ प्रकाशनया निम्ति दोहल पागु जुल ।

धःमू खलःपिंसं दनेगु मन्दः



लक्ष्य चैत्य



मत




धर्म



बुद्ध



संघ



अमोघपास लोकेश्वर मण्डल



गुरु मण्डल

